

মুক্তাভাস্ম

প্রাণতোষ ঘটক

ল পাবলিশার্স প্রাইভেট লিমিটেড
কলিকাতা-৮৫

॥ প্রথম সংস্করণ, ১৩৬২ ॥

॥ দ্বিতীয় সংস্করণ, পৌষ ১৩৬৩ ॥

॥ প্রকাশক ॥

শ্রীশচীন্দ্রনাথ মুখোপাধ্যায় ।

বেঙ্গল পাবলিশার্স প্রাইভেট লিমিটেড

১৪, বঙ্কিম চাটুজ্জৈ স্ট্রীট,

কলিকাতা-১২ ।

॥ মুদ্রক ॥

শ্রীযোগেশচন্দ্র সরখেল ।

কলিকাতা ওরিয়েন্টাল প্রেস প্রাইভেট লিঃ ।

৯নং পঞ্চানন ঘোষ লেন,

কলিকাতা-৯ ।

॥ ব্লক ও প্রচ্ছদপট মুদ্রণ ॥

ভারত ফোটোটাইপ স্টুডিও ।

॥ বাঁধাই—বেঙ্গল বাইণ্ডার্স ॥

পাঁচ টাকা

উৎসর্গ

মুসাহিত্যিক সৈয়দ মুজতবা আলীর করকমলে

॥ এই লেখকের ॥

আকাশ পাতাল—দুই খণ্ডে (উপন্যাস)

বাসকসজ্জিকা (গল্প-সঙ্কলন)

রাজায় রাজায় (উপন্যাস)

রত্নমালা (সমার্থাভিধান)

কলকাতার পথঘাট (ইতিহাস)

খেলাঘর (উপন্যাস)

মনোহারী (রম্যরচনা)

আলো-আধারি (গল্প-সঙ্কলন)

মুক্তাভস্ম (উপন্যাস)

সাঁজার তীর পর্য্যন্ত চন্দনপুরের সীমানা ।

ওধারে কোম্পানীর সেই সেকেন্দ্রে রেল লাইন । শাড়ীর পাড়ের মত
তু'জোড়া লাইন এঁকে বেঁকে চলে গেছে যেদিকে কলকাতা সেদিকে ।
চন্দনপুরে শহরের গন্ধ পাওয়া যায়, চন্দনধামের বিশালাকৃতি ল্যাঙে যখন
পথের ধুলো উড়িয়ে যাওয়া আসা করে, বিজলী আলো যখন সন্ধ্যাশেষে
জ'লে ওঠে চন্দনধামের সদর-মহলের হলগুলোয় ; অল-ওয়েভ রেডিও
যখন বিদেশিনীদের গীতিমাল্য শোনাতে থাকে মধ্য-রাত্রে, তখন ।

একশো বিঘা জায়গা জুড়ে চন্দনধাম ।

জমিদারবাবুদের বাস্তুগৃহ । ত্রিশ বিঘা বাস্তু, সত্তর বিঘা জমি-
জায়গা । ফুল-বাগান, কুঞ্জবন, সায়র-দীঘি, ঝিল । চন্দনধামের শাখা
উপশাখা হালের, সাবেককালের নামটির কিন্তু অক্ষয়-প্রাপ্তি হয়েছে ।
চন্দনধামের ফটকের পাশে খেত-পাথরের 'পরে কৃষ্ণকায় অক্ষরগুলি কালের
গ্রাস চ'টে গেলেও, পুরাণো ক্ষত-চিহ্নের মত বেশ চোখে পড়ে । দূর
থেকে নয়, কাছাকাছি এগোলে বাঙলা অক্ষর নজরে পড়ে । দেখা যায়,
বোঝা যায়, পাঠোদ্ধার করা যায়—লেখা আছে 'চন্দনধাম' নাম ।

চন্দনধামের ছাদে উঠলে কাছে দূরে অস্ত্র কারও ইটের ইয়ারত দৃষ্টি-
গোচরই হয় না, সে-আনন্দে বাবুদের বুক সদাই যেন দশহাত হয়ে
আছে । বাবুদের গর্ব-ক্ষীত বক্ষ কে না দেখেছে ! আর দেখে কে না
ভয় পেয়েছে !

বিগত মহাযুদ্ধের মেশোপটামিয়া-ফেরৎ যোদ্ধা দিলবাহাদুর।

ফটকের সামনে বসে থাকে ছোট একটি তিনপায়া টুলের ওপর।

ফাঁকা দোনলটায় মরচে ধরেছে বটে, দিলবাহাদুর সেটাকে সগর্বে উচিয়ে ধরে, যখন বাবুদের কেউ যাওয়া আসা করেন। আসেন কিংবা যান। কাক তাড়িয়ে আনন্দ পায় দিলবাহাদুর, পল্লীর শিশুদের ভয় দেখায়। একটা কাঠ-বিড়ালীকে পর্যন্ত চন্দনধামের চতুঃসীমানার মধ্যে পা দিতে দেয় না।

ছাদে উঠলে আর কারও কোঠা বাড়ী চোখে পড়ে না, সেই আনন্দেই আত্মহারা বাবুরা। রাস্তায় পা দিলে চলন্ত পথিক পথ ছেড়ে স'রে দাঁড়ায়। প্রতিবেশী নত হয়ে সেলাম জানায়, দোকানী বিক্রী রেখে উঠে দাঁড়ায় সসঙ্কোচে—বুক ফুলে ওঠে জমিদারবাবুদের। পথে যেতে যেতে ফরাস-ডাক্তার নকল-পাড় কোঁচানো ধুতির কোঁচা ইচ্ছাকৃত লোটাতে থাকে মাটিতে, পথের ধুলোতে।

যদিও জমিদারবাবুদের মধ্যে আবার সিকি পয়সারও সন্নিক আছে। ভাগে পড়বে হয়তো ক'খানা ইট—তবুও প্রত্যেকের নামাস্তে 'জমিদার' লেখা চাই। বাবুদের একরক্মি ছেলেগুলো পর্যন্ত সেলাম চায় দিলবাহাদুরের কাছে।

সাতকাল গিয়ে এককালে ঠেকেছে, তবুও ষাট বছরের গৃহকর্তার স্নানের জলে চন্দনের তাল ঢালতে হয়। গামছায় আতর। পানীয় জলে কেওড়ার নির্যাস। কথায় কথায় মাথায় গোলাপ জল।

গৃহকর্তার রূপটি অপূর্ণ। কে বলবে কর্তা ষাটে পা দিয়েছেন।

সামেবদের মত রঙ। ঈষৎ কুঁজো হ'য়ে পড়েছেন। চুলে কলপ দিতে হয় এই যা দুঃখ। গৃহকর্তার রূপের মত নামটিও অপূর্ণ। কর্তার নাম কে না জানে জানতেন? ভারতবর্ষের গভর্নর জেনারেল পর্যন্ত।

সরকারী আমন্ত্রণের সম্মানী অতিথিদের লিষ্টিতে লেখা আছে চন্দনপুরের জমিদার-কর্ত্তা অনঙ্গমোহনেরও নাম।

মাননীয় অনঙ্গমোহন মুখার্জী।

বাবুদের সামাজিক স্থানও সর্বোচ্চে। জাতে যে তাঁরা জাতিশ্রেষ্ঠ, ব্রাহ্মণ। জাতের গুরু, কিন্তু পেটে বোমা মারলেও অনেকে নিজের নামোচ্চারণ পর্যন্ত করতে পারবেন না, তবুও বাবুরা ব্রাহ্মণ। শুদ্ধ উপবীতের খাতিরে সমাজ-শীর্ষে বাবুদের আসন। বিয়ের বাজারে বাবুদের ছেলেদের চড়া মূল্য।

অনঙ্গমোহনই শুধু লেখা-পড়া জানা, কেতাভূরন্ত।

সায়েব-সুবোর সঙ্গে এককালে মেলামেশা করেছেন খুব বেশী। বিদ্যালয়ে পাঠ নেননি কখনও, শুধু দেখে আর ঠেকে শিখেছেন। এককালে অনঙ্গমোহন ছিলেন সাতটা লজের সভ্য। বিলেতী ঠাট ও ঠমক আয়ত্ত করতে হয়েছিল। পাকেচক্রে প'ড়ে ধূতি ছেড়ে দিয়েছিলেন, স্মার্ট ধরেছিলেন। পাড়কার বদলে সূ-জুতো। একেক হুণ্ডায় ক'দিন ক'রাত্রি থাকতেন কলকাতায়। শহর কলকাতার চন্দনধামে। মাসের মধ্যে পনেরো দিন কলকাতায় যেতে হ'ত, তাই খুশীমত আর পছন্দ মারফিক বানিয়েছিলেন কলকাতার গৃহ—চৌরঙ্গীর এক অঞ্চলে। পার্ক স্ট্রিটের কবরখানার কাছাকাছি কোথায়।

সাতকালে গিয়ে এককালে ঠেকলে কি হবে এখনও অনঙ্গমোহনের জন্ত আছে ডিনার ও লঞ্চের ব্যবস্থা। চপ, কার্টলেট, ফ্রাই। পাউরুটি আর মাখন। ব্রেড এণ্ড বাটার। মনে-প্রাণে সায়েব হ'লে কি হবে, সময়ের কোন জ্ঞান নেই অনঙ্গমোহনের। মোটেই পাকচূয়াল নন। জমিদার, তাই ঘড়ির তোয়াক্কা করেন না। এখনও বেলা দশটায় ঘুম থেকে ওঠেন, বারোটায় ব্রেকফাস্ট বা প্রাতরাশ খান আর সূর্যাস্তের সময় লাঞ্চে বসেন। তারপর দিবানিদ্রা কিছুক্ষণ।

ওঠেন রাত্রি ঘন হয় যখন ।

ঘরে ঘরে যখন বিজলী আলো জলে । রঙীন বেলোয়ারী কাঁচের
লণ্ঠনের মধ্যে জলে বিজলী আলোর বালব্ !

দিবানিদ্ৰা শেষে অনঙ্গমোহন তাঁর ঘরের সমুখের দরদালানে গিয়ে
বসেন । আজকেও ঘুমন্ত ছুঁচোখে আঙুল চালাতে চালাতে
অভ্যাসানুযায়ী দরদালানটিতে বসতে যাবেন এমন সময় বার-বাড়ীর
হলঘরগুলো চোখে পড়লো তাঁর, যখন চোখ থেকে হাত নামালেন ।

দরদালানের উন্মুক্ত জানালা থেকে দেখলেন দৃষ্টি প্রসারিত ক'রে ।
ভুল দেখলেন না তো অনঙ্গমোহন ? বয়স যে ষাটের কোঠায় !

সদরের হলগুলোয় এত আলো কেন ?

অনঙ্গমোহনের মিহি ও কম্পিত কণ্ঠে কথা ফুটে উঠলো । বললেন,
—বাড়ীতে আজকে কি হচ্ছে শ্রামাপদ ? এত আলো কেন ?
মেইন্টো যদি ফেল্ করে ! কি মুশ্কিলেই না পড়তে হবে তখন !
শ্রামা কথা কও না কেন ?

—কি বলবো হজুর ? আমাদের মুখে ওসব কথা শোভা পায় না ।
আমরা হজুর চাকর, চাকরই থাকি ।

স্থির দৃষ্টিতে আরেকবার দেখলেন অনঙ্গমোহন সদর মহলের
আলোক-উজ্জ্বল বাতায়নসমূহ । লাল ভেলভেটের পর্দা ঝুলছে জানলা
দরজায় ।

অনঙ্গমোহন যেন অত্যন্ত বিরক্ত হয়ে উঠলেন । ভাঙ্গা গলায় বললেন,
—আমার কাছে কথা চাপছো শ্রামাপদ ? তোমার তো সাহস বড
কম নয় ! হল-ঘরের দরজার চাবি দিলে কে ? ঘর খোলার পারমিশনই
বা কে দিয়েছে !

শ্রামাপদ নিরুপায়! কি বলবে সে! বললে,—কথা কি আর আপনার কাছে চাপা থাকবে? আমাদের ছোটমুখে কি বড় কথা শোভা পায় হজুর?

—শ্রামাপদ! ধমকে উঠলেন অনঙ্গমোহন। সজোরে। বললেন,—
যা জানো তাই বল' না তুমি! কথার এত ঘোরপ্যাঁচ করছো কেন?

—কলকাতা থেকে হজুর বাইজী আসছে। নাচ-গান হবে।

অনিচ্ছাসত্ত্বেও কথাগুলি কোন রকমে বলে ফেললে শ্রামাপদ।
কথা শেষ করেই ত্যাগ করলো দরদালান।

অনঙ্গমোহনের কপালে রেখা ফুটলো।

নিমেষের মধ্যে যেন কত দুশ্চিন্তা অনঙ্গমোহনের মন আর মস্তিষ্কে উত্তেজিত করে তুললো। ঈষৎ কুঁজো হয়ে পড়লেন অনঙ্গমোহন। তার-পর ক্ষিপ্ত গতিতে দরদালান থেকে ঘরে চ'লে গেলেন। আলো ঝলমল ঐ সদর মহল যেন তার চোখের দৃষ্টিকে আরও ম্লান ক'রে দিয়েছে।

—বাইজী আসছে কলকাতা থেকে? মাইফেল চলবে বুঝি?

নিজের মনে নিজেকেই প্রশ্ন করলেন অনঙ্গমোহন। স্বগত করলেন,
—উলুনে হাঁড়ি চড়ছে না, ঘরের মেয়ে-বোয়ের অঙ্গে ছিন্নবাস, তবুও এখনও কলকাতা থেকে বাইজী আসবে? এই টুয়েন্টিথ্ সেঞ্চুরীতে!
শ্রামা! শ্রামা! শ্রামাপদ গেলে কোথায়?

আশেপাশের কোন্ ঘর থেকে সাড়া দেয় শ্রামাপদ। বলে,—
কোথাও যাইনি হজুর, আপনার চায়ে দুধ ঢালছি। পাউরুটিতে মাখন মাখাচ্ছি। টোষ্ট্ বানাচ্ছি।

আরাম-কেদারার ফর্সা গদীতে দেহ এলিয়ে দিলেন অনঙ্গমোহন।

নিজেকে যেন তাঁর এই প্রথম মনে হয়েছে যে তিনি কত দুর্বল হয়ে পড়েছেন। বংশের বয়োজ্যেষ্ঠ তিনি, সদরের হল-ঘরের দরজা খুললো,

অথচ তাঁর অহুমতি চাইল না কেউ? কাছারীর নায়েব ক'টারও মনে পড়লো না এই অসামান্য বিষয়টা! ক্ষীণ কণ্ঠ হ'লে কি হবে, আবার গর্জ্জে উঠলেন অনঙ্গমোহন। বললেন,—শ্রামা, শ্রামা!

ডাক কানে পৌছতে না পৌছতে সাক্ষ্য-ভোজনের ট্রে হাতে ঘরে ঢুকলো শ্রামাপদ। বললে,—অহেতুক চেষ্টাবেন না হজুর। শরীরটা আপনার আগের মত আছে কি যে এত চেষ্টামেচি সহ্য হবে!

সঙ্গে সঙ্গে অনঙ্গমোহনের কণ্ঠ ক্ষীণ থেকে ক্ষীণতর হয়ে গেল। বললেন,—শ্রামা, ফটকের পাহারাওলাটাকে একবার ডাকতে পারিস? তোদের ঐ বুড়ো দিল্বাহাহুরকে?

আরাম-কেদারার পাশেই অনঙ্গমোহনের টেবিল।

কি আছে আর কি ঘে নেই এই টেবিলে। বিগত কয়েক মাসের স্ট্রেটসম্যান পত্রিকা। চিঠি লেখার টেবিল-সরঞ্জাম। সোডার শূণ্য বোতল ক' গুণ্ডা। লজের মেনু। জামা-কাপড়ের ইস্ত্রি। হেজলিন স্নো, বেবী জনশন পাউডার, জবাকুসুম তেলের শিশি। লালেবাই সাবানের বাক্স। ছুরি, কাঁচি, আলপিন, ক্লিপ। আরও কত কি!

শ্রামাপদ বুঝেছিল তার প্রভুর মনের কথা। বললে,—দিল্বাহাহুরকে আর কেন হজুর?

অনঙ্গমোহন বললেন,—দিল্বাহাহুরকে বলতাম যে ঐ নায়েব ক'টাকে দূর ক'রে দেবে কাছারী থেকে। কি করতে আছে ওরা? নাচগানের টাকা জোগাচ্ছে কে?

নীরব শ্রামাপদ। সে কি বলবে। কি জানে সে!

প্রথম রাত্রির শিথিল-শীতল হাওয়ার বেগে ঘরের ঝুলন্ত আলোগুলি ছলছে। জানলার পর্দা ক'টাও ছলছে। চায়ের পেয়ালায় চামচ চালাতে লাগলেন অনঙ্গমোহন। এলানো দেহ তুলে সোজা হয়ে কখন বসেছেন

ইতিমধ্যে। উত্তেজনার ছায়া যেন তাঁর চোখে মুখে। দেহের গুহ্র
বর্ণ কিঞ্চিৎ লাল হয়ে উঠেছে।

চায়ের পেয়ালায় চামচ-চালনা হঠাৎ বন্ধ করলেন অনঙ্গমোহন।

কে কোথায় কঁাদে! কান্নার স্বর শুনলেন কি তিনি! কে কঁাদলো
কে! নারীকণ্ঠের ক্রন্দন না! অনঙ্গমোহন ভেবেছিলেন তার কর্ণেচ্ছিন্ন
হয়তো বিকল হয়ে গেছে। হয়তো ভুল শুনেছেন।

সেই কান্নার স্বর, ক্রমে স্পষ্ট থেকে স্পষ্টতর হয়।

কোন্ নারী-কণ্ঠের চাপা কান্নার স্বর অনঙ্গমোহনের দিকে যেন
এগিয়ে আসছে ধীরে ধীরে। অনেকক্ষণ চুপচাপ থেকে কথা বললেন।

—কে কঁাদছে শ্রামাপদ? কঁাদছে না কে?

—তাইতো শুনছি হজুর।

ভুল শুনেছেন কি অনঙ্গমোহন! চায়ের উষ্ণ পেয়ালায় প্রথম চুমুক
দিলেন। চা না খেয়ে আর বুঝি থাকতে পারছেন না। মন খিঁচড়ে
আছে। মাথা ব্যথা করছে।

এমন সময় রুম্মকেশ, স্থলিতবেশ কে এক নারী অশ্রুসজল চোখে
ঘরে ঢুকেই অনঙ্গমোহনের পায়ের কাছে আছড়ে পড়লো। দস্তুরমত
চমকে উঠেছিলেন অনঙ্গমোহন। হাতের কাচের পেয়ালাটা আরেকটুর
জন্তু বেঁচে গেছে, নয়তো হাত থেকে পড়ে ভেঙ্গে চুরমার হয়ে যেতো।

—কে?

—জ্যাঠামশাই, আপনি বেঁচে থাকতে আমার এমন হবে?

ক্রন্দনরতা নারী কথা বললে কান্নার স্বরেই।

অনঙ্গমোহন কাঁপতে কাঁপতে শ্রামাপদকে ইশারায় জিজ্ঞাসা করলেন,

—কে ?

—সেজবাবুর পুত্রবধূ । ছোট বৌমা । আপনাদের কল্যাণী ।

—কল্যাণী ? ছোট বৌমা ?

চায়ের পেয়ালা টেবিলে রেখে কেদারা থেকে উঠে 'পড়লেন অনঙ্গমোহন । একেই তাঁর শরীর হুজ্জ-কুজ্জ, মেঝেয় লুটিয়ে-পড়া বধূটিকে আরও আনত হয়ে দেখলেন খুঁটিয়ে খুঁটিয়ে । কল্যাণীর মুখ দেখা যায় না । পৃষ্ঠদেশ দেখা যায় । রুম্ব এলো চুলের বোঝা তার পিঠে । ফুঁপিয়ে ফুঁপিয়ে কাঁদছে কল্যাণী ।

—কি হয়েছে কি ? প্রশ্ন করলেন অনঙ্গমোহন ।

শ্রামাপদ ঘরের বাইরে ছিল । বললে,—নাচুগানের টাকা জোগাচ্ছে কে জানতে চাইলেন না হুজুর ? বোধহয় সেই সকল ঘটনারই কিছু একটা ঘটেছে ।

অনঙ্গমোহন ধমকে উঠলেন,—দাঁড়িয়ে দাঁড়িয়ে কি দেখছিস শ্রামাপদ ? ছোট বৌমাকে ওঠা, উঠিয়ে বসা । আমার কি আর সে সাধ্য আছে যে—

—ছোটবৌমা, কেঁদে কি হবে ? উঠে ব'স তুমি । কি হয়েছে খুলে বল হুজুরকে ।

শ্রামাপদ ভৃত্য ! সে কি ধ'রে তুলতে পারে কোন' গৃহবধূকে !

কল্যাণী ধীরে ধীরে উঠে বসলো । মুখের 'পরে নেমে-আসা এলো চুলের রাশি সরিয়ে ফেললো । শাড়ীর আঁচলে মুখ মুছতে মুছতে বললে,—জ্যাঠামশাই, উনি আমার গা থেকে গয়না চেয়েছিলেন । আমি দিতে চাইনি তাই চাবুক দিয়ে মেরেছেন আমাকে । এই দেখুন —আমার সর্বাঙ্গে তার চিহ্ন । গলা থেকে হার ছিঁড়ে নিয়ে গেছেন । টানাটানিতে কতখানি কেটেছে দেখুন !

কথা বলতে বলতে চিবুক তুললো কল্যাণী ।

‘রক্তের রাঙা চিহ্ন দেখলেন অনঙ্গমোহন । কল্যাণীর বাহুতে চাবুকের আঁকাবাঁকা ক্ষতচিহ্ন । শিউরে উঠলেন অনঙ্গমোহন । বললেন,—ইস, মৈরে ফেলেছে বোঁটাকে ! ওঠ মা, ওঠ তুমি । আমার তো কিছু করবার নেই । শরিক কখনও শরিককে শাসন করতে পারে !

—আমরা কাকে বলবো জ্যাঠামশাই ?

কাতরকণ্ঠে কথা বললে কল্যাণী । মাথায় ঘোমটা তুলতে তুলতে । অনঙ্গমোহনের শরীর রোমাঞ্চিত হয়ে ওঠে তাজা রক্ত দেখে । যেন আলতা মেখেছে বোঁটা !

পরণের কাপড়খানার বহু জায়গায় শোণিতরেখা । কল্যাণীর চোখে নিরাশ দৃষ্টি, মুখাকৃতিতে হতাশা । কান্নার আবেগে লাজলজ্জার বালাই যুচে গেছে । সেমিজের বোতামগুলো খোলা—জামাটিকে কে যেন টেনে হিঁচড়ে ছেঁড়াছেড়ি করেছে । বাধা দিয়েছিল কল্যাণী । প্রবল আপত্তি জানিয়েছিল । দেহে প্রাণ থাকতে কিছুতেই নিতে দেবে না আর একটি গহনাও । অনেক দিয়েছে সে এতদিনে । প্রায় সর্বস্ব দিয়েছে । মুখের কথায় কোন কাজ হয়নি । কাকূতি মিনতি করেছিল প্রথমে । শেষ পর্য্যন্ত থাকতে পারেনি, মুখ ছুটিয়েছিল । স্বামীর মুখের ওপর কথা বলেছিল । তখন অদম্য অপমানে স্বামী তার গায়ে হাত তুলেছেন । শক্তি প্রয়োগ করেছিল । গায়ে যত জোর আছে । স্বামীর জুলুমই শেষে জয়ী হয়েছিল । হাতের ক’গাছি চুড়ি খুলে নিয়েছেন স্বামী । গলার হার ছিনিয়ে নিয়েছেন এক টানে ।

ভয়ার্ত-চোখ অনঙ্গমোহনের ।

গৃহের এক বংশধরের কুকীৰ্ত্তি দেখতে দেখতে চক্ষু মুদিত ক’রে ফেললেন,—উঠে পড় বোমা । কাদতে নেই, ছিঃ ! স্বামীর দুর্নাম

ছড়িয়ে পড়বে তুমি যদি ভেঙ্গে পড় এমন! লোকে যে গারে থুথু দেবে!
আমি যে মা আজ হাত-পা বাঁধা!

—জানতে কি কারও বাকী আছে জ্যাঠামশাই? এ বাড়ীর
ছেলেদের কে না চেনে! রুদ্ধকণ্ঠে জবাব দেয় কল্যাণী। পরণের
শাড়ী ঠিকঠাক করতে করতে উঠে পড়ে।

অনঙ্গমোহন কম্পিতকণ্ঠে ডাকেন,—শ্রাম, শ্রাম, শ্রামা! শ্রামাপদ!
কোথায় চলে গেছে শ্রামাপদ। হয়তো চোখে দেখতে পারেনি এই
কুকীৰ্ত্তি। এই মারাধরা। এই রক্তপাত।

নিষ্ফল আক্রোশে ঘর থেকে বেরিয়ে যায় কল্যাণী।
গলার ক্ষতে আঁচল চেপে ধ'রে কি সব বকতে বকতে বেরিয়ে যায়।
অনঙ্গমোহন বললেন,—বৌমা, শুনে যাও।

ফিরে দাঁড়ালো কল্যাণী।

ক্রোধ আর বিষেষের আধিক্যে ওষ্ঠাধর তার থরথরিয়ে কাঁপছে।
রাঙা ঠোঁট কেমন যেন বিবর্ণ হয়ে গেছে। ঘন ঘন শ্বাস ফেলছে।

অনঙ্গমোহন বললেন,—বৌমা শ্রামাপদকে বল এই মুহূর্ত্তে যেন
টিনচার আইডিন বুলিয়ে দেয়। নয়তো যদি বিষিয়ে যায়!

—যাক্ বিষিয়ে! বললো কল্যাণী। যে পথে এগিয়েছিল পুনরায়
চললো সেদিকে। বললে,—আর আইডিন দিয়ে কাজ নেই! বিষিয়ে
যেতে বাকী আছে কিছু?

কল্যাণীর সব ক'টি কথাই কানে পৌঁছেছিল অনঙ্গমোহনের। তিনি শুধু
বিরক্তিপূর্ণ কণ্ঠে বললেন,—শ্রামাটা যখন তখন কোথায় যে পালিয়ে যায়!

অনঙ্গমোহনের অঙ্গকারে বিলীয়মান কল্যাণী।

ভয় পেয়েছে সে। কিসের যেন ভয়ে উর্দ্ধ্বাসে ছুটতে শুরু করেছে।
এত ঘন অঙ্গকার, তবুও যেন দৃকপাত নেই। হঠাৎ কি একটা ভয়ের

কথা মনে জেগেছে কল্যাণীর। ভয় আর ভাবনার বেন অস্থির হয়ে উঠেছে কণিকের মধ্যে।

নিজের ঘর উন্মুক্ত রেখে নালিশ জানাতে এসেছিল বোঁ।

আবার যদি তিনি আসেন! এসে ঘর খোলা পেয়ে স্বামী যদি তার আলমারীটাই ভেঙ্গে খুলে ফেলেন! সর্বস্বান্ত হয়ে যাবে তা হ'লে কল্যাণী। সব ঘুচে যাবে। যা আছে তাও যাবে। আর কিই-বা আছে! মাত্র ক'খানা গয়না। তাও যদি যায়?

গয়না না নিয়ে যদি খানকতক বেনারসী শাড়ীই টেনে নিয়ে যান তিনি! যত ভাবে তত ভয় পায় কল্যাণী। যত ভয় পায় তত দ্রুত ছুটতে থাকে। ঘর যে খুলে হাট ক'রে রেখে এসেছে সে। ঘরে ছেলেটা আছে, কিন্তু সেও নেহাতই শিশু। তার মুখে কথা ফোটেনি এখনও। ব্যাপার দেখে সেই শিশুও ককিয়ে কেঁদে উঠেছিল।

কতক্ষণ ধ'রে নিজেকে সামলেছেন অনঙ্গমোহন।

দেখে শুনে শরীরটা তাঁর ঠকঠকিয়ে কাঁপছে এখনও। আরাম-কেন্দারায় এলিয়ে পড়েছেন ফের। কাপের চা ওদিকে ঠাণ্ডা হয়ে গেল। গৃহের একটি বধূ এসে তাঁকে নালিশ জানিয়ে গেল, দেখিয়ে গেল দেহে তাজা রক্তের ধারা বইছে—তবুও তিনি কিছু করতে পারলেন না। নির্বাক দর্শক হয়েই রইলেন?

অপমানের লজ্জায় সঙ্কুচিত হয়ে আছেন অনঙ্গমোহন! কি করতে পারেন তিনি! কল্যাণীর স্বামী রাসমোহন যদি তাঁকে অপমান করে একবাড়ী লোকের সম্মুখে, তখন? কোন্ অধিকারে প্রতিকার করতে যাবেন? অনধিকার-চর্চা করতে গিয়ে এই বৃদ্ধবয়সে কি তিনিও মার

ধাবেন! তার ওপর কল্যাণীর স্বামী রাসমোহনটা এমনিতেই মারমুখে
হয়েই আছে। রুদ্র মেজাজ তার। পান থেকে চুণ খসতে দেয় না!

—দাছ, চকোলেত খাবো।

মুদিতচক্রে কেদারায় দেহ এলিয়ে দিয়েছিলেন অনঙ্গমোহন। হঠাৎ
শিশুকণ্ঠ শুনে চমকে উঠলেন। চোখ খুললেন।

—কে দাছ? এসো, ভাই এসো।

—চকোলেত খাবো। চকোলেত দাও।

একটি শিশুর আধো আধো বুলি। অনঙ্গমোহন শিশুটির হাত
ধরে কাছে টেনে নিলেন। কেমন লজ্জা পেয়ে বললেন,—চকোলেট
তো নেই ভাই। তুমি বরং মিছরী খাও এক টুকরো। কেমন?

শিশু রাজী হ'ল না। মুখে বিকার ফুটলো তার। বললে,—না।
চকোলেত দাও।

—ছিঃ থোকা! দাছকে বিরক্ত করো না। দাছ যা বলছেন তাই
খাও। মিছরী খাও।

শিশুর পিছু পিছু হয়তো এসেছিল শিশুর জননী। কাছাকাছি ছিল
কোথায়। ছেলের বায়না দেখে যেন কথা বললে। কথার শেষে
ঘরের দরজায় দেখা দিলো।

অনঙ্গমোহন দৃষ্টি ফিরিয়ে একবার দেখে বললেন—কে? মালতী বোমা?

—হ্যাঁ। আপনি চা খেলেন না? মাথার গুঠন ঈষৎ টেনে দিয়ে
বললে মালতী।

এতক্ষণে যেন মনে পড়লো যে যেমনকার চা এখনও তেমনিই পড়ে
আছে। ঠাণ্ডা হয়ে গেছে হয়তো। মাখন-মাখানো পাউরুটির টোষ্ট
কখন কুঁকিয়ে খটখটে হয়ে গেছে।

গৃহের অন্ত এক বধু মালতী ।

নামটি তার আকারে ছোট করে নিয়েছেন খণ্ডরকুল, নয়তো নামটি আরও দীর্ঘ । শুধু মালতী নয়, মধুমালতী । সাক্ষা-বাতাসে মধুমালতীর নীলাশ্রয়ী শাড়ীর প্রান্তভাগ উড়তে থাকে । গুঠন থাকে না মাথায় ।

—ঐ শিশিটা থেকে এক টুকরো মিছরী ওকে দাও মালতী-মা ।

টেবিলের ওপরে অঙ্গুলি-নির্দেশ করলেন অনঙ্গমোহন । সঠিক দেখিয়ে দিলেন কোন্ শিশিটা । আরও অনেক শিশি আছে যে । মিছরী না দিয়ে ভুল ক’রে যদি ফটকিরিই এক টুকরো দিয়ে দেয় !

কথার শেষে চায়ের পেয়ালা মুখে তুললেন অনঙ্গমোহন ।

এক চুমুকে শেষ করে ফেললেন কাপটা ! মিছরীর শিশির ঢাকা খুলতে খুলতে মধুমালতী বললেন,—টোষ্ট মুখে তুললেন না জ্যাঠামণি ?

—না মা । মুখে উঠলো না । রুচলো না । ও টোষ্ট তুমিই খেয়ে নাও আজ । কথায় মিনতি মাখিয়ে বললেন অনঙ্গমোহন ।

অপ্রস্তুত হয় মধুমালতী । লজ্জার ক্ষীণ রেখা দেখা দেয় মধুমালতীর পান-খাওয়া লাল ঠোঁটের ফাঁকে । বলে,—নাঃ । আপনি খেলেন না, আমি ওগুলো খাবো !

—তাতে দোষ নেই । বললেন অনঙ্গমোহন ।

ঈষৎ লজ্জানত হয়ে রেকাবী থেকে মাখন-মাখানো পাউরুটির ফালি দুটো তুলে নেয় মধুমালতী । সেই কখন বেলা একটায় ভাত খেয়েছিল, তারপর এখনও পর্য্যন্ত এক কাপ চা পর্য্যন্ত খেতে পায়নি ।

ঘরে চা আছে । দুধও আছে । চিনি নেই ।

মধুমালতীর দেরাজের হাত-বাক্সে যে ক’টা পয়সা আছে সে ক’টা তার শিশুপুত্রের মাথায় ছোঁয়ানো । মানতের পয়সা । খোকার জর-জ্বালায় কবে মেনেছিল মধুমালতী ।

থাবেন! তার ওপর কল্যাণীর স্বামী রাসমোহনটা এমনিতেই মারমুখো হয়েই আছে। রুদ্র মেজাজ তার। পান থেকে চুণ খসতে দেয় না!

—দাছ, চকোলেত খাবো।

মুদিতচক্রে কেরারায় দেহ এলিয়ে দিয়েছিলেন অনঙ্গমোহন। হঠাৎ শিশুকণ্ঠ শুনে চমকে উঠলেন। চোখ খুললেন।

—কে দাছ? এসো, ভাই এসো।

—চকোলেত খাবো। চকোলেত দাও।

একটি শিশুর আধো আধো বুলি। অনঙ্গমোহন শিশুটির হাত ধরে কাছে টেনে নিলেন। কেমন লজ্জা পেয়ে বললেন,—চকোলেট তো নেই ভাই। তুমি বরং মিছরী খাও এক টুকরো। কেমন?

শিশু রাজী হ'ল না। মুখে বিকার ফুটলো তার। বললে,—না। চকোলেত দাও।

—ছিঃ খোকা! দাছকে বিরক্ত করো না। দাছ যা বলছেন তাই খাও। মিছরী খাও।

শিশুর পিছু পিছু হয়তো এসেছিল শিশুর জননী। কাছাকাছি ছিল কোথায়। ছেলের বায়না দেখে যেন কথা বললে। কথার শেষে ঘরের দরজায় দেখা দিলো।

অনঙ্গমোহন দৃষ্টি ফিরিয়ে একবার দেখে বললেন--কে? মালতী বোমা?

—হ্যাঁ। আপনি চা খেলেন না? মাথার গুঠন ঈষৎ টেনে দিয়ে বললে মালতী।

এতক্ষণে যেন মনে পড়লো যে যেমনকার চা এখনও তেমনিই পড়ে আছে। ঠাণ্ডা হয়ে গেছে হয়তো। মাখন-মাখানো পাউরুটির টোষ্ট কখন শুকিয়ে খটখটে হয়ে গেছে।

গৃহের অন্ত এক বধু মালতী ।

নামটি তার আকারে ছোট করে নিয়েছেন স্বশুরকুল, নয়তো নামটি আরও দীর্ঘ । শুধু মালতী নয়, মধুমালতী । সাক্ষ্য-বাতাসে মধুমালতীর নীলাম্বরী শাড়ীর প্রান্তভাগ উড়তে থাকে । গুণ্ঠন থাকে না মাথায় ।

—ঐ শিশিটা থেকে এক টুকরো মিছরী ওকে দাও মালতী-মা ।

টেবিলের ওপরে অঙ্গুলি-নির্দেশ করলেন অনঙ্গমোহন । সঠিক দেখিয়ে দিলেন কোন্ শিশিটা । আরও অনেক শিশি আছে যে । মিছরী না দিয়ে তুল ক'রে যদি ফটকিরিই এক টুকরো দিয়ে দেয় !

কথার শেষে চায়ের পেয়ালা মুখে তুললেন অনঙ্গমোহন ।

এক চুমুকে শেষ করে ফেললেন কাপটা ! মিছরীর শিশির ঢাকা খুলতে খুলতে মধুমালতী বললেন,—টোষ্ট মুখে তুললেন না জ্যাঠামণি ?

—না মা । মুখে উঠলো না । রুচলো না । ও টোষ্ট তুমিই খেয়ে নাও আজ । কথায় মিনতি মাখিয়ে বললেন অনঙ্গমোহন ।

অপ্রস্তুত হয় মধুমালতী । লজ্জার ক্ষীণ রেখা দেখা দেয় মধুমালতীর পান-খাওয়া লাল ঠোঁটের ফাঁকে । বলে,—নাঃ । আপনি খেলেন না, আমি ওগুলো খাবো !

—তাতে দোষ নেই । বললেন অনঙ্গমোহন ।

ঈষৎ লজ্জানত হয়ে রেকাবী থেকে মাখন-মাখানো পাউরুটির ফালি ছুটো তুলে নেয় মধুমালতী । সেই কখন বেলা একটায় ভাত খেয়েছিল, তারপর এখনও পর্যন্ত এক কাপ চা পর্যন্ত খেতে পায়নি ।

ঘরে চা আছে । দুধও আছে । চিনি নেই ।

মধুমালতীর দেরাজের হাত-বাক্সে যে ক'টা পয়সা আছে সে ক'টা তার শিশুপুত্রের মাথায় হোঁয়ানো । মানতের পয়সা । ধোকার জ্বর-জ্বালায় কবে মেনেছিল মধুমালতী ।

কত লোক বর্ষা চুরুট খায়, কিন্তু সত্যিকার বর্ষার চুরুট কজন আর খায় ? অনঙ্গমোহন দাঁতের-কাঁকে-ধরা চুরুটে দেশলাইয়ের কাঠি ধরিয়ে বললেন,—রাসমোহনের কাণ্ডটা দেখলে মালতী-মা ? রক্তারক্তি করলে এতগুলো চোখের সামনে ?

পাউরুটির টোষ্ট চিবোতে চিবোতেই কথা বলে মধুমালতী । প্রায় রুদ্ধ কণ্ঠের কথা । বলে,—আপনি যেন জ্যাঠামণি ওপর-পড়া হয়ে কিছু বলতে যাবেন না ! মান-সম্মান থাকবে না, তা বলে রাখছি ।

অনঙ্গমোহন এখনও সত্যিকার বর্ষা চুরুট ছাড়া মুখে তোলেন না । কলকাতায় রাধাবাজারের কাছাকাছি কোন্ দোকান থেকে প্রতি মাসে আনিয়ে নেন । আজ্ঞে বাজ্ঞে নয়, একেবারে খাঁটি জিনিষ ।

কি অপূর্ণ এক গন্ধ ছড়ালো ঘরময় ।

চুরুটে ঘন ঘন কয়েকটা টান দেওয়ার পর অনঙ্গল ধূম উদগীরণ করতে করতে বললেন,—সে কথা তুমি আমাকে বলে দেবে বোমা ? আমি এ বাড়ীর ব্যোজ্যোষ্ঠ হ'লে কি হবে, মুখে কুলুপ এঁটে বসে-ছিলাম, যখন রাসমোহনের স্ত্রী এসে এই তুমি যেখানে দাঁড়িয়ে আছে সেখানে আছড়ে পড়লো ! রাসমোহনের কাণ্ডজ্ঞান হ'ল না এখনও ?

মধুমালতীর ক্ষুধায় কাতর শুককণ্ঠ কথা বলে,—হোক, না হোক, আপনি কোন কথা বলবেন না । শুধু দেখে যাওয়া ছাড়া উপায় কি ?

অনঙ্গমোহন শুধোলেন,—তোমার পতি দেবতাটি কোথায় ? সদরের জলসায় নাকি ? মাইফেলের আড্ডায় ?

লজ্জা না ঘৃণা, শঙ্কা না সঙ্কোচে নিশ্চুপ হয়ে গেল মধুমালতী । টেবিলের ওপর থেকে জলের গেলাস তুলে নিলো মুখে । পাউরুটি গলা দিয়ে নামছে না যে । ক্ষুধায় কাতর শুককণ্ঠ মধুমালতীর । জলের

পাত্রটি শূণ্য হয়ে যায় কয়েক মুহূর্তে। ক্ষুধার্ত হয়েছিল বোঁ। মুখ ফুটে কিছু বলে না, নয়তো ক্ষুধায় সত্যিই জলছিল জঠর।

সেই কখন বেলা একটায় দু'মুঠো ভাত খেয়েছে, তবুও দেখলে কে বলবে যে মধুমালতীর বুকে ক্ষুধার জ্বালা! মুখ দেখলে কে বলবে যে হাতও তার শূণ্য। তবুও এখনও কথায় কথায় হাসির ঝিলিক ছোট্টে মধুমালতীর পানরাঙা মুখে।

সিঁথিতে টাটকা সিঁদুর রেখা।

কপালে গুঁড়ো সিঁদুরের টিপ। তাঘুলরাগরক্ত অধর। নীলাশ্বরী, তাঁতের পাংলা নীল শাড়ী। লাল শালুর ব্লাউজ। পায়ে আলতা।

সোনার মত রঙ মধুমালতীর, এতই উজ্জল।

টানা টানা ঘন কালো চোখ। উন্নত নাসা।

ঘরের বিজলী আলোয় মধুমালতীর নোজ-জুয়েলটাও ঝিলিক তুলছে যখন তখন। ছোট্ট একটি হীরে। তবুও ব্যবহারশ্রান।

—কথা কইলে না মালতীমা? চুকটের ঘোঁয়া ছাড়তে ছাড়তে কথা বললেন অনঙ্গমোহন।

অনেক দুঃখে কথা বললে মধুমালতী। বললে,—আজকাল হপ্তায় কদিনই বা তিনি বাড়ীতে থাকেন!

—কেন? বিস্মিত কণ্ঠ অনঙ্গমোহনের!—তাই না কি?

—হ্যাঁ। বললে মধুমালতী। বেশ দীপ্তকণ্ঠেই বললে। কোন কিছু গোপন না করেই বললে।

—একেবারেই জাহান্নামে গেলো? আটকাতে পারলে না মা? অনঙ্গমোহন স্বর নত ক'রে বললেন কথাগুলি। সর্বদা জলে উঠলো যেন মধুমালতীর। চোখের দৃষ্টি বদলে গেল। মুখাকৃতির এ কি পরিবর্তন! কেমন যেন উগ্রতা মধুমালতীর মুখে। প্রায়কর্তার প্রতি স্থির নিবদ্ধ দৃষ্টি।

মধুমালতী বললে,—কলকাতার যাত্রার দলে রাজা সাজবার অন্তে যে দিবারাত্রি স্বপ্ন দেখছে আর পাড়ায় পাড়ায় যাত্রা করে বেড়াচ্ছে, তাকে কখনও ফেরানো যায় জ্যাঠামণি ?

—যাত্রা করছে না কি হরিমোহন ?

—হ্যাঁ। দীপ্তকণ্ঠে জবাব দিলে মধুমালতী। বললে,—আর কিছু তো জানে না। তাই দেখছে যদি জমিদারী চেহারটা দেখিয়ে যাত্রায় নেমে কিছু উপার্জন করতে পারে !

—সে কি কথা বোমা ? আমাদের বাড়ীর ছেলে যাত্রা করবে কি ? তুমি প্রশ্ন দাও না কি ? অনঙ্গমোহনের কণ্ঠস্বর কত নত। শোনা যায় কি না যায়।

—জানিনা জ্যাঠামণি। আপনাদের বাড়ীর ছেলেদের তো শুধু জমিদারী করবার কথা। তবে ইদানীং জমিদারীর টাকায় জমিদারীই যে চলছে না, তাতো আপনিও দেখছেন।

কথা বলতে বলতে ছেলের হাত ধরে টেনে নেয় মধুমালতী। কেমন যেন ক্ষুব্ধ হয়ে বেরিয়ে যায় ঘর থেকে। ছেলের হাত ধ'রে।

—তাই বলে যাত্রা করবে আমাদের বাড়ীর বংশধর ? বললেন অনঙ্গমোহন, সবিস্ময়ে।

মধুমালতী ঘরে থাকলে এ কথার জবাব দিতে পারতো। কিন্তু সে তখন ঘর থেকে দালানে গিয়ে পৌঁছেছে। অনঙ্গমোহন কথা শেষ ক'রে দেখলেন কথা শোনার লোক আর নেই সেখানে। জানলার বাইরে অন্ধকার আকাশে উদাসদৃষ্টিতে তাকিয়ে রইলেন। চুরুটের ধোঁয়া ছাড়তে থাকলেন ঘন ঘন। মনটা ঘেন তার ভেঙ্গে পড়েছে। সেই সঙ্গে কি শরীরটাও !

—শ্রামা ! শ্রামা ! শ্রামাপদ !

ভাঙা-মনে ডাকলেন অনঙ্গমোহন। ঘরে এখন তিনি শুধু একা। আর কেউ নেই। শিশুর মতই থেকে থেকে কেমন যেন ভীত হয়ে ওঠেন তিনি। একা থাকতে পারেন না। কোন্ এক অশরীরী আত্মা যেন তাঁর আশেপাশে বিচরণ করছে। অনঙ্গমোহন স্তন্যে পান বুঝি তার চলাফেরার পদধ্বনি। কার শ্বাসপ্রশ্বাসের শব্দ! কার চুড়ির রিনিঝিনি আওয়াজ!

সে কি এসেছে! অনঙ্গমোহনের চতুর্দিকে ঘোরাফেরা করছে কি!

অনঙ্গমোহন দেওয়ালে টাঙানো একটি ছবির প্রতি দৃষ্টি নিবদ্ধ করলেন। ঐ তো তার আলেখ্য। আবক্ষ ছবি। আলোকচিত্র। চৌরঙ্গীর বোন এণ্ড সেফার্সের তৈরী রঙীন আলোকচিত্র! যেন ঠিক জীবন্ত। শুধু যা মুখে কথা নেই।

এলোমেলো সাক্ষ্য-বাতাস ঘরে যেন সহসা দাপাদাপি করতে থাকে।

টেবিলের কাগজ-পত্র, জানলার পর্দা, আনলায় বুলানো পোষাক—এরা যেন সব সজীব হয়ে উঠলো মুহূর্তের মধ্যে। বাতাসে কি স্মিটগন্ধ! কনকটাপার গন্ধ। কাছাকাছি গৃহপ্রাঙ্গণের কোথায় আছে কয়েকটা আকাশস্পর্শী টাপাগাছ। ফুল ধরেছে সেই গাছে। গন্ধ ছড়াচ্ছে বাতাসে।

—ডাকছিলেন হজুর?

ঘরের বাইরে থেকে কথা বললে শ্রামাপদ! ভয়ে ভয়ে বললে।

ইদিক সিদিক দেখলেন অনঙ্গমোহন। বললেন,—আচ্ছা শ্রামা, তোর মাঠাকরুণ কি এসেছেন? ছাথ দেখি, খুঁজে ছাথ দেখি!

একটা দীর্ঘ দীর্ঘশ্বাস ফেললে শ্রামাপদ।

একটু মান হাসলো। হুঃখের হাসি। বললে,—আপনি কি ক্ষেপে গেলেন হজুর? মাঠাকরুণ আসতে যাবে কোন্ হুঃখে! তিনি স্বর্গে গেছেন, স্বর্গেই থাকবেন।

—স্বর্গে কি সে গেছে? যেতে পেরেছে? তার কি স্বর্গবাস হবে?
হুঃখমিশ্রিত কথার ধ্বনি অনঙ্গমোহনের। চোখে জিজ্ঞাসু দৃষ্টি।
কুঞ্চিত ক্রয়ুগল।

—নিশ্চয়ই গেছেন হজুর। বললে শ্রামাপদ। সজোরে বললে।—
তার মত সতী লক্ষীর স্বর্গ ছাড়া আর কোথাও স্থান নেই।

কার কথা বলতে চান অনঙ্গমোহন।

কোন স্বর্গতার কথা! কে তিনি!

ঐতো দেওয়ালে ঝুলছে সেই পতিব্রতার ছবি। আলোকচিত্র।
আহা, যেন জীবন্ত! মুখেই শুধু যা কথা নেই। তাকিয়ে আছেন
অপলক দৃষ্টিতে, অনঙ্গমোহনের প্রতি। কি অপরূপ রূপের অধিকারিণী
ছিলেন তিনি! এ বাড়ীর বড় বোঁ অল্পপমা। অনঙ্গমোহনের অর্দ্ধাঙ্গিণী।

কবে চলে গেছেন মরজগত থেকে, এখনও ভুলতে পারলেন না
অনঙ্গমোহন। দেওয়াল-গাত্রে ঝুলন্ত আলোকচিত্রটি বহু পরস। খরচায়
করিয়েছিলেন অনঙ্গমোহন। অল্পপমার মৃত্যুর অব্যবহিত পরেই।
অল্পপমার জীবদ্দশায় ততটা আদর-যত্ন করতে পারেননি অনঙ্গমোহন—
সেই আকশোস এখনও বুকে বাজে সময়ে অসময়ে।

—ও সব কথা নাই বা চিন্তা করলেন হজুর!

শ্রামাপদ তার মনিবের মন ফেরাতে চায়।

হতাশ হেসে বললেন অনঙ্গমোহন,—আমি কি আর চাই, কেবলই
যে দেখতে পাই তাকে চোখের সামনে। যেমনটি চূপচাপ দাঁড়িয়ে
থাকতো আমার পাশটিতে, ঠিক তেমনি যেন দাঁড়িয়ে আছে। আমি
যে তার স্বাসের শব্দ পর্য্যন্ত কানে শুনতে পাই। বড্ড হুঃখকষ্টে
আছি শ্রামাপদ। অল্পর জন্তে কেন কে জানে সদাই অস্থির হয়ে
থাকি! কবে যে আবার আমরা দু'জনে এক হব কে জানে!

এক নিখাসে এতগুলি কথা বলতে বলতে হাঁকিয়ে ওঠেন বক্তা।

শ্রামাপদ বললে,—আ ঠাকরণ ঠিক আপনার জন্ত অপেক্ষা করবে।

আমার কথা কখনও মিথ্যা হয় না ছজুর। দেখে নেবেন।

হতাশ হাসি হাসলেন অনঙ্গমোহন। দস্তহীন মাড়ি বের করে হাসলেন। বললেন,—সে গেছে স্বর্গে, সেখানে কি আমার মত এই পাপিষ্ঠের ঠাই আছে?

কি এমন পাপ করেছেন অনঙ্গমোহন, যেজন্ত এই ধরণের উক্তি করলেন! কি দোষ করলেন! কি অজ্ঞায়?

ছবির অল্পমার কিন্তু কোন বিকারই নেই।

চিরকাল ঐ একই দৃষ্টিতে তাকিয়ে আছেন। অনঙ্গমোহন ঘরের মধ্যে যেখানেই থাকুন, অহোরাত্রি স্বামীর প্রতি চেয়ে আছেন অল্পমা। পলকহীন চোখে।

অনঙ্গমোহন নতকণ্ঠে বললেন,—জানিস শ্রাম, আমারও যখন তখন মনে হয় আমিও ঐ অল্পর মত আত্মহত্যা করি। সকল জালা জুড়োই। কিন্তু, কিন্তু আত্মহত্যার চেয়ে বড় পাপ আর কি কিছু আছে। নরকেও যে ঠাই হবে না।

আত্মহত্যা করেছিলেন অল্পমা! কোন্‌ দুঃখে!

অনঙ্গমোহন যখন লজ্জা আর ক্লাব আর পাটি নিয়েই ব্যস্ত থাকতেন, তখন।

চন্দনধামের কলকাতার শাখায় থাকতেন। সপ্তাহান্তে একদিন ফিরতেন কি ফিরতেন না, তার কোন ঠিক ছিল না। একসঙ্গে কতগুলো লজের মেথার, কতগুলো ক্লাবের। প্রায় প্রত্যহ দিনে রাত্রে দু'দুটো পাটি! তাতেও কোন' দুঃখ ছিল না অল্পমার, কোন ক্ষোভই ছিল না। কিন্তু অল্পমা যেদিন মিস্‌ মার্গারেটের নাম শুনলেন,

সেদিন আর স্থির থাকতে পারলেন না। অপমান, অবহেলা আর অনাদরের লজ্জায় একটা কাণ্ড বাধিয়ে বসলেন। রুদ্ধহারকণ্ঠে গায়ে কেরোসিন ঢেলে তিলে তিলে দগ্ধ করলেন নিজেকে। জীবনভোর দুঃখ-ভোগের কাছে সেই অগ্নিদাহনের কষ্ট নাকি অতি সামান্যই !

সে যুগে স্বামীর মৃত্যুর সঙ্গে সঙ্গে আগুনে নাকি ঝাঁপ দিতো নারী-জাতি। অল্পপমা স্বামীর অপকীর্তির দুঃখে স্বামী থাকতে থাকতেই মৃত্যু বরণ করলেন কেরোসিনের আগুনে। তাই মনে হয়, কে ব'লেছে সতীদাহ উঠে গেছে দেশ থেকে? সতীদাহপ্রথা?

—আত্মহত্যার তুল্য পাপ আর নেই ছজুর। এমন কাজটি করবেন না। শ্রামাপদ কথা বললে বিস্ফারিত চোখে। চোখ বড় ক'রে। অনাগত ভয়ের আশঙ্কা ফুটলো তার চোখেমুখে।

শ্রামাপদ যে স্বচক্ষে দেখেছে একটা আত্মহত্যা।

অল্পপমা ঘরের মধ্যে ছটফট করতে করতে পুড়ছেন। ঘরের বাইরে জানালা থেকে সকল ঘটনাই দেখেছে শ্রামাপদ। কত চেষ্টাতেও বাধা দিতে পারেনি। কত অনুরোধ জানিয়েছিল শ্রামাপদ। নিষেধ ক'রেছিল কত। কত কাকুতি মিনতি ক'রেছিল। ঘরের একটা জানালা সজোর ধাক্কায় কোন রকমে খুললেও ঘরের বন্ধ-দরজা সে কোনমতেই খুলতে পারেনি। অবশেষে অনেক পরে যখন খুলেছিল তখন অল্পপমার দগ্ধ দেহে কোন' সাড়াই ছিল না। দেহটা সম্পূর্ণ ভস্মীভূত হ'তে পায়নি।

তবুও অপরূপ রূপের অধিকারিণী অল্পপমাকে দেখে কেউ আর চিনতে পারলো না। কেমন যেন বিকলাঙ্গ হয়ে গিয়েছিলেন অল্পপমা। কি বিপ্রী সেই অগ্নিদগ্ধ রূপ !

অনন্মোহন তখন নাকি আদপেই ছিলেন না। চন্দনপুরেই ছিলেন না।

ছিলেন কলকাতায়, পার্ক স্ট্রিটের মিস্ মার্গারেটের বাসায়। মার্গারেটের নির্জন গৃহকোণে। মার্গারেটের প্রেমচ্ছায়ায়। জী অল্পমার মৃত্যু-সংবাদটি শুনে তিনি প্রথমে বিশ্বাস করতে পারলেন না। আত্মহত্যার অবিশ্বাস্য সংবাদ শুনে হইকির প্রবল নেশায় হেসেছিলেন প্রচুর। তারপর কলকাতা থেকে মোটরযোগে দ্রুত চন্দনপুরে পৌঁছে যখন স্বচক্ষে দেখলেন তখন বহু বিলম্ব হয়ে গেছে।

চোখে দেখেও বুঝি বিশ্বাস হয় না অনঙ্গমোহনের।

সে কি রূপ অল্পমার! কি বীভৎস রূপ! দেখলে আঁতকে উঠতে হয়।

সোনার মত গায়ের রঙ ছিল অল্পমার। সেই সৌন্দর্য্য জলে পুড়ে কালো হয়ে গিয়েছিল। অল্পমার রাশি রাশি কৌকড়া চুলের বোঝা, দাউ দাউ জ্বলে ছাই হয়ে যায়। মাথায় কেরোসিন তেলেছিলেন অল্পমা।

এখনও, এতকাল বাদেও, সেই দৃশ্য চোখে কিংবা মনে ভেসে উঠলে দস্তুরমত শিউরে ওঠেন অনঙ্গমোহন। মাঝে মাঝে রাতে স্বপ্নের মধ্যে দেখেন এই স্মৃতির চলচ্চিত্র।

আহা মার্গারেট যদি অনঙ্গমোহনের জীবনে না আসতো!

মিস্ মার্গারেটকে যদি চোখে না দেখতেন অনঙ্গমোহন! যেদিন সর্বপ্রথম দেখলেন মার্গারেটকে, সেদিন তখন আকাশে কনে-দেখা-আলো ফুটেছিল। আউটরাম ঘাটের ধারে কেল্লার সমুখের প্রলম্বিত পথ ধরে মন্থরগতিতে চলেছিল মিস্। হাতে ছিল এক গুচ্ছ গোলাপ ফুল। গোলাপী রঙের গোলাপ ফুল। ফুল, কুঁড়ি, কচি গোলাপ পাতা।

অনঙ্গমোহন ছিলেন অশ্বপৃষ্ঠে।

রাইডিং-শেষে ক্লান্ত হয়ে ফিরছিলেন, এমন সময় প্রথম দেখলেন মার্গারেটকে, পিক্ রঙের সিক্কের গাউনে। অনঙ্গমোহন তার সোনালী

চুল দেখে মুগ্ধ হয়ে গিয়েছিলেন সেই বৈকালিক কনে-দেখা আলোয়।
সেই প্রথম দৃষ্টিতেই।

পরে মিস্ মার্গারেটকে হাতের নাগালে পেয়ে ক্রমে এমনই বিভ্রান্ত
হয়ে গেলেন যে চন্দনপুরকেই এক রকম ভুলতে বসেছিলেন।
কলকাতা থেকে ফিরতে চাইতেন না। গৃহে মন বসতো না বতকণ
না মার্গারেটকে দেখতে পেতেন, চাকল্যে অস্থির হয়ে থাকতেন।

অল্পপমার মত জ্বীকেও মন থেকে দূরে সরিয়ে দিয়েছিলেন
অনঙ্গমোহন? যৌবনের জোয়ারে তখন তিনি ভাসিয়ে দিয়েছিলেন
নিজেকে; সপ্তসমুদ্রপারের সাসেক্স-নগরীর এক পলাতকার সঙ্গে ঘনিষ্ঠতম
কি একটি সম্বন্ধ বাধিয়েছিলেন বন্ধু ও আত্মজনের চক্র অস্তরালে
থেকে। এক কথায় ঐ নীল-চোখ, সোনালী-চুল সাসেক্স-কন্টার প্রেমে
পড়েছিলেন অনঙ্গমোহন। যাকে বলে, ইন ডীপ্ লভ্।

—হজুর! ঘরে প্রবেশের অল্পমতি দিন।

ঘরের বাইরে থেকে এক পুরুষ-কণ্ঠের আবেদন। স্রেফ স্বপ্ন
দেখতে মশগুল ছিলেন অনঙ্গমোহন।

অল্পপমা আর মার্গারেটের কথা ভাবতে ভাবতে কোন্ সে দুনিয়ায়
চলে গিয়েছেন, হৃৎক আঁখির কত কথাই মনে পড়েছে। কেন কে
জানে অনঙ্গমোহন এত কাল বাদে ঐ দু'জনার মধ্যে যেন জীবন-মৃত্যুর
ছায়া দেখলেন। একজন পরিপূর্ণ জীবন, অগ্নাজন মৃত্যুর হিমশীতল
প্রতিমূর্তি। মার্গারেট জীবন আর অল্পপমা মৃত্যু!

কার কথায় ভাবনার জাল ছিন্নভিন্ন হয়ে গেল মুহূর্তমধ্যে। অনঙ্গ-
মোহন জিজ্ঞাস্য দৃষ্টিতে তাকিয়ে অস্পষ্ট কথা কইলেন। শুককণ্ঠে
বললেন,—শ্রাম, কে কথা বলছে?

* —পুরোহিতমশাই এসেছেন হুজুর ।

—সে কিরে ? আমার ঘরে পুরোহিত আসবে কেন ? ভাখ্ ভাখ্, শোন গিয়ে, কি বলতে চান । ঘরে যেন এসে না পড়েন ।

কথায় কথায় ব্যস্ত হয়ে উঠলেন গৃহকর্তা ।

পুরোহিতই বললেন, সরবে,—আমি এখান থেকেই বলছি, ঘরে যেতে চান আর না চান । একটি অভিযোগ ছিল । একটা নালিশ ছিল ।

—অভিযোগ ! নালিশ !

অনঙ্গমোহনের কপালে বলিরেখা স্পষ্টতর হয় । চোখের তন্ত্রিয়া মুছে যায় যেন । বললেন,—আমি একটা স্লেচ্ছ মানুষ, আমার কাছে আবার কিসের অভিযোগ ! আমিতো জাত কুল খুঁয়েছি কবে কোন্‌কালে ! লড়্, লড়্ এগো !

—আপনাদের মন্দিরের মূর্তির চোখের রত্ন উপড়ে নেওয়া হয়েছে । পুরোহিতের কণ্ঠ ভীষণ ক্রোধ-পঙ্কীয় । বললেন,—কথাটি আগে ভাগে জানিয়ে রাখতে এসেছি । ভবিষ্যতে আমাকে যেন না চুরির দায়ে ধরা পড়তে হয় !

কি শুনছেন অনঙ্গমোহন !

নিজের কানকে যেন তাঁর বিশ্বাস হচ্ছে না । কে এই ছুকার্য্য করলো ? এই পাপকার্য্য ! এই মহাপাপ !

গৃহদেবতা আছেন গৃহে । মুরলীধর আছেন ।

চন্দনখামের পেছনে চন্দনঝিলের তীরে গৃহদেবতার মন্দির আছে । দেবভোগ্য সম্পত্তি । ভিন্ন ভিন্ন শরিক, দেবতার পূজা শরিকদেরই হাতে । যখন যে শরিকের পালা পড়ে তখন তাকে পূজার ভার নিতে হয় । নিজে খেতে পাও আর না পাও, দেবতাকে অভুক্ত রাখলে চলবে না । যেখান থেকে হোক পূজার উপচার জোগাড় করতে হবে ।

তাই পালার ভয়ে একেই অতিষ্ঠ হয়ে থাকে শরিকের দল । কখন কারি
পালা পড়ে কে জানে !

চন্দনধামের পেছনে গৃহ-দেবতা মুরলীধরের মন্দির ।

কত গভীর রাত্রি পর্যন্ত প্রদীপ জালিয়ে রাখতে হয় মন্দিরের ।
পুরোহিতের চোখে ঘুম আসে না । ভয়ে ভয়ে জেগে থাকতে হয় ।
প্রদীপের আলোর সামনে পুঁথি খুলে পড়েন তিনি । ত্রীচৈতন্যচরিতামৃত
পড়েন । তক্ষকের দল গভীর-রাত্রে আসে মন্দিরের আনাচে কানাচে,
আসে কলা খাওয়ার লোভে । হাঁক ছাড়েন পুরোহিত,—হিস্,
হিস্, যাঃ—।

সভয়ে রাত্রি জেগে বসে থাকতে হয় বাবুদের জন্তে । কখন কে
আসেন, তার ঠিক কি ! মুরলীধরের গায়ের অলঙ্কার চুরি করতে
আসেন । দোষ হবে পুরোহিতের, তাই তাঁর যত ভয় ।

নিজের কানকে যেন বিশ্বাস হয়নি অনঙ্গমোহনের । বেশ কিছুক্ষণ নীরব
থেকে বললেন,—শ্রাম, কি বললেন পুরোহিত মশাই ? বুঝলাম না ঠিক ।

দুঃখের হাসি হাসলো শ্রামাপদ । বললে,—কি আর বলবেন !
ঠাকুরমশাই বলছেন যে আপনাদের গৃহের অধিষ্ঠিত মুরলীধরের চোখের
রক্ত উপড়ে নিয়েছে কে যেন !

—চোখের রক্ত উপড়ে নিয়েছে ? নিজের মনে নিজেকে যেন প্রশ্ন
করেন অনঙ্গমোহন । বলেন,—মুরলীধরের চোখের রক্ত ?

কথা শেষ করতে না করতেই সসঙ্কোচে জিব কাটলেন । ভুল
করেছেন তিনি, নিজের অজ্ঞাতে একটি বিষম ভুল করেছেন,—মুরলী-
ধরের নাম উচ্চারণ ক'রে ফেলেছেন উদ্বেজনায় বশে । লজ্জ, ক্লাব আর
পার্টি নিয়ে একদা মেতে উঠেছিলেন অনঙ্গমোহন । মিশেছিলেন অজাত
কুজাতের সঙ্গে । কত কি অখাদ্যই না খেয়েছিলেন !

গৃহ-দেবতা মুরলীধরের নাম পর্য্যন্ত এই সব কারণে ইদানীং মুখে
আনতে চান না তিনি। উত্তেজনার বশীভূত হয়ে নামটি উচ্চারিত
হওয়া মাত্র অনঙ্গমোহন তাই জিব কাটলেন। যেন মস্ত এক পাপ
ক'রে ফেলেছেন, এমনি তাঁর ভয়ার্ত্ত মুখভঙ্গী।

—কে এমন কাজ করলে? নরাধমটি কে?

হঠাৎ সজোর কণ্ঠে প্রশ্ন করলেন অনঙ্গমোহন। অ্র কুঁচকে
তাকালেন শ্রামাপদর প্রতি।

পুরোহিত বললেন,—বাবুদের মধ্যে ক'জনা ছিলেন দেখি নাই।
অনেকেই ছিলেন। আমার অহুরোধ উপরোধে কর্ণপাত করলেন
না। আমাকেই শাসালেন।

অনঙ্গমোহনের শরীর যেন ঠকঠকিয়ে কাঁপছে।

হস্তপদ কেন কে জানে ক্রমশঃ শিথিল হয়ে যায়। পা কাঁপে।
বুকে যেন হাতুড়ির ঘা পড়ছে। ওষ্ঠাধর পর্য্যন্ত কম্পমান। কণ্ঠকের
জন্তু নিজেকে সামলে উত্তেজিত স্বরে বললেন,—এ বছর কার পালা
চলেছে? তাকে এ বিষয়ে অবগত করা হোক।

কার পালা! শরিকদের পালা। একেক শরিকের একেক বছরের
পালা।

পুরোহিত বললেন,—হজুর, যার পালা তিনিও স্বয়ং উপস্থিত ছিলেন
এই ছক্কীতির মধ্যে। তাঁকে আর কি বলবো?

অনঙ্গমোহন হতাশার নিশ্বাস ফেললেন। আরাম-কেদারায় দেহ
এলিয়ে অনেকক্ষণ ধ'রে একটি সুদীর্ঘ শ্বাস টানলেন। কথা বলতে
বলতে উত্তেজনায় হাঁফিয়ে উঠেছেন হয়তো। বললেন,—তবে?
তবে আর কি হবে? ছেন্, হোয়াট্ ক্যান্ আই ডু? আমি কি
করতে পারি! আই অ্যাম্ হেল্পলেস্।

পুরোহিত বললেন,—আমার কর্তব্য আপনাদের অবগত করা।
কায় কাছে যাই ? আপনি এই বংশের সর্বজ্যেষ্ঠ, সেজন্ত আপনাকেই
নিবেদন করছি। জেনে রাখুন।

এ কথার কোন' প্রত্যুত্তরই দিলেন না অনঙ্গমোহন।

জানলার বাইরে অন্ধকার আকাশে চোখ তুললেন। অবসর ও
কাতর দৃষ্টি। পরাজিত যোদ্ধা যে-দৃষ্টিতে তাকায় সেই চাউনি চোখে।
কালো আকাশে কি নক্ষত্র ফুটেছে ! আকাশে তারার ঘুম ভেঙেছে কি !
প্রসারিত দৃষ্টি, তবুও কিছু দেখতে পান না অনঙ্গমোহন। ঝাপসা দেখেন।
দৃষ্টিশক্তি আছে কি আর চোখে ! হয়তো যা আছে তা সামান্যই।
সে-দৃষ্টিতে আকাশে সোনালী তারা দেখা যায় না, দেখা যায় নিজের
হাত-পা। দেখা যায় অতি নিকটে যে আছে তাকে, দূরের কাকেও নয়।

আকাশ থেকে চোখ ফেরালেন অনঙ্গমোহন।

চোখ আপনা হ'তেই স্থির হয়ে যায় ঘরের একটি ছবিতে।
অল্পপমার ছবি। ঘরময় আসবাবপত্র, দেওয়ালে আছে আরও কত
কা'র ছবি, তবুও একটি ছবিই কি বারবার চোখে পড়ছে ! বোর্ণ
এও সেফার্সের তৈরী রঙীন আলোকচিত্র অল্পপমার, ছবিতে কত
আকর্ষণ ! একেই অঙ্গরীর রূপ ছিল অল্পপমার। মুখশ্রী ছিল অপূর্ব।
দুঃখ এই, অল্পপমার রূপে আকৃষ্ট হননি অনঙ্গমোহন কোনদিনই।
এখন, এতকাল পরে বুঝি ছবির অল্পপমার মুখে পেয়েছেন গভীর
আকর্ষণ। কতদিন খুঁটিয়ে খুঁটিয়ে দেখেছেন, সত্যিই রূপবতী ছিল
অল্পপমা। কি সুন্দরই না দেখতে ছিল ! কতদিন ঐ ছবির অল্পপমাকে
অত্যন্ত কাছ থেকে দেখতে দেখতে একা একা কেঁদেছেন অনঙ্গমোহন।
শব্দহীন কান্না, কেবলমাত্র দরদর অশ্রুপাত। কতদিন এমন অবস্থায়
বিভ্রান্ত হয়ে কতবার ব'লেছেন,—আই এ্যাপলজাইন্স, কমা কর' অল্প।

—টাকার কি এমন দরকার পড়লো যে গৃহদেবতার চোখের রত্ন উপড়ে নিতে হবে? হঠাৎ কথা বললেন অনঙ্গমোহন। প্রশ্নটা শ্রামাপদকেই করলেন। তার দিকে চোখ ফিরিয়ে।

শ্রামাপদ রহস্যময় হাসি হাসলো।

পেটের পীলায় হাত বুলাতে বুলাতে বললে,—কিন্তু কলকাতা থেকে নাকি বাইজী আসছে ক'জন।

—হোয়াট ননসেন্স!

কথার শেষে চোখ দু'টি বন্ধ ক'রলেন অনঙ্গমোহন।

ঘরের দরজার বাইরে তখনও ছিলেন পুরোহিত, অপেক্ষা করছিলেন। যদি কিছু বলেন রত্ন উপড়ানোর কারণটা শুনে। কিন্তু কিছুই আর বললেন না গৃহকর্ত্ত। নিম্নলিখিত চোখে প'ড়ে রইলেন আরাম-কেদারায়। একান্ত নির্জীবের মত। খাস চলছে কি না চলছে বোঝা যায় না।

শ্রামাপদ কিন্তু বোঝে। কতগুলি যুগ কাটলো!

কতদিন কাজ করছে শ্রামাপদ! কতদিনের লোক! শ্রামাপদ বোঝে তার মনিবের শরীরতত্ত্ব। কখন ঘুম, আর কখন যে তাঁর আগরণ সব কিছুই বুঝতে পারে শ্রামাপদ। মুখ দেখলেই বুঝতে পারে!

ভরা দুপুর গ্রীষ্মের উত্তাপ ছিল। ঘরে বিজলী পাখা থাকলে কি হবে, ঘর-দোর তেতে উঠেছিল। ছাদে দালানে পা দেয় কার সাধি! সারাটা দুপুর, আজ কেন কে জানে অল্প অল্প দিনের মত চোখে-পাতায় করতে পারেননি। ছাড়া ছাড়া, ছেঁড়া ছেঁড়া ঘুম হয়েছিল। তাই হয়তো অনঙ্গমোহনের চোখ তন্দ্রায় আচ্ছন্ন হয়ে আছে এখনও। এতক্ষণ যাও-বা হেসে দু'টো কথা বলছিলেন, পুরোহিতের অভিযোগ কানে পৌঁছানো পর্যন্ত আর সে-হাসি থাকলো না। উবে গেল যেন ঠোঁটের কোন থেকে। অসম্ভব গম্ভীর হয়ে গেলেন অনঙ্গমোহন।

কপালের বলিরেখা যেন আর কখনও সোজা হবে না।

চোখ দুটি বন্ধ রেখে, ঝিমিয়ে পড়ে কি এত আকাশ-পাতাল ভাবছেন অনঙ্গমোহন! চিন্তাগ্রস্ত হয়ে প'ড়েছেন। হুশ্চিন্তা।

—দাদাবাবু তো! হুজুর এখনও কলকাতা থেকে ফিরলেন না? ছটা পঁয়ত্রিশের ট্রেন বহুক্ষণ চলে গেছে।

শ্রামাপদ বললে হঠাৎ। কি মনে হয়, তাই হয়তো বলে।

শিউরে উঠলেন যেন অনঙ্গমোহন!

মস্তিষ্কের সূক্ষ্মতম এক উপশিরা ধ'রে কে যেন টান মেরেছে। চমকে উঠেছেন তাই। বললেন,—কে? মনিমোহন?

শ্রামাপদ বলে,—হাঁ হুজুর, আমাদের দাদাবাবু।

অনঙ্গমোহন চোখ খুললেন। বললেন,—কেন বল্ তো এখনও আজ আসছে না? আমিও তো সেই কথাই ভাবছি কতক্ষণ ধ'রে। কথা বলতে বলতে একটি দীর্ঘশ্বাস ফেললেন। যেন বক্ষের অন্তস্তল থেকে শ্বাস পড়লো। বললেন,—হয়তো আজ হেরে গেছে! গড্ নোজ, হোয়াট্ হাপেন্ড্!

—হেরে যাবেন কেন? বললে শ্রামাপদ। দৃঢ় বিশ্বাসের সঙ্গে যেন বললে,—হেরে যেতে যাবে কেন! নিশ্চয়ই জিত্ হয়েছে দাদাবাবুর। হেরে ফিরে আসবে, সে ছেলে দাদাবাবু নয়। আপনি হুজুর চিন্তা করবেন না। একটা ট্রেন ফেল্ করলে আর একটা আছে।

অনঙ্গমোহনের মুখে হতাশ হাসি ফুটলো।

নিরাশার স্মিত হাসি। বললেন,—ফর্ নাথিং কি কোন' লোক এমন দিনের পর দিন হেরে যায়। আমার লাক্টা কিছুকাল ধ'রে বেজায় বেয়াড়াপনা করতে শুরু করেছে! আই এ্যাম্ লুজ্জিং এন্ড্ রিথিং।

দিন নেই রাত্রি নেই, সদাঙ্গণ কেউ ব্রিয়মান হয়ে থাকলে ভাল

আর কোন্ মানুষের লাগে! শ্রামাপদও কখনও কখনও বিরক্ত হয়, অখুশী হয়। শ্রামাপদের মুখেও বিরক্তির স্পষ্ট ছায়া দেখা দেয়। মুখে কিছু প্রকাশ না করলেও মনে মনে ভীষণ গুমরোতে থাকে। মুখে তখন কোন' কথা জোগায় না, গুম মেরে যায় শ্রামাপদ। ঘর থেকে বেরিয়ে যায়। সন্দেরও একটা সীমা আছে। অসহ্য মনে হয় শ্রামাপদের।

ঘরের বাইরে অন্ধকার।

দালান, উঠান অন্ধকার। দূরে কোন কোন্ ঘরের বিজলীর সোনারঙ দেখা যায়। কার ঘরে আলো জ্বলছে কে জানে। কত অসংখ্য ঘর এই বাড়ীতে! কত কে আছেন!

মধ্যখানে শান-বাঁধানো উঠান।

চতুর্দিকে ঘর, সারি সারি। ঘরের কোলে লম্বা লম্বা দালান।

একটা দালান ধ'রে এগিয়ে চললো শ্রামাপদ। ইটের ইমারত হ'লে কি হয়, এই খাঁচার মধ্যে থেকে থেকে অতিষ্ঠ হয়ে উঠেছে শ্রামাপদ। কোথাও যেন মুক্তি নেই, মুক্ত আকাশ চোখে পড়ে না। শ্রামাপদ চললো হনহনিয়ে।

—শ্রাম, তোমার ছজুর কি ক'রছেন?

—কি আর ক'রবেন, যেমনকার তেমনি পড়ে আছেন। আরাম-কেদারায় এলিয়ে প'ড়ে আছেন।

—তুমি এমন ব্যস্ত হয়ে কোথায় চললে?

—কোথায় আর যাবো দিদিমণি! ষাওয়ার কি কোন' চুলো আছে যে যাব? একটু ফাঁকায় যাচ্ছি। দম বেরিয়ে যাওয়ার দাখিল হয় যেন কাছে থেকে থেকে।

—তোমাকে যদি ডাকেন এখুনি? রাঙাদাছকে একা রেখে তোমার যাওয়া উচিত নয় শ্রাম। একেই অধৰ্ব্ব হয়েছেন!

মেজাজ রুদ্ধ হয়ে ওঠে শ্রামাপদর ।

নেহাৎ অন্ধকার, তাই দেখা যায় না কিছু, শ্রামাপদর মুখে হতশ্রদ্ধার ভাব । বিরক্তিতে বিস্ত্রী দৃষ্টি ফুটেছে চোখে । তাজিলোর সঙ্গে কথা বলে সে,—অত যদি রাঙাদাছুর অণ্ডে দরদ দিদিমণি, যাওনা ছুঁদণ্ড কাছে গিয়ে বস'গে না ! আমিতো দিনরাত্তিরই আছি । আর পারি না আমি, যা হবার হোক ।

শেষের কথাগুলি স্বগত ক'রলো সে ।

—আমি রাঙাদাছুর কাছে থাকছি কিছুক্ষণ, যাও তুমি ঘুরে এসো শ্রাম । রাঙাদাছু ঘুমিয়ে পড়েননি তো ?

—না গো দিদিমণি, না । ঘুমিয়ে পড়বে এখন ? সব ঘুম ভেঙেছে বলে ! দিবানিদ্রা থেকে এই খানিক আগে উঠেছেন ।

—তবে আমিই যাচ্ছি । শীঘ্র এসো কিন্তু শ্রাম । দেরী ক'র না যেন ।

—না গো দিদিমণি না । যাব আর আসবো ।

নিরবিচ্ছিন্ন অন্ধকারে মিলিয়ে গেল শ্রামাপদ । কথার শেষে আরেক মুহূর্ত দাঁড়ালো না । খাসরোধ হয়ে যাওয়ার দাখিল হয়েছে, মুক্ত আকাশ চাই । চার দেওয়ালের বাইরে ফাঁকায় চলে যায় শ্রামাপদ । অনেকটা এগিয়ে গেছে, কি মনে পড়তে ফিরে আসতে হয় । শ্রামাপদ তৎক্ষণাৎ ফিরে আসে । হাঁফাতে হাঁফাতে আসে । বলে,—রাখাদিদি ?

লম্বা দালানের শেষপ্রান্তে পৌছেছিল রাখা ।

অন্ধকার, কিছুই দেখা যায় না । শুধু অভ্যাসের বশবর্তী হয়ে আন্দাজে পা চালিয়েছিল । ডাক শুনে থমকে দাঁড়ায় । বলে,—আবার ফিরলে কেন ?

—একটা কথা শুধোতে এয়েছি রাখাদিদি । শ্রামাপদর কথায় যেন লজ্জার প্রলেপ ।

—কি বলবে বল' ? কি বিল্লী ঘুটঘুটে অঙ্ককার ! ভয় করে যেন !
দৈবৎ ভয়ান্ত কণ্ঠে কথা বলে রাধা ।

শ্রামাপদ বললে,—হাঁ দিদিমণি, বেজায় আঁধার এখানে । এটা যে
বারোয়ারীর দরদালান ! কে আর গাঁটের কড়ি খরচা করে আলো
জ্বালাবে বল ?

সভয়ে হাসলো রাধা । ভয়ে যেন শিউরে আছে, তবুও হাসলো
স্মিত হাসি । বললে—তা জানি আমি । কি ব'লবে ব'লছিলে ?

একেই শ্রামাপদ বেতনভোগী ভৃত্য । সে ভাবছিল কথাটি বলবে কি
বলবে না । তার ছোট মুখে কি মানাবে বড়দের কথা ! তবুও লজ্জার
মাথা খেয়ে বলেই ফেললে,—হাঁ রাধাদিদি, সেদিন ধারা তোমাকে
দেখে গেলেন, শেষ পর্যন্ত কি জানালে ? মেয়েতো আমাদের অপছন্দের
নয় । তবে ?

এক দুঃসহ লজ্জা আর অপমানের জ্বালা ধরলো যেন রাধার দেহ
আর মনে ।

পায়ের তলায় ভূমি কাঁপতে থাকলো । বৃকের স্পন্দন অশ্রুভব করতে
হয় । নেহাৎ আলো নেই তাই, নয়তো দেখতে পাওয়া যেতো রাধার
কর্সা মুখখানি লজ্জায় রাঙা হয়ে উঠেছে ।

প্রশ্নের উত্তর মিলছে না । রাধা নীরব নির্ঝাঁক ।

অপ্রস্তুত হ'ল শ্রামাপদ । কথাটা না পাড়লেই বুঝি ভাল ছিল ।
রাধাকে দেখতে এসে পছন্দ ক'রলে কিংবা পছন্দ হওয়ার পর বিয়ের
দিনটি ধার্য্য হ'লে কি জানতে পারতো না শ্রামাপদ ! নিজের মনে
নিজেকেই প্রশ্ন করে সে । ভাবে, কি প্রয়োজন ছিল তেমন কথা বলার,
যে-কথার কোন উত্তর পাওয়া যায় না ? কথা বলার শেষে নিজেকে যেন
মনে হয় শ্রামাপদর, সে একটা মূর্খ, একটা আহান্যক, কাণ্ডজ্ঞানহীন ।

কথা বলতে হ'লে স্থান কাল পাত্রের বিচার করতে হয়, তাও তার জানা নেই। এই বুড়ো বয়সে এটুকু জ্ঞানও সঞ্চয় করতে পারলো না।

বেশ কিছুক্ষণ অতীত হওয়ার পর রাধা বিনম্র স্বরে কথা বলে। লজ্জানম্র কণ্ঠে বলে,—পছন্দ হয়েছিল, যা টাকা চাইলে তাতেই পিছিয়ে এলেন বাড়ীর লোক।

কথার জবাব পেয়ে বাঁচলো যেন শ্রামাপদ।

দুঃখকাতর হাসলো কথাগুলো শুনে। হাসতে হাসতে বললে,—আজকাল, দেখেছো রাধাদিদি, শালার ছেলেরা টাকা না পেলে বিয়েই করতে চায় না! তোমার মত মেয়েকে রাধাদিদি যে বিয়ে করবে সে টাকা চাইবে কেন? তোমার মত মেয়ে—

শ্রামাপদ ব'লে যায় কত কথা।

কিন্তু কথা যে শুনবে সে তখন আর সেখানে নেই। বিয়ে না হওয়ার অসহ্য লজ্জায় আর একটি মুহূর্ত অপেক্ষা করেনি। শব্দহীন পদক্ষেপে ধীরে ধীরে এগিয়ে গেছে। যেন রুদ্ধশ্বাসে পালিয়ে গেল রাধা, লজ্জা ও সঙ্কোচের আবেগে বেসামাল হয়ে পালিয়ে গেল দ্রুত পায়ে।

শ্রামাপদ একজন বেতনভোগী চাকর, তাতেই যত লজ্জা।

নয়তো রাধার কাছে এসব কথা অতি পুরানো। মামুলী কথা। রাধাকে যেই দেখে সেই শুধায়। যে মুখ ফুটে বলতে পারে না সে নিশ্চয়ই মনে মনে এই বিয়ে না হওয়ার কারণটা অনুমান করতে চেষ্টা করে। কত সময়ে ভাবতে ভাবতে হেসে ফেলেছে সে। যতদিন দেহে শাড়ী উঠেছে হয়তো ততদিন ধ'রে এক নাগাড়ে রাধা শুনে আসছে এমন ধারার কথা। কত কে বলেছে! এখনও বলাবলি করে। অণু কেউ বললে তাই এখন আর গায়ে মাখে না। শ্রামাপদ যে একজন দীন দরিদ্র, মাইনের চাকর!

আরাম-কেদারায় আরাম নেই ।

কালো অয়েল-রুথের তলায় তবু নরম তুলো । বর্মার কারুকার্য ।
আরাম-কেদারার গদী বুঝি বা কণ্টকশয্যা মনে হয় ! বেশীক্ষণ স্থির
হয়ে থাকতে পারেননি অনঙ্গমোহন । উঠে পড়েছেন । একান্ত অনিচ্ছা
সত্ত্বেও উঠে গেছেন ঘরের সমুখের দালানের ঐ খোলা-জানালার ধারে ।
দূরের কিছুই স্পষ্ট দেখতে পান না, তবুও নির্গিমেষ দৃষ্টিতে তাকিয়ে
থাকেন জানালার বাইরে—যেদিকে সদর ; যেদিকে সদরের নাচঘর ।

বাইরে অসীম অন্ধকার । রাত্রির কালো আঁচলের আড়ালে লুকানো
প্রকৃতির কিছুই দৃষ্টিপথে দেখা যায় না । শুধু অদূরে দেখা যায় আলো-
উজ্জল সারি সারি বাতায়ন । লাল ভেলভেটের পর্দা ঝুলছে ।

নাচঘরে আলো, তবুও স্পষ্ট দেখতে পেলেন না অনঙ্গমোহন ।
ঝাপসা দেখলেন । শুধু দেখলেন আলোর হলুদ আভাষ অদূরে । দেখতে
দেখতে বুকের পাঁজরা ক'খানা যেন শির শির করতে থাকে । বাদশা
কিংবা আমীর কিংবা ওমরাহের মত পেছনে দু'টি হাত একত্রে রেখে
ঈষৎ নত হয়ে দাঁড়িয়ে আছেন অনঙ্গমোহন । স্পষ্ট দেখতে পাওয়া যায়
কিনা দেখতে সচেষ্ট হন । কান পেতে থাকেন ।

সারেঙ্গীর গুমরানি ভেসে আসে কৈ ! কৈ কিছুই তো শোনা যায়
না । বুকের পাঁজরা ক'খানা শিরশিরিয়ে উঠলেই মনে মনে যেন ভীষণ
বিরক্ত হন অনঙ্গমোহন । সারেঙ্গীর গোড়ানি গুনবেন কোথায় তা নয়,
বাইরে শুধুই ঝাঁঝের কীর্তন । আর এলোমেলো বৈশাখী বাতাস ?

গ্রামের নাম চন্দনপুর ।

নামের সঙ্গে গ্রামের কোন যোগ-সম্পর্কই নেই । নামেই চন্দনপুর ।
খাল বিল গড় চন্দনপুরের শিরা উপশিরা । তরুশাখার আড়ালে
নিজেকে লুকিয়েছে চন্দনপুর । ঘন বাঁশবনের ছড়াছড়ি চতুর্দিকে ।

আকাশ-চাঁচা তাল আর নারকেলের সারি জোবা পুকুরের ধারে।
আগাছার ঝোপ। গড়খাতে জল নেই, মরা-নদীর শুকনো বুকে ঝোপ
আর জঙ্গল গজিয়েছে কবে কোন্ কালে। চন্দনপুরের এই বিস্তৃত
গড়খাতের নাম ককর সেনের গড়।

ককর সেনের না ককর সেনের গড় ?

ইতিহাসে বাদ প্রতিবাদ হয়েছে। একদল বলেন ককর সেন,
একদল বলেন, না ককর সেন।

তখন মুর্শিদকুলী খাঁ বাউলার দেওয়ান। ককর সেন হুগলীর
ফৌজদারে পেস্কারের কাজ করতেন! বাদশা শা আলম বাহাদুর শাহ
'দেওয়ান বেউতাং', অর্থাৎ ভাণ্ডারের অধ্যক্ষ জেয়াদীন খাঁ তখন হুগলীর
ফৌজদার। জেয়াদীন কেবল ফৌজদার নয়, পূর্ব উপকূলের ও বঙ্গোপ-
সাগরের রণতরীসমূহের ভারও তিনি স্বহস্তে গ্রহণ ক'রেছেন। এই ককর
সেন হুগলী ফৌজদারীতে পেস্কারের কাজ করতেন। তাঁরই নামে গড়।

গড়খাতে ঝোপ আর জঙ্গল। পূর্বের গঙ্গা নদীর সঙ্গে আঁতাত ছিল,
যোগাযোগ ছিল, তখন ককর সেনের গড়ে সাত মাসুয জল। এখন জল
নেই, জলা আছে কোথাও।

কাছে মশা ভোঁ ভোঁ করে।

দূরে বিরামবিহীন ঝাঁ ঝাঁ ডাকছে। সারেকীর গোঙানি তবে কি
ঝাঁ ঝাঁর ডাকে চাপা পড়লো। অনঙ্গমোহন আর কতকণ মশার কামড়
সহ করবেন! তবুও সাদা সূতোর ঢিলে পায়জামা পরেছেন। গায়ে
বিলীতি সামার কুল গেঞ্জী।

—রাঙাদাছ!

—কে?

—তুমি কোথায় ?

—তুমি যে কে তাই তুমি আগে !

—আমি রাধা । রাধারাণী ।

দালান ছেড়ে ঘরে চললেন অনঙ্গমোহন ।

এ আবার কি শোনাতে এলো ! বহন করে আনলো হয়তো কি এক দুঃসংবাদ । বিজলী আলোর আলোয় দেখলেন অনঙ্গমোহন । রাধারাণীকে দেখলেন, তার মুখাকৃতি দেখলেন । শোকের এক প্রতিমূর্তি কোন্ অদৃশ্য ছায়ালোক থেকে আবির্ভূত হয়েছে কি !

রাধারাণী ঘন-নীল নীলাশ্বরী প'রেছে ।

রাত্রির নকল আলোয় ঘন-নীল রঙ চেনা যায় না ঠিক । ঘন কালো রঙ ব'লেই ভুল হয় । রাধারাণীর নীলাশ্বরীতে কত যে সেলাই আছে, কেউ জানে না । প্রায় শতচ্ছিন্ন শাড়ী, দেখলে কেউ বুঝবে না । রাধারাণীর চোখের কোলে কালিমা । কপালে চূর্ণ কুন্তল কয়েকটি । রুম্ম চুলের বাসি খোঁপা মাথায় । শতচ্ছিন্ন শাড়ীর সঙ্গে কি দৃষ্টিকটুই না রাধারাণীর জামা ! বেগুনী আলপাকার চোখ-ঝলসানো ব্লাউস । বুকে টিপ-কলের বোতাম ছিল, ছিঁড়ে গেছে অতি ব্যবহারে । তাই রাধারাণীর বুকে সেফটিপিনএর এক রাজত্ব গ'ড়ে উঠেছে যেন ।

—রাধা, তুমি কি মনে ক'রে ?

ঘরের আলোয় এসে বললেন অনঙ্গমোহন । বলতে বলতে টেবিলের কাছাকাছি এগোলেন । ছাই-দানে কখন রেখে দিয়েছিলেন আধ-খাওয়া চুরুট । তুলে নিলেন চুরুট । দেশলাইটাও তুললেন ।

রাধারাণী বললে,—রাঙাদাত্ত, তোমার কাছে ব'সতে এসেছি ।

অনঙ্গমোহন বললেন,—তোমার অশেষ রূপা, আমার কি সৌভাগ্য !

দেশলাইয়ের একটি কাঠি জ্বলেছিলেন কথা বলতে বলতে ।

বৈশাখের দিন-শেষের এলোমেলো ঝড়ো হাওয়ায় আগুনের শিখা এতই ঋণস্থায়ী যে, মুহূর্তের মধ্যে সে-আগুন নিভে গেল। আবার একটি কাঠি, ফস ক'রে জ্বলে মুখাণ্ডি করলেন নিজের। আসল বর্ষা চুরুটের উগ্র গন্ধ ছড়ালো ঘরে।

ঘরের দু' দেওয়ালের দুই বিপরীতে ছিল দু'খানি বেলজিয়ান কাঁচের আয়না। কাঁচেরই ফ্রেম! ফ্রেমেও টুকরো টুকরো আয়না। আয়নায় দেখলো রাধারাণী, কি বিস্মী হয়ে আছে তার মাথার চুল। আয়নায় দেখতে দেখতে বাসি খোঁপার কাঁটা তুলে বিহুণীটা আরেক বার জড়িয়ে নেয় সে। দাঁতের সূক্ষ্ম কামড়ে ধ'রে থাকে ক'টা লোহার কাঁটা।

—আমার চাকর শ্রামকে দেখলে? কোথায় যে যায় ঝুপিড়টা!

এক মুখ ধোঁয়া ছেড়ে দিয়ে বললেন অনঙ্গমোহন। কালো অয়েল-ক্লথের গদী দেওয়া আরাম-কেদারায় বসলেন। টেবিল থেকে ছাইদানটি কাছে এগিয়ে নিলেন।

দাঁতে লোহার কাঁটা ক'টা ধরা আছে, তবুও চিবিয়ে চিবিয়ে কথা কয় রাধারাণী। বলে,—শ্রাম আসছে এখুনি। আমি তোমার কাছে আসছি দেখে বললে যে, সে যাবে আর আসবে। শ্রামকে তোমার কি দরকার তা না হয় আমাকেই বললে।

—দরকার? দরকার তেমন কিছুই নেই। তা রাধারাণী, তুমি একটি কাজ করতে পারবে?

অনঙ্গমোহনের কণ্ঠে শিশুস্বলভ কাকুতি। কথায় যেন অহুরোধের সুর।

খোঁপায় কাঁটা বসাতে বসাতে রাধারাণী বলে,—কি রাঙাদাছ?

—আমার ঘরের ঐ বাইরের দালান থেকে দিদি দেখতে পারো, নাচঘরে বেলোপনা শুরু হয়ে গেছে কি?

কণ্ঠস্বর অসম্ভব ধীর অনঙ্গমোহনের । যেন ফিস ফিস কথা ।

‘মুচকি হাসলো রাধারাণী । কপালের পরে নেমে-আসা কতগুলি
চূর্ণ কুস্তল সরিয়ে দিতে দিতে দালানের দিকে এগিয়ে চললো ।

—সারেঙ্গীর গোঙাণি শোনা গেল না এখনও ?

ঘরের ভেতরে থেকে প্রশ্ন করলেন অনঙ্গমোহন ।

রাধারাণী ঘরের বাইরে থেকে বললে,—না রাডাদাদু, এখনও কৈ
কিছু শুনছি না তো ! নাচঘর তো নিস্তব্ধ । কোন সাড়া শব্দই নেই ।
সারেঙ্গী দূরের কথা ।

তু’ পায়ের দশ আঙ্গুলে দেহের ভর রেখে, খানিক উঁচু হয়ে দেখতে
হয় রাধারাণীকে । দালানের জাফরি-জানলা খুব নীচে নয় ; বেশ
উঁচুতে । রাধারাণী যে তেমন দীর্ঘাঙ্গী নয় । কুড়ির ঘর কবে পেরিয়ে
গেছে, রাধা যেমনকার তেমনই আছে । কি এক গুপ্তবিজ্ঞায় যেন
যৌবনকে বেতে দেয়নি, ধ’রে রেখে দিয়েছে, দেহের কানায় কানায় ।

—কলকাতা থেকে বাঈজী আসবে । নাচঘরে এখন কোথায় কে !

ঘরের বাইরে থেকে দ্বিতীয়বার কথা বললে রাধারাণী । কথার
শেষে ঘরে প্রবেশ করলো । একটা সেফটিপিন বড্ড বেশী এঁটে গেছে ।
নরম বুকের কোথায় যেন বিঁধছে থেকে থেকে ; সেফটিপিনটি খুলে
আবার লাগিয়ে নিয়েছে রাধা, দরদালানের আড়াল-অন্ধকারে ।

—কলকাতা থেকে বুঝি বাঈজী আসছে ?

রাধাকে দেখে শুধোলেন অনঙ্গমোহন । চুরুটের ধোঁয়া ছাড়লেন
একমুখ ।

এমন সময়ে ঝিলের ধারের মন্দিরে কাসর-ঘণ্টা বাজতে থাকলো
হঠাৎ । সন্ধ্যারতির শব্দ শুনে আরও যেন ব্যস্ত হয়ে উঠলেন

অনঙ্গমোহন। রাধারাণী ছ'হাত জোড় ক'রে কপালে ভুললো।
গৃহদেবতাকে স্মরণ ক'রলো হয়তো।

—ই্যা রাডাদাছ। কলকাতা থেকে নাকি ছ' ছ'জন বাড়ীজী আসছে।
নায়েব মশাই ইন্টিসানের গাড়ীর জন্তে ফটকে ধর্শা দিচ্ছে কতক্ষণ থেকে!

—আমার ছেলে এখনও কেন ফিরছে না বলতে পারো? ছ'টা
পয়ত্রিশের ট্রেন মিশ্ করবে, মনিমোহন আমার সে ছেলে নয়। কি যে
হ'ল আজ কে জানে!

রাধারাণী কোতুহলী হয়ে শুধোলে,—মণিকাকা কেন কলকাতায়
গেছেন রাডাদাছ? কেন, জরুরী কাজ ছিল বুঝি?

মুখখানা অনঙ্গমোহনের হঠাৎ কালো হয়ে যায় রাধার প্রশ্নে।

এক মুহূর্তে মুখের আকৃতির কত পরিবর্তন হতে পারে মানুষের!
মুখের চুকট মুখেই থাকে, নামে না আর। দাঁতের চাপে আটকে
থাকে। অসম্ভব গাভীর্যের সঙ্গে অনঙ্গমোহন বললেন,—আমিই
পাঠিয়েছি। আমার কাজেই গেছে সে। আমিই তাকে পাঠিয়েছি।

রাধারাণী আর কিছু বলে না। আর কোতুহল প্রকাশ করে না।

তার রাডাদাছর মত ব্যস্তও হয় না সে। মনে মনে হাসে।
রাধারাণী জানে, বেশ ভালই জানে। তাই আর বেশী কথা বলে
অনঙ্গমোহনকে অপ্রস্তুত করতে চায় না, লজ্জা দিতে চায় না।

কতক্ষণ আর দাঁড়িয়ে থাকা যায়। অথচ ঘরে একটিও বাড়তি
চেয়ার নেই। কারও বসতে ইচ্ছা হয় তো ঘরের খালি মেঝেয় বসতে
হবে তাকে। তবুও রাধারাণী খেয়ালের বশে ভুল ক'রলো।
অনঙ্গমোহনের খাটের দুক্ষফেননিভ বিছানার এক কিনারায় বসেছে কি
বসেনি রাধারাণী, হঠাৎ বিকট চীৎকার করলেন অনঙ্গমোহন। কণ্ঠস্বর
গর্জনে তুলে বললেন,—এই, এই এই যাঃ।

চীৎকার শুনে আর ব'সলো না রাধারাণী ।

‘খাটের কাছ থেকে স’রে ক’ হাত দূরে গিয়ে দাঁড়ালো । অনঙ্গমোহন এক মুখ ধোঁয়া ছেড়ে বললেন,—তোমাকেও এখনও ব’লে দিতে হবে রাধা ? তোমরা জানো যে আমি আমার বিছানায় বসতে পর্যন্ত কাকেও এঁলাউ করি না, তবুও কথাটা অ্যাট অল্ মনেই পড়লো না ! ক’রলে কি বল’ দেখি ! দাও, বিছানার ওখানটা ঠিক করে দাও । চাদরটা ভাঁজ খেয়ে গেছে, ঠিক কর’ এখন ।

রাধারাণী হেসে ফেললো । বললো—রাঙাদাচ্ যেন কি ! আমরা কি অস্পৃশ্য ? অশুচি ?

—না ভাই তা নয় । আন্টাচেবিলিটির কোন্ডেন নয়, আই ওয়াণ্ট্ ক্লিনলিনেস্ । পরিষ্কার পরিচ্ছন্নতা, আর কিছুই নয় । অনঙ্গমোহন কথা বললেন ভীষণ ধীর কণ্ঠে । কে বলবে যে, তিনি আবার এই কণ্ঠ পঞ্চমেও তুলতে পারেন ।

সত্যিই বিলাস কিংবা অস্পৃশ্যতা নয়, পরিচ্ছন্নতা ।

যেখানকার যেটি সেখানেই সেটি থাকবে । ধূলি-মলিন হ’লে চলবে না । অনঙ্গমোহনের দৃষ্টিতে প’ড়লে একটা কাণ্ড বাধিয়ে ব’সবেন তিনি । যতক্ষণ না সাফ্ করা হচ্ছে ততক্ষণ শান্ত হবেন না । অনঙ্গমোহনের ঘরে কত কি আছে প্রয়োজন আর অপ্রয়োজনের, কিন্তু এক কণা ধূলো কোথাও নেই । সাজানো গোছানো ঘর না দেখতে পেলেই অশান্তি । দুধ্ধফেননিভ বিছানার কোথাও খাঁজ পড়বে না ; একটি বালিস ন’ড়বে না ; অনঙ্গমোহন ছাড়া কারও স্থান হবে না । বিছানায় বসতে পর্যন্ত দেবেন না কাকেও, তা সে যতই নিকটতম হোক । অপরিচ্ছন্ন শয্যায় কিছুতেই ঘুম আসবে না তাঁর ; ঘুমের ব্যাঘাত হবে ।

—এই বইগুলো কি বই রাঙাদাচ্ ?

ঘরের এক কোণে ছিল একটি তেপায়া। সেখানে ছিল একই আকারের অনেকগুলি চটি বই। ক্ষুদ্রাকার পুস্তিকা। সেগুলোর প্রতি আঙুল দেখিয়ে কথাগুলি বললে রাধারাণী। মুখে তার চাপা হাসি। নীলাশ্বরীর আঁচলে চাপা ওষ্ঠাধর।

অনঙ্গমোহন অপ্রস্তুত হয়ে প'ড়লেন। চোখ ফিরিয়ে দেখলেন বইগুলির প্রতি। তাঁর কর্ণমূল রক্তাভ হয়ে উঠলো। মাথাটি তিনি নত ক'রলেন। নতমুখ হয়েই ব'ললেন,—সব কিছুতেই কি তোমার দরকার? তুমি বুঝবে না ওসব বই। রেখে দাও, হাত দিও না।

রাধারাণী হাসি লুকিয়ে বললে,—উপন্যাস কিম্বা গল্পের বই তো আর নয় যে হাত দেবো! তা আমি জানি। তবুও বল' না কি বই? কি আছে এ বইয়ে?

কথার কোন জবাব দিলেন না অনঙ্গমোহন।

পরিপূর্ণ বিরক্তিতে মুখের রেখাসমূহ স্পষ্ট হয়ে উঠলো। বিব্রত বোধ ক'রছেন তিনি। লজ্জানুভব ক'রছেন। কিন্তু মুখে কিছু বলতে পারছেন না। মিথ্যা কথা ব'লবেন কি বার্তাক্যে পদার্পণের পরেও!

রাধারাণী খিল খিল শব্দে হঠাৎ হেসে ফেললো।

চোখে-মুখে আঁচল চেপে সে কি হাসি! যেন কখনও থামবে না সে হাসি। কি এক গোপন তথ্য যে ফাঁস হয়ে গেছে! অনঙ্গমোহন যেন ধরা প'ড়ে গেছেন। চোর, চোর খেলায় আসল চোরটি যেন ধরা প'ড়েছে। লজ্জায় আরক্তিম হয়ে উঠেছেন অনঙ্গমোহন। তবুও তিনি ব'ললেন,—তু' একথানা উপন্যাস তুমি কি পড়তে চাও? আমার বইয়ের আলমায়রা খুলে নিয়ে নাও।

রাধারাণী হাসির বেগ সামলাতে পারে না। হাসতে হাসতে বলে,

—উপগ্রাস পড়তে নিয়ে যাই তোমার কাছ থেকে, তারপর মা যখন বাঁটা হাতে তেড়ে আসবেন ?

অনঙ্গমোহন বললেন,—তোমার মা তা হ'লে দেখছি খুবই কড়া !
বাঁটা নিয়ে তেড়ে আসবে, সে আবার কি ! সত্যি কথা না কি ?

হাসি থামায় রাধারাণী । হাসির বেগে তার দু'চোখ সজল হয়ে গেছে । হাসি থামিয়ে বলে,—হ্যাঁ গো রাঙাদাছ । মা যে এত রাগতে পারে কোন' দিন আমি দেখিনি ।

কথার প্রসঙ্গটির মোড় ঘুরছে দেখে কিঞ্চিৎ প্রকৃতিস্থ হন অনঙ্গমোহন । এক মুখ ধোঁয়া ছাড়তে ছাড়তে অল্প হেসে বললেন,—
কেন, তুমি কি দোষ ক'রেছিলে ? তোমার অপরাধ ?

প্রায় চুপি চুপি কথা বলে রাধারাণী । মুখের আঁচল খসিয়ে দিয়ে বললে,—আমার অপরাধ ? আমি ঘরের দরজা বন্ধ ক'রে পড়ছিলুম শরৎবাবুর 'পরিণীতা' । জানালার ফাঁক থেকে মা দেখতে পেয়েছিলেন ।

—তাই জন্তে বাঁটা নিয়ে তেড়ে আসতে হবে ! সহাস্ত্রে বললেন অনঙ্গমোহন । অল্প হাসি হেসে বললেন,—সে কি কথা !

রাধারাণীর মুখে অলঙ্কারের জগ্ন ভয়ের আশঙ্কা দেখা যায় । সে যেন এখনও চোখে দেখতে পায় তার মায়ের সেই রুদ্রমূর্তি । 'পরিণীতা' বইখানি মেয়ের হাত থেকে কেড়ে নিয়ে ফেলে দিয়েছিলেন বাড়ীর পুরুরে । যা মুখে এসেছিল বলেছিলেন । শুধু মারতে না কি বাকী রেখেছিলেন ।

কপালের 'পরে নেমে-আসা রুক্ষকুন্তল হাত দিয়ে সরিয়ে দিতে দিতে রাধারাণী বললে,—একেবারে বাঁটা নিয়ে সত্যিকার তেড়ে না এলেও সত্যি সত্যিই মা সেদিন কি ভীষণ চ'টে গিয়েছিলেন । মায়ের অমন রাগ কোন'দিন দেখিনি ।

অনঙ্গমোহন কথা বলছেন, কিন্তু অশ্রু মনে ।

মন তাঁর প'ড়ে আছে অশ্রু কোথাও । ছেলে এখনও ফিরলো না
আজ । ট্রেন ফেল করলো কি না কে বলতে পারে ! হয়তো হেরে
গেছে আজ, গোহারাণ হেরে গেছে মণিমোহন, তাই ফিরলো না আর ।
ট্রেনভাড়ার পয়সা পর্য্যন্ত ছিল না । কত আকাশ-পাতাল কল্পনাই
করেন অনঙ্গমোহন । মন যেন তাঁর ভেঙ্গে পড়েছে । মুখে কথা আসছে
না । চুরুটে টান দিয়ে চলেছেন একের পর এক ।

—ও বইগুলো যে তোমার ঘোড়দৌড়ের বই, তা আমি জানি
রাঙাদাছ, তুমি যতই লুকোও । আজ পর্য্যন্ত ঘোড়দৌড়ে কত টাকা
ঢাললে বল'তো ?

সহসা এ কি এক প্রসঙ্গ তুললো রাধারাণী ! যার ভয়ে এত লজ্জার
ভয় পেয়েছিলেন অনঙ্গমোহন, ঠিক সেই আসল কথাটি এত সহজে ব'লে
দিলো জ্ঞার মুখের ওপর ! কি নির্লজ্জ রাধা !

বেজায় অপ্রস্তুত হলেন মানুষটি । লজ্জায় যেন লাল হয়ে উঠলেন
কণেকের মধ্যে । ছাইদানে চুরুটের ছাই ফেলতে থাকলেন । একেবারে
নিরুত্তর অনঙ্গমোহন । শুধু ঘোড়দৌড়ের বই ঘরে থাকলে কোন লজ্জাই
ছিল না, কিন্তু ঘোড়ার খুর আঁকা ঐ বইয়ের প্রতি পৃষ্ঠার সঙ্গে যে জড়িয়ে
আছেন অনঙ্গমোহন স্বয়ং । আর আছে জড়িয়ে কত যে অজস্র টাকা !
অনঙ্গমোহনের জয়পরাজয়ের কত ইতিকথাই না লেখা আছে, কেউ
জানে না ।

আরাম-কেদারা ত্যাগ করলেন তিনি ।

এই প্রসঙ্গে যাতে বিচ্ছেদ টানা যায় তাই বেরিয়ে গেলেন ঘর
থেকে । ঈষৎ আনত হয়ে চললেন । বয়সের প্রাচুর্য্যে মেরুদণ্ড বাঁকতে
ব'সেছে । ঘরের বাইরে দরদালানে চ'লে গেলেন তৎক্ষণাৎ ।

—আঃ !

উন্মুক্ত আকাশ। মুক্ত বাতাস। বাতাসে রাত্রির স্নিগ্ধতা।

‘দীর্ঘ দালানের জাক্রি-জানলার প্রায় সবই খোলা। হাওয়ার অবাধ যাওয়া আসায় দালানে যেন একটা ছোট খাটো ঝড়ের তাণ্ডব চ’লেছে’। চায়ের পাত্রে ভুফান!

অনঙ্গমোহনের মনেও বুঝি বা ভুফান বইতে থেকেকে। রাধার মত একটি মেয়ের একটি মাত্র কথায় মন যেন তার ওলট-পালট হয়ে গেছে। কি অপরিসীম লজ্জাই না পেয়েছেন! দালানের অন্ধকারে গিয়ে মুখ লুকোতে হয়েছে শেষে কি না।

রাধারাণীও ক্রমে বুঝলো, তার রাঙাদাছ মনে মনে নিদারুণ লজ্জিত হয়েছেন! হার স্বীকার করে যেন পালিয়ে গেছেন ঘর থেকে। হার মেনে নিয়েছেন নীরবে।

ঘোড়দৌড় বা রেশ-খেলার লজ্জায় অনঙ্গমোহনকে যখন থেকে বেরিয়ে যেতে দেখে রাধারাণীও দুঃখ অনুভব ক’রলো। সেও এককণে লজ্জা পায়। কেন যে মরতে বলতে গেল এই ধরনের কথা, যে-কথায় এতটা বিব্রত ও সঙ্কুচিত হয়ে উঠেছেন রাঙাদাছ! দিন দিন কেমন যেন রাধারাণীর প্রকৃতিটা ঐ মাথার রুম্মকেশের মতই রুম্ম হয়ে উঠছে! যাকে তাকে বলছে এমন ধারার কথা, যে-কথায় মিষ্টি নেই শুধুই তিক্ততা। বড় যেন কটুভাষী হয়ে পড়ছে রাধারাণী!

—রাঙাদাছ!

ডাকলো রাধারাণী। ডাকলো স্নেহভরা কণ্ঠে।

কোন’ সাড়া মিললো না। অনঙ্গমোহন নিরুত্তর। নির্বাক।

আবার ডাকলো রাধারাণী,—ও রাঙাদাছ!

ডাক শুনে আর নিশ্চুপ থাকতে পারেন না। সাড়া দেন। বলেন,

—‘কি বলবে বল’।

রাধারাণী বলে,—রাঙাদাছ, সদর থেকে খোঁজ নিয়ে আসবো ?
মণিকাকা কলকাতা থেকে ফিরলো না যে এখনও !

—যাও না ভাই । বড্ড উপকার হয় । শ্রামাপদটা যে কোথায় ডুব
মারলো কে জানে ! ডেকে দিতে পারো ষ্টুপিডটাকে ?

অনঙ্গমোহন কথা বলেন সবিশেষ আগ্রহের সঙ্গে । কে বলবে পূর্ব-
মুহূর্তে তিনি এত লজ্জা পেয়েছেন । রাধারাণীর প্রস্তাবে স্বস্তির শ্বাস
ফেলেন ।

—যাই, তবে যাই ।

বললো রাধারাণী । ঘরের আয়নায় তখনকার মত নিজেকে সে শেষ
দেখে নেয় । কি উগ্রই না দেখতে হয়েছে ! রুম্মকেশের বাসি খোঁপা
যেন মাথা থেকে ঝুলে পড়তে চাইছে । অবাধ্য কুন্তলগুলি হাওয়ায়
উড়ছে থেকে থেকে । ফর্সা রঙ ; রুম্মতায় আরও যেন শুভ্র হয়ে গেছে
রাধারাণীর মুখ, হাত, পা । চোখের কোলে কি বিস্তীর্ণ কালি প'ড়েছে !

রাধারাণী তার নীলাশ্রীর নীল আঁচল উড়িয়ে অকস্মাৎ কখন যে
বেরিয়ে গেছে । অনঙ্গমোহন দরদালানে থেকে চুপিসাড়ে দেখছিলেন,
মেয়েটা কি ঘর থেকে গেছে ! ঘর শূন্য হয়েছে দেখে কিঞ্চিৎ আশ্বস্ত
হ'লেন । কিন্তু আবার যদি আসে ঐ মুখকাটা বাচাল মেয়েটা !

চন্দনপুরের বাতাসে চুরুটের উগ্রগন্ধ ছড়িয়ে দিয়েছেন অনঙ্গমোহন ।
মনের মধ্যে অধীর প্রত্যাশা ও নিবিড় ব্যাকুলতা । কত ঘন ঘন চুরুটে
টান দেন আজ । তেমনি অনর্গল ধূম উদ্গীরণও করেন । মাথার মধ্যে
ঘোর ছুশ্চিন্তা । অন্ধকার শূন্যে চোখ তুললেন অনঙ্গমোহন । কোথাও
কিছু চোখে পড়ে না নিঃসীম আধারে ! দূরে বহুদূরে গাছ-গাছড়ার ফাঁক
থেকে উঁকি মারে ইতস্তত কয়েকটি আলোকবিন্দু । এখানে সেখানে

ছড়িয়ে আছে, মৃতকল্পের আত্মার মতই যেন ধুক পুক করছে। যে-কোন ক্ষণে দপ্ করে নিবে যেতে পারে !

চন্দনপুরের দরিদ্র বাসিন্দাদের ঋড়ের চালায় আলো জ্বলছে।

বিজলী নয়, তৈল-প্রদীপ। আলোর তেজ নেই, তাই ক্ষণস্থায়ী। অনঙ্গমোহন বহু চেষ্টা সত্ত্বেও আর কিছু দেখতে পান না। সদরের ঘরে ঘরে উজ্জল-আলো জ্বলতে দেখেন ! ঘোর রক্তবর্ণ ভেলভেটের পর্দা ঝুলছে দেখেন।

কিন্তু, সারেঙ্গীর গুমরানি শুনলেন না কেন এখনও। নিজের কর্ণেন্দ্রিয়ের প্রতি সন্দেহ জাগে। হয়তো সারেঙ্গীতে সুর ধরা হয়েছে, তাঁর কানেই শুধু পৌঁছালো না।

আকাশে কি তারা ফুটেছে !

অনঙ্গমোহন আকাশে চোখ তুললেন। আকাশের ইদিক-সিদিক দেখলেন। ঘন তমসাবৃত আকাশ। সোনালী তারা জ্বলছে মাত্র কয়েকটি। কত দূরের ব্যবধান একের মধ্যে একের।

কিন্তু মণিমোহন এখনও পর্যন্ত ফিরলো না কেন ?

সর্বস্ব খুইয়ে ব'সে আছে হয়তো, এই একটি কথাই বারবার উকি-ঝুঁকি মারে মনশ্চক্ষে। যখনই মনে পড়ে হতাশার শ্বাস ফেলেন। দীর্ঘশ্বাস।

রেশখেলার সময় নয় এখন। ঘোড়দৌড়ের সীজন এটা নয়।

তথাপি, কলকাতার মত দুনিয়ার এক বিখ্যাত আজব শহরে জুয়ার আড়ার অভাব নেই ! কোথায় আছে সহজে জানা যায় না, খুঁজে নিতে হয় ! ঘোড়দৌড়ের ঋতুতে আর কোন বালাই থাকে না। অনঙ্গমোহন তখন তাঁর ছেলে মণিমোহনকে সোজা গড়ের মাঠে পাঠিয়ে দেন। মণিমোহনের জামার পকেটে দিয়ে দেন খেলার টাকা, আর তার মগজের মধ্যে দিয়ে দেন কয়েকটি বিশিষ্টতম ঘোড়ার নাম—যাদের

জন্ম-ইতিহাস আছে, যাদের পূর্বপুরুষ কোলিঙের প্রতিষ্ঠা ছিল।
তাদের নাম আর দেহের ওজন। কয়েকজন জকীর নাম।

এখন ঘোড়দৌড়ের সময় নয়।

এ খেলা যখন তখন খেলা যায় না। দিনকণ থাকে এ খেলার।
পালে-পার্কানে খেলতে হয়। তাও বেশীর ভাগ খ্রীষ্টানী পর্বে। একমাস
আর গুড ফ্রাইডের মহালগনে।

খোলা মাঠের খেলা নাই বা চললো।

তাই ব'লে বন্ধঘরের খেলা বন্ধ থাকবে না কি! কলকাতার মত
আজব শহরের অলিতে-গলিতে আছে এমন অনেক রুদ্ধদ্বারকক্ষ,
যেখানে দিবারাত্র টাকার খেলা চলেছে। টাকা টাকা খেলা। জুয়াখেলা।

সন্ধান খুঁজে পাওয়া গেলে আর আড্ডার পুরানো জুয়াড়ীদের সঙ্গে
আলাপ জমাতে পারলে, যে কোন লোক সেখানে গিয়ে কড়ি ফেলে
তেল মাখতে পারে; নির্দিষ্টবাদে।

মনিমোহনও গেছে কলকাতায়। কোন, জুয়ার আড্ডায়।

পাঁচ টাকাকে দশ টাকায়, দশকে বিশ, পঁচিশ, পঞ্চাশ, একশো
টাকায় পরিণত করতে গেছে। অবশ্য যদি ভাগ্যে থাকে, নয়তো সবই
যাবে। এক কপর্দকও থাকবে না। মনিমোহনকে স্বেচ্ছায় পাঠিয়েছেন
অনঙ্গমোহন। আজ নয়, অনেক দিন থেকেই পাঠাচ্ছেন। যতদিন
থেকে জমিদারী ভাগাভাগি হয়েছে। যতদিন থেকে জমিদারীর আয়
কমেছে। প্রজার দলকে দল মুখ ফিরিয়েছে।

ছেলেকে হাতে-কলমে শিক্ষা দিয়েছিলেন বাবা।

টাকা নিয়ে ছিনিমিনি খেলার গোপন রহস্যগুলি শিখিয়েছেন
অনঙ্গমোহন। ছেলে মনিমোহনের বুঝতে সময় লেগেছে। একদিনে
কিংবা এক বছরেই সে পাকা হয়নি। বছরের পর বছর ধরে কত অজস্র

টাকা জলাঞ্জলি দিয়ে তবে মণিমোহন এ লাইনের কিছু কিছু বুঝেছে।
জেনেছে।

কি এক শব্দ শুনেছেন অনঙ্গমোহন।

কার পায়ের শব্দ! যেন চেনা চেনা। মুখের চুপট নামিয়ে
রাখলেন ছাইদানে। সাততাত্তাতি এগোলেন। দরজার মুখে
দাঁড়িয়ে থাকলেন সাগ্রহে।

কিছু কি ছাই দেখা যায়!

বাবুদের ঘরে ঘরে আলো জ্বলছে। বাবুদের খাসকামরায় পঁচাত্তর
থেকে একশো বিদ্যুৎশক্তির বল জ্বলছে। অন্তরের দালানগুলোয়
কে জ্বলবে আলো! কার দায় পড়েছে যে বারোয়ারী দালানে আলো
জ্বলতে যাবে!

তাই কে আসে আর কে যায়, দেখা যায় না।

আর কতক্ষণ রুদ্ধশ্বাস হয়ে থাকবেন অনঙ্গমোহন।

থাকতে পারছেন না যেন! বললেন,—কে, মণিমোহন না কি?

—ই্যা বাবামশাই।

—এত দেরী কেন? আমিতো ভেবেই মারা হচ্ছি।

এতক্ষণ যার জন্ত মিনিট গুণছিলেন অনঙ্গমোহন, তাকে চোখের
স্বমুখে দেখতে পেয়ে যেন বিলকুল হুশিয়ারা ভুলে গেছেন। মনের কোন্ড
মুছে গেছে। ঘর্মাক্ত জামা খুলতে খুলতে ঘরে ঢুকলো মণিমোহন।

ভেতরের ছিঁড়ে-যাওয়া গেঞ্জীটা একেবারে ভিজ্জে গেছে ঘামে।
ঘরের বিজলী পাখার সুইচটা টিপে, জামাটি আনলায় রাখতে রাখতে
মণিমোহন বললে,—মিশ্ করেছি বিকেলের ট্রেনটা।

—আমিও তাই আন্দাজ ক'রেছি। বললেন অনঙ্গমোহন! আরাম-

কেদারায় নিশ্চিন্তায় বসতে বসতে বললেন!—আন্দাজ করেছি তো ঠিক।
মনটা যে আনচান করতে থাকে যতক্ষণ না ফিরতে দেখি তোমাকে!

মণিমোহন বিজলী পাথার নীচের মেঝেয় ব'সে পড়লো।

বড় বেশী ক্লান্ত মনে হচ্ছে নিজেকে। সেই সকাল সাড়ে দশটার
প্যাসেঞ্জার ট্রেনে যেতে হয়েছিল কোন' রকমে চান-খাওয়া সেরে।
নাকে-মুখে গুঁজে দৌড়তে হয়েছিল চন্দনপুর স্টেশনের পথে! স্টেশনে
যখন পা দিয়েছিল, ঠিক তখন প্যাসেঞ্জার ট্রেনখানা ত্রেক্ষতে কক্ষতে
চুকছে স্টেশনে। যদিও বা প্রায় ছুটতে ছুটতে পৌছানো গেল মুখে
রক্ত তুলে, সিঁড়ি ভেঙ্গে পেরোতে হয়েছিল ওভার-ব্রিজ—কাটতে
হয়েছিল থার্ড ক্লাসের টিকিট একখানা। সওয়া ছ' আনার।

তারপর ট্রেনে উঠে সে কি ভীড়ের সঙ্গে লড়াই! শুধু মাত্র দাঁড়ানোর
জন্ত একটুকু স্থানলাভের জন্ত কি ভীষণ ঠেলাঠেলি আর গুঁতোগুঁতি!
সহযাত্রীরা সকলে মানুষের মত মানুষ হ'লেও বিনা যুদ্ধে সূচাগ্র জায়গা
কেউই ছাড়তে চায় না। যাত্রীদের সঙ্গে কলকাতার বাজারের জন্ত
বৈশাখী ফলমূলও যে চলেছে। আম কাঁটাল লিচুর ঝুড়ি। কাঁদি কাঁদি
কলা। ঘরে কাটানো ছানার টুকরী শত শত। ট্রেনের মধ্যে পা দেয়
কার সাধ্য! ছানার চুয়ানো জলে জলময় হয়েছিল কামরাখানা।

—জুর কত ব্যগুই না হচ্ছিলেন আপনার তরে! কথা বলতে
বলতে শ্রামাপদ আসে। হ'হাতে তার চায়ের পিরিচ-পেয়ালা আর
খাবারের রেকাবী।

মেঝেয় নামিয়ে দিতে তর সয় না যেন মণিমোহনের।

কি জ্বালাময়ী ক্ষুধায় যে সে জলছে, কে জানবে, কে বুঝবে! এই
যে সারাটি দিন কলকাতার মত শহরের জুয়া আর জুয়াড়ীদের আড্ডায়
কাটিয়ে এলো মণিমোহন, কে তার সঙ্গে ছিল? কেউ নয়। একটিও

চেনা মুখ নেই। একজনও নেই। কত জাতের মানুষই না দেখে মনিমোহন! জুয়ার অভয়ায় পৃথিবীর কত জাতের মানুষই না আসে। দেশীর সঙ্গে বিদেশীর এক হওয়ার এমন বিচিত্র মিলন-মন্দির দুনিয়ায় আর কি আছে! মাঝে মাঝে হাসি পায় মনিমোহনের, ইংরাজ-কবি রাডিয়র্ড কিপ্লিং-এর কাব্য-পঙ্ক্তি মনে পড়লে মনিমোহন হাসে। কিপ্লিং নাকি কাব্য করে বলেছিলেন, ইষ্টের সঙ্গে ওয়েষ্টের মিলন নৈব নৈব চ।

একটা টোষ্ট, স্নন-মরিচ মাখানো একটা টোষ্ট এক নিমেষে যেন খেয়ে ফেললে মনিমোহন। আরেকটি টোষ্ট মুখের কাছে তুলে ধরে বললেন,—সদরে আজ এত আলো কেন?

এক অদ্ভুত রহস্যপূর্ণ হাসি ফুটলো অনঙ্গমোহনের মুখে। এতক্ষণে হাসলেন ষৎসামান্য। সারাদিনে এই বুঝি প্রথম হাসলেন। বললেন,—শুনছি, আজকে নাকি হোল্ নাইট পারফরমেন্স। কলকাতা থেকে বাঙ্গীজী আসছে।

—তাই নাকি? বাঙ্গীজী আসছে?

টোষ্টে কামড় দিতে দিতে বললে মনিমোহন। কথার শেষে চায়ের পেয়ালা তুললো অগ্র হাতে। গলা ভিজিয়ে নিতে চায় হয়তো।

—হ্যাঁ, তাইতো শুনছি। কিন্তু—

কথা শেষ করলেন না অনঙ্গমোহন।

শ্রামাপদ যে জলজ্যান্ত দাঁড়িয়ে আছে! সে ভৃত্য, তার সামনে কখনও বলতে পারেন! সামলে নিলেন কথা।

চায়ের পেয়ালায় গোটা দুয়েক চুমুক দিয়ে মনিমোহন বললে,—কিন্তু?

—আচ্ছা, আই উইল্ টেল্ ইউ আপটারওয়ার্ডস্। পরে বলছি তোমাকে। তুমি আগে খেয়ে নাও। ফিনিশ্ ইওর মিল্।

শ্রামাপদের প্রতি দৃষ্টি ফিরিয়ে কথা বলেন অনঙ্গমোহন।

মনিমোহন চোখের ইসারায় কি যেন বললে শ্রামাপদকে । কীণ হাসির সঙ্গে কি একটা ইসারা করলো । যাকে করলো সে আর কালবিলম্ব করলো না, চলে গেল তৎক্ষণাৎ ।

অনঙ্গমোহন বললেন,—বলছিলাম কি, তুমি যেন জ্বয়েন্ ক'রো না । ডোন্ট্ পারটেক্ ! যেও না যেন ঐ বাড়ীজীর জলসায় ।

—আপনি বেঁচে থাকতে আমি বাড়ীনাচ দেখতে যাবো ? আপনি কি তাই মনে করেন আমাকে ?

মনিমোহন কেমন যেন উগ্র মেজাজের স্বরে কথা বললে । তাকিয়ে রইলো পিতার চোখে চোখ রেখে । হাতের পেয়লা মেঝেয় নামিয়ে রাখতে যাবে এমন সময়ে মিহি কণ্ঠে বললেন অনঙ্গমোহন,—নেভার, নেভার, তোমাকে আমি তেমন মনে করি না বলেই বলছি । কৈ, বাড়ীর অগ্র কাকেও ডেকে আমি বলতে গেছি !

—ভেবেচিন্তে কথা বলবেন আপনি ।

রুদ্ধস্বরে বললে মনিমোহন । রেকাবী থেকে তুলে নিলে কি একটি সন্দেশ । দোকানের তৈরী, নরম পাকের । কামড়ে কামড়ে আর খায় না এ সাইজের সন্দেশ, তাই একগালে পুরে ফেললো । যদি বা আরও একটি থাকতো রেকাবীতে । একটি মাত্র, তারই নাকি দাম চার আনা ।

—ভুল হয়েছে আমার । আকাশে মেঘ দেখলেই যে ভয় পাই । আই বেগ্ ইওর পার্ডন ।

কেমন যেন অশুশোচনার সঙ্গে বললেন অনঙ্গমোহন । আরাম-কেদারায় এলিয়ে দিলেন দেহ । ছ'চার সেকেণ্ড নীরব থেকে বললেন,—লেট্ ইট্ গো । যেতে দাও । এখন যেজন্তে গিয়েছিলে তার কি রেজ্যান্ট্ তাই বল । কি ফলাফল !

পেয়ালায় শেষ চুমুক দেয় মনিমোহন।

আকণ্ঠ চা পান করে। যতটুকু অবশিষ্ট ছিল থেয়ে নেয় এক চুমুকে। পেয়লা নামিয়ে রেখে বললে,—জিতেছি আজ। আমার পকেটে টাকা আছে, উঠে দিচ্ছি আপনাকে।

খুশীর উচ্ছ্বাসে হেসে ফেললেন অনঙ্গমোহন। শিশুহুলভ হাসি।

হাসতে হাসতেই বললেন,—কনগ্র্যাচুলেসন! কনগ্র্যাচুলেসন! তুমি দেখছি একটা পাক্স খেলোয়াড় হয়ে উঠলে। কি খেললে আজ?

—তাস। বললে মনিমোহন। বললে,—চীনেপাড়ায় গিছলাম আজ। ফিয়াস'লেনে। লালবাজারের কাছাকাছি।

হাসি থেমে গেছে, মুখের হাস্যরেখা তবু মিলোয় না। হাসি-হাসি মুখে অনঙ্গমোহন বললেন,—ক' রাউণ্ড খেললে?

—তেরো রাউণ্ড। ঠিক মনে নেই। এক আধ রাউণ্ড কম বেশীও হতে পারে।

কথা বলতে বলতে উঠে পড়লো মনিমোহন। দেওয়ালের ঝোলানো আলনার টাঙানো জামার পকেট থেকে বের করলো লম্বা লেফাফা একটি। ভাঁজ করা খাম।

অনঙ্গমোহনের বুকের ভেতরে কে বুঝি হাতুড়ী পিটছে!

কি অদম্য উৎসাহ, কি ব্যাকুল ব্যগ্রতা! আনন্দের আতিশয্যে হয়তো বা প্যাল্পিটেশন হচ্ছে। ইজি চেয়ার ছেড়ে উঠে পড়েন আর কি অনঙ্গমোহন! খামটি তাঁর হাতে পড়তেই তিনি বললেন,—কত টাকা নিয়ে গিয়েছিলে, আছেই বা কত?

খেকিয়ে উঠলো মনিমোহন। বিরক্তির সঙ্গে বললে,—মনে নেই আপনার? দিয়েছিলেন মাস্তুর কুড়িটি টাকা, হু'খানা দশ

টাকার নোট। আর খামের মধ্যে আছে পুরো আশী টাকা, আটখানা দশ টাকার নোট। খুলে দেখুন না কেন!

—গাটস রাইট। বললেন অনঙ্গমোহন।

মনিমোহনের আর এক দণ্ড সেখানে দাঁড়াতে মন চায় না। দেওয়ালের আলনা থেকে টাঙিয়ে রাখা জামাটি পেড়ে নিয়ে ঘর থেকে বেরিয়ে যায়। চায়ের পর আর যাই হোক, একটি সিগারেট না ধরালে কখনও ভাল লাগে? সিগারেট খাওয়ার টাইম এখন মনিমোহনের—জন্মদাতা হলে কি হবে অনঙ্গমোহনও তা জানতেন। এখন অন্ততঃ আর কিছুক্ষণের জন্তু আর টিকি দেখতে পাওয়া যাবে না ছেলের। একটা কাঁচি সিগারেট সতক্ষণ না শেষ হচ্ছে।

আবার কতক্ষণ পরে সাক্ষাৎ মিলবে, তাই অনঙ্গমোহন ডাকলেন,—মনিমোহন, যেও না, শুনে যাও। কথা আছে।

ফিরে এলো মনিমোহন।

বললে,—কি বলছিলেন?

—তুমি যে টাকা চেয়েছিলে। বলেছিলে, দর্জির দোকানে তোমার তৈরি জামা নাকি পড়ে আছে, টাকার জন্তে আনতে পারছে না! কত টাকা?

অনঙ্গমোহন খামের মুখে আঙ্গুল চালাতে চালাতে কথা বলেন। কাজ মিটিয়ে নিতে চান তিনি। ফেলে রাখতে চান না ভবিষ্যতের প্রতীক্ষায়।

—সাড়ে আট টাকা। চারটে সাদা টুইল সার্টের মেকিং চার্জ। বললে মনিমোহন। বিরস কণ্ঠে।

—এই নাও। হ্যাভ্‌ ইট্‌ উইট্‌ ইউ।

কথা বলতে বলতে একখানি দশ টাকার নোট তুলে ধরলেন

অনঙ্গমোহন। বললেন,—বাকী আর ফেরৎ দিতে হবে না। থাক তোমার কাছে। তোমার কখন কি দরকারে লাগে।

দশটাকার নোটখানি নিয়ে নীরবে ঘর থেকে বেরিয়ে গেল মনিমোহন। একটি বাক্য ব্যয় করলো না।

হাতে যেন স্বর্গ পেয়েছেন অনঙ্গমোহন। এতই আনন্দ। কত কত দিন যে মন খুলে হাসেন নি তার ঠিক আছে! জুয়া বা ঘোড়দৌড়ে দশ বিশ ত্রিশ টাকা পাওয়াটা এমন কিছু কল্পনার অতীত নয়, বরং হামেশাই মেলে। পঞ্চাশোর্দেও ওঠে কখনও কখনও। এমন কি শতাধিকও কতদিন মিলেছে। তবু আজকের টাকা হস্তগত হ'তে মন মেজাজ অত্যন্ত রকম হয়ে যায়; ঠিক মস্তবলে কে যেন বদলে দেয় অনঙ্গমোহনকে। উৎফুল্ল হয়ে তিনি ডাকলেন—শ্যাম!

অনেক দূরে ছিল শ্যামাপদ।

অনন্দের এক সিঁড়ির মুখে ছিল। কার সঙ্গে যেন কথা বলছিল ফিসফিসিয়ে। মনিবের ডাক তার কানে পৌঁছেছিল এত দূর থেকেও।

অনঙ্গমোহন পুনরায় ডাকলেন—শ্যামা! শ্যামাপদ!

ঘরের অনেক দূরে ছিল শ্যামাপদ।

সিঁড়ির মুখে দাঁড়িয়ে কথা বলছিল কার সঙ্গে। ফিস ফিস কথা। রাধারাণীর সঙ্গে কথা বলছিল। মনিমোহন কলকাতা থেকে ফিরেছে, সেই সংবাদ দিতে আসছিল রাধারাণী। শ্যামাপদের সঙ্গে দেখা হওয়ায় সে আর আসতে দেয়নি রাধাকে। বলেছিল,—দাদাবাবু, যখন ঘরে এসে গেছে তখন আর যেতে হবে না কষ্ট ক'রে।

রাধারাণী বলেছিল,—মনিকাকা ঘরে গেছে রাঙাদাছুর?

—হ্যাঁ। তোমাকে আর যেতে হবে না। কথা বলতে বলতে

খানিক খেয়েছিল শ্রামাপদ । ইদিক সিদিক চোখ ফিরিয়ে বলেছিল,—
একটি বর না হ'লে যেন আমাদের রাধাদিদিকে আর মানাচ্ছে না ।

অন্ধকারে কারও মুখ কেউ দেখতে পায় না ।

তা না হ'লে শ্রামাপদ দেখতো যে, রাধার মুখে বুঝি আবেগের
কালো মেঘ নেমেছে । অপরিসীম লজ্জায় সে নতমুখী হয়ে থাকে
কিছুক্ষণ । তারপর কণ্ঠস্বর স্পষ্ট ক'রে বলে,—মেয়েদের কার না আর
সাধ যায়, বিয়ে হোক, স্বত্তরবাড়ীর ঘর সংসার করুক ।

—তা তো বটেই । তা তো বটেই । বলেছিল শ্রামাপদ ।

রাধারাণী ক্ষুব্ধকণ্ঠে বলেছিল,—বিয়ে হওয়া না হওয়ায় আমার কি
কোন হাত আছে ? দাদারা অত টাকা খরচ করবেই বা কোথা
থেকে, ছেলের পক্ষ যদি এখন কাঁড়ি কাঁড়ি টাকা চায় ? তাও শুধু
টাকা নয়, পঞ্চাশ ভরি সোনা চাই, খাট-বিছানা আলমারী চাই,
বরের ঘড়ি, আঙটি, বোতাম চাই ।

মনিবের কাতর ডাক শুনে শ্রামাপদ বললে,—বুড়ো ডাকছে
রাধাদিদি । বরপক্ষের যে এত বেশী দাবী তাতো জানতুম না ।

অন্ধকারে দু'জনে দু'দিকে মিলিয়ে যায় ।

—ডাকছিলেন হজুর ?

ঘরে গিয়ে ভয়ে ভয়ে বললে শ্রামাপদ । সসঙ্কোচে ।

—তুমি ছুটি নাও শ্রামাপদ । জাষ্ট্ টেক লীভ । আমি তোমাকে
ছুটি দিচ্ছি ।

অত্যন্ত সহজ স্বরে কথা বলেন অনঙ্গমোহন । অত্যন্ত ধীরে ধীরে ।

—কেন হজুর একথা বলছেন ? অধমের অপরাধ ?

শ্রামাপদ বিস্ময়াবিষ্ট হয়ে কথা বলে ।

অনঙ্গমোহন সহজ স্বরেই বলেন,—ডাকলে যদি সাড়া না পাওয়া যায়, ঘণ্টায় চার বার ক’রে তুমি যদি এখন ডুব মারতে চাও তা হ’লে আমি তো নাচার। তার চেয়ে টেক্ মীড্ এও গো হোম। আমি অন্য লোক দেখি।

হতাশ-চোখে চেয়ে থাকে শ্রামাপদ। কথাগুলি শুনে একটি দীর্ঘশ্বাস ফেলে। মনিবের চোখে চোখ রাখতে পারে না, ঘরের মেঝেয় চোখের দৃষ্টি নামায়। সলজ্জায়!

—কথা কইলে না যে?

যাকে তিরস্কার করছেন তার নীরবতা অসহ্য মনে হওয়ায় অনঙ্গমোহন পুনরায় কথা বলবেন।—কথা কইলে না যে?

মেঝের থেকে চোখ তোলে না শ্রামাপদ। আনত দৃষ্টিতেই কথা বললে,—এই শেষ বয়সে কোথায় আর যাবো, কে কাজ দেবে?

—জাট আই নো নট। তা আমি জানি না। বললেন অনঙ্গমোহন। বললেন,—ইম্পার্টিনেন্ট, ফুল! তোমাকে ডাকতে ডাকতে আমার গলার শির বোধ হয় ছিঁড়ে গেল! তোমাকে ডাকাডাকি করতে দেখছি একটা লোক পুষতে হবে!

শ্রামাপদ আমতা আমতা করে। বলে,—কোন কাজকর্ম ছিল না এখন। দাদাবাবুকে চা জলখাবার দিয়ে ঐ দালানে গিয়ে দাঁড়িয়েছি আর আপনিও ডেকেছেন। আপনি আর দাদাবাবু হয়তো কোন প্রাইভেট কথা কচ্ছিলেন তাই আমিও আর—

—ঢের হয়েছে! আর সাফাই গেলো না, থাক। বললেন অনঙ্গমোহন। বললেন—আমি এক কাপ চা খেতে চাই। পাওয়া যাবে?

মনিবের কথার মোড় ঘুরেছে, মনে মনে উল্লসিত হয় শ্রামাপদ।

বলে,—এখনি দিচ্ছি হজুর । তখন তো কিছু মুখে তোলেন নি ।
ছ'খানা টোষ্ট ?

—না, আর কিছু নয় । শুধু এক পেয়ালা চা ।

কথার মাঝেই কথা বললেন অনঙ্গমোহন ! কথার শেষে আরাম-
কেদারায় দেহ এলালেন । হাতের মুঠোয় ধরে আছেন জুয়া
খেলায় জিত হওয়ার টাকা ভর্তি খাম । একান্ত পিতৃভক্তের মত যে-
টাকা খানিক আগে মনিমোহন হাতে তুলে দিয়ে গেছে ।

টাকা হাত পেতেই নিয়েছিলেন, কিন্তু মনের মধ্যে কোথায়
যেন বার বার খোঁচা লেগেছিল । অপমানের খোঁচা । অনঙ্গমোহনকে
শেষে কিনা ছেলের কাছে হাত পাততে হয় ! কি লজ্জার কথা !
যদিও তাঁর এমন দুরবস্থা কোনদিন আসেনি ইতিপূর্বে । জমিদারীর
আয় বর্তমানে সিকির সিকি হয়ে গেছে । নামমাত্র আয় । নামেই
মাত্র জমিদারী । তাতেই এখন এই ভিক্ষা চাওয়ার অপমান সহ
করতে হচ্ছে ।

মনিমোহন ছেলেটার সব ভাল, শুধু যা ঐ গোঘারগোবিন্দর মত
কথায় কথায় মাথা গরম করে বসে থাকে, কিন্তু মধ্যে মধ্যে যখন মারমুখো
হয়ে ওঠে তখন যেন ভয় করে । হবে নাই বা কেন ! জুয়ার আড্ডার
ক্ষণিকের বন্ধুদের প্রভাব থেকে মুক্ত থাকবে, মনিমোহন এমন কিছু
নিলিপ্ত সাধু-সন্ন্যাসী নয় । জুয়া যারা খেলতে যায় তাদের কি মূর্তি !
তাদের মুখে কি অভদ্র ভাষা ! কি অনগ্রসাধারণ তাদের ভাবভঙ্গী
আর আদব-কায়দা । যেন কোন এক অদ্ভুত জগতের মানুষ !

কালে-ভদ্রে হ'লে না হয় কথা ছিল, দিনের পর দিন যদি যেতে
হয় সেই আড্ডায়, কে আর ভাল থাকতে পারে ! মনিমোহন কি
মানুষ ছাড়া আর কিছু ?

অনঙ্গমোহন তাই যখন তখন ছেলের চিন্তায় আকুল হয়ে যান।

কিন্তু তিনি কি করতে পারেন? খেয়ে প'রে বাঁচতে হ'লে একটা কিছু উপায় অবলম্বন করতেই হয়, সং হোক অসং হোক, যা হয় একটা। অনঙ্গমোহনও তাই পিতা হওয়া সঙ্গেও নিজেই নিজের ছেলের হাতে টাকা তুলে দেন। রেস্ আর জুয়ার টাকা। তাঁর নিজের সামর্থ্য থাকলে নিজেই যেতেন। নেহাৎ শরীরটা বাধ সাধে, বয়সটাও বাধা দেয়। চূপচাপ থাকতে থাকতে মাঝে মাঝে কেমন যেন বিব্রত হয়ে উঠেছেন অনঙ্গমোহন। কি এক শব্দ শুনেছেন কাণে! কর্ণেন্দ্রিয় সজাগ করেন। কাণের দোষে কিনা কে জানে কাণে যেন চাপা কান্না শুনেছেন থেকে থেকে। রাত্রির অন্ধকারে দিগ্বিদিক নীরব এখন। তবুও কি ভুল শুনেছেন তিনি।

কল্যাণী বৌ কি এখনও কান্না থামায় নি!

রাসমোহনের স্ত্রী কল্যাণী। এখনও সে কি কাঁদছে! সামান্য একটু আইওডিনও কেউ দিতে পারলো না তার রক্তাক্ত ক্ষতস্থানে?

এলোমেলো কত কথাই মনে উদয় হয় অনঙ্গমোহনের! যদিও তিনি নিরুপায়। তার কিছু করবার নেই। শরিকের ঘরোয়া কথায় কথা কইতে যাওয়ার মত মূর্খামি আর কিছু আছে না কি! অন্তের ঘরের কথার মাঝে নাক গলাতে কে যায়, একান্ত মূর্খ ছাড়া?

—হজুর চা এনেছি।

শ্রামাপদর কথা শুনে চোখ খুললেন অনঙ্গমোহন। এতক্ষণ দু' চক্ষু বন্ধ ক'রে ফেলেছিলেন, শুনেছিলেন কেউ কাঁদছে কি না। কল্যাণী বৌমার কাতর কান্নার আওয়াজটুকু এখনও যেন কানে ভাসছে তাঁর। হঠাৎ কথা বললেন তিনি,—মনিমোহনের আর দোষটা কি বল'?

—কেন হজুর, দাদাবাবু আবার কি দোষ করলে ?

কথার ঈর্ষ্য ব্যগ্রতা শ্রামাপদ ।

—না তাই বলছিলাম । বললেন অনঙ্গমোহন, চায়ের পেয়ালা বসানো পিরিচ হাতে নিয়ে বললেন,—তাই বলছিলাম যে, আমি যদি তার অন্নদাতা বাপ হয়ে তাকে জুয়া খেলতে পাঠাই, তাতে আর দোষ কি ?

—হজুর আমি আর কি বলবো ? হজুর, যা ভাল বোঝেন করেন । অনঙ্গমোহন কথার কোন জবাব দিলেন না ।

নিরন্তর হয়ে রইলেন । চায়ের গরম পেয়ালার কিনারায় মুখ ঠেকালেন, কিন্তু এক বিন্দুও পান করলেন না । মুখ ঠেকিয়ে থাকলেন কয়েক মুহূর্ত । কি যেন ভাবছেন, একাগ্রচিত্তে । চোখের দৃষ্টি একদিকে নিবিষ্ট ।

—হজুর, আবার যেন জুড়িয়ে ফেলবেন না পেয়ালার চা । গরম-গরম খেয়ে নেন তো ভাল হয় ।

—এঁা ? হ্যাঁ, বাই । ওদিকে অনঙ্গের কি ব্যাপার শ্রাম ? কথার শেষে এক চুমুক চা পান করলেন অনঙ্গমোহন ।

রহস্য মাখানো হাসি হাসলো শ্রামাপদ । শব্দহীন হাসি । বললে,—আর বলবেন না হজুর । একেবারে তুলকালাম কাণ্ড । কান পাতা যায় না, চোখে দেখা তো দূরের কথা ।

পেয়ালায় আরও কয়েকটি ছোট ছোট চুমুক দিয়ে অনঙ্গমোহন বললেন,—কেন রে, কি হ'ল আবার ?

ইতি উতি দেখলো শ্রামাপদ । যদি কেউ গুনতে পায় !

বললে,—টাকা তুলতে হচ্ছে যে হজুর ! বাবুরা একটা ফণ্ড করেছে । টাকা উঠানো হচ্ছে । টাকার যোগাড় করতে হচ্ছে বাবুদের ।

—কত টাকার দরকার হ'ল যে টাকার জন্তে বাড়ীতে হলুদুল পড়ে গেল ? কি রাজস্বয় যজ্ঞটা হচ্ছে গুনি ?

কথা শেষ ক'রে আবার মুখে পেয়লা তুললেন অনঙ্গমোহন ।

শ্রামাপদর মুখের হাসি মিলিয়ে যায় মূর্ত্তমধ্যে । বলে,—খরচা নেই হজুর, বলেন কি ?

—কেন ? কত আর খরচা ? বাইনাচে আর কত খরচা লাগে ?

—তুধু বাইনাচ কি হজুর, আরও কত কি । ক' ডজন মদের বোতল যে এয়েছে খোঁজ নেন না একটিবার । শত খানেক বোতল জলসোড়া, টিন টিন দামী সিগারেট আর চুরুটের বাস । ওদিকে ভিয়েনে মাংস, চিংড়ীর কাটলেট, লুচি তোয়ের হচ্ছে বেলা একটা থেকে ।

এক নিশ্বাসে কথাগুলি বলে গেল শ্রামাপদ ।

—ও গড্ ! তাই না কি ?

শুধালেন অনঙ্গমোহন ।

—তুধু তাই হজুর ? বাইদের পায়ে কি আর ছ' চারখানা গয়না-গাটি পড়বে না ভেবেছেন ?

মুহু হাসি হেসে বললে শ্রামাপদ ।

অনঙ্গমোহনও সহাস্তে বললেন—না, আমি কিছুই ভাবিনি । গয়নাগাঁটিও পড়বে তুমি বলতে চাও ?

—পড়বে বৈকি, পড়বে না আবার ! টাকা পড়বে, গিনি-মোহর পড়বে, তারপর গয়না পড়তে থাকবে ।

শ্রামাপদর কথায় অস্বাভাবিক নিশ্চয়তা । সে যেন ভবিষ্যদ্রষ্টা, যা বলে তাই হয়, এমনই তার কথার স্বর ।

—গয়না ! বল' কি শ্রাম ?

চায়ের পেয়লা টেবিলে রাখতে রাখতে হাসি মুখে বলেন অনঙ্গমোহন ।

—হ্যাঁ, হজুর হ্যাঁ । বললে শ্রামাপদ,—তখন কি আর জ্ঞান

থাকবে বাবুদের কারও ! ঐ রকম চড়া চড়া বিলীতি মদ পেটে পড়লে
কি জ্ঞান থাকে কখনও কারও ?

—তা বটে । গাট্‌স্‌ রাইট । ইউ আর এ্যাবসোলিউটলি রাইট ।
ঠিক তো, বিলীতি মদ কি যা তা চীজ ?

সবিস্ময়ে কথা বলেন অনঙ্গমোহন !

কথা মেনে নিয়েছেন মনিব । তবুও কথায় আরও জোর দিয়ে
শ্রামাপদ সদন্তে বললে,—আমি ছজুর বাজে কথা বলি না । আপনি
দেখে নেবেন, কথা আমার ফলে কি না ফলে !

অনঙ্গমোহনের দৃষ্টিতে বিস্ময় । তিনি বললেন,—এমন এ্যামিউজ-
মেন্টের দরকারটা কি ? ঘরের মেয়ে-বৌয়ের গায়ের গয়না খুলে
বাঁধনাচ দেখতে হবে ?

শ্রামাপদ বললে,—হাতে কি আর কারো কিছু আছে বাবুদের ?
কিছু নেই, কিছু নেই । হাতে পয়সা নেই, উত্থনে জ্বাণ্ডন পড়েনা,
পরণের কাপড় জোটেনা, তবুও বাবুদের সখ বলিহারী !

কিন্তু আজ ?

আজ বাবুদের বাড়ীতে ভাই ভাই ঠাই ঠাইয়ের বেদনাপূর্ণ দৃশ্য
আর দেখতে হবে না । আজ সকলেই এক । কলহ আর হৃন্দ, মামলা
আর মোকদ্দমার তিক্ত অভিজ্ঞতা কি বেমানুম ভুলে গেলেন মুখোপাধ্যায়
বংশ ? যতই হোক সকলের শরীরে একই রক্তপ্রবাহ । এক মহীরুহের
সহস্রশাখা পরস্পর । মুখ দেখাদেখি নেই, বাক্যালাপ দূরের কথা । শ্রেফ
নর্তকীর পায়ের না-শোনা ঘুঙুরের ঝামাঝম শব্দ আর না-দেখা নর্তকীকে
হাতের নাগালে ও চোখের সমুখে দেখতে পাওয়ার লোভে বাবুরা আজ
রাতারাতি অজাতশত্রুর রূপ ধারণ করেছেন । ফাণ্ড তৈরি হয়েছে একটা

মোট। রকমের। যেখান থেকেই হোক, যে যেমন পারছেন দিয়েছেন।
চাঁদার ফাণ্ড, বাবুদের একেক জনের সাধো যা যতটুকু কুলিয়েছে,
দিয়েছেন। কেউ কেউ এখনও টাকার যোগাড় করতে পারেন নি শত
চেষ্ঠাতেও। তাঁরা টাকার বদলে কথা দিয়েছেন। প্রতিশ্রুতি দিয়েছেন।

শুধু ডাক পড়লো না অনঙ্গমোহনের।

কেউ ডাকলো না তাঁকে। হয়তো কারও সাহসে কুলায় নি।
বংশের মধ্যে বয়স ও সম্মানে জ্যেষ্ঠতম অনঙ্গমোহন, কে ডাকবে
তাঁকে! আমোদ-আহ্লাদে বয়স ব'লে একটা কথা আছে, যেটিকে
অমান্য করা যায় না কোন মতেই। স্মৃতির আড্ডায় সমবয়সীদের
সম্মিলনই বাঞ্ছনীয়, বাবুরাও তারই পক্ষপাতী।

—শ্যামাপদ!

বেশ কিছুক্ষণ গভীর থাকতে থাকতে হঠাৎ কথা বললেন
অনঙ্গমোহন। কোন্ এক গভীর চিন্তায় ডুবে গিয়েছিলেন যেন এতক্ষণ।
বললেন,—বাড়ীতে তা'হলে আজ কুরুক্ষেত্র, কি বল শ্যামাপদ?

—তা আর নয় হুজুর! এখন ভালয় ভালয় রাতটা কাটলে
বাঁচি! এ বাড়ীর বাবুরা একেকটি অমানুষ! শ্যামাপদ এই
কথাগুলি স্বগত করলো। সভয়ে দেখলো মনিবের মুখপানে, যদি
তাঁর কোন ভাবপরিবর্তন হয়।

কিন্তু অনঙ্গমোহন যেন পাষাণ! ডেম্পারেট! স্ক-ফ্রন্ড!

তাঁর মুখভঙ্গীতে পরিবর্তনের কোন চিহ্নই ফোটে না। আরাম
কেদারার হাতে হাত বুলাতে থাকেন। স্থিরদৃষ্টিতে বসে থাকেন,
পুরানো রোগীর মত।

শ্যামাপদ বললে,—হুজুর, জনা চারেক হালুইকর বামুন এসেছে

কলকাতা থেকে। চপ্ কাটলেট ক্রাই আর পটলের দোরমা তৈরী হচ্ছে বাবুদের জন্তে। চিংড়ী মাছের পোলাও তৈরী হচ্ছে। আদার চাটনী, রাধাবল্লভী, কত কি তৈরী হচ্ছে !

—অম্মানে তা আমি বুঝেছি। বাতাসে গন্ধ পেয়েছি মশলা পেঁয়াজের। কলকাতার হালুইকর তাও গন্ধ পেয়ে বুঝেছি।

ঠিক যন্ত্রের মতই কথাগুলি বলে গেলেন অনঙ্গমোহন। একান্ত নির্বিকারের মত।

শ্রামাপদ ঘরের ঘড়ির দিকে তাকালো। কিসের যেন সময় উৎরে যাচ্ছে, এমনই ভয়ান্ত-কণ্ঠে বললে,—রেডিওটা খুলে দিই হুজুর।

অনঙ্গমোহনও ঘড়ি দেখলেন। বললেন,—হ্যাঁ, নিশ্চয়ই। বাঙলা নিউজের টাইম হয়ে এসেছে তো। দাও, দাও চালিয়ে দাও রেডিওটা।

ঘরে আছে একটি অল্‌ওয়েভ্‌ সেট।

এইচ, এম, ভির তৈরী দামী মডেল। অনঙ্গমোহন নিজে বাঙালী, কোথায় কলকাতা বেতার কেন্দ্র গুনবেন, তা নয়। দিল্লী থেকে যখন বাঙলায় সংবাদ বলে শুধু ততক্ষণই বেতার-ভারতের সঙ্গে অনঙ্গমোহনের সম্পর্ক। অগ্ন্যান্ত সময় যখন ইচ্ছা হয় তখন ধরেন যত করেন স্টেশন,—বি. বি. সি, প্যারী, স্পেন, বার্লিন কিম্বা টোকিও।

রাত্রি গভীর হওয়ার সঙ্গে সঙ্গে যখন দিকে দিকে নিঃশুমতা, তখন দূরদূরান্তরের ভেসে-আসা কণ্ঠ ও যন্ত্রসজ্জীত শোনা যায় অতি স্পষ্ট। অনঙ্গমোহন হয়তো তাদের ভাষা বোঝেন না, কিন্তু স্বরের মূর্ছনা কার না ভাল লাগে! স্বরের পূজারী অনঙ্গমোহন, মধ্যরাতে গৃহে পরিপূর্ণ শান্তি যখন বিরাজ করে তখন তিনি শোনেন যত বিদেশী সিম্ফনি, অর্কেস্ট্রা। স্প্যানিশ সারিনেড্‌।

নতুন দিল্লী থেকে বাঙলা সংবাদ পরিবেশন শুরু হয়ে গেছে এই মাত্র।

এখন আর কোন কথা নয়, কাজও নয়, এখন শুধু নীরবে ব'সে থাক। অনন্তসাধারণ মনোযোগের সঙ্গে চুপচাপ শুনবেন এখন অনন্তমোহন। সরকারী টুটি-বাঁধা যতেক টাটকা খবর শুনবেন হিল্লী, দিল্লী আর লাহোরের।

রেডিওতে বাঙলা খবর বলছে।

তবুও আজ অনন্তমোহন ইশারায় ডাকলেন শ্রামাপদকে। ডাকলেন অতুলিনির্দেশে। একেবারে কাছাকাছি আসতে চুপি চুপি বললেন,— একটা জরুরী কথা বলি।

আরও কাছে এগিয়ে আসতে হয় শ্রামাপদকে।

অনন্তমোহন ফিস ফিস করলেন,—বাড়ীতে আজ এমন একটা ফেষ্টিভ্যাল, শুনলাম, তুমিই তো বললে ভাল-মন্দ কত কি রান্না হচ্ছে, পারো যদি দেখো, আমার জন্তে খানকয়েক চপ কার্টলেট যদি জোগাড় করতে পারো।

এক নিশ্বাসে কথা ক'টি বলে গেলেন।

কথা বলার সময় এখন নয়। তবুও হয়তো হাওয়ায় ভেসে-আসা মশলা আর প্লেমাজের উগ্রগন্ধের লোভে লোভে দৈনন্দিন নিয়ম ভঙ্গ করলেন! দিল্লীর খবর শুনতে শুনতে কথা বললেন!

শ্রামাপদ শুধু বললে,—ছজুরের যেমন ছকুম হবে। ছজুরকে কেউ দ্বিক আর না দ্বিক, আমি হালুইকরদের ছ'চার আনার পান খাইয়ে ছজুরের জন্তে চপ, কার্টলেট, ফেরাই ঠি—ক জোগাড় করে আনবো। কথা বলতে বলতে এক মুহূর্ত্ত থামলো শ্রামাপদ। বললে,—দেখলেম হারাণ হালুইকর এয়েছে।

—তাই নাকি? হারাণ হালুইকর? অনেকদিন হারাণের রান্না খাইনি।

—হ্যাঁ, হুজুর। কথার মাঝে আবার একবার থামল শামাপদ।
কিসের এক সঙ্কোচ কাটিয়ে বলে ফেললে,—তা হুজুর, হালুইকরদের
যদি পান খাওয়াতে হয় দু'চার আনা পয়সা চাই যে।

—তা বটে। তবে দাও আমার মানি ব্যাগটা দাও।

অনঙ্গমোহন মনে মনে বিরক্ত হলেও অন্তোপায় হয়ে বললেন।
টেবিলে ছিল কুমীরের চামড়ার একটি পকেট ব্যাগ। শামাপদের
হাত থেকে ব্যাগটি ছিনিয়ে নিলেন চক্ষের নিমেষে। ব্যাগের মুখ খুলে
দেখে দেখে একটি সিকি বের করে দিলেন। চার আনা পয়সা খরচ
করলে যদি দু'পাঁচখানা চপ, কার্টলেট, ফ্রাই খেতে পাওয়া যায়!

হাতের সিকি আলোয় ধ'রে ঘুরিয়ে ফিরিয়ে দেখতে দেখতে নিজের
এক কানে পু'রে ফেললো শামাপদ। বললে,—দেখি গিয়ে কতদূর
কি হ'ল, কে কে এলো!

অনঙ্গমোহন শুনলেন কি শুনলেন না।

নতুন দিল্লী থেকে বাঙলায় খবর বলছে এখন। অগুদিন এতক্ষণ
কোনদিকে দিকপাত থাকতো না তাঁর। অন্তের কথায় কর্ণপাতও
করতেন না, নিজেও কথা বলতেন না। কিন্তু হারাণ হালুইকরের
হাতের রান্নার মশলার গন্ধ নাকে পেয়েছেন আজ। অনেক দিনের
লোভাতুর ক্ষুধা উগ্র হয়ে উঠেছে যেন!

এমন একদিন ছিল, যখন মাছ-মাংস ছাড়া অণ্ড কিছু মুখে দিতেন
না অনঙ্গমোহন। বনের পাখী নিরামিষ খায়, সভ্য মানুষ কেন খাবে!
দু'বেলায় দু'দুটো গোটা মুরগী ছিল তখন বরাদ্দ। কথায় কথায়
চপ, কার্টলেট, ডেভিল আর ফ্রাই। প্রত্যহ প্রাতরাশের ঠেবিলে
এক জোড়া কোয়াটার বয়েল্ড্ ছোট ডিম। লজ্ আর পার্টিতে হাম,
বেকন, অক্স-টাঙ্।

আর আজ ?

অন্ধকার ভেদ করে তাড়াতাড়ি পা চালিয়েছিল শ্রামাপদ ।

দিন নেই, রাত্রি নেই, বৃদ্ধ মনিবের কাছে থেকে থেকে মন যেন তিত্তিবিরক্ত হয়ে গেছে । মনিবের ঐ চার দেওয়ালের ঘর ছাড়া ছুনিয়ায় আরও কত কি আছে, তাদের সঙ্গে ছিন্ন হয়ে যেতে বসেছে শ্রামাপদের যোগাযোগ । মাথার 'পরে দিগন্তবিস্তৃত আকাশ আছে, তাও যেন তার চোখে পড়ে না । দাসখতের খাতায় নাম লিখেছে বটে বহু যুগ আগে ; সেজন্ত কি সুখ দুঃখ হাসি কান্না ব্যথা বেদনার অম্লভূতিও লুপ্ত হয়ে যাবে ? শ্রামাপদ দ্রুত পা চালায় অন্ধকার দালানে ।

অন্ধর যেন আজ নীরব হয়ে আছে । সাড়া শব্দ নেই বললেই হয় । মানুষের বসতি আছে কি না চট করে বোঝা যায় না ; কিন্তু ঘরে ঘরে আলো জ্বলছে । ঘরের দরজা জানালায় আলোর চতুষ্কোণ আভাষ । দালান ধ'রে দ্রুত পদে যেতে যেতে থমকে দাঁড়িয়ে পড়লো শ্রামাপদ । কি চোখে পড়েছে তার ! কোন্ অদেখা দেখা পড়েছে ! দালানের অন্ধকারে নিজেকে লুকিয়ে চুরিয়ে দেখতে থাকে চোরা-দৃষ্টিতে ।

অদূরে, একটি ঘরের জানালা ভেদ করেছে সেই প্রথম দৃষ্টি ।

মোহময় চোখে চেয়ে আছে শ্রামাপদ । বিমুক্ত-দৃষ্টিতে । অদূরে, একটি ঘরের জানালার মধ্যে দেখা যায় এক নারীমূর্তি । পিছন ফিরে দাঁড়িয়ে আছে ড্রেসিং আলমারীর আয়নার সম্মুখে । শুভ্র দুই বাহু তুলে চুল বাঁধছে । যদিও আঁটসাঁট ব্রেসারীর প্রাচীর, তবুও অসাবধানেই হয়তো স্থলিত হয়ে পড়েছে বক্ষবাস ।

কেউ যদি দেখতে পায় ! যদি কারো চোখে পড়ে !

সেই ভয় ও লজ্জায় আর বেশীক্ষণ দাঁড়ালো না । শ্রামাপদ

ধোঁয়া ছাড়েন। বাবুদের ক্ষুষ্টির চোটে কৃষ্ণচন্দ্র ধীরেস্থে এক কলকে তামাক খাওয়ার ফুরসৎ পান না।

—নায়েবমশাই।

সিঁড়ির তলার ঘরে শ্রামাপদও ঢুকলো। বললে,—নায়েবমশাই, আজকের ব্যাপারখানা কি বলুন তো?

হুক্কোয় টান দিতে থাকেন কৃষ্ণচন্দ্র।

আজ সারাদিনে এক কলকে তামাক খাওয়ার পর্য্যন্ত অবসর মেলেনি। বাবুদের হুকুমের পর হুকুমে ব্যতিব্যস্ত হয়ে আছেন। মুখখানা বিরক্ত হয়ে আছে। একেই শূলের বেদনায় অস্থিসার আকৃতি কৃষ্ণচন্দ্রের। কৰ্ম-ব্যস্ততায় ভাল ক'রে খেতে পাননি আজ। নামেমাত্র দু'মুঠো ভাত নাকে মুখে কোন রকমে গুঁজে উঠে পড়েছেন। হুক্কোয় পর পর অনেকগুলো টান দিয়ে অনর্গল ধোঁয়া ছাড়াতে ছাড়াতে নায়েব বললেন,—ব্যাপার আর কি! ব্যাপার যা তাতো চোখেই দেখবে। নাচ গান বাজনা হবে, মাইফেলী হবে, আড্ডা তামাসা হবে, আরও কত কি হবে কে জানে!

কথার শেষে মুখে আবার হুক্কো ঠেকালেন! সিঁড়ির তলার ঘরে হুক্কোয় তামাক খাওয়ার ঘন ঘন শব্দ হয়। কৃষ্ণচন্দ্র উবু হয়ে বসে তামাক টেনে যান।

শ্রামাপদ বললে,—বাবুদের সখ বলিহারী যাই! উলুনে হাঁড়ি চড়ে না, র্যাশনের টাকা জোটে না, পরণের কাপড় নেই, তবুও এ কি বেলেপ্পাপনারে বাবা! যেটা রয় বসে, সেইটেই কর' না!

হুক্কোয় আবার অনেকগুলো টান দিয়ে ধোঁয়া ছাড়াতে ছাড়াতে কৃষ্ণচন্দ্র কথা বলেন,—জমিদারী গেছে, জমিদারী গেছে তো কি হয়েছে? অনাচার না করলে বাবুদের পয়সা আজ খায় কে?

ঠিক কথা। বললে শ্রামাপদ।—হক কথা বলেছেন নায়েবমশাই।

কৃষ্ণচন্দ্র বললেন,—তাও নিজেরা আনন্দ কর', স্তুতি কর', যা খুশী তাই কর', এত পয়সা খরচা করে বার্জী আনতে যাওয়া কেন! শ'য়ে শ'য়ে ইয়ার-বন্ধুদের জড় করারই বা কি দরকার?

শ্রামাপদ অপেক্ষায় ছিল, নায়েব কখন হুকো ছাড়েন। শ্রামাপদ নতকণ্ঠে বগেল,—আমাদের ছোট মুখে বড় কথা না বলাই ভাল। বাবুদের কাণ্ডকারখানাই আলাদা! বার্জীনাচের জন্তে কে আর কবে ভিয়েন বসায় তাই বলেন?

নায়েব বললেন,—তাই না তাই। পাকা পোনা, ভেটকী আর চিংড়ী মাছই এসেছে সবসময়ে শওয়া ছ'মণ! মাংসের কিমা বিশ সের। এক মণ ময়দা ভাজা হবে।

শ্রামাপদ বললে,—তা হ'লে তো দেখছি এলাহী ব্যাপার!

—তা আর নয়! বললেন কৃষ্ণচন্দ্র,—বিলেতী মদই এসেছে শ' পাঁচেক টাকার। ছ'শো সোডার বোতল। বরফ দশ টাকার। সিগারেটের টিন ছ'ডজন!

—জলের মত টাকাগুলো খরচা হবে তো আজ, ইদিকে লোকজনকে মাইনে দেওয়ার নাম নেই।

শ্রামাপদ কথা বলে আক্ষেপের স্বরে। হতাশ হাসির সাথে!

—সে কথা আর বল না। নাও, হুকোটা ধর; ঐ শোন', কে আবার আমাকে ডাকে!

কথা বলতে বলতে ও হুকোটি হস্তান্তরের সঙ্গে সঙ্গে কৃষ্ণচন্দ্র বেরিয়ে গেলেন সিঁড়ি তলার ঘর থেকে।

শ্রামাপদ শুধু বললে,—বোধ হচ্ছে বড়বাবুই ডাকছেন!

—হ্যাঁ বড়বাবুই ডাকছেন বটে।

সিঁড়ি তলার ঘর থেকে বেরিয়ে নায়েব চলে গেলেন।

শ্রামাপদ স্বগত করলে,—যাও এখন, গাল খাও গে যাও ! হুকো
টানা বেরিয়ে যাবে !

কথার শেষে নিজের হুকোয় টান দিতে থাকে । যেন কত কত
যুগ তামাকের স্বাদ পায়নি ! পয়সায় ছ'টা বিড়ি খাওয়ারও হিম্মত নেই
* যার, সেই শ্রামাপদ যদি পায় অম্বরী তামাকের সাজা কলকে !

কি কলরোল সদরে ! কান পাতা দায় ।

সকলেই কথা বলছেন, ডাকাডাকি করছেন, তাই কোন ব্যক্তি-
বিশেষের বিশেষ কণ্ঠও শোনা যায় না । চাঁচামেচিতে চাপা প'ড়ে
যায় কে কাকে ডাকছে, কে কি বলছে ।

যতই হৈ হৈ আর হুলা চলুক, সদরের বাতাসে আজ অপূর্ব এক
মিষ্ট স্বগন্ধ । গোলাপজল, বেলফুল আর মূল্যবান সিগারেটের একতায়
বাতাস বুঝি ভারী হয়ে আছে । তানপুরার নাকে-কান্না শুরু হয়েছে ।
তবলার আওয়াজ ঠিক হচ্ছে রূপোর হাতুড়ীর ঘায়ে ।

ষ্টেশন থেকে গাড়ী পৌছানোর অপেক্ষা শুধু । দুজন বাঈজী
আসছে ।

নূরজাহান বাঈ আর মতিয়া বিবি । তাদের সঙ্গে আসবে ভেড়ুয়া ।
সারেঙ্গী বাজাবে । প্যালা কুড়োবে । বাঈদের পায়ের ঘুঙুর বেঁধে
দেবে । বুকের কাঁচুলী এঁটে দেবে ।

এখনও আসর জমেনি । এখানে সেখানে ছড়িয়ে আছেন বাবুরা ।
নাচঘরে জমায়েৎ না হ'য়ে যে যার সান্নোপান্নসহ একেক ঘরে একেক
দল আড্ডা জমিয়েছেন ।

বড়বাবুর কণ্ঠস্বর । সদর কাঁপিয়ে ডাক ছেড়েছেন । ডাকছেন
নায়েবকে ।

কৃষ্ণচন্দ্রের অন্তরাস্তা কাঁপতে থাকে ভয় আর আশঙ্কায়। কাঁপতে কাঁপতে হাঙ্গির হয় নায়েব। চন্দ্রমোহন সক্রোধে বললেন,—কোথায় ছিলে হে তুমি? কোথায় ডুব মেরেছিলে?

আমতা আমতা করে কৃষ্ণচন্দ্র। মুখে তার কোন কথা জোগায় না। হাতে হাত কচলাতে কচলাতে বলে,—এই তো হজুর, এখানেই আমি আছি। কোথাও তো যাইনি হজুর।

বড়বাবুর মুখ-চোখ ক্রোধে রক্তবর্ণ হয়ে যায়। মুখ বিকৃত করেন তিনি। বলেন,—ষ্টুপিড্, ফুল, ননসেন্স্, মিথ্যে কথা বলবার আর জায়গা পাওনি! এত ডাকাডাকি করছি, তাও তোমার সাড়া নেই?

কৃষ্ণচন্দ্র জড়িতকণ্ঠে কথা বলে। বলে,—সাড়া আমি দিয়েছি হজুর, আপনার কানে পৌঁছায়নি।

বড়বাবু ধমকে উঠলেন! সরবে বললেন,—ফের মিথ্যে ব'লছো গর্দভ? সাড়া দিলে শুনতে পাবো না আমি? তা হ'লে বলতে চাও, আমার কানের দোষ হয়েছে?

কৃষ্ণচন্দ্র হাতে হাত কচলায় আর বলে,—সে কথা আমি বলতে চাইনি হজুর। লোকজনের কথাবার্তায় হয়তো আপনি শুনতে পাননি; সাড়া ঠিকই দিয়েই হজুর!

বড়বাবু বললেন,—চোপ রওলাডি ব্যাষ্টার্ড, মুখের ওপর কথা ক'ও না!

নিজের সম্পর্কে উচ্চারিত বিশেষণ ক'টি কানের ভেতর দিয়া মরমে গিয়ে হানা দেয় কৃষ্ণচন্দ্রের! এত লোকের সমক্ষে অপমানের লজ্জায় মরমে ম'রে যায় যেন! নতমস্তকে দাঁড়িয়ে থাকে চুপচাপ! চোখ দুটি শুধু ছলছলিয়ে ওঠে! ওষ্ঠ কম্পমান হয়!

প্রথম রাত্রির পাংলা অন্ধকারে কিছুই চোখে পড়ে না বড়বাবুর। সমস্বরেই তিনি বললেন,—বৃষের কাঠের গত শুধু আড়ষ্ট হয়ে দাঁড়িয়ে

থাকলে চলবে না। সেজন্তে তোমাকে মাইনে দিয়ে রাখা হয়নি। ষ্টেশন থেকে এখনও কেন গাড়ী আসছে না, আগে খোঁজ করাও।

কৃষ্ণচন্দ্র বললে,—যথাস্থা হুজুর !

কথার শেষে সে-স্থান ত্যাগ করলো ধীরে ধীরে। আহত সৈনিকের মত চললো ভগ্ন পদক্ষেপে। লোকজনের সমক্ষে অপমানিত হওয়ায় ভাবলো, আজ সকালে ঘুম থেকে উঠে যে কার মুখ দেখেছিল !

বড়বাবুর নাম চন্দ্রমোহন। যেমন গম্ভীর তেমনি রাশভারী !

চন্দ্রের স্নিগ্ধতা নেই। যেন সূর্যের মত সদা-উত্তপ্ত। নধরকান্তি আকৃতি, তবুও মনের কোথাও কোমলতা নেই বললেই হয়। তাঁর জুড় মনের মূর্ত প্রকাশ যেন তাঁর গৌণে। সেই গৌণের এক প্রান্ত পাকাতে পাকাতে নাচঘরে প্রবেশ করলেন তিনি।

সমবয়সের আত্মীয় ও বন্ধুজন তাঁকে দেখে সহাস্তে অভিবাদন জানায়। চন্দ্রমোহনও স্নিতহাসি হাসলেন। কে বলবে এই মুহূর্তে তিনি ক্রোধে অগ্নিশর্মা হয়ে উঠেছিলেন। দেখলে যেন বিশ্বাসই হয় না !

—কৈ হে চাঁদমোহন, তোমার নাচোয়ালীরা কৈ ?

বড়বাবুর বন্ধুদের মধ্যে একজন প্রশ্ন করলে কোতুহলী কণ্ঠে। একটি চোখ ঈষৎ মুদিত করলে কথার শেষে।

চন্দ্রমোহন বললেন,—আরে অধৈর্য্য হও কেন ! এইতো সব কলির সঙ্কো ! ইষ্টিশনে গাড়ী গেছে, এতক্ষণে পৌছে যাওয়ার কথা ! তাইতো নায়েবটাকে বকাবকি করছিলুম !

—খাক্ আর বকাবকি ক'রে কাজ নেই। তুমি এখন আসর জাঁকিয়ে ব'স দেখি। বড়বাবুর বন্ধুদের কে একজন কথা বললেন।

চন্দ্রমোহন বললেন,—আমি ব'সে পড়লে চলবে না ভাই ! বাদ্জী ছুটো না আসা পর্য্যন্ত যেন স্থির হ'তে পারছি না কিছুতেই।

—নাও, ততক্ষণ একটা সিগারেট খাও ।

বন্ধুদের একজন চন্দ্রমোহনের সম্মুখে সিগারেটের প্যাকেট খুলে ধরলো ।
এপাশে ওপাশে মাথা দোলালেন চন্দ্রমোহন । বললেন,—কাঁচি
সিগারেট তো চলে না ভাই আমার । আমার ব্র্যাণ্ড্ হচ্ছে থি
ক্যাশেলস্ । অন্য কিছু খেলেই কাশতে শুরু করবো এখনই !

—তা থি ক্যাশেলস্ই হোক একটা ।

ফরাস থেকে রুপোর সিগারেট-কেশ তুলে ধরলো কে যেন ।

চন্দ্রমোহন তুললেন একটি । বন্ধুদের একজন দেশলাই জ্বাললো তাঁর
মুখের কাছে । সিগারেট ধরিয়ে তিনি বললেন,—আমাদের এষ্টেটের
নায়েবটি একটি আস্ত গাধা ! এতকাল ধরে কাজ করছে, তবুও এতটুকু
বুদ্ধি গজালো না ? শালার ঘরের শালা শুধু কাজ ভুল করতে আছে !

—এমন লোককে মাইনে দিয়ে পোষা কেন ?

বন্ধুদের কে একজন এই প্রশ্নটি করলে ।

নাক দিয়ে ধোঁয়া ছাড়তে ছাড়তে চন্দ্রমোহন বললেন,—আমার
একার এষ্টেট হ'লে গাধাটাকে কবে দূর ক'রে দিতুম ।

—এখনকার কর্তাদের মধ্যে তুমিই তো বড় হে চাঁদমোহন । তুমি
তো ইচ্ছে করলে কত কি করতে পারো ।

বন্ধু-মহল থেকে কথা উঠলো ।

চন্দ্রমোহন বললেন,—তা তো পারি । আমি যে মাগ্বে গগ্বে বড়,
সেকথাও ঠিক । তবে, তবে কি না এখনও অনঙ্গকাকা জীবিত আছেন ।
তাঁর অবিশিষ্ট রিটায়ার্ড লাইফ, নিজের ঘরেই থাকেন । শরীরও তেমন
সুবিধের নয়, গেলেই হয় আর কি !

—আহা, ভারী মিঠে বাজাচ্ছে তো !

কথায় কথায় বললে কে যেন বন্ধুমহল থেকে ।

চন্দ্রমোহন বললেন,—হ্যাঁ! অপূর্ব বাজাচ্ছে ।

পাশের হলে কে বুঝি সেতারে সুর ধ'রেছে । বিলম্বিত লয়ে শুধু
আলাপ করছে ধীরে ধীরে । সঙ্গে তানপুরার ধ্বনি ।

কি করবে কি ! নর্তকী এখনও নাই বা পৌঁছালো, তাই বলে হাঁ
করে সকলকে বসে থাকতে হবে, সে কেমন কথা ! তাই কোন' কোন'
দল তাস পিটতে বসেছে । কেউ যন্ত্রে সুর তুলছে । কেউ দাবায়
বসেছে । আবার অনেকে সত্যি সত্যি হাঁ করেই বসে আছে লোলুপ-
দৃষ্টিতে । বাবুদের দৌলতে নাচ দেখা যাবে, বাবুদের পয়সায় ভুরি-
ভোজন হবে । পান, সিগারেট আর ছইস্কি মিলবে ।

এখনও কিছুই হয়নি, তবু যেন চোখে চোখে নেশার ঘোর
নেমেছে । গোলাপজল, বেলফুল আর থ্রি ক্যাশেলসের একীগন্ধে হয়তো
নেশা লেগে গেছে ! চোখে চোখে নেশা না নিদ্রার ঢুলু-ঢুলু !

চন্দ্রমোহন সিগারেটের ছাই ফেললেন এক বন্ধুর প্রায় গায়েই ।
বললেন,—তোমরা মনের আনন্দে গল্প-গুজব কর, আমি একবার দেখে
আসি ভিয়েনে কত দূর কি হ'ল ।

কথার শেষে হল থেকে বেরিয়ে গেলেন ।

ভিয়েনের তখন ছ' ছ'টা চুল্লী গনগন জ্বলছে ।

কোনটায় কড়া আর কোনটায় হাঁড়ি চ'ড়েছে । হারাণ হালুইকরের
দল হিমসিম খেয়ে যাচ্ছে । পেঁয়াজ আর মশলার উগ্র গন্ধ ছড়িয়েছে
চতুর্দিকে । ভিয়েনের এক দিকে ময়দা পেশা হচ্ছে । নেচি কাটা হচ্ছে
ময়দার—গুণায় গুণায় ভাগ করা হচ্ছে বারকোশে । কাটলেটের চিংড়ী
খোড়া হচ্ছে । চুল্লীতে চপের কিমা আর মাংস রান্না হচ্ছে । পটল আর
বেগুন ভাজা হচ্ছে রাশি রাশি ।

—কি হে হারাণ, তোমার কতদূর ?

ভিয়েনে পা দেওয়া মাত্র প্রশ্ন করলেন চন্দ্রমোহন। সিগারেটের ধোঁয়া ছাড়তে ছাড়তে বললেন।

হারাণ হালুইকর তখন মাংসে জল ঢালছে অত্যন্ত মনোযোগের সঙ্গে। কে ডাকলো না ডাকলো, সেদিকে তার কান নেই।

চন্দ্রমোহন দেখলেন কি একটি গুরুতর কাজে ব্যস্ত রয়েছে হারাণ। মুখ-চোখ কুঁচকে জলের পরিমাণ মাপছে আর ঢালছে ধীরে ধীরে। চুল্লীর আগুনের আঁচে অসাধারণ ঘেমে উঠেছে হারাণের শরীর! মাথার তৈলাক্ত বাবরি চুল ঘেঁটে গেছে কাজের ঝঞ্ঝাটে। এত ব্যস্ততা, কাজে এত একাগ্রতা, তবুও গালের পান চিবানো স্থগিত নেই। হারাণের মুখে একমুঠো পান আছে হয়তো।

হারাণ বললে,—বড়বাবু, আমাদের জন্তে চিন্তা করবেন না। আমরা ঠিক আছি। সময়ে সব ঠিক তৈরী থাকবে দেখবেন।

চন্দ্রমোহন আধ-খাওয়া সিগারেট ফেলে দিয়ে বললেন,—শ' দেড়েক লোক থাকে বৈ তো নয়! তুমিতো হারাণ এবাড়ীতে হাজার হাজার লোক থাইয়ে গেছো বছরে বছরে।

—সে কথা আর বলবেন না বড়বাবু। বললে হারাণ। বললে,—কি দিনই সব গেছে! পূজোপাক্ষন, বিয়ে-পৈতে কিছুতেই বাদ যায়নি। তখন লুচি আর ভাতের পাহাড় তৈরী হ'তো আপনাদের। একসঙ্গে হাজার হাজার লোক! মাটি খুঁড়ে চুল্লী বানাতে হ'ত। কুলিয়ে উঠতো না গড়া চুল্লীতে!

ভিয়েনে হাওয়া নেই, শুধু উত্তাপ। আগুনের হলুকা।

তবুও হাওয়ায় যেন মাঝে মাঝে একেক মশলার স্থগন্ধ ভাসছে। পেঁয়াজ আর হাঁসের ডিমের গন্ধ, মাংস আর ভিনিগারের গন্ধ। ফোড়ন আর মশলার।

—আমাকে আর আসতে হবে না তো হারাণ ?

প্রশ্ন করলেন চন্দ্রমোহন। কৌচানো ধূতির প্রান্ত পেছনে ধ'রে ইদিক সিদিক দেখতে দেখতে বললেন।

হারাণ বললে,—না বড়বাবু। আপনি আর কষ্ট করবেন না।

হালুইকরের মৌখিক সম্মতি পেয়ে কালো বার্নিশ চটি জুতোর শব্দ তুলতে তুলতে চলে যাচ্ছিলেন চন্দ্রমোহন। হারাণ ডাকলে,—বড়বাবু, একটা কথা বলছিলাম।

থামলেন চন্দ্রমোহন। রাইট্‌এবাউট্‌টার্ণ হ'লেন।

হারাণ মিনতিসহকারে বললে,—এক কেটলী চায়ের যদি ছকুম দেন বড়বাবু।

—সে কি কথা ? বললেন বড়বাবু।—তোমাদের চা দেয়নি না কি !

হারাণ বললে,—হ্যাঁ ছজুর দিয়েছে। আর এক কেটলি যদি দেন। বড্ড গরম ছজুর !

—সে কি কথা !

বললেন, আর ফিরলেন চন্দ্রমোহন ! ব্যস্ত হয়ে জোর কদমে চললেন সদরের পথে। বার্নিশ চটির শব্দ মিলেয়ে গেল কোথায়।

সন্ধ্যা উৎরে গেছে কখন। ভিয়েনে গোটা দুয়েক পঁচিশ পাওয়ারের বল জ্বলছে। তাই আলো হয়েছে টিমটিমে। দেখা যায় কি না যায়। চুল্লীগুলোয় কতকাল আঁচ পড়েনি কে জানে, ক্যাকড়া বিছে বেরিয়েছে আগুন ধরাতেই।

—হারাণ, কিমায় কিসমিস দিয়েছ ?

কে একজন বসেছিলেন ভিয়েনে। বাবুদের কে একজন। নাম বিরাজমোহন। এ বাড়ীতে তিনি নাকি রান্না-বান্নায় পাকাপোক্ত। বিরাজমোহনের চোখে মোটা কাচের চশমা, পুরু লেন্স। যে কোন

কাজকর্মে, ভিয়েনে বিরাজমোহন না থাকলে যজ্ঞিই উঠবে না। শুধু রান্নায় হাত থাকলে চলে না, চোখ রাখতে হয় হালুইকরের কাজে। কাজ করছে না ফাঁকি দিচ্ছে! রান্নার উপকরণের সং ব্যবহার করছে, না অপচয় করছে অযথা? বিরাজমোহনের চোখে জোরালো চশমা, নজর এড়াতে পারে না কেউ।

—একেবারে ভুলে মেরেছি। বললে হারাণ। হাসতে হাসতে বললে। বললে,—ওঃফ্, বিরাজবাবুর চোখ আছে বটে!

বিরাজমোহন কোন কথা বললেন না। হাতের হাতঘড়ির প্রতি একবার চোখ ফেরালেন। মুখে তাঁর গর্কের মূহূহাসি ফুটলো।

কিসমিসের ঠোঁটটা কে যেন ছুঁড়ে দেয় হারাণের পায়ের কাছে। মুঠো মুঠো কিসমিস ছড়িয়ে দেয় হারাণ কিমার কড়ায়। অম্মশোচনার সুরে কথা বলে,—কলকাতার হোটেলে কিসমিস দেওয়ার রেওয়াজই নেই।

বিরাজমোহন সহাস্তে বললেন,—কলকাতার হোটেলে কুকুর বেড়ালের মাংস,—কে আর কিসমিস দিচ্ছে!

—তা যা বলেছেন বিরাজবাবু।

বাবরি চুল ঝুলিয়ে হারাণ ঝুঁকে পড়লো কড়ায়। কাঁজরি দিয়ে ঘাঁটতে লাগলো গরম কিমার স্তূপ। কিসমিস মেশাতে থাকলো। বললো,—কলকাতার হোটেলের কথা আর বলবেন না বিরাজবাবু! সেখানে কি হয় না তাই বলুন।

—যা বলেছো! বললেন বিরাজমোহন।—তোমাদের বড়বাবু ইনস্পেকশন্ করে গেলেন হারাণ, হাত চালিয়ে নাও তোমরা। কিমাটা এখনও হয়ে উঠলো না, চিংড়ী মাছও খোড়া হ'ল না। চপ কার্টলেট করবে কখন?

হারাগ বললে,—কিছু ভাববেন না আপনি। আচ্ছা বিরাজবাবু, বড়বাবুর সঙ্গে বুঝি আপনার কথা নেই ?

—তুমি কোথা থেকে জানলে হারাগ, আগে তাই শুনি।

ফিরতি প্রশ্ন করলেন বিরাজমোহন। চাপা হাসি লুকোলেন। চোখের চশমা খুলে কোঁচার খুঁটে কাচ মুছতে থাকলেন।

কিমার কড়ায় ঝাঁজরি চালিয়ে কিসমিস মেশাচ্ছিল হারাগ। নিজের দলের একজনের উদ্দেশে বললে সজোরে,—বলরামদা, হাত চালাও।

বলরাম কার্টলেটের চিংড়ী খুড়ছিল।

একটা কাঠের পিড়িতে সারি সারি দোফালা চিংড়ী। লেজসমেত। বলরাম বললে,—আর দু'কুড়ি বাকী আছে। তুমি বিস্কুট লাগনের জোগাড় দেখ' না।

ভিয়েনের এক পাশে হামানদিস্তায় বিস্কুট পেশা চলেছে। পেশা হচ্ছে আর টেলে রাখছে ছেঁড়া কাগজের বুকে।

—আচ্ছা বিরাজবাবু, আমরা গরীব-গরবা হ'তে পারি, তা বলে কি গরীবের চোখ নেই বলতে চান আপনি? চোখে দেখলুম যে বড়বাবু এতক্ষণ ছিলেন, তবুও আপনি একটিও কথা কইলেন না।

এতক্ষণে কথার জবাব পেলেন বিরাজমোহন, হারাগের মুখ থেকে তাঁর প্রশ্নের উত্তর শুনলেন। হারাগ কথাগুলো বললে চাপা গলায়। ইদিক-সিদিক দেখে তবে সে এতগুলি কথা বলেছে।

বিরাজমোহন মৃদুহাসির সঙ্গে বললেন,—তোমাদের বড়বাবু চন্দ্র-মোহনের সঙ্গে যে আমরা ক'ভাবে কেস্ লড়ছি। খুব জোর মামলা চলেছে যে!

এলোমেলো বাবরি চুলের আড়ালে হারাণের চোখ দুটো বড় হয়ে উঠলো সঙ্গে সঙ্গে। বিশ্বয় আর কৌতূহলের সঙ্গে বললে,—তাই না কি বিরাজবাবু? তা তো জানতুম না।

বিরাজমোহন মুদু হেসে বললেন,—হ্যাঁ, মামলা খুব জোর চলছে। এই বাড়ী নিয়েই মামলা।

কথা শুনে হারাণের হাতের বাঁজরি থেমে গেল। হাঁ করে তাকিয়ে রইলো সে। কিছুক্ষণ অতীত হওয়ার পর বললে,—এই বাড়ী নিয়ে মামলা কেন বিরাজবাবু? বাস্তব নিয়ে মামলা-মকদ্দমা?

বিরাজমোহন সহাস্তে বললেন,—আর দু'দিন বাদে বাড়ীটি যে ধ্বংসে পড়ে যাবে! কত বছর মিস্ত্রীর হাত পড়েনি তার ঠিক আছে? আজ সাপ বেরুচ্ছে, কাল বিছে বেরুচ্ছে, এই তো অবস্থা। সিঁড়িগুলো যেন বাসুকীর ফণা, ওঠানামায় নড়বড় করে। ভয় হয় এই বুঝি ভেঙ্গে পড়ে গেল। তাই আমরা চাইছি এ বাড়ী বিক্রী করতে। বড়বাবুর আপত্তি হচ্ছে।

হারাণ কিম্বার কড়া থেকে মাংসের চুল্লীতে যায়। বলে,—তা হ'লেও বাস্তববাড়ী, বিক্রী করবেন কি বিরাজবাবু?

—তা নয়তো কি? বললেন বিরাজমোহন। মুখে মুদু হাসি মাখিয়ে বললেন,—এ বাড়ী রেখে লাভ কি? যে যার ভাগের টাকা নাও, বাড়ীটাও বিক্রী হয়ে যাক।

—কি যে বলেন আপনি? বললে হারাণ। বললে—এ বাড়ী বিক্রী করতে যাবেন কোন দুঃখে?

বিরাজমোহন বললে,—দুঃখটা তুমি যদি বুঝতে হারাণ, তা হলে আর কোন কথা ছিল না। গরীব হঠাৎ বড়লোক হ'লে খুবই স্বপ্নের কথা, কিন্তু হারাণ, বড়লোক যদি একদিন গরীব হয়ে যায় তখন তার অবস্থাটা কি হয় ভাবতে পারো?

কথা শুনে কেমন যেন নির্ঝাক মেরে যায় হারাণ । চুপ মেরে যায় ।
তার মুখে কোন কথা জোগায় না । নিজের কাজে মন দেয় সে ।

কিন্তু কথা না বললেও হারাণের মনটা যেন মুহূর্তের মধ্যে অশ্রু রকম
হয়ে গেছে । চন্দনপুরের মধ্যে এই চন্দনধামে হারাণ যে কতবার আসা-
যাওয়া করেছে ? পূজো-পার্কণ, বিয়ে, মুখে-ভাতের কত উৎসবে হারাণের
দল এসেছে । এসে যজ্ঞি মিটিয়ে, ভিয়েন তুলে দিয়ে গেছে । এ বাড়ীর
অন্দরে পর্য্যন্ত হারাণের অবাধ গতি । কে না চেনে তাকে মেয়ে-মহলেও !

এখন যারা পূর্ণযৌবনা ষোড়শী কুমারীর দল হয়ে উঠেছে, তাদেরই
একদিন হারাণ দেখেছে পরণে ফ্রক ঘাগরা । মণিমালা, রাধাদিদি,
শ্রামলী, কেকা, মঞ্জুদিদি, কমলা, বীরা, ধীরা, ইরা, চম্পাবতী—এদের
শৈশবে দেখেছে হারাণ । এখন দেখছে বর্ষার ভরা নদীর মতই,
ভরায়ৌবনা যেন ওরা । ফ্রকের বদলে হাতে ছোপানো শাড়ী উঠেছে
ওদের শ্রীঅঙ্গে ।

নেহাৎ বিরাজবাবু ঠায় ভিয়েনে বসে আছেন একটা কাঠের
চেয়ারে, নয়তো ঐ মণিমালাদের দলকে দল এসে হাজির হ'ত কখন ।
হারাণকে তাদের হাতে হাতে লুকিয়ে দিতে হ'ত পুর কিংবা লুচি, বা
রাধাবল্লভী । কমপক্ষে বেগুনভাজা ।

কত কতবার অন্দরের দরজা-জানলার ফাঁক থেকে মণিমালা আর
রাধাদিদিদের দল চোরা দৃষ্টিতে দেখে গেছে । একটিবার যদি ভিয়েনে
যাওয়া যায় ! রাগ্নার ভেসে-আসা গন্ধের আমেজে যেন জল ঝরে জিভ
থেকে । কিন্তু বিরাজমোহন একনাগাড়ে বসে আছেন তো বসেই
আছেন । উঠবার নামটি নেই ।

হারাণও যে কাজের ফাঁকে ফাঁকে সহাস দৃষ্টিতে দেখছিল, অন্দরের
জানালা দরজা, পুরু কাচের চশমা থেকেও তা দেখতে পান না বিরাজমোহন ।

অন্দরের জানালার ওপারে কারা যেন দেখা দিচ্ছে থেকে থেকে ।
পায়ের আঙুলে দেহের ভর রেখে উঁচু হয়ে দেখছে মণিমালা আর রাধা
দিদিদের মধ্যে কে কে ! হারাণ বাবরি চুলের আড়াল থেকে দেখে আর
মাংসের চুল্লীতে কাঁচা কাঠ ঠেলতে থাকে । এ গালের পান ওগালে
টেনে হারাণ বললে,—বিরাজবাবু আপনি বাঈ নাচের আসরে যাবেন না ?

মুখে একমুখ কাঁচাপাকা দাড়ি বিরাজমোহনের ।

কতদিন ক্ষুর পড়েনি কে বলবে ! মাথার এলোমেলো চুলে কতকাল
যেন চিরুণী পড়েনি । বৈশাখের অত্যধিক গরমেই হয়তো থেকে থেকে
আঙুল চালিয়ে চলেছেন খোঁচা দাড়িতে । মূহু হেসে তিনি বললেন,—
আমি দেখতে যাবো বাঈনাচ ? রক্ষে আছে তা হ'লে ? বৌ ঝোঁটিয়ে
বিষ ঝেড়ে দেবে না ?

হারাণ সহাস্তে বললে,—বৌদি তো তা হ'লে দেখছি খুবই কড়া
মানুষ ।

বিরাজমোহন বললেন,—একেবারে তোমার যাকে বলে ভীষণ কড়া ।
নড়তে চড়তে উঠতে বসতে জবাবদিহি করতে হয় । বুঝে নাও হারাণ,
তার ওপর বৌ যদি হয় অপ্সরী স্ত্রীরী ! কথা না শুনে আমার রেহাই
নেই । সেই যে বিছানা নেবে, কার সাধ্য সে বিছানা থেকে ওঠায় !

পান-লাল দাঁত বের করে হেসে ফেললো হারাণ । বললে—সত্যিই,
আমাদের অপর্ণাবৌদিদির রূপের তুলনা হয় না । বিরাজবাবু, আপনার
বিয়ে আমার স্পষ্ট মনে আছে । বৌদি এসেছিলেন যেন লক্ষ্মী প্রতিমা ।

—ঠিক তেমনই আছে এখনও । আমি শুধু বুড়িয়ে গেছি !
বোকার মত হাসতে হাসতে বললেন বিরাজমোহন,—কে বলবে যে
হু'টো ছেলে মেয়ের মা !

কথা শুনে হাসবে, না হাসবে না, তাই ভাবছিল হারাণ। বিরাজ-
বাবু যেন এক ধরনের মানুষ। কোথায় কি বলতে হয়, কাকে কি
বলতে হয়, কিছুই জানেন না যেন। জীবীর রূপের প্রশংসায় পঞ্চমুখ
হয়ে ওঠে কেউ কখনও? ঘরের জীবী যতই অপ্সরী কিম্বদী হোক!

হারাণ হাসি চেপে বললে,—সত্যিই অপর্ণাবোধির মত রূপ আমি
ছ'টো দেখিনি আজ অবধি। যেন সাক্ষাৎ লক্ষ্মীপ্রতিমা!

বিরাজমোহন কোন কথা বলেন না। থেকে থেকে খোঁচা দাড়িতে
আঙুল চালাতে থাকেন। মুখে তাঁর হুঁচিস্তার ছায়া নামে হঠাৎ। কি
যেন মনে পড়ে গেছে, তাই চিন্তাকুল মুখভঙ্গী। চেয়ার ছেড়ে উঠে
পড়লেন বিরাজমোহন। বললেন,—আমি আসছি অন্তর থেকে।
তোমরা হাত চালিয়ে নাও হারাণ। বেশী দেরী হয়ে গেলে এত
আয়োজনের সব পণ্ড হয়ে যাবে।

হারাণ আলগোছে একটি পান মুখে পুরলো। বললে,—আপনি
নিশ্চিন্ত হোন বিরাজবাবু। সময়ে সব প্রস্তুত হয়ে যাবে, দেখবেন।

কথায় কান দেওয়ার অবকাশ নেই আর বিরাজমোহনের। কথার
শেষেই তিনি অন্তরের দিকে পা বাড়িয়েছেন। নড়তে চড়তে উঠতে
বসতে জবাবদিহি করতে হয় ঘরের জীবীর কাছে। বিরাজমোহন চললেন
ব্রহ্মপদক্ষেপে। হালুইকরের দল হাঁফ ছেড়ে বাঁচলো। ভূপ্তির শ্বাস
ফেললো।

হারাণ বললে,—ওঃফ্ একটা বিড়ি খাওয়ার ফুরসৎ পাইনি ক' ঘণ্টা
ধ'রে। বলরামদা, একটা লালসুতো দাও দেখি, খাই।

বৈশাখের রাত্রি। অন্তরে বাতাস নেই বললেও হয়

বিজলী পাখার হাওয়া বইছে ঘরে ঘরে, ফুল স্পীডে । তবুও অপর্ণা-বৌদি গরমে যেন আইটাই করছেন । নিজের ঘরের খাটে শুয়ে এপাশ ওপাশ করছেন । বুক, পিঠ, গলা ঘেমে উঠছে বড় বেশী । মাইসোর শ্রাণ্ডেল সাবান মেখে গা ধুয়ে এসেছেন একটু আগে, তবুও ঘামছেন । ঘাড়ে পিঠে বুক আর গলার খাঁজে ট্যালকম পাউডার দিয়েছেন, তবুও ঘামছেন । ভেতরের আঁট-জামাটা ভিজে গেছে ঘামে ।

কত গয়না অপর্ণাবৌদির গায়ে ! সোনার গয়না !

গোছা গোছা মিছরীদানা চুড়ী, ঢাকাই কাজের ককন, মটরমালা, কানে কুমকো, মুক্তোর নাকচাবি । খোঁপায় সোনার ফুল । ঘনকালো পাড়ের আকাশী রঙের চেক শাড়ী অপর্ণাবৌদির দেহে, একটি আঁট-জামা—ধোপধুরস্থ পোষাক । শাড়ীর আঁচলে চাবির চেন-রিং রূপোর । কপালে সিঁহুর টিপ পয়সা-প্রমাণ, পায়ে রাঙা আলতা ।

অসহ্য গরমে এপাশ ওপাশ করছিলেন অপর্ণাবৌদি !

রেডিওটা চালিয়ে দিয়েছিলেন । ৩৭০'৪ মিটারের ঘরে রেডিওর কাঁটা । কে এক ওস্তাদ দরবারী কানাড়া ধরেছে রেডিওতে । বড় দরদ দিয়ে গাইছে যেন । তেমনি তবলা চলেছে সঙ্গে সঙ্গে ।

গলার মটরমালা দাঁতে কামড়ে অপর্ণাবৌদি কড়িকাঠে চোখ তুলে তাকিয়ে আছেন । আকাশ পাতাল কি যেন ভাবছেন । কখনও নুন্দা টানা চোখ বন্ধ করছেন, কখনও খুলছেন ।

কাকে যেন ডাকতে পাঠিয়েছেন । তারই প্রতীক্ষায় আছেন ।

বিরাজমোহন ঘরে যেতেই অপর্ণা উঠে বসলেন । বুকের বসন ঠিক করতে করতে বললেন,—কখন ডাকতে পাঠিয়েছি, এতক্ষণে সময় হয়েছে তো ? আচ্ছা বিবেচনা বটে !

বিরাজমোহন কাঁচা পাকা দাড়িতে আঙ্গুল চালাতে চালাতে বলেন,
—ভিয়েনে ছিলুম, তাই দেবী হয়েছে। কি বলছে কি তাই বল।

ক্ষীণ একটি দীর্ঘশ্বাস ফেলে অপর্ণা বললেন,—ভিয়েনে ছিলে, তা
হ'লে তো আমার বাপচোদ্দপুরুষ উদ্ধার হয়ে গেছে! বলি ডাক্তারের
কাছে যেতে হবে না? ছেলেটার পেটে আজ আর ওষুধ পড়বে না তো?

মুখখানি বিকৃত করলেন বিরাজমোহন। বললেন,—এখন যেতে
হবে ডাক্তারের কাছে?

—তা হলে আমিই যাই!

ক্রোধ-গম্ভীর মুখে কথা বললেন অপর্ণা। খাট থেকে নেমে ঘরের
মেঝেয় দাঁড়ালেন। বললেন,—সময় হবে না, বাঈনাচ দেখতে যাওয়া
হবে বুঝি?

—তা বাড়ীতে যখন হচ্ছে বাঈনাচ, তখন না দেখে আর উপায়
কি? ঘরের দরজা বন্ধ করে লুকিয়ে বসে থাকবো না কি?

বিরাজমোহন সহজ স্বরে কথা বলেন। বেপরোয়ার মত।

খাটের এক পাশে অপর্ণার অস্থস্থ ছেলে। কথা কাটাকাটি হওয়ায়
তার তন্দ্রার ঘোর কেটে যায়। চোখ মেলে তাকায় দুর্বল দৃষ্টিতে।

অপর্ণা বললেন,—রোগা ছেলেটা তাই বলে ওষুধ পাবে না? কি
মুশকিলে পড়লুম আমি! কাকে তবে পাঠাবো ডাক্তারের ডিসপেন-
সারিতে, সেটা শুনি?

বিরাজমোহন বললেন,—কেন তোমার ভক্ত, তোমার সম্বাদার,
তোমার পরম বন্ধু অলককে পাঠাও।

কয়েক মুহূর্ত চুপচাপ থাকেন অপর্ণা। রাগে বুঝি তাঁর সর্বাত্ম কাঁপতে
থাকে! বলেন,—তার পড়াশোনা আছে, সে যেতে পারবে না।

—তবে আমি নিরুপায়। জু'মাইল রাস্তা পেরিয়ে ডাক্তারের

ডিস্পেনসারিতে যেতে পারবো না আমি এই রাত্তিরে ! কাল সকালে
এনে দেবো !

বিরাজমোহনের কথায় উদ্ভাপ নেই । স্পষ্ট কথা বললেন তিনি ।

অপর্ণা বললেন,—তা হ'লে ছেলেটা ওষুধ না পেয়ে মরুক ।

বিরাজমোহন বললেন,—পালাজরে কেউ এক রাত্তিরের মধ্যে
কখনও মরে না । তারপর ওষুধ আনতে গেলেই ফেলতে হবে আড়াইটি
টাকা । ওষুধ কিনে কিনেই আমি ফতুর হয়ে গেলুম এ যাত্রায় ।

—ওষুধের টাকা আমি দিচ্ছি । বললেন অপর্ণা । ঘরের আলমারীর
চাবি খুলতে উদ্ভত হলেন । পিঠের আঁচল টানলেন । আঁচলে রূপোর
চেন-রিং !

বিরাজমোহন খেঁকিয়ে উঠলেন,—বড্ড যে টাকা হয়েছে দেখছি !
টাকার গরম থাকে না মানুষের । তাও যদি বাপের দেওয়া মাসোহারার
টাকা না হ'ত বুঝতাম ! কথা বলতে বলতে ক্ষণেক ধেমে বললেন,—
মাসে মাসে ভারীতো ত্রিশটি টাকা পাও, তার জগেই এত গরম ?

—ভুল বলছো তুমি ! বললেন অপর্ণা,—মিথ্যে কথা বলছো ! গরম
আমি কাকেও দেখাইনি । টাকার অভাবে তাই বলে ছেলেটা ওষুধ
পাবে না ! যা হয়ে আমি তা চোখে দেখতে পারবো না ।

পালাজরের রোগী জ্বরের প্রকোপে আচ্ছন্ন হয়ে আছে যেন ।

খাটের এক পাশে নেতিয়ে পড়ে আছে । ঘরে কথা কাটাকাটির শব্দ
হওয়ায় থেকে থেকে দুর্বল দৃষ্টিতে দেখছে । আবার চোখ বন্ধ করে
ফেলছে অধিক জ্বরের ঘোরে । শীত শীত করছে, তাই গায়ে চাদর
ঢেকেছে ।

বেশ কিছুক্ষণ নীরব থাকেন বিরাজমোহন ।

কৌতূহলী চোখে অপর্ণার আপাদমস্তক লক্ষ্য ক'রে দেখেন । মুখে

তঁার য়ুহু হাসির ক্ষীণতম রেখা ফুটে ওঠে। দেখতে দেখতে সহাস্তে হঠাৎ বললেন,—মাইরি, তুমি গয়না পরেছো বটে! যে ক'খানা আছে তার সবগুলোই গায়ে চাপিয়েছো বুঝি?

অপর্ণা দীপ্তকণ্ঠে বললেন,—না আরও আছে। গয়না আছে তাই পরেছি। তোমাদের বাড়ীর বৌ হয়ে বছরান্তে একখানা গয়নাও তো পাইনা!

মুখখানি বিবর্ণ হয়ে যায় বিরাজমোহনের। কাঁচা-পাকা দাড়িতে আঙ্গুল চালাতে চালাতে বলেন,—এত চট করে চ'টে যাও কেন বলতে পারো?

—চটিয়ে দিলে কে আর চটে না তাই বল'। বললেন অপর্ণা ব্রান-গম্ভীর কণ্ঠে। বললেন,—আমিও তো মানুষ, কাঁহাতক আর কথা সহ্য করি অকারণে!

বিরাজমোহন বললেন,—আমি যে এত কথা বললুম, সেতো তোমাকে চটাবার জন্তেই! তুমিও তাই মেজাজ গরম করবে? যা মুখে আসবে তাই বলবে?

—আগে আমি বলিনি। মাসে মাসে ত্রিশ টাকার বেশী বাবা দিতে পারেন না। তাই নিয়ে আঁকাবাঁকা কথা শুনেতে আমি মোটেই রাজী নই। বাবা আমাকে যা দিচ্ছেন তাইই যথেষ্ট। এই বা দেয় কে শুনি?

বিরাজমোহন বললেন,—তোমার বাবার তুলনা আছে? তোমার বাবা হ'লেন সাক্ষাৎ দেবতা। তঁার মত লোক হয় না। তিনি নররূপী স্বয়ং ভগবান, হয়েছে তো?

—ঢের হয়েছে থাক। আর নকল সোয়াগ কাড়াতে হবে না। এখন ওষুধটা এনে দাও দেখি।

অপর্ণা এতক্ষণে সহজ হ'লেন। স্বভাবস্বলভ মিষ্টি গলায় কথা বললেন।

ঘরের বেতার-যন্ত্রে দরবারী কানাড়া ধ'রেছিল কোন্ এক বিখ্যাত গাইয়ে। তবুও চাবি ঘুরিয়ে যন্ত্রের আওয়াজ কমিয়ে দিলেন। বড্ড বেশী জোরে রেডিওটা বেজে চলেছিল যেন। নিমেষের মধ্যে, কার যেন শাসানির ধমক শুনে, শব্দ হ্রাস করলে রেডিও।

—দাও তবে টাকা দাও। বললেন বিরাজমোহন।—সাইকেলে যাই, ওষুধটা এনে দিই।

অপর্ণা পিটের আঁচল টেনে চাবি ধরলেন।

আয়নাদেওয়া দেবাজের পাল্লা খুললেন। বললেন,—কত দেবো তাই বল? আলমারী খুলে দাঁড়িয়ে থাকতে পারবো না। ছেলেটার জন্মে এখন বার্লি তৈরী করতে যেতে হবে।

—কাঁচা-পাকা দাড়িতে আঙ্গুল চালাতে চালাতে আর কি যেন ভাবতে ভাবতে বললেন বিরাজমোহন,—ওষুধের জন্মে দাও টাকা তিনেক।

—টাকা তিনেক কেন? এই মাত্রর যে বললে আড়াই টাকা?

বিরাজমোহন ঐ কুঁচকে বললেন, বেশী করে বললাম,—যদি দু'চার আনা বেশী চায়?

—অ।

—আর আমাকে দু'চার টাকা দেবে না? বাড়ীতে আজ বার্দীনাচ হচ্ছে, আর আমি কিনা নাচের আসরে না গিয়ে লুকিয়ে লুকিয়ে ঘুরে বেড়াচ্ছি! আমি তো আর চাঁদা দিইনি যে নাচ দেখতে পাবো। কেমন যেন হতাশ সুরে কথা বললেন বিরাজমোহন। যেন দুঃখের আভাষ কণ্ঠস্বরে।

অপর্ণা বললেন,—নাই বা গেলে নাচ দেখতে।

—বাড়ীর সকলে, কচিবুড়ো সকলেই তো আছে। আমিই শুধু—

তু'এক মুহূর্ত নিম্পলক দৃষ্টিতে স্বামীর মুখে চোখ রেখে তাকিয়ে থাকলেন অপর্ণাবোধি। তাকিয়ে থাকতে থাকতে কি মনে হয় কে জানে বললেন,—কত টাকা চাঁদা? কে কত টাকা দিয়েছে তাই শুনি?

বিরাজমোহন বুঝলেন যে মাটি ভিজছে। বললেন,—যার যেমন সামর্থ্য। কম বেশী আছে। সকলে তো আর সমান অঙ্ক দেয়নি।

—তুমি কত টাকা দিতে চাও? তোমাকে কত টাকা দিতে হবে?

বিরাজমোহন বললেন বিনত্র স্বরে,—ভেবেছিলুম তো, অল্প অল্প শরিকরা যা দিয়েছে তাই দেবো। তবে, তুমি যা দেবে তাইই দেবো।

—কি হবে টাকা জলাঞ্জলি দিয়ে?

কথা বলতে বলতে হাতবাক্স খুললেন অপর্ণা। বললেন,—এই নাও, ওষুধের জন্তে তিন টাকা আর তোমার চাঁদা পাঁচ টাকা।

নোট আর রেজগীতে মিলিয়ে মোট আটটি টাকা বিরাজমোহনের হাতে দিলেন। ক্যাশবাক্স বন্ধ করলেন। আয়না-দেওয়া দেওয়ালে চাবি দিয়ে পিঠে আছড়ালেন চাবির গোছা সমেত আঁচল। সজোরে।

বিরাজমোহনের ঠোঁটের কোণে হাসির ঝিলিক মারলো! ঘরের এক ছকে ঝোলানো আধ-ময়লা আদির পাঞ্জাবীটি পেড়ে কাঁধে ফেলে বললেন,—তবে আমি যাই, ওষুধটা চট করে এনে দিই, আর বাজারের সেলুন থেকে দাড়িটা কামিয়ে আসি।

—যাবে আর আসবে। দেবী করবে না মোটে। ছেলোটোর ওষুধ খাওয়ার সময় উৎরে গেছে বোধ হয়। দাড়িটাও কামিয়ে এসো বাপু, কি বিক্রীই না হয়ে আছে মুখটা!

কথার শেষে খাটের এক কিনারায় ঠেস দিয়ে দাঁড়ালেন অপর্ণা বোধি। দেহ হেলিয়ে আছেন, তাই পরণের শাড়ীখানি কেমন যেন এঁটে লেপটে যায়। স্পষ্ট হয়ে ওঠে তাঁর দেহরেখা। বয়স কবে পেরিয়ে

এসেছেন, তবুও অপর্ণা বৌদির যৌবন এখনও আছে অটুট। খাটের কিনা-
রায় দেহ হেলিয়ে দেরাজের আয়নায় নিজেকে দেখতে থাকেন তিনি।

আর বিরাজমোহন কাঁধে জামা চাপিয়ে, মুহুর্তের মধ্যে অন্ধকারে
অদৃশ্য হয়ে যায়। ঘরের বাইরে বেরিয়ে একবার যেন হাসেন তিনি।
বেশ জোর কয়েকটা মিথ্যে কথা বলেছেন অপর্ণাকে। চোখে তাঁর
ধুলো দিয়েছেন।

ওষুধের দাম তিন কেন আড়াই টাকাও নয়।

পালাজরের এক শিশি মিক্সচারের দাম পুরা দেড় টাকাও নয়। বাকী
টাকাটি আত্মসাতের আনন্দে ঘর থেকে বেরিয়ে মনের স্বখে একবার
হেসেছিলেন বিরাজমোহন। তারপর জোরে পা চালিয়েছেন।
সাইকেল চালিয়ে যেতে হবে ডাক্তারের ডিসপেনসারীতে। তারপর
ফিরে এসে যোগ দিতে হবে নাচঘরের সারারাত্রিব্যাপী আনন্দ-উৎসবে।

বিরাজমোহন ঘর থেকে বেরিয়ে যেতেই সোজা দাঁড়ালেন অপর্ণা
বৌদি। দেরাজের আয়নার সমুখে গিয়ে মাথার খোঁপা চাপড়াতে
লাগলেন। দেখলেন নিজের মুখ, ঠিক আছে, না নেই। পাউডার
উবে গেছে কি! চোখের সূক্ষ্মা কি মুছে গেছে! কপালের পয়সা-প্রমাণ
গুঁড়ো-সিঁদুরের টিপ!

—অপর্ণা বৌদি?

—কে?

—আমি?

আয়না থেকে মুখ ঘোরালেন অপর্ণা। দেখলেন যে ডাকছে
তাকে। বললেন,—কে? অলক ঠাকুরপো?

—হ্যাঁ আমি। তোমার জন্মে বাগান থেকে যুঁই ফুল এনেছি!

কথা বলতে বলতে এক রাশ যুঁই হাতে ঘরে ঢুকলো অলক । তাজা, টাটকা ফুল । সজ্জ ফোটা ! ফুল আর কচি কচি ঘন সবুজ পাতা ।

তৃপ্তি না আনন্দের উৎসাহে একগাল হাসি হাসলেন অপর্ণা বৌদি । মুক্তার মত দাঁতের সারি দেখা গেল । ছুঁহাত পাতলেন । ঝির ঝির করে পড়লো শুভ্রপুষ্পিকার রাশি, অপর্ণার ফর্সা হাতে । সজ্জ ফোটা ফুলের মিষ্টি গন্ধ ভাসলো ঘরে ! টাটকা যুঁইয়ের স্নগন্ধ । হাতের 'পরে ফুলের রাশি দেখে পরিতৃপ্তির হাসি হাসতে হাসতে অপর্ণা বললেন,— কোথা থেকে আনলে ? কোথায় পেলো এত ফুল ?

অলকমোহন কপালের ঘাম মুছতে থাকে নীল-সার্টের আঁস্তিনে । বললে,—অনেক কষ্টে, অনেক দূর থেকে আনতে হয়েছে বৌদি । সেই ঘোষপাড়া থেকে ।

ঘরের এক কোণে ছিল একটি বেতের গোলাকার টেবিল । সেখানে আছে কবিগুরু রবীন্দ্রনাথের ছবি । নিকেলের ফ্রেম । সেই ছবির সম্মুখে কাচের একটি রেকাবী । অপর্ণা অতি সন্তর্পণে ফুলের রাশি ঐ রেকাবীতে উজাড় করে দিলেন । কুঁজো থেকে জল গড়িয়ে ছিটিয়ে দিলেন ফুলে । বললেন,—তুমি এই ফুল আনতে গিয়েছিলে ঘোষপাড়ায় ? সে যে অনেক দূর !

অলকমোহন লজ্জা পায় এ কথায় । লজ্জায় বলে,—তুমি যে বৌদি যুঁইফুল ভালবাসো । কথা বলতে বলতে থামলো এক মুহূর্ত ! আবার বললে,—আর কি ফুল ভালবাসো বৌদি ?

কুঁজো থেকে জল গড়ানোর সঙ্গে সঙ্গে খসে পড়েছিল বুকের আঁচল-খানি । চাবির গোছা ঝনঝনিয়েছিল । ঘরের মেঝেয় লুটানো আঁচল যথাস্থানে টানলেন অপর্ণা । বললেন,—সব প্রথম ভালবাসি যুঁইফুল । কনকচাঁপা, গন্ধরাজ, রজনীগন্ধা, ক্রিসিস্থিমাম ।

—কেয়া ফুল ভাল লাগে না তোমার ?

—কেয়া ফুল ?

—ই।

—খু—উ—ব ভাল লাগে। বললেন অপর্ণা, পরিতৃপ্ত কণ্ঠে বললেন,
—তবে চট করে দেখা যায় না কেয়াফুল !

—কে বললে তোমাকে ?

অপর্ণা ক্র কুঁচকে বললেন,—কোথায় দেখা যায় ? তুমি কোথায়
দেখলে ঠাকুরপো ?

অলকমোহন বললে,—গঞ্জের ফুলের বাজারে প্রচুর পাওয়া যায়।
শোনা যায় ঘরে রাখলে না কি সাপ আসে !

সহসা জিব কাটলেন অপর্ণা। বললেন,—ঠাকুরপো, তুমি রাস্তিরে
এই নাম মুখে আনলে ?

অলকমোহন হাসলো ! শব্দহীন হাসি। সে যেন জানতো অপর্ণা
এই কথাটি বলবেন। হাসতে হাসতে বললে অলক,—কেন বৌদি,
রাস্তিরে সাপের নাম করতে নেই কেন ?

আবার জিব কাটলেন অপর্ণা। আবার যে সাপের নাম করেছে অলক !

—মা মনসাকে মনে মনে প্রণাম কর' ঠাকুরপো। রাস্তিরে ও-নাম
মুখে আনতে নেই। মা মনসা রুষ্ট হন।

অলকমোহন হাসিমুখে বললে,—রুষ্ট হয়ে কি করেন বৌদি ?

অপর্ণা খাটের কিনারায় বসলেন পা মুড়ে। মুখে গাভীর্ষ্য ফুটিয়ে
বললেন,—রাস্তিরে ও-নাম করলে মা মনসার বাহন নাকি দংশায়।

অলকমোহন মজা পায় যেন কথা শুনে। বলে,—দেখি আজ
রাস্তিরের মধ্যে আমাকে দংশায় কি না ! চন্দনদীঘির ধারে গিয়ে বসে
থাকবো।

ভয়ে যেন সিঁটিয়ে উঠলেন অপর্ণা ।

ভয়ার্ত্ত মুখভঙ্গী করলেন । দুই কাঁধ কাঁপিয়ে শিউরে শিউরে উঠলেন । বললেন,—খুব হয়েছে । আর বেশী বাহাদুরীতে কাজ নেই । মাথার অমন চুলগুলোকে কি ক’রে রাখা হয়েছে তাই শুনি ?

অলকমোহনের মাথায় একরাশ কৌকড়ানো চুল ।

টাকার মত চাকা চাকা চুল রাশি রাশি । অযত্ন আর অবহেলায় এলোমেলো হয়ে আছে ।

কথা বলতে বলতে খাট থেকে নেমে পড়লেন অপর্ণা বৌদি ।

চুল-বাঁধার আড্ডা থেকে চিরুণীটা তুলে নিয়ে এগিয়ে গেলেন অলকমোহনের কাছাকাছি । বললেন,—এসো, আঁচড়ে দিই আমি ।

সম্মতি বা প্রতিবাদ, কোন কিছুই ধার ধারলেন না । কথা বলতে বলতে অলকের চিবুক ধ’রে তার মুখ তুললেন । ডান হাতের চিরুণী চলতে শুরু করলো !

একান্ত নিরুপায়ের মত তাকিয়ে থাকতে হয় অলকমোহনকে । পলকহীন চোখে অলক তাকিয়ে থাকে, অপর্ণা বৌদির মুখে চোখ রেখে । কি অপূর্ব মুখশ্রী ? স্তম্ভ দেওয়া চোখে কি গভীর দৃষ্টি ! কত বেশী লাল ঐ পাতলা অধর ! সালঙ্কারা অপর্ণা বৌদির কি অপক্লপ রূপমাধুরী ।

—কালকে কলেজ নেই তোমার ?

শুধোলেন অপর্ণা । অলকের চুলের জট ছাড়াতে ছাড়াতে বললেন ।

—ই্যা আছে । কাল শ’ এগারোটায় ফাষ্ট ক্লাশ । ন’টা পয়ত্রিশের ট্রেন ধরতে হবে । ন’টার মধ্যে বাড়ী থেকে বেরুতে হবে ।

একসঙ্গে অনেকগুলি কথাই বলে যায় অলকমোহন ।

অপর্ণা বৌদি বললেন,—এখনও পড়তে ব’স নি ? কলেজের পড়া করবে না ?

হাসলো অলকমোহন। সরল হাসি। বললে,—কলেজের পড়াতো সেই পরীক্ষার আগে।

—তার আগে বুঝি পড়তে নেই? না কলেজের মেয়ে দেখে দেখেই সময় কেটে যাবে?

শেষের কথাটি বলতে বলতে হাসলেন বৌদি।

—খ্যৎ! কি যে বল' তুমি!

বললো অলোকমোহন। সলাজ হাসি হাসলো।

—আমরা কি আর কিছু বুঝি না? বললেন অপর্ণা। সহাস্তে বললেন,—খু—উ—ব বুঝি। দেখে দেখে তাই বুঝি স্কটিশ্ চার্চ কলেজে ভর্তি হওয়া হয়েছে!

অসম্ভব লজ্জা পায় অলকমোহন।

মাথা নত করতে চায়। কিন্তু তার চিবুক অপর্ণার হাতে। সলজ্জায় বললে,—অন্ত কোন কলেজে যে সীট্ পাওয়া গেল না। সেন্ট্ জেভিয়ার্সে সীট্ পেলাম না যে!

—চেষ্টা করলে কি আর মিলতো না?

—সত্যি বলছি, সেন্ট্ জেভিয়ার্সে সীট্ পাইনি। প্রেসিডেন্সিতেও নয়।

—সত্যি বলছো?

—হ্যাঁ, সত্যি বলছি।

—অপর্ণা স্মিতহাসি হাসলেন। ইদিক সিদিক তাকিয়ে বললেন নতকণ্ঠে,—এই নীল পপলিনের সার্টটায় তোমাকে খু—উ—ব ভাল দেখায়।

কনেক অপর্ণাবৌদি নির্ণিমেষ দৃষ্টিতে তাকিয়ে থাকলেন। বললেন,—আয়নায় মুখটা দেখো তো। ভদ্র হয়ে গেছো ক—ত!

কোন কথা বলে না অলকমোহন। চূপচাপ থাকে। অপর্ণাবৌদি

চুল-বাঁধার আড্ডায় চিরুণী রেখে দিয়ে রেডিওটা বন্ধ ক'রে দিলেন। দরবারী কানাড়া শেষ হওয়ার সঙ্গে সঙ্গে কোন্ মন্ত্রী না উপমন্ত্রী লেকচার দিতে ব'সেছেন। কাঁচা গত্তে কথা বলছেন। কাগজ পড়ছেন। 'কেন ঘুষ দেবেন না' বিষয়টি দেশবাসীকে বুঝিয়ে দিচ্ছেন। বলছেন, "যারা ঘুষ নেয় আর যারা ঘুষ দেয় তারা উভয়েই সমান পাপী।"

গান নয়, বাজনা নয়, বাঙলায় লেকচার শুনবে কে এখন! অপর্ণা রেডিওর চাবি ঘুরিয়ে দিয়ে খাটের কিনারায় দেহ এলিয়ে দিলেন আবার। অকারণ অবসন্নতার ভাব ফুটলো দেহভঙ্গিমায়। স্পষ্টতর হয়ে উঠলো দেহের রেখাগুলি। বললেন,—আজতো বারবাড়ীতে সারারাত নাচগান হচ্ছে।

—তাইতো দেখছি। লোকজনের বেশ ভীড় হয়েছে দেখলাম! যেন অপ্রস্তুত হয়ে কথা বলছে অলকমোহন। বংশের কুকীর্তির লজ্জায় হয়তো। নয়তো বাঈজীর নাচের প্রসঙ্গই হয়তো লজ্জাকর।

অপর্ণা বললেন,—এখন যাও পড়তে যাও, কেমন?

মাথা হেলিয়ে সম্মতি জানালো অলকমোহন। ধীরে ধীরে চলে যাচ্ছে এমন সময় অপর্ণা আবার কথা বললেন। বললেন,—ঠাকুরপো, রাত্তিরে আজ গল্প করা যাবে। আসবে তুমি? তোমার দাদাতো থাকছে নাচের আসরে।

মাথা হেলিয়ে সম্মতি জানালো অলকমোহন। তারপর ঘর থেকে ধীরে ধীরে বেরিয়ে গেল। আবার ডাকলেন অপর্ণা।

—ঠাকুরপো, শুনে যাও।

—কি?

ফিরে এলো অলকমোহন। দরজার মুখে।

—একটু দাঁড়াবে ভাই? আমিও যাবো তোমার সঙ্গে!

—কোথায় যাবে?

—যাবো রান্নাবাড়ীতে। খোকার বার্লি তৈরী করতে যাবো।
রান্নাবাড়ীতে দালানটায় যা অঙ্ককার! বড্ড ভয় করে ভাই। আমাকে
পৌছে দিয়ে পড়তে যাও, কেমন?

বৌদির ভীতিকাতরতায় হাসলো অলকমোহন! বললে,—খোকার
জর কমেনি?

অপর্ণা বললেন,—জর কমবে? এইতো সব এসেছে! পালাজরের
নিয়মই এই। প্রথম চোটে খু—উ—ব জর ওঠে। একেবারে একশো
তিন ডিগ্রী। ঋষিগণের আগে আগে দিতুম, এখন আর জর দেখি না।

কথা বলতে বলতে ঘর থেকে বেরিয়ে পড়লেন অপর্ণা।

ঘরের বাইরের দালানে কাকে উদ্দেশ্যে ক'রে বললেন,—সুপর্ণা,
তুমি চোখ রেখো, ঘরে যেন কেউ না ঢোকে। আমি খোকার বার্লি
নিয়ে এখুনি আসছি।

অপর্ণার একমাত্র কন্যা সুপর্ণা। কুমারী কিশোরী।

দালানের আলোয় বালব্ নেই, কে খুলে নিয়েছে। সুপর্ণা তাই
একটি হারিকেনের সম্মুখে ব'সে স্কুলের লেখাপড়া করছে। মাদুর বিছিয়ে
নিয়েছে একটা। হাতের লেখা করছিল এক মনে সুপর্ণা। মায়ের
কথায় চোখ তুললো খাতা থেকে। কলম থামলো। বললে,—আচ্ছা,
শীঘ্রী শীঘ্রী এসো কিন্তু। দেরী ক'র না যেন। একা একা আমার যে
ভয় করবে!

—ভয় করবে কেন? আমি যাব আর আসবো।

কথার শেষে দালানের এক দরজা অতিক্রম ক'রে অগ্র এক দালানে
পা দিলেন। সেখানেও দারুণ অঙ্ককার। নেহাৎ অভ্যাস আছে
তাই রক্ষা।

আগে আগে চলেছিল অলকমোহন।

অভ্যাসের গুণে চলেছিল হনহনিয়ে। পেছন থেকে এগিয়ে তার একটি হাত ধরলেন অপর্ণাবৌদি। ভয় পাওয়ার ভঙ্গীতে নিজের এক বাহুমধ্যে ধরে রাখলেন তার হাতখানি। তারপর চললেন ভীত ও ত্রস্ত পদক্ষেপে। চুপি চুপি কথা বললেন,—সারেঙ্গীর বন্ধার গুনতে পাচ্ছে তো ঠাকুরপো ?

—হ্যাঁ।

নীরবতা আর নিরবচ্ছিন্ন অন্ধকারের গহ্বরে যেন ছ'জনে হারিয়ে গেল।

শুধু সারেঙ্গীর সুরেল আওয়াজ আজকের বৈশাখী বাতাসে।

চন্দ্রমোহনের উৎসাহে আজ নাচ, গান আর বাজানার রকম-বেরকমের ডিমনষ্ট্রেশন হবে কত রাত্রি পর্যন্ত, তা কেউ বলতে পারে না। চন্দ্রমোহন নিজে যে শুধু সঙ্গীতরসিক তাই নয়, তিনি একজন বীণকার। বীণা আর সুরশৃঙ্গারে দস্তুরমত দখল আছে তাঁর। সুরের পূজারী তিনি। গানের সমঝদার।

সুরের পূজারী যে, তাঁর কেন এমন একচোখা দৃষ্টি !

চন্দ্রমোহন তারের যন্ত্র ধরেন কিন্তু মন থেকে অপছন্দ করেন পিয়ানো, অর্গান, হারমনিয়ম, গীটার। খাস বাঙলার জমিদার বাড়ীর বংশধর গান জানেন ঋপদ আর ধামার। বাজনা বলতে বোঝেন ঝদঙ্গ, তানপুরা বীণা, সুরশৃঙ্গার, ব্যাস।

বার্জী ছ'জন আস্থক চাই নাই আস্থক আজকের রাত্রি কি বৃথা চলে যাবে ! সদরের বড় হলঘরেই আসর হয়েছে। বড়বাবু চন্দ্রমোহন হলে পৌছেই বললেন,—আর ওয়েট করা চলে না। ফর নাথিং সময় নষ্ট হচ্ছে। ততক্ষণ গান বাজনা চলুক না কেন !

অনেকেই একসঙ্গে তারস্বরে বললেন,—হ্যাঁ হ্যাঁ, তাই চলুক, তাই চলুক ।

আকাশ কালো, রাতের অন্ধকারে । কত প্রত্যাশার এই রাত্রি ! কত প্রতীক্ষার ! সেই রাত্রিটুকু যদি বৃথাই অতিবাহিত হয়ে যায় ? মিশ্ কালো আঁধার ফুরিয়ে আকাশ যদি হঠাৎ ফর্সা হয়ে যায় !

ঢালোয়া ফরাস বিছানো ঘরে যেন লোক আর ধরে না ।

বাবুরা শুধু নেই, আছেন তাঁদের বন্ধু-বান্ধব । বাবুদের যত সব এক গেলাশের ইয়ার । মোসায়ের । ফরাসের এক পাশে ততক্ষণে তানপুরায় সুর বাঁধাবাদি চলতে থাকে । যন্ত্রের কাণে পাক দেওয়া হয় । তবলার কানায় হাতুড়ির ঘা পড়ে ।

—বাঈজী যদি না আসে, আমার চাঁদার টাকা ফেরৎ দিতে হবে !

অত্যন্ত আক্ষেপের সঙ্গে, কে একজন বললেন । বাবুদের মধ্যে থেকে । কথা বলতে বলতে হাসলেন । নকল হাসি ।

কথা কি আর শোনা যায় কারও ! কেই বা শোনে ! ঘরে যেন, খণ্ডযুদ্ধ চলেছে হাসি তামাসা মস্তরার । কত—কত দিন পরে একত্রে মিলেছেন চন্দনধামের বাবুরা ! আজ রাত্রির মত সকলেই এক এক অজাতশত্রু হয়ে পড়েছেন । বিবাদ-বিসম্বাদ ভুলে গেলেন পরস্পরে । মুখ দেখাদেখি ছিল না বাঁদের মধ্যে, জলসার যাতুমায়ার আর মদিরা-সুধায় তাঁরা আজ আত্ম-পর মানবেন না ।

—আমার একটা এ্যাপীল ছিল তোমাদের কাছে !

বড়বাবু চন্দ্রমোহন কথা বলছেন । গম্ভীর কণ্ঠস্বর তাঁর । সকলের মুখের কথা থেমে যায় । মুখের হাসি মিলিয়ে যায় । তিনি বললেন,—এটা নাচগানের জলসা, সকলকে মনে রাখতে হবে । গল্পগুজবের আড্ডা নয় এটা । কথা বলতে হয় এঘরের বাইরে গিয়ে কথা বল' ।

চন্দ্রমোহন কথা বলছেন। প্রায় সকলেই নীরব হয়ে যায়। সঙ্গে সঙ্গে। যে যার দোষ বুঝে যেন নিশ্চুপ হয়। তানপুরা আর তবলার প্রস্তুতি-ধ্বনি স্পষ্টতর হয়।

সদরের দোতলার নাচঘর, চতুষ্কোণ নয়, অষ্টভুজাকৃতি। প্রায় গোলাকার বললেই হয়। নাচঘরের কোলে কোলে দালান আর টুকরো টুকরো ঘর। কোন' ঘরে ছিল বাবুচিখানা। কোন'টি ড্রেসিংরুম বা সাজঘর, কোন'টি গোসলখানা। আবার কোন'টির নাম বুঝি বা ওয়াইন-চেম্বার,—যেখানে থাকতো শুধু হরেকরকমের বোতল আর বোতল। আবলুশ কাঠের বিলেতী ক্যাবিনেট পরিপূর্ণ থাকতো। বোতল বোতল ছইস্কি, জিন, শেরী, শ্যাম্পেন, কুঁইয়া আর রম্, বীয়ার ব্র্যান্ডি। বিলেতী জাতের ক্যাবিনেট কত কালের তা কেউ জানে না। বিলেতী, তাই তার ফাট ধরেনি কোথাও, চিড়ও খায়নি। শুধু গুণ ধরেছে। আয়নার কাচ ঝাপসা হয়ে গেছে। ক্যাবিনেটে এখনও আছে সারি সারি বোতল। তবে শূন্য এই যা দুঃখ!

ঘরে ঘরে এখন আরশুলা চামচিকার বসতি। নাচঘরে অন্য রাত্রে চলে ছুঁচোর কীর্তন!

রাত্রি ঘন হ'তে থাকে ক্রমেই, অথচ কলকাতার বাঈজীর সাক্ষাৎ নেই এখনও। কেমন যেন মনমরা হয়ে যায় কেউ কেউ। গুম মেরে যায়। চন্দ্রমোহন বললেন,—কলকাতার বাঈজী যদি না আসে, চন্দনপুরের গঞ্জ থেকে বাঈজী আনবো আমি। তারজন্তে তোমরা কেউ ভেবো না।

—চন্দনপুরের গঞ্জে বাঈজী নেই, আছে খেমটাউলী।

বাবুদের ভেতর থেকে কে যেন বলেন দাঁতে দাঁত চেপে। নতকণ্ঠে।

চন্দ্রমোহন বললেন,—কুছ পরোটা নেই, খেমটাই সই। যম্বিন্
দেশে—

—নেই-মামার চেয়ে কানা-মামাও ভাল।

আবার কার সহাস মন্তব্য। ভিড়ের মধ্যে নিজেকে লুকিয়ে কে
যেন বললেন। চন্দ্রমোহন সিগারেটের ধোঁয়া ছাড়তে ছাড়তে
বলেন,—ডিস্কারেজড্ হও কেন সব? ট্রেনের টাইম এখনও উৎরোয়নি।
লাষ্ট ট্রেনই আছে রাত দশটা ক' মিনিটে।

—আগে গান হবে না বাজনা হবে?

কে যেন ভয়ে ভয়ে শুধায়। দ্রুত কণ্ঠে।

কাঠ-বিড়ালীর লেজের মত চন্দ্রমোহনের দুই ভ্রু বাঁকা হয়। ক্ষণেক
চিন্তিত হন যেন। সিগারেটে টান দিতে দিতে ইদিক সিদিক দেখেন।
কাকে যেন খুঁজতে থাকেন সন্ধানী দৃষ্টিতে। আশেপাশে চোখ ফিরিয়ে
বললেন,—সতু কোথায় গেল? সে যা বলবে তাই হবে। হি ইজ্
অথরিটি ইন্ দিস্ লাইন।

সতু গুরুফে সত্যেন্দ্রমোহন। এ গৃহের এক বংশধর। চন্দ্রমোহনের
প্রায় সমবয়স্ক একজন। সঙ্গীতবিদ্যায় তাঁর নাকি অসীম দক্ষতা। রাগ
রাগিনীর জ্ঞান অসীম। সত্যেন্দ্রমোহন নিজেই ঋপদ ধামার গাইতেন
এককালে। বহু ওস্তাদের পায়ে বহু টাকা ঢেলেছেন। বাঁকুড়া আর
বিষ্ণুপুরের গাইয়েরা পর্যন্ত তাঁকে সম্মান করেন এখনও।

নাচঘরেই আছেন তিনি। সুর বাঁধার দলে ভিড়ে সুর বাঁধার কাজে
মেতে আছেন। সত্যেন্দ্রমোহন বললেন,—বাজনার পালা আগে চুকে
যাক। তারপর গান হবে। আগে অর্কেষ্ট্রা হোক না।

—গাটস্ রাইট্।

সোম্মাসে বললেন চন্দ্রমোহন।

চন্দনপুরের অর্কেষ্ট্রা ক্লাবের নাম এ তল্লাটে কে আর না জানে ! ফ্রেণ্ডস্ ইউনিয়ন অর্কেষ্ট্রা ক্লাবের নাম ? চন্দ্রপুরের চতুঃসীমার মধ্যে সৌখীনদের নাটক-অভিনয়ে এই ক্লাবই মুখরুকা করে । চন্দনপুরের যে কোন' মেয়ের বিয়ের আসরে বরপক্ষদের খুশী রাখে ফ্রেণ্ডস্ ইউনিয়ন ক্লাব ! একদিন এই ক্লাবের সভ্যদের সকলেই ছিল ফ্রেণ্ডস্, সভ্যদের মধ্যে দস্তুরমত ইউনিয়নও ছিল । ক্লাবের সেক্রেটারীর পদ নিয়ে ভোট-ভুটিই যত নষ্টের মূল । আজ তাই অর্কেষ্ট্রার ঐকতানে তান আছে, ঐক্য বুঝি নেই ।

ফ্রেণ্ডস্ ইউনিয়ন ক্লাবের সভ্যদের মধ্যে খুশীর জোয়ার বইতে থাকে । সর্বাগ্রে তাদের স্মরণ দেওয়া হয়েছে । প্রথম চান্স দেওয়া হয়েছে । বাজিয়েরা মুহু মুহু হাসির সঙ্গে ন'ড়ে চ'ড়ে বসে । যে যার যত্নে হাত দেয় ।

সত্যেন্দ্রমোহন বললেন,—তোমাদের বিলীতি গৎ ফৎ চলবে না এখানে । শ্রেফ দিশী সুর বাজাতে পারোতো দেখো ।

ফ্রেণ্ডস্ ইউনিয়ন ক্লাব এখনও কোন' কিছুতেই পেছপাও নয় । দলের প্রত্যেকের মুখে মুহু মুহু হাসি ফুটলো । দৃষ্টি বিনিময় করলো পরস্পরে । বেহালায় ছড়ি পড়লো । ক্লারিওনেট মুখে উঠলো । টেবিল হারমনিয়মে পা পড়লো । কয়েক মূহুর্তের মধ্যে সুর ধরা হয় । এক চেনা চেনা সুর । রবীন্দ্রসঙ্গীতের সুর । অতিথি এসেছে দ্বারে...ছিল সে নদীর পারে...চেনা চেনা যেন মুখটি তার—

চন্দনপুরের বাতাসেও যেন আজ নেশার আমেজ ।

গ্রীষ্ম-সন্ধ্যার ক্ষেপা হাওয়া বইছে থেকে থেকে । প্রথম রাত্রির আধারে যেন নেশার কাজল । অত্যাশ্চর্য রাতে এতক্ষণ শুধু ঝাঁঝের ডাক শোনা যায় ; মধ্যে মধ্যে শিয়ালের কোরাস । আজকে যেন অর্কেষ্ট্রার

মিষ্টি স্বরের বহুদূরবিস্তৃত তরঙ্গে চন্দনপুর মুখর হয়ে উঠেছে।
চন্দনধামের বাবুদের দোতলার নাচঘরে উজ্জল বিজলী আলো।

চন্দনধামের ফটকের সমুখে মাস্তুলের ভীড় জমেছে !

বাবুদের দোতলার নাচঘরে গান বাজনা চলবে, বান্ধনাচ হবে।
যারা অনাহত তারাই দাঁড়িয়ে গেছে ফটকের বাইরে। যদি ঐ
নাচঘরের উন্মুক্ত জানালা ভেদ ক'রে দেখা যায় বান্ধিজীর দেহলাবণ্য !
প্রবেশের অসুমতি নেই। ফটকের পাহারাদার দিলবাহাদুর আজ
যেন বড় বেশী কড়া হয়ে উঠেছে। তার মিলিটারী মন আজ যেন
এতকাল পরে জেগে উঠেছে। কোন' রকম বেয়াদপি বা বেনিয়ম সে
আজ আর বরদাস্ত করবে না। ফটকেই আছে দিলবাহাদুর। সামরিক
কায়দায় বন্দুকধারী দিলবাহাদুর পাষাণ মূর্তির মত অবিচল দাঁড়িয়ে
আছে। অনাগত রাত্রির প্রতীক্ষায় সারাটি দুপুর ধ'রে ঘষে মেজে সাফ
ক'রেছে মরচে-ধরা বন্দুকটাকে। ঐ প্রিয়তম সাথীকে বুকে জড়িয়ে
আছে যেন দিলবাহাদুর। পোকায় কাটা মিলিটারী পোষাক উঠেছে
অঙ্গে। খাকির জামা আর পায়জামা। বুকের 'পরে ঝুলিয়েছে কয়েকটি
মেডেল। সোনা কিংবা রূপার নয়, শ্রেফ শিশার মেডেল—শক্তি ও
ও সামর্থ্যের সার্টিফিকেট যেন। রণনিপুনতার পরিচয়। কীটদষ্ট
পোষাক আর তালি দেওয়া বুট জুতোয় নেহাৎ বেমানান হয়নি।
ভালই দেখায় বুড়ো দিলবাহাদুরকে।

উন্মুক্ত ফটক। বাইরের পথে উৎসুক জনতা। বত সব
সঙ্গীতরসপিপাসু। রূপমধুপায়ী মোমাছির দল যেন !

কিন্তু ফটকে যে দিলবাহাদুর। কেউ যদি পা বাড়িয়েছে তো বন্দুকের গুঁতো খেয়েছে তৎক্ষণাৎ! বন্দুক উচিয়ে দাঁড়িয়ে আছে সে নির্বাক নিষ্পন্দের মত। অর্কেষ্ট্রার স্বর ফটক পর্যন্ত ভেসে আসে। ভারী মিঠে শোনায় বাতাসে ভাসমান কনসার্টের আওয়াজ।

পথের অদূরে দুটো অগ্নিগোলক। হঠাৎ চোখে পড়লো।

পাশাপাশি দুটি ধূমকেতু যেন, ছুটতে ছুটতে আসছে। অন্ধকারের বুক চিরে যেন আসছে। দিলবাহাদুর তার নিস্তেজ চোখের দৃষ্টি প্রসারিত করতে সচেষ্ট হয়। বার্ককোর জরায় চোখে আর তেমন দৃষ্টি নেই আগের মত। আকাশের উড়ন্ত পাখী আর অনেক উঁচু গাছের শীর্ষে ঝুলন্ত ফল একটি টোটারায় আর দাগতে পারে না দিলবাহাদুর!

বিশ্বাস হয় না নিজের চোখ দুটোকে। পলকহীন ব্যগ্র দৃষ্টিতে দেখে তবু।

বাবুদের গাড়ী আসছে কি? বাবুদের মোটর-গাড়ী! উনিশশো বিশ সালের মডেলের সেই পুরাণো ফোর্ডথানা! কনসার্টের স্বরের সঙ্গে মোটরের যান্ত্রিক শব্দের মিলন হয়। বড় বিলম্বী শোনায় যেন!

দিলবাহাদুর পা বদলায়। দাঁড়ায় গোড়ালীতে গোড়ালী ঠুকে।

পথের অদূরে বাবুদের ঝড়ঝড়ে ফোর্ডের তীব্র হেডলাইট। যেন এক মন্ত দানবের মত গাড়ীটা ছুটে আসছে সশব্দে!

স্টেশন থেকে গাড়ী আসছে। গাড়ীর গর্ভে আছে বাঈজী ছ'জন, আরও যেন কে কে আছে।

ফটকের দু'ধারে ছিল মাধবীলতার ঝাড়। বহুদিনের দুটি বুড়ী বৃক্ষলতা। এক দিকের মাধবীর ঝাড়ের আড়ালে লুকিয়ে দাঁড়িয়ে ছিলেন নায়েব কৃষ্ণচন্দ্র। কিছুক্ষণের মত ফুরসৎ পেয়ে আরামে বিড়িতে টান

দিয়ে চলেছিলেন। মোটরের হেডলাইটের আলোকপুচ্ছ নজরে পড়তেই যেন স্বস্তির শ্বাস ফেললেন তিনি। আধ-খাওয়া বিঁড়ি ছুঁড়ে ফেলে দিলেন।

বিজলী ব্যাটারীর আলো মোটরে।

হেড লাইটের স্বচ্ছ আলোয় চন্দনধামের সমুখের পথ স্পষ্ট হয়ে ওঠে অন্ধকারে। চন্দনধামের আশপাশে আগাছার ঘন জঙ্গল আর দীন-দুঃখীদের মাটির বাসা। মোটরের আলো পড়তেই মাটির ঘরের যত দরিদ্রজন সচকিত হয়ে ওঠে।

ফটকের সামনে গাড়ী দাঁড়াতে সামরিক কায়দায় এগিয়ে যায় দিলবাহাদুর। গাড়ীর পাশে গিয়ে একটি সেলাম ঠোকে। পায়ের বুট খটখট শব্দ তোলে।

নায়েব কৃষ্ণচন্দ্রকে একান্ত অনিচ্ছাসত্ত্বেও এগোতে হয়।

বান্ধিজী না বারবানিতা কে জানে! তিনি যেন ঘুণায় সিঁটিয়ে আছেন আজ। চন্দনধামের সৌখীন বাবুদের হাজারো রকমের সখ আর বদ খেয়াল থাকতে পারে, কিন্তু বুদ্ধ নায়েব কৃষ্ণচন্দ্র নেহাৎই নায়েব। সখ বলতে কিছুই তাঁর নেই। এখনও তিনি প্রত্যহ প্রাতঃকালে খাতা লেখার কাজের আগে, এমন কি মুখে জল দেওয়ার আগে, অর্থাৎ নিদ্রাভঙ্গের পর, সর্বাগ্রে লালকালির কলম ধরেন। বাবুদের কাছারীতে ধূনো আর গঙ্গাজল পড়ে যখন, নায়েবমশাই তখন লাল কালির আখরে লিখতে থাকেন দুর্গানাম! ঠিক পাকা একশো আট নাম লেখেন প্রতিদিন। পরস্ত্রীর মুখ দেখেন না কখনও, পায়ের দিকে চোখ রাখেন।

দালাল, সারেঙ্গী বাজিয়ে আর ছুজন ওড়নায় ঢাকা মুখের কারা যেন গাড়ীর গর্ভে! ফটক পেরিয়ে গাড়ী সোজা চললো সদরের মুখে। গর্জন করতে করতে। পুরানো আমলের ফোর্ড। উনিশ শো বিশ শতকের টুরার মডেল—মাটি থেকে অনেক উঁচু, সরু চাকার গাড়ী। শিথিলগ্রন্থি

বৃক্ষের মত নড়বড়ে হয়ে গেছে। সেলফ্‌ ষ্টার্ট কবে বিগড়ে গেছে। হ্যাণ্ডেল
না মারলে চলে না! গাড়ীটির প্রতি বাবুদের কারও যত্ন নেই আর।
ঝারোয়ারী গাড়ী, তাই দৃষ্টি নেই বিশেষ কারও। ধোয়া-মোছা করে না
কেউ, কন্সটিনকালেও। মাডগার্ড কাঁজরা হয়ে গেছে, যক্ষারোগীর ফুসফুসের
মত। সাইলেন্সার ফেটে গেছে, তাই গাড়ীর এত তর্জন গর্জন। হুড়ে
তালি পড়েছে বেশ কয়েকটি। গদীর ছোবড়া বেরিয়ে পড়েছে।
হেডলাইটের কাচ ফেটে গেছে। তুবড়ে গেছে বডির এখান সেখান।

নারীর যদি বয়স বেশী হয়? গাড়ী যদি ঝড়ঝড়ে হয়ে যায়?

তাই আর বাবুদের তেমন নজর নেই গাড়ীর প্রতি। দেখেন না
কেউ। তবুও শ্রেফ্‌ ফোর্ড (প্রথম) সাহেবের নির্ভেজাল যন্ত্রপাতির গুণে
চিরকালের মত এখনও থেমে যায়নি গাড়ীর ষ্টার্ট! পেট্রোল, মবিল ডেলে
হ্যাণ্ডেল মারলেই গর্জে ওঠে। ব্যাটারীতে ডিস্টিল্ড জল ঢালতে হয়।

অর্কেষ্ট্রায় রবীন্দ্রসঙ্গীতের স্বর, চন্দনধামের প্রতি মানুষকে যেন মন্ত্র-
মুগ্ধ ক'রে রেখেছে। ফ্রেণ্ডস্‌ ইউনিয়ন ক্লাবের কনসার্ট, কত দূর থেকে
শোনা যায়। চন্দনপুরের বাতাসের সঙ্গে পর্য্যন্ত যেন তার মিতালী; বহু
দিনের পরিচয়। কনসার্টের মধুমিষ্টি স্বর শুনে চন্দনপুরের কত কুমারী-
মন ঝগ্নেকের জগ্ন অগ্নমনা হয়ে গেছে। অর্কেষ্ট্রার স্বরে কত আনন্দের
বাণী, প্রেমের আবেদন-নিবেদন, কত ব্যথা আর বেদনা যে মিশে থাকে!

নাচঘরে আর প্রবেশ করবেন না, পণ করেছিলেন নায়েব কৃষ্ণচন্দ্র।

চোখে দেখবেন না বেল্লাপনা, কানেও শুনবেন না নাচঘরের
হাসি-তামাসা। ও সব চোখে দেখলে আর কান শুনলে নাকি মনের
'পরে সবিশেষ প্রতিক্রিয়া দেখা দেয়। মন নীচু হয়ে যায়। মনের
বিকার হয়। আত্ম-সংঘর্ষের বাঁধ ভেঙ্গে যায়। তবে কৃষ্ণচন্দ্রকে যে

বেতনভোগী পুরাতন ভৃত্য বললেও হয়। কর্তব্যের কাছে যনের অধোগতি হওয়ার শঙ্কা বা সঙ্কোচের কোন মূল্যই নেই।

নাচঘরে যেতেই হয়। ভয়ে ভয়ে চোরের মত প্রবেশ করেন নায়েব। বড়বাবু চন্দ্রমোহন বললেন,—হোয়াট ডু ইউ ওয়াণ্ট হিয়ার ? (এখানে তুমি কি চাও ?)

নায়েব কৃষ্ণচন্দ্র নিজের মাথায় হাত বুলিয়ে যান আর বলেন,—হজুর, কলকাতা থেকে তাঁরা এসেছেন। ষ্টেশন থেকে আমাদের গাড়ী ফিরেছে।

দু' এক মুহূর্ত স্থিরচোখে তাকিয়ে থাকেন চন্দ্রমোহন। তারপর বলেন,—গেট আউট ক'রে দাও! ঠিক জাষ্ট্র্যাট সিক্স্, ঠিক ছটার মধ্যে শালীদের এখানে পৌছানোর কথা, এখন রাত আটটা বেজেছে!

নাচঘরের দেওয়ালে আঠিকালের এক টাইমিং ক্লক।

কনসার্টের সুরে চাপা পড়ে যায় ঘড়ির সশব্দ সন্ধেতের ঝঙ্কার।

হজুরের কথা শুনে নায়েব যেন থ মেরে যান। চুপচাপ দাঁড়িয়ে থাকেন অবনত চোখে।

চন্দ্রমোহন বললেন,—হোয়াই ডু ইউ ওয়েট ? (আর তোমার অপেক্ষা কেন ?)

আমতা আমতা করেন কৃষ্ণচন্দ্র! বলেন,—হজুর আমি এ সব কথা বলতে পারবো না। আমি ওদের সঙ্গে বাক্যালাপও করি না। আমাকে ক্ষমা করুন।

হো হো শব্দে হেসে উঠলেন চন্দ্রমোহন। সোপ্লাসে। হাসতে থাকলেন তো হাসতেই থাকলেন। হাসতে হাসতে প্রায় গাড়িয়ে পড়লেন; এলিয়ে পড়লেন একটি ভেলভেটের তাকিয়ায়। নায়েবের কি অস্বাভাবিক বিধবাপনা, সেই কথা ভেবেই অটুহাস্ত শুরু করেন চন্দ্রমোহন। হাসির তোড়ে লজ্জানুভব করেন নায়েব। তাঁর কপাল

ঘামতে থাকে। পাঁজরাসার বক্ষ ছরু ছরু করে। কয়েক মুহূর্ত
অধোবদনে দাঁড়িয়ে নাচঘর থেকে বেরিয়ে যান লজ্জায়।

দালাল শিউশরণ কিন্তু কোন' কথাতেই কর্ণপাত করে না। কারও
প্রতি দৃকপাতও করে না। বাবুদের কে কি হুকুম করলো কাণে তোলে
না দালাল। কলকাতা থেকে চন্দনপুর, ট্রেনের খার্ড ক্লাসে আসতে
হয়েছে তাকে। টিমেতেতালার প্যাসেঞ্জার ট্রেনে আসতে হয়েছে। কত
কষ্ট যে করতে হয়েছে শিউশরণকে! দম বেরিয়ে গেছে যেন। তাও
যদি সে একা থাকতো, কোন' কথাই ছিল না। সারেঙ্গী বাজিয়ে আর
দু'জন ওড়নায় ঢাকা মুখের তন্বী যুবতী সঙ্গে এসেছে। ঘরমুখো যাত্রীদের
বৈকালী ট্রেনের ভীষণতম ভীড়ের মধ্যে বাঈজীদের সম্মানরক্ষা করতে
হয়েছে তাকে। ওদের শরীরে মাছিটিকে পর্যন্ত বসতে দেয়নি
শিউশরণ। গায়ে কোন আঁচ লাগতে দেয়নি। হাওড়া ষ্টেশনের
জনারণ্যে ওদের নিয়ে দিশাহারা হয়ে পড়েছিল যেন।

চিৎপুর, ফুলবাগান, প্রেমচাঁদ বড়াল ষ্ট্রীট আর বৌবাজারের অলি-
গলি ওতপ্রোত ভাবে চেনে শিউশরণ। ঐ সকল অঞ্চলের নাড়ী-নক্ষত্র
তার নখদর্পণে। বাঙলা দেশের প্যাসেঞ্জার ট্রেনের তৃতীয় শ্রেণীকে সে
চিনবে কোথা থেকে? জন্তু-জানোয়ার অর্থাৎ ট্রেনের ভেড়া-ছাগলের
কামরাও বুঝি এর কাছে স্বর্গতুল্য!

শিউশরণ বাবুদের কারও কথায় কাণ দেয় না!

সঙ্গের সঙ্গীদের নিয়ে সদরের দোতলায় পৌঁছে সাজঘরে ঢোকে।
নাচঘরের লাগোয়া সাজঘর। নায়েব তাকে চন্দ্রমোহনের নির্দেশ
প্রদিয়েছে অক্ষরে অক্ষরে, তবুও শিউশরণ অনড় অটল। নায়েবের মুখে

কথাগুলি শুনে বলেছে,—বড়বাবুকে বলুন যে, যাদের এনেছি তাদের দেখলে আর মুখে কোন বাৎচিং থাকবে না ।

স্বর্গ থেকে যেন অঙ্গরী, কিম্বরীদেব দু'টিকে ধরে এনেছে শিউশরণ ।

সমুদ্রের অতলতার মধ্যে থেকে পাকা ডুবরীর মত এনেছে দু'টি মংস্ত্র-কণ্ঠা ? এমনই গর্বভরা কথার ধরণ শিউশরণের ।

নাচঘরের পাশই সাজঘর । নিজের দলকে ভেতরে পুরে দিয়ে সে হন হন ক'রে চললো নাচঘরের দিকে । চন্দ্রমোহনের সঙ্গে চার চোখ এক হতেই শিউশরণ কপালের ঘাম মুছতে মুছতে বললে,—হুজুর, হাওড়া ইষ্টিশনতো নয় যেন হরিহরছত্রের মেলা । দু' দু'টো টেরেন ফেল করেছি ! সঙ্গে ছিল দু' দু'টো জোয়ান আওরং, বলেন কেন আর ! হুজুর, ওদের যদি চোখে দেখেন তো আর হামাদের তাড়িয়ে দিবেন না ।

ফরাস থেকে উঠে পড়লেন চন্দ্রমোহন । ধড়মড়িয়ে । দ্বারমুখে এগোলেন ।

কনসার্ট চলতেই থাকে । বাবুদের কেউ কেউ খুশী খুশী চোখে দেখলেন শিউশরণকে । দেখলেন, এক নম্বর সূতোর মিলের ধুতি আর চুড়িদার আঙ্গির আজাহুলম্মা পাঞ্জাবী শিউশরণের পরণে । ফুলেল তেলে ভেজা এলোমেলো চুল মাথায় । কপালের মধ্যখানে লাল চন্দনের স্ববৃহৎ ফোঁটা । তার পানলাল ঠোঁটের আড়াল থেকে একটি সোনার দাঁত উঁকি মারছে ।

সাজঘরের দরজা ফাঁক ক'রে চুরিয়ে চুরিয়ে দেখেন চন্দ্রমোহন ।

সরাসরি ঘরে ঢুকে দেখতে যেন লজ্জা পান, সদরভর্তি লোকজনের সম্মুখে ।

সাজঘরের অন্দর দেখা যায়। সংস্কারের অভাবে এঘরের বিজলী-লাইন অকেজো হয়ে গেছে, তাই একটা হাজাক জেলে দেওয়া হয়েছে। যেন দিনের আলো ফুটেছে ঘরে, ডে-লাইটের আলোয়।

চন্দ্রমোহন দেখছেন তো দেখছেনই! চোখ আর ফেরে না যেন।

রাশ আলগা দৃষ্টি। চন্দ্রমোহন দেখলেন, সত্যিই অপ্সরী-কিন্নরী। যেন রস্তা আর মেনকা। যেন অবিরাম নাচানাচির পর ক্লান্তা,—অবসন্ন দেহে ব'সে পড়েছে। সাজঘরের ইঁদুরে-কাটা, তুলো বেরিয়ে-পড়া কোচে এলিয়ে পড়েছে। ওদের একজন হাতপাখার হাওয়া খাচ্ছে। হাজাকের আলোয় ওদের আসল না নকল হীরার অলঙ্কার বালমল করছে। নাকের নোজ-পিন আর কাঁচুলী-উঁচু বুকের ব্রোচ চিক চিক করছে। বন্ধঘর, তাই লাজলজ্জার বালাই নেই। ওড়না নেই মাথায়, নেই বুকের বসন।

ওদের কাজল-কালো চোখ দেখে বুঝি আশ্চর্যান হারিয়ে ফেলেন চন্দ্রমোহন। দরজার ফাঁক থেকে চোখ ফিরিয়ে বললেন,—শিউশরণ, তোমরা যখন এসেছো তখন আর ফিরে যেতে হবে না। অনেকটা পথ আসছো, বিশ্রাম কর কিছুক্ষণ।

শিউশরণ একমুখ হাসলো। হাসতে হাসতে বললে,—হজুর, হামাদের চা আর জল-খাবারের কথা বলিয়ে দিন। হুকুম করে দেন একবার।

—নিশ্চয়ই নিশ্চয়ই। বললেন চন্দ্রমোহন। বললেন,—চা জল খাবার দেবে বৈকি তোমাদের!

পানলাল দাঁত দেখিয়ে নীরব হাসি হাসলো শিউশরণ। বার্ণিশ চটির চটাপট শব্দ তুলে চলে গেলেন চন্দ্রমোহন।

বাঈজীদের জন্তু সাজঘরে বন্দোবস্থ হয়েছে। পৌছেইতো আর আসরে নামতে পারে না। জিরেন চাই খানিকক্ষণ।

শিউশরণ জানতো সেই ঘর, বেশ ভালভাবেই জানতো। অনেক দিন ধ'রেই তার জানপছন এই ঘরের সঙ্গে। এই সাজঘরে কত কত বাদ্গী-নর্তকীকে বসিয়েছে শিউশরণ! তদারকী করেছে তাদের।

সাজঘরে আজ আলো পড়েছে। হাজার জলেছে। ডে-লাইটের তীব্র দিনের আলো।

ঘরের বিজলী-লাইন শর্ট হয়ে গেছে। লাইন বদল করা হয়নি এখনও। অনেক, অনেকদিন পরে ঘরের বাপসা আয়না ক'টায় নানুশের প্রতিবিম্ব দেখা যায়। বেলজিয়ান কাচের লুকিং গ্লাস, অব্যবহারে মলিন হয়ে গেছে।

সাজঘরের ছোবড়া-বেরিয়ে পড়া একটি লম্বা কোচে বসেছিল দুই তরী—যাদের তনুর তনিমা দেখে চন্দ্রমোহনের চোখ কপালে উঠে গেছে। পথের ক্লান্তিতে ওদের দেহ বুঝি অবসন্ন, তাই বসতে বসতে কখন যে এলিয়ে পড়েছে, তা যেন নিজেরাই জানে না। মুখের হাসি গেছে। মুখে মালিণ্য, গাভীর্ঘ্য।

সারেঙ্গী বাজিয়েদের একজন একপাশে দাঁড়িয়ে হাতপাথার হাওয়া খেলায়। বাদ্গী দু'জন গরমে যেন হাঁসফাঁস করছে। বন্ধঘরের গুমোট গরমে ঘামছে। কাঁচুলী ভিজে গেছে। হাওড়া ষ্টেশনের জনারণ্য থেকে তিন দাঁড়ির কামরার ঠেসাঠেসি—সেখান থেকে আবার এই নোংরা, অপরিচ্ছন্ন সাজঘরে!

শিউশরণ ঘরে গিয়েই বললে,—তোদের চা জলখাবার আনতে অর্ডার করেছি। ভাবিস না নূরজাহান বাদ্গী আউর মতিয়াবিবি!

ওরা নিমীলিত আঁখি মেলে। যেন ঘুমিয়েছিল, কথা শুনে চোখ চাইলো। আড়-নয়নে দেখলো শিউশরণকে। শুনলো, সে কি বলছে।

নোংরা, অপরিচ্ছন্ন, ধূলিমলিন সাজঘরে উগ্র স্নগন্ধের ঢেউ। খস

আতরের গন্ধ বইছে। নূরজাহান বাই আর মতিয়াবিবি হয়তো এক
আধ ছিটে বন্ধবাসে ঘষেছে। কী অসহ্য গরম সাজঘরে। মর্ত্যস্বর্গের
অঙ্গরী দু'জন অতিষ্ঠ হয়ে ওঠে। ওদের চিবুকে ঘর্মরেখা ফোটে।

বাবুদের কেউ কেউ ঘরের সমুখ দিয়ে অকারণ ঘোরাফেরা শুরু করেন।

—তোমার চাও চাই না, খাবারও চাই না শিউশরণ, শুধু একটু
ঠাণ্ডা জল খাওয়াও আমাদের। কথা বললে মতিয়াবিবি। আড়নমনে
চেয়ে। দাঁতে দাঁত চেপে কথা বললে। বললে,—তেষ্টায় বুকের
ছাতি যে ফেটে যাচ্ছে!

—সব আসবে বিবিজান, সব আসবে। তোমার চা আসবে, জল
আসবে, খাবারও আসবে। খোদ কর্তাকে অর্ডার করেছি আমি।

কথা বলতে বলতে সাজঘরের দরজা ভেজিয়ে দিয়ে ক্রমেঘর উবু হয়ে
ব'সে পড়লো শিউশরণ। আজাতুলনিত চুড়িদার পাঞ্জাবীর স্বগভীর
পকেটে হাত চালিয়ে বের করলে কি যেন একটা। বললে—শালার
নেশার টাইম পাশ করে গেছে বহৎক্ষণ, খেয়ালই নেই হামার!

দুই নারীর ওষ্ঠাগ্রে হাসি ফুটলো। ঈষৎ কৌতুক মিশ্রিত, তবুও
নির্লিপ্ত হাসি। মুহূর্তে নূরজাহান বাঈ বললে,—এ কোথায় বন-
বাদাড়ে ধ'রে আনলে শিউশরণ? এমন জানলে আমি—

—বন-বাদাড় কোথায় দেখলে নূরজাহান বাঈ? কথার মাঝপথে
কথা ধরলো শিউশরণ। বললে,—চন্দনপুর বহৎ আচ্ছা জায়গা আছে।
কিছু বেশী ম্যালোয়ারী আছে, নয়তো জায়গা বহুত ভাল।

খিল খিল শব্দে হাসলো ওরা দু'জনে। একসঙ্গে হেসে উঠলো।

একজন অণ্ডজনের অঙ্গে ঢ'লে পড়লো হাসতে হাসতে। মিশি-
মাখানো কালো দাঁতের সারি দেখা যায় দু'জনের। হাজারেকের তীব্র
আলোয় ওদের বেশভূষা চাকচিক্য ছড়ায়।

—তাই এত মশা, নয় শিউশরণ ?

খিল খিল হাসি থামিয়ে মতিবিবি প্রশ্ন করে ।

সত্যিই, মশার কি দৌরাভ্যা !

স্থির হয়ে থাকলেই ভোঁ ভোঁ করে কাণের কাছে ।

আবার মশার ডানা ওড়ার শব্দ নাকি ঠিক কাণের কাছটিতে না পৌঁছলে কোন আওয়াজই কাণে পৌঁছায় না । তেমনি কি না ব'লে ক'য়ে যখন তখন যেখানে সেখানে দংশন করে ! আর সামান্য ঐ ছলের কি ভীষণ জ্বালা ! যেন জ্বলিয়ে দেয় ! প্রথমে জ্বলে, তারপর চুলকোয়, তারপর আমবাতের মত ফুলে ফুলে ওঠে, যেখানে হল ফোটার ।

মশার কি দোষ !

বাঙলার গ্রামে গ্রামে হাজার হাজার এঁদো পুকুর থাকতে কোথায় যেতে যাবে মশককুল ! গ্রামতো আর বন-বাদাড় নয় সত্যি কথা, তবে কেন এত আগাছার বন জঙ্গল, গ্রামের যেখানে মানুষের বসতি সেখানে ! দলাদলির যুদ্ধক্ষেত্র মিউনিসিপ্যালিটির মহিমায় ! মশাকে দুশে কিছু লাভ নেই, কিছু লাভ নেই ।

শিউশরণ বললে,—হামাদের বেহারে মতিবিবি মশা দেখা যায় না, শুকনো খটখটে জায়গা আছে বেহার । তোমাদের হাওড়া আউর হুগলীর মশাতো মশা নয়, যেন একটা একটা মনিয়াপাখী !

আবার হাসলো ওরা । খিল খিল হাসি !

হাসির সঙ্গে সঙ্গে দু'জনের দেহে হিল্লোল উঠলো । জোছনাভরা আকাশের তলে যেন সমুদ্রের তরঙ্গ উঠলো ।

আসমানী রঙের পাংলা বেনারসী প'রেছে নূরজাহান বাদি । ফিকে নীল ওড়না ।

মতিবিবি পরেছে ছাই রঙের বেনারসী । নয়রকঙ্গী-রঙ ওড়না ।

প্রথমার ঘন লাল আর দ্বিতীয়ার বুকে বেগুনী ভেলভেটের কাঁচুলী
এঁটেসেঁটে ব'সে গেছে যেন। নকল না আসল কে জানে, কুঁচো হীরের
অলঙ্কার দু'জনের সমান সমান। চুড়ি, চিক আর কুমকো। বুকে
ব্রোচ। হাতের আঙুলে আঙটি। নকল না আসল কে জানে, ওদের
অবাধ হাসির হিল্লোলে হীরের ছটা ছড়াতে থাকে ঘরে।

মতিবিবি বললে,—শিউশরণ, এই গুমোট ঘরে তুমি কি গাঁজার
ধোঁয়া ছাড়বে নাকি? ন'রে যাবো তা হ'লে দম বন্ধ হয়ে!

কলকেয় আগুন ধরায় শিউশরণ। কথার কোনই জবাব দেয় না।
কলকেয় শুধু ফুঁ দিয়ে যায়। নেশার টাইম না কি উৎরে গেছে বহুক্ষণ।

—তোমার চা জল খাবার কখন আসবে শিউশরণ? তেঁষ্টায় যে
ন'লাম আমি!

নূরজাহান বাঈ তৃষ্ণার কাতর স্বরে কথা বলে। কোঁচে উদ্ধাঙ্গ
এলিয়ে দেয় কথার শেষে।

জবাব দেবার ফুরসৎ নেই শিউশরণের। কোন দিকে দৃকপাত
নেই। দুই মুষ্টির বেষ্টনে আবদ্ধ, প্রায় অদৃশ্য কলকেয় টান দিতে
থাকে। এমনই ঘন ঘন, যেন কস্মিনকালেও থামবে না সে।

বিশ্রী এক গন্ধ ভেসে ওঠে ঘরে। গাঁজার ধোঁয়া, ভাসতে থাকে
হাজাকের চতুঃপার্শ্বে। কোন দিকেই দৃকপাত নেই শিউশরণের। দুই
চক্ষু সে বুঁজে ফেলেছে, হয়তো নেশার উগ্রতায়। কলকে তৈরী
হওয়ার টান দেয় এখন, আসল টান দেবে খানিক পরে। আঁচ ঠিকঠাক
ধরলে। তবুও অদ্ভুত এক কটুগন্ধে ঘরের আবহাওয়া বিষিয়ে ওঠে যেন।

খস আর অটো দিলবাহার গায়ে ছিটিয়েছিল ওরা দু'জন। কোথায়
মিলিয়ে যায় তাদের কুমপাড়ানি, মনমাতানি স্গন্ধ!

—শিউশরণ!

কে যেন ডাক দেয় দরজার বাইরে থেকে । বয়স্ক কণ্ঠ ।

সাড়া দেবে কে ?

শিউশরণের মুখ এখন বন্ধ ! মুষ্টিবদ্ধ কলকে তাঁর মুখে । কলকেয় গমগমে আঁচ ।

মতিবিকি বললে,—দেখো না রহমন, বাইরে থেকে কে ডাকে ।

সারেঙ্গী বাজিয়ের নাম রহমন । মতিবিকির কথা শুনে তার যেন চটক ভাঙ্গলো । সে একদৃষ্টিতে লক্ষ্য করছিল শিউশরণের নেশা করার ধরন । হয়তো আশায় আশায় ছিল শিউশরণ যদি কলকেটা একবার এগিয়ে দেয় ।

রহমন দ্বার খুলে দেয় । আহ্বানকারী আর কেউ নয়, নায়েব রুক্ষচন্দ্র ।

নায়েব দৃষ্টি অগ্র দিকে ফিরিয়ে বললেন,—ডাকলে সাড়া দেও না কেন শিউশরণ ? তোমাদের জল খাবার আর চা আনা হয়েছে । বেয়ারার হাত থেকে ট্রেনানা নিয়ে নেও ।

নিমেষের মধ্যে হাতের কলকেটা মেঝেয় উপুড় করে দেয় শিউশরণ ।

উঠে পড়ে সঙ্গে সঙ্গে । দরজার কাছে এগিয়ে দু'হাত বাড়িয়ে বললে,—কে ? হামাদের নায়েবমশায় ? একশো বছর তোমার পরমায়ু হবে নায়েবমশায় । বাঁচিয়েছো তুমি হামাকে ।

—তোমরা সবসময়ে ক'জন আছো শিউশরণ ?

অগ্র দিকে মুখ ফিরিয়ে প্রশ্ন করলেন রুক্ষচন্দ্র । বিকারহীন তাঁর মুথাকৃতি ।

শিউশরণ ট্রে ধ'রলো দু'হাতে । বললে,—চারজন আছি ।

—তবে ঠিকই আছো ।

নায়েব বললেন আর ফিরলেন সঙ্গে সঙ্গে । এখানে আর একটি

মুহূর্ত্ত নয়। তাঁর কাজ মিটে গেছে। বড়বাবু চারজনের মতই জল-খাবার দিতে ছকুম করেছেন, তিনি তাইই দিয়েছেন।

মিষ্টি, নোনতা। বিরাট একটি ষ্টীলের ট্রে। তোয়ালে বিছানো তায়।

চার প্লেট মিষ্টি, নোনতা খাবার, চার পেয়লা চা, চার ভাঁড় জল, ট্রের 'পরে সারি সারি দাঁড়িয়ে।

যে যার পাত্র টেনে নেয়। কতক্ষণ জল পড়েনি মুখে। যেমন ক্ষুধা তেমনি তৃষ্ণা! সাজঘরে নীরবতা, কেউ আর কথাটি বলে না।

অন্দরে তখন ফিসফাস গুঞ্জন শুরু হয়ে গেছে। জানাজানি হয়ে গেছে।

এ ঘরে সে ঘরে কথা ছড়িয়েছে যে, সদরের নাচঘরে কলকাতা থেকে দু'জন বাঈজী এসেছে। দু'জন পরমাসুন্দরী মুসলমানী বাঈজী! নাচঘর নাকি লোকে লোকারণা, এত লোক জমায়েত হয়েছে সেখানে। চন্দনধামের বাবুরা আছেন, আর আছেন তেনাদের প্রত্যেকের ইয়ার-বন্ধু, পা-চাটা-মোসাহেব। যত গাইয়ে আর বাজিয়েও আছে।

—মাইকেল চলছে নাচঘরে?

বড়বাবু চন্দ্রমোহনের স্ত্রী চিত্রলেখা খোঁজ নেন একে তাকে ডেকে। সঠিক কেউ কিছুই বলতে পারে না। চিত্রলেখা তাঁর খাসকামরার সামনের দালানে দাঁড়িয়ে থাকেন। প্রায় অন্ধকার দালান, ঘরের আলোয় যতটুকু আলো হয় সেখানে। তাও ঘরে যদি আগের ইলেকট্রিকের আলো থাকতো! এঘরেও লাইন ফিউজড্; লাইন আছে যেমনকার, তারের জোড়া জোড়া লাইন দেওয়াল আর কড়িকাঠের বুকে। কিন্তু অকেজো। বিগড়ে যাওয়া। ঘরে হারিকেন জ্বলছে।

মেঘ ডাকলো কি আকাশে!

গুরু গুরু ধ্বনি শুনলেন চিত্রলেখা। অনেক দূরের আকাশ থেকে ভেসে আসা শব্দ। যেন পাহাড় ধ্বসে যাচ্ছে কোথায়।

বিনা মেঘে বজ্রপাত না কি ?

চিত্রলেখা দালানের জাফরির ফাঁক থেকে আকাশ দেখলেন। রাত্রির ঘন কালো আকাশে চোখ মেললেন।

মিশ্র-কালো আকাশ। কিছু দেখা যায় না। একটি তারাও নয়। দালানের জাফরি ছেড়ে ঘরের জানালায় গেলেন চিত্রলেখা। উন্মুক্ত বাতায়নের বাইরে থেকে শন শন বাতাস আসছে। কালবৈশাখীর হাওয়ার মত, বাতাসে যেন ঝড়ের ইঙ্গিত।

চিত্রলেখা ফিরলেন জানালা থেকে। আবার দালানে।

—বড়বৌদি !

—কে ?

—আমি রাধা। তুমি কোথায় ?

—এই যে আমি।

হারিকেনের আলোয় একজন আরেকজনকে দেখতে পায়। চিত্রলেখা তাড়াতাড়ি রাধার হাতটি নিজের দুই মুঠোয় ধ'রে ফেললেন। বললেন,—রাধাঠাকুরঝি, আমার হাত দুটো কেমন হিম হয়ে গেছে ণাথ্।

—হ্যাঁ, তাইতো। ঘোর বিস্ময়ের সুরে চোখ বড় ক'রে বললে রাধা। বললে,—কেন রে বৌদি ?

কালি-পড়া হারিকেনের অম্পষ্ট আলোয় ভাল ক'রে দেখলো রাধা। তার বড়বৌদির মুখখানা একবার দেখলো। কেমন যেন ভয়ান্ত। চিত্রলেখার চাউনিতে ভীতি-বিস্ময়। পলক পড়ছে না চোখে।

চিত্রলেখা রাধার চিবুক তুলে ধ'রে বলেন,—হ্যারে কলকাতা থেকে না কী বাড়িজী এসেছে ?

রাধা ওপরে নীচে মাথা দোলায়। বলে,—হ্যাঁ এসেছে। তুমি কোথেকে জানলে?

চোখ দুটি বন্ধ করেন চিত্রলেখা। আর যেন কিছু শুনতে চান না। যা কিছু জানবার তাঁর জানা হয়ে গেছে। অনুমান সত্যি হয়েছে।

—শুধু বাঈজী? বোতল বোতল মদ আসেনি!

রাধা বলে ফেললো মুখ ফসকে।

চোখ খুললেন না চিত্রলেখা। তাঁর বিবর্ণ ঠোঁট দুটি যেন শুধু থর থর কাঁপতে থাকলো। অকারণে মাথার গুঠন টেনে দেন কপাল পর্যন্ত। লজ্জা না অপমানে মুখখানি হয়তো দেখাতে চান না।

—আমার বাচ্ছা ক'টা যে কোথায়, জানিস রাধা?

কাঁপা কাঁপা কণ্ঠে প্রশ্ন করলেন চিত্রলেখা। কেমন যেন অসহায়ের মত। চিত্রলেখা মনে মনে জানেন, তাঁর স্বামীও আছেন সদরের নাচঘরে। বাঈজীর আসরে তিনিই হয়তো আজ প্রধান উদ্যোগী হয়েছেন।

রাধা বললে,—ইতু আর পতু দাসীদের কাছে ব'সে গল্প শুনছে দেখেছি। বিমলকে দেখতে পাইনি।

কত যেন চিন্তিত হয়েছিলেন চিত্রলেখা, বাচ্ছাদের না দেখতে পেয়ে। তাদের কথা শুনেও তার মুখাকৃতি বদলায় না। বিবর্ণ ঠোঁটের থর থর কম্পন থামে না। চিত্রলেখা আর এ জগতে নেই এখন। ইষ্টমন্ত্ৰ জপছেন এখন তিনি মনে মনে। ভয় আর বিপদের সময়ে অন্ত কোন' পথ খুঁজে মেলে না চিত্রলেখার।

—শুধু বাঈজী? বোতল বোতল মদ আসেনি!

তাও এসেছে না কি! রাধার সেই কথাগুলি মনে মনে নিজেকে শুধোলেন চিত্রলেখা। রাধার স্মৃষ্টি কথাগুলি কানে যে বাজে এখনও।

বড় বেসুরো স্বরে বাজে যেন। ঘরের মুক্ত জানালার বাইরে চোখ
মেলেন চিত্রলেখা। ঝড়ের হাওয়া বইছে বাইরে।

কত কত দিন পরে বলে আজ ওয়াইন চেম্বারের চাবি খোলা হয়েছে!
বারোজনের বারোয়ারী টাকায় আজ কত কাল পরে যে মুখ
বদলাবে বাবুদের! দেশী খেয়ে খেয়ে মুখের স্বাদ মরে গিয়েছিল।
ছইন্সি, জিন, ভারমুখের সঙ্গে মা-কালী-মার্কী—তুলনাই হয় না।
তাইতো এত উদ্যোগ, এত আয়োজন। কিসে আর কিসে! মা কালী
কপালে থাকুন।

নূরজাহান বাঈ আর মতিয়াবিবিকে দেখে চন্দ্রমোহন সোজানাচঘরে
গেলেন না, গেলেন ওয়াইন-চেম্বারে। নাচঘরের কাছেই, নাচঘরের গায়েই।

—একটি বোতলও খোলা হয়নিতো?

ঘরে যাওয়া মাত্র জিজ্ঞেস করলেন চন্দ্রমোহন।

—না, আপনি যখন অর্ডার করেননি, তখন খুলবে এমন সাধ্য কার
আছে বড়বাবু?

—আটস্ রাইট!

চন্দ্রমোহন ঠোঁটের কোনে হাসির ঝিলিক তুলে বললেন। মুখে
প্রসন্নতা ফুটলো। ক্যাবিনেটের ইদিক থেকে সিদিক পর্যন্ত বার
কয়েক চোখ ফিরিয়ে ফিরিয়ে দেখলেন।

রেড-লেবেল আর হোয়াইট লেবেল। ব্ল্যাক এণ্ড হোয়াইট।
সীগ্রামস্ ভি, ও। বুতস্ ড্রাই জিন। য়েভা স্কচ লিকুয়ের। কার্টিস
জিন। মার্টিনির ড্রাই ভারমুখ। স্মিরনফ্ ভড্কা। ভ্যাট্ সিক্সটি-
নাইন। রেমী মার্টিনের কুঁইয়া।

—এক আধ পেগ্ দিই বড়বাবু?

ঘরের রক্ষাকর্তা সবিনয়ে বললে ।

—দেবে ? তা দেবেতো দাও ! তা কি দেবে বল' দেখি রতনদা ?
চন্দ্রমোহন একটি চোখ ঈষৎ মুদিত করে শুধোলেন ।

কপাল কুঁচকে ভাবলেন রতনদা ! দেখলেন বোতলের সারি ।
দেখতে দেখতে সহসা বললেন,—হাফ্ পেগ্ বৃত্তস্ ড্রাই জিনে পেগ্
দেড়েক ব্ল্যাক এণ্ড হোয়াইট । দিই একটা তৈরী করে ? সামান্য
লেমনের সঙ্গে সোডা ওয়াটার ?

খুশীর হাসি হাসলেন চন্দ্রমোহন । বললেন,—দাও একটা ।

রতনদা বললেন,—ভিৎটা আগে তৈরী হয়ে যাক বড়বাবু, তারপর
যা খুশী চালিও'খন ।

কথা বলতে বলতে বোতলের ছিপি খোলার যন্ত্রটি রতনদার
হাতের মুঠোয় সজীব হয়ে উঠলো যেন । একটি নগ্ন যন্ত্র, তার কত
ব্যবস্থা ! ক্যাপ, কর্ক দুইই খোলা যাবে ।

ওয়াইন চেম্বার ফ্রনিকের মধ্যে নিস্তব্ধ হয়ে গেল !

কথা নেই কারও মুখে । রতনদা নিঃশব্দে কাজ করেন । কাচের
বোতল গেলাশ, তবুও কোন ঠুং ঠুং নেই ।

জল চলকানোর শব্দ কানে যেতেই চন্দ্রমোহনের মাতাল-মন আরও
যেন চঞ্চল হয়ে ওঠে । বোতল থেকে গেলাশে জল ঢালার ঢুকু ঢুকু শব্দ ।

বাবুদের ওয়াইন-চেম্বার বহুদিন কেউ খুলতো না । ক্যাবিনেটের
আয়না বাপসা হয়ে গেছে ।

দেওয়ালের ছবিগুলি চেনাই যায় না । ইংলণ্ডের হরেক দৃশ্যের
রঙীন চিত্র—অফসেটে ছাপানো । আপাতদৃষ্টিতে মনে হয় হাতে আঁকা
আসল ছবি । বাকিংহাম প্যালেস, ওয়েষ্টমিনিষ্টার এ্যাবে, হাইড পার্ক,
টেমস নদীর সেতুর কীটদৃষ্ট ছবি—মলিন কাচের আড়ালে লুকিয়ে

আছে যেন। আরও ছবি আছে ঘরে। ইংলণ্ডের গ্রামীণ দৃশ্য—
মেষচারণের মাঠ, ফ্লাওয়ার মিল, রাখাল বালকের হাতে তারের
বাদ্যযন্ত্র, নদীর তীরে যাত্রীগামী ফেরী বোটের জটলা, উড়ন্ত সামুদ্রিক
পাখীর ঝাঁক—চলন্ত জাহাজের আশেপাশে।

—বড়বাবু। গেলাসটা ধ'রে নাও।

ডাক শুনে দেওয়াল-পাত্র থেকে চোখ ফেরালেন চন্দ্রমোহন। যেন
এক জগত থেকে অন্য এক জগতে ফিরলেন। বললে,—রতনদা, তুমিও
ভিৎটা তৈরী করে নাও না কেন!

কথার শেষে হাতের পাত্র মুখে তুললেন। তৃপ্তির হাস্যরেখা দেখা
দেয় তাঁর ঠোঁটের কোনে!

রতনদা বললেন,—তা তুমি যদি পার্মিশন্ দাও।

ছুঁচার চুমুক পানীয়, কোথায় যে তলিরে যায়! চন্দ্রমোহন বুঝতেই
পারেন না। কণ্ঠনালী শুধু জ্বলতে থাকে মুহুমুদ। বলেন,—রতনদা,
বড় চমৎকার বানিয়েছো ভাই। এ তোমার হাতের গুণে তৈরী হয়েছে।

গর্কের হাসি ফুটলো রতনদার চোখে-মুখে। তিনি তখন আর এক
পাত্র তৈরী করছেন। নিজের জন্ত।

রতনদা চন্দনধামের সকলেরই রতনদা। এ বাড়ীর আবালবৃদ্ধবনিতা
ঐ নামেই তাঁকে ডাকে। তিনিও আপত্তি করেন না কোনদিন। চন্দন-
ধামের সঙ্গে বহু দূরের আত্মীয়তার সম্পর্ক তাঁর, তবুও তিনি যেন কত
নিকটতম হয়ে গেছেন ক্রমে ক্রমে। সকলেরই আপনার হয়ে গেছেন।
সুখী দেবীর পরম ভক্ত রতনদা। দিল্খোলা মানুষ। সুখে দুঃখে মুখের
হাসি মোছে না। মনে কোন দাগ নেই, তাই সকলেই মনে করেন
আপনজন। কেউ তাঁর কাছে পর নয়।

চন্দনপুরেই রতনদার বসবাস। জলকলের ফোরম্যান তিনি।

আঙুনে-পোড়া অঙ্গারের মত লাল-কালো দেহের রঙ। বলিষ্ঠ, দীর্ঘ আকৃতি। কালো ফ্রেমের চশমা চোখে। বড় বড় চোখ দু'টি তাঁর দিবারাত্র সদাঙ্গ রক্তবর্ণ হয়ে আছে। মাথায় কাঁচাপাকা কাঁকড়া চুল এলোমেলো হয়ে গেছে, বিজ্ঞাসের সময়ভাবে।

চন্দনধামে আজ বাজনাচ আছে শুনে, জলকল থেকে আর বাড়ী ফেরেননি। সোজা চলে এসেছেন। আর এসে পৌঁছানো মাত্র বড়বাবু চন্দ্রমোহন বেছে বেছে রতনদাকেই আজকের মত ওয়াইন চেম্বারের ইনচার্জ করে দিয়েছেন। সুরাদেবীর একনিষ্ঠ সেবক রতনদা, একটিবারও আপত্তি জানালেন না। সার্টের দুই হাতা গুটিয়ে কাজে লেগে গেছেন।

চন্দ্রমোহন বললেন,—সিগারেটের টিনগুলো কোথায় আছে রতনদা? এ ঘরেই ছিল না? এই ঘরেই তো রাখতে বলেছি আমি। একটা টিন দাওতো।

—ওয়েট এ মিনিট। বললেন রতনদা।

কথা বলতে বলতে হাতের গেলাশ নামিয়ে রাখলেন ক্যাবিনেটের তাকে। খুলে ফেললেন ক্যাবিনেটের একটি ছোট দেরাজের পাল্লা। সারি সারি সিগারেটের টিন সেখানে। প্রেয়ার্স নাম্বার থ্রি, গোল্ড ক্লেক, ক্রাভেন্স 'এ', সোব্রেইন, থ্রি ক্যাশেল্‌স্‌ আর কমদামের মধ্যে সীজরস্‌ অর্থাৎ কাঁচির টিন।

চন্দ্রমোহন দেখে দেখে বললেন,—ক্রাভেন্স 'এ' এক টিন খুলে দাওতো রতনদা। অনেকদিন ও সিগারেট খাইনি।

হাওয়া বন্ধ টিন। এয়ার-টাইট।

হাতের চাপে ঢাকনি ঘোরাতেই ফস্‌ ক'রে হাওয়া বেরিয়ে যায় টিন থেকে। রতনদা বললেন,—নাও ধর, গেলাশটা আমাকে দাও।

গেলাসের অবশিষ্ট এক চুমুকে শেষ করে মুখ বিকৃত করলেন

চন্দ্রমোহন । সিগারেটের টিনটি হাতে পেয়েই তাড়াতাড়ি বেরিয়ে
গেলেন ঘর থেকে ।

কনসার্টে কখন সুর বদলানো হয় আবার ।

‘অতিথি এসেছে দ্বারে’ গানটি বাজানো শেষ ক’রে ধরা হয়েছে
অন্য একটি গানের সুর ।

রবীন্দ্রনাথেরই গান : আমায় সুর শুনায়ে

যে ঘুমও ভাঙাও

সে ঘুম আমার রমণীয় ।

জাগরণের সঙ্গিনী সে,

তারে তোমার পরশ দিও । * * *

চন্দনপুরের বাতাসে ভাসতে থাকে এই সুর !

বাদ্যযন্ত্রের ঐকতান, না কেউ কাঁদছে ইনিয়ে বিনিয়ে ! বৈশাখের
এলোমেলো হাওয়ায় ঐ সুর যেন দাপাদাপি করে আকাশে আর
বাতাসে । কখনও মনে হয় বুঝি চন্দনধামের সংলগ্ন সায়র-দীঘির অপর
তীরের ঘন জঙ্গল থেকে যেন সুরের তরঙ্গ উঠছে আকাশে । না কি
বাবুদের পরিত্যক্ত কুঞ্জবনে কেউ লুকিয়ে লুকিয়ে মনের দুঃখে কাঁদছে !
ফুল বাগানে আছে করবীর ঝাড়, সেখানে কেউ নেইতো !

চন্দনধামের বাবুদের ত্রিশ বিঘা বাস্তু ।

সত্তর বিঘার জমি-জায়গায় ফুলবাগান, কুঞ্জবন, সায়র-দীঘি, ঝিল ।
এই বিরাট আঙিনায় কে কোথায় কি যে করছে চট ক’রে বোঝা
যায় না ।

ঝিলের ধারে গৃহদেবতার ভগ্নপ্রায় মন্দির ।

চন্দনঝিলের তীরে আছেন মুরলীধর । মন্দিরের পুরোহিত চমকে

চমকে ওঠেন, ঝিলের জলে যখন মাছ লাফ খায়। বাবুদের কারও
পদশব্দ নয়তো! আবার যদি আসেন কেউ উন্নত অবস্থায়!

সন্ধ্যা সমাগমের সময় পুরোহিত ছিলেন না মন্দিরে।

সেই ফাঁকে কে বা কারা এসে মূর্তির চোখের রত্ন উপড়ে নিয়ে গেছে।
সেই ভয়ে যেন অতিষ্ঠ হয়ে আছেন পুরোহিত। অমঙ্গলের আশঙ্কায়
থেকে থেকে তাঁর শ্বাস যেন রুদ্ধ হয়ে যায়। কখন কি হয় কে বলতে
পারে! কার পরে দেবতার কোপ পড়বে কেউ জানে না!

অন্তঃসারশূন্য চোখ মুরলীধরের। নেত্রগোলকহীন অন্ধের মতই
ব্যর্থদৃষ্টিতে যেন তাকিয়ে আছেন।

শ্রীরাধিকার মূর্তি মুরলীধরের বাম পাশে। হয়তো চুরি-ধরা-পড়ার
ভয়ে চোরের দল রেহাই দিয়াছে রাধাকে। তাড়াতাড়িতে আর রাধার
চোখে হাত পড়েনি। রাধার অন্ধের অলঙ্কার খুলে নিয়েছে, ক'খানা
ছিল। নিরাভরণা এখন তিনি। সজলচোখে কি দেখছেন রাধিকা!
প্রদীপের স্বল্প আলোয় তাঁর দুই চোখে অশ্রুর চিকণ দেখা যায় কি!

তবে কি শ্রীরাধাই কেঁদেছেন এমন বিষন্ন স্বরে!

পুরোহিত-দর্পণের পাতা হাওয়ায় ওড়াওড়ি করে। পুরোহিতের
সমুখে প্রদীপ আর পুরোহিত-দর্পণ। পাঠে তিনি কোন' মতে মন বসাতে
পারেন না। চমকে চমকে ওঠেন। মঙ্গল আর অমঙ্গলের কত কথাই
মনে জাগে তাঁর। ক্রোধ আর উত্তেজনায় পুরোহিতের ইড়া, পিঙ্গলা ও
স্বমুখা হয়তো আর সাড়া দেয় না। তাঁর ব্যাথার পূজা সমাপন হয় না।

পুরোহিত-দর্পণ উন্মুক্ত পড়ে আছে। এক অক্ষরও পড়তে পারেন না
পুরোহিত। ক্রোধ আর উত্তেজনায় তাঁর কণ্ঠমণি চঞ্চল হয়ে ওঠে কখনও
কখনও। তাঁর করোটির মধ্যস্থ মস্তিষ্কে যেন অসহ্য এক জ্বালা ধরেছে।
ধমনীঘাত দ্রুত হয়ে উঠেছে। দেহের রক্তসংবহন থেমে গেছে।

বৈশাখী হাওয়ায় গাছের পাতা নড়লেও শিউরে উঠছেন।

মন্দিরে যুগলমূর্তির দিকে আর তাকাতে পারছেন না মনের দুঃখে।
মুরলীধরের চোখের কোটর হাঁ ক'রে আছে। শ্রীরাধার অঙ্গে নেই
কোন' অলঙ্কার।

—কিং মে অপরাধম্!

মন্দিরের দুয়ারের কাছে পাহারা দিতে ব'সে ভগ্নমনে স্বগত করলেন
পুরোহিত। বললেন, দেবভাষায় বললেন,—আমার কি অপরাধ?

কে সাড়া দেবে! কে দেবে উত্তর! মন্দিরের দেব-দেবী যে অগ্রসন্ন
হয়েছেন! রাধিকার চোখে যে জলের ধারা নেমেছে! গৃহের বাসিন্দাদের
কাণ্ডজ্ঞানহীনতায় নিজের কপালে করাঘাত করেন পুরোহিত।

করাঘাতের শব্দে চটপট পালিয়ে যায় তক্ষকের দল। মন্দিরের
নৈবেদ্য থেকে কদলী লাভের আশায় এসেছিল। নিমেষের মধ্যে
কোথায় অদৃশ্য হয়ে গেল অন্ধকারে।

মুরলীধর কি ধীরে ধীরে এগিয়ে আসছেন! চোখের মণি অপহরণের
দুঃখ জানাতে আসছেন কি? প্রকৃত দোষীদের নামগুলি কি শুনাতে
আসছেন পুরোহিতের কানে কানে।

না, বোশেখী হাওয়ায় মূর্তি-কণ্ঠের বিগুঞ্চ সাদা অপরাজিতার মানা
ছুলে ওঠে। মূর্তি অচঞ্চল! মানুষের হাতে লাক্ষিত ও অবমানিত
দেবতা নির্ঝাঁক, নিষ্পন্দ হয়ে গেছেন। পরম বিস্ময়ের ঘোরে যেন
অভিভূত হয়েছেন।

মারো মারো অর্কেষ্টার সুরও কাণে যায় পুরোহিতের।

এমন গানের সুর শুনেও বিতর্কায় বিরক্ত হন। তাঁর কপালের
বলিরেখা স্পষ্টতর হয়।

—ঠাকুরমশাই!

মন্দিরের বাহির থেকে কার ডাক শুনে আরেকবার চমকে উঠলেন পুরোহিত । বিছাতের ছোঁয়া লাগলো যেন শরীরের কোথায় । সভয়ে সাড়া দিলেন,—কে ডাকে ?

চন্দনধামের বাবুদের কেউ নয় তো ! কিম্বা বাবুদের ছেলেদের কেউ কি !

সকলেই সমান । কেউ কম আর কেউ বেশী নয় । পিতাপুত্র একই রক্তের, একই ধারার ।

—ঠাকুরমশাই, আমি মেজবাবুর চাকর । আমার নাম নিকুঞ্জ ।

—কি বক্তব্য ?

—মেজবাবুর ছেলেটা জরের ঘোরে ভুল বকছে । মন্দির থেকে ফুল আর চরণামৃত আনতে বললেন মেজমা । জ্বর খুব বেশী হয়েছে ।

কথাগুলি শুনে কয়েক মুহূর্ত স্থির হয়ে থাকলেন পুরোহিত । কোন কথাটি বললেন না ।

নিকুঞ্জ বললে,—দেবী করবেন না ঠাকুরমশাই । মেজমা বড় অস্থির হয়েছেন !

—পাত্র আনয়ন করেছে ? চরণামৃতের পাত্র ?

ক্রোধ-গষ্ঠীর কণ্ঠে প্রশ্ন করলেন পুরোহিত । কথার শেষে আচমন করতে থাকলেন । এক, দুই, তিনবার আচমন সেরে যুগলমূর্তির পায়ে দুই হাত ছোঁয়ালেন । পাত্রের ফুল দেবেন খুঁজে খুঁজে ।

—পেতলের এই ঘটিতে দিন ঠাকুরমশাই । পাত্র এনেছি বৈকি ।

নিকুঞ্জ কথা বলতে বলতে মন্দিরের দুয়ার-প্রান্তে এগোয় ।

হেই হেই ক'রে ওঠেন পুরোহিত । বলেন,—তুমি কি মন্দিরে প্রবেশ করবে নাকি ? পাত্রটি ভূমিতে নামিয়ে রাখো ।

—না ঠাকুরমশাই, না। আমরা জাতে নীচ বলে কি জ্ঞানগম্যিও হারিয়েছি? মন্দিরের ভিতরে আমি যাই নাই।

নিকুঞ্জ হৃৎখমিশ্রিত স্বরে কথা বলে!

ফুল আর পাদধৌত জল একত্রে ঢেলে দিলেন পুরোহিত।
ভূমিতে নামিয়ে-রাখা পিতলের পাত্রে।

চোখের পলক পড়তে না পড়তে কোথায় অদৃশ্য হয়ে যায় নিকুঞ্জ।
সেই পাত্রসমেত যেন হাওয়া হয়ে যায় নিশাক্ষকারে।

কনসার্টের স্বর আরও যেন স্পষ্ট হয়।

—মেজবাবুর ছেলেটা ভুল বকছে।

নিকুঞ্জর বলে যাওয়া কথাগুলি যেন বারে বারে কানে বাজতে থাকে।
কি জানি কেন, বিষাদমাখানো ক্ষীণ হাসি হাসলেন পুরোহিত। হতাশ
হাসি। আরেকবার দেখলেন ঐ যুগলমূর্তিকে। যেন চোখে দেখা
যায় না।

—মেজবাবু কোথায়? যার সন্তান জরের ঘোরে ভুল বকছে, কোথায়
তিনি এখন? পুরোহিত মনে মনে এই প্রশ্নটি করলেন নিজেকে। কোন
সহস্তর খুঁজে পেলেন না। এত বড় বিশাল গৃহের কে কোথায় কখন যে
কি করছে কে বলতে পারে!

ত্রিশ বিঘার বাস্তু বাবুদের। চন্দনধামের আয়তন, পরিধি।

সাবেককালের একটি রূপ ছিল মূলগৃহের। শাখা উপশাখা হালের।
বর্তমানে জীর্ণ শীর্ণ, প্রায় পড়ে পড়ে। কতদিন যে ভারী বাধা হয়নি!
চুনকাম হয়নি! থ'সে থ'সে পড়ছে পলস্তারা। দিনের আলোয় দূর
থেকে দেখায় যেন কুষ্ঠরোগের মত। চন্দনধাম যেন এখন ব্যাধিগ্রস্থ।
দুরারোগ্য কি এক রোগে যেন ভুগে ভুগে কাহিল, ক্লান্ত।

রোগটাও সামান্য নয়। রাজরোগ। প্রচুর, প্রচুর অর্থের প্রয়োজন

এ মহাব্যাধি সারাতে । তাও এখন ওষুধ ধরবে কি না তার ঠিক নেই ।
মুম্বু !

পুরোহিত জানেন না, মেজবাবু কোথায় । মেজমাও জানেন না,
স্বামী তাঁর কোথায় ।

গানের জলসায় ? নাচের আসরে ? কোন্ জাহান্নমে কে জানে !

তবুও মেজমা নিজের ঘরে অস্থস্থ বিকারগ্রস্থ ছেলের শিয়রের কাছে
ব'সে ছেলের মাথায় হিমশীতল আইসব্যাগ ধরেছিলেন । কপালে ইউ-
ডি-কোলনের জল ছিটিয়ে দিতে দিতে মেজমা অরুণা দেবীও খোঁজ
করছিলেন অসহায়ের মত । চাকরকে শুধোলেন,—কোথায় রে তোদের
বাবু ? দেখলি কোথাও ?

চরণামৃতের পাত্র এগিয়ে ধরে নিকুঞ্জ । বলে,—কি জানি মাঠাকরুণ !
দেখি নাইতো ।

জরের ঘোরে ভুল বকছে ছেলে । অরুণা দেবী থার্মোমিটার দিয়ে
দেখছেন । জ্বরটা বড্ড বেশী হয়েছে । চার ডিগ্রীরও ওপরে !

ছেলের মুখে মা চরণামৃত দেন । দিশাহারার মত হয়ে আছেন
অরুণা দেবী । কেমন যেন অধিক কথা মুখে আসে না তাঁর ।
বেশী কথা ব'লে কারও আর খোঁজ নিতে তাঁর আর মন চায় না । যে
যেখানে ইচ্ছা থাক !

তাঁর ছেলে যে এখন ভুল বকছে ! হাতের মুঠো শক্ত হয়ে গেছে
ছেলের । পা দু'টো হিম যেন বরফ । থার্মোমিটারে উঠেছে চার ডিগ্রীরও
ওপরে । দেহের উত্তাপ দেখে কেমন যেন বিভ্রান্ত হয়ে পড়েছেন অরুণা ।

দু'দিন সামান্য জ্বর হয়েছিল । সামান্য জ্বর ভেবেছিলেন অরুণা ।
কিন্তু আজ সন্ধ্যা থেকে কেন কে জানে, জ্বর চড় চড় করে হঠাৎ বেড়ে
গেছে । মাথায় যেন বজ্রপাত হয়েছে অরুণার !

—ডাক্তারকে ডাকতে পাঠাতে হবে যে নিকুঞ্জ !

উন্মাদিনীর মত যেন শূন্যদৃষ্টিতে তাকিয়ে কথা বললেন অরুণা অত্যন্ত ব্যস্তকণ্ঠে । বললেন,—তোমাদের হুজুর কোথায় একবার দেখো নিকুঞ্জ ! আমি তো ছেলেকে ছেড়ে উঠতে পারবো না এখন । ছেলে যে যায় !

নিকুঞ্জ বলেন,—মাঠাকরুণ, তিনি হয়তো সদরে । ডাকতে গেলে যদি রাগারাগি করেন ?

—বল' যে আমি ডাকছি । ছেলের ভীষণ অসুখ ! রাগারাগি করবেন কি ?

ধীরকণ্ঠে অরুণা দেবী কথা বলেন আর ছেলের মাথায় ইউ-ডি-কোলনের জল ছিটাতে থাকেন !

—তবে যাই, আমি যাই ।

নিকুঞ্জ কথা বলতে বলতে ঘরের বাইরে যাওয়ার জন্ত এগোয় ।

অরুণা বললেন,—ঐ দিকের জানালাটা বন্ধ ক'রে দিয়ে যাওতো নিকুঞ্জ ! গান-বাজনা ভাল লাগছে না আমার ।

যেদিকের জানলার প্রতি অঙ্গুলিনির্দেশ করলেন, সেইদিকেই হয়তো সদর । সেইদিকেই হয়তো সদরের নাচ-ঘর—যেখানে এইতো সবে মাত্র জলসা বসলো ! এই কিছুক্ষণ আগে । যেখান থেকে কনসার্টের সকল যন্ত্রের মধ্যে ক্লারিওনেটের কাঁপা করুণ সুর ভেসে আসছে এখানে ।

ভেসে আসছে সদাক্ষণ নয় । ঐ দিকের হাওয়া যখন এদিকে ভেসে আসছে তখন ।

তার ওপর দেখে দেখে আজকের রাতটিতে এমন এক এলোমেলো বাতাস বইছে থেকে থেকে !

কাল বৈশাখীর হাওয়ার মত দিকভ্রাস্ত হাওয়া। কোন্‌দিক থেকে যে কোন্‌ দিকে বইছে ধরা যায় না।

চন্দনধামের শীর্ষে মরচে-ধরা ওয়েদার ককের মাথার তীরটা অন্ধকারের বুক চিরে বন বন শব্দে ঘুরছে। স্থির হয়ে থাকছে না কোন' দিকে।

হাওয়ায় যেন ঘূর্ণী। বাতাস যেন কেমন, হঠাৎ এসে জড়িয়ে ধরতে চায় তার সহস্রবাহু মেলে। বৈশাখ-রাত্রের বাতাস, তাই এখনও হয়তো ঈষৎ উষ্ণতা হাওয়ায়।

জানালা বন্ধ হয়ে গেছে, তবুও কি মনের জ্বালা মিটেছে অরুণা দেবীর? বাদ্দিনাচ এখনও শুরু হয়নি তবুও যেন তিনি কানে শুনছেন গুণ্ডুরের ঝুন ঝুন শব্দ।

বাদ্দিজীরা বাক্যালাপে রত তখন।

—সরাপের ব্যবস্থা নেই শিউশরণ? দু'এক পেয়ালা দেবে না আমাদের? হেসে হেসে বললে মতিবিবি।

কথা শুনে গাঁজা-খাওয়া-লাল চোখ দু'টো কেমন বড় হয়ে যায় শিউশরণের। কথা বলার সঙ্গে সঙ্গে বলে,—না তোমাদের সরাপ খেয়ে কাজ নেই। নেশা হয়ে গেলে কে নাচবে?

মতিবিবি হাসি ধরলো সশব্দে। তার সর্বাঙ্গে যেন হিল্লোল উঠলো হাসির তালে তালে। বললে,—তুমি একটা বেকুব শিউশরণ! তুমি কিছুই জানো না। নেশা এমন চট ক'রে হয় না আমাদের। মতিবিবি জল-খাবার খায় আর কথা বলে।

—জানি আমি সব মতিবিবি। তবুও যারা পয়সা দিয়েছে তাদের কাছে আগে আমাদের ইজ্জৎ রাখতে হবে। পেয়ালাকে আমি বিশ্বাস করি না, পেয়ালা বড় হারামী আছে মতিবিবি!

শিউশরণের কথায় আত্ম-প্রত্যয়ের সজ্জার সুর। অভিজ্ঞের মত
কথা বলে যেন।

দেখে দেখে ঠেকে শিখেছে শিউশরণ। দেখে আর ঠেকে শিখেছে।
পেয়ালাকে বিশ্বাস করলে কি হয়, তা বেশ ভালই জানে সে।

পেয়ালা মান-মর্যাদা নষ্ট করে। পেয়ালা সর্বনাশ। শিউশরণের
কাছে পেয়ালার চেয়ে আরও বড় ইজ্জৎ—যা একবার নষ্ট হ'লে খরচা-
হয়ে-যাওয়া টাকার মতই আর কখনও উদ্ধার করা যায় না। মদের
নেশায় বিভোর হয়ে থাকলে কে নাচবে আসরে! কে গাইবে!
আর মজলিসে পাকা সমজদার থাকলে কি বলবে তখন, যখন গান
বেহরো ঠেকবে কাণে! মাতাল কখনও গাইতে পারে, নাচতে পারে!

—তবে দুটো পানই খাওয়াও শিউশরণ। ব'সে ব'সে চিবুই।

চিবিয়ে চিবিয়ে কথা বললে মতিবিবি। কটাক্ষপাত করলো কথার
শেষে! কোমরের ঝুলন্ত রেশমী-রুমাল টেনে নিয়ে ঠোঁটের দুই প্রান্ত
মুছলো! খেয়ে দেয়ে যেন চাঙ্গা হয়ে উঠেছে সে।

শিউশরণ বললে,—পান তুমি যত পারো খাও। দুটো কেন দু'শো
দিচ্ছি হামি!

সাজঘরের এক কোণে ছিল পাথরের একটি টেবিল। কাঠের পায়া,
পাথরের গোলাকার চক্র। ধুলো পড়েছে। কেউ সাফ করে না, তাই
রঙ হারিয়েছে। খেত-প্রস্তরের শুভ্রতা ঘুচে গেছে ধুলির আশ্রয়ে।

সেই টেবিলের 'পরে কলাপাতা একখানা। রাশি রাশি তবক-দেওয়া
সাজা-পানের থিলি, পাত্রাভাবে কলার পাতায় দেওয়া হয়েছে।

হাতের মুঠোয় যতগুলি ওঠে, ততগুলি তুললো শিউশরণ। এক
মুঠো তুললো আর কি! তার সঙ্গে কাশীর জর্দা আর স্ত্রীতি।

—রাত কত হবে শিউশরণ?

ত্রিশ বিঘা জমির ওপর চন্দনধাম, যেন একটি ছোটখাটো শহর। আগে ছিল বৈভবে জমকালো। এখন যেন কি এক মহামারীতে ছত্রভঙ্গ হয়ে গেছে। নয়তো যেন এক ভূমিকম্পের জোরালো কাঁপুনিতে নড়বড়ে হয়েছে। কিংবা হয়তো বয়স অধিক হওয়ায় সত্যিকার বার্ককো পৌছে গেছে!

মতিবিবি বললে,—এ বাড়ীর অন্দর তুমি দেখেছো শিউশরণ?

—দেখেছি বৈকি। কিছু আর দেখতে হামার বাকী নেই বিবিজান!

শিউশরণ হেসে হেসে কথা বলে। হাসে গর্কের হাসি। নীরব হাসি। বলে,—এ বাড়ীর সদর দেখেছি, অন্দর দেখেছি, ঝিলের ধারের মন্দির দেখেছি, বাগান, পুকুর বিলকুল আমার দেখা আছে।

একটা বাজে কথা বললে শিউশরণ। নিছক বাজে।

চন্দনধামের সদর সে সত্যি সত্যিই দেখেছে। আগেও দেখেছে, এখনও দেখেছে—দেখেছে খুঁটিয়ে খুঁটিয়ে। কিন্তু অন্দরে সে কোনদিন যায়নি, দেখেনি অন্দরের অন্তর। হয়তো দূর থেকে দেখেছে, অন্দরের বাইরেটাই দেখেছে। যদিও আগের সেই জম-জমাট অন্দর আর নেই, নেই তার সেই আগের দিনের সজোর স্পন্দন।

শুধু অন্দর নয়, সারা চন্দনধামটাই যেন আজ মুহমান হয়ে আছে। মরণের পথের যাত্রীর মত হৃদয় তার যেন সদাঙ্গ ধুকপুক করছে। যে কোন মুহূর্তে যেন শেষ নিশ্বাস ত্যাগ করে ধ্বংসে পড়ে যাবে।

গর্ক আর অহঙ্কারের যেন এক মূর্ত প্রতীক, পতনের সঙ্গে সঙ্গে বুকি মিশে যাবে মাটির সঙ্গে! বড় বেশী উচুতে মাথা তুলিছিল যে! আর তাই যেন তার পতন হবে এক অশুভ লগ্নে! সে কি আসন্ন, সেই শেষ মুহূর্ত, কে জানে!

যে চন্দনধামের ছাদে উঠলে অশ্রু কারও ইটের ইমারৎ চোখে পড়ে

না এবং যে জন্তু বাবুদের বুক দেমাকে দশ হাত হয়ে উঠতো আজ তার ছাদে ফাট ধরেছে। বর্ষার দিনে ছাদের বুক ভেদ ক'রে বৃষ্টির জল পড়ে ঘরের মধ্যে।

নাচঘর থেকে তানপুরার বাকার ভেসে আসে দরজা, জানালার ফাঁক থেকে। কখনও কখনও যেন স্পষ্ট শোনা যায়, কখনও একেবারে অস্পষ্ট হয়ে যায় তারের আওয়াজ। একেক সময়ে সাজঘরে নিরবিচ্ছিন্ন স্তব্ধতা প্রকাশ পায়—যখন কেউ কথা বলে না। শিউশরণ গাঁজার নেশায় হাই তোলে। যেন জলহস্তীর মত হাঁ করে। নূরজাহান বাঁদী চুপচাপ ব'সে থাকে তো বসেই থাকে, উই-ধরা কড়িকাঠে চোখ তুলে। মতিবাবি নীরবে নিজেকে দেখছে তো দেখছেই। নিজের দিকে তাকিয়ে দেখে না, তার চোখের সম্মুখে বিপরীত দেওয়ালের ময়লা আয়নায় দেখে নিজেকে। শ্রান দর্পণের প্রতিচ্ছায়া।

ঠোঁট দুটি কি লাল হয়েছে! সূর্য্য আছে তো চোখের পাতায়, আঁখির কোণে! মুখখানা কি পথের ক্লান্তিতে ঘামে ভিজ়ে গিয়ে কাহিল দেখায়! পাউডার কি ধুয়ে গেছে মুখের!

নেহাৎ ময়লা আয়না, ঘোলাটে আকাশের মত, ঝলসে-যাওয়া কটির মত—নয়তো এত কষ্ট করতে হ'ত না মতিবাবিকে। এত খুঁটিয়ে দেখার কষ্ট থাকতো না!

কত মূল্যের, বেলজিয়ান কাচ আয়নায়। শুধু অব্যবহারে শ্রান হয়ে গেছে। ধূলো প'ড়ে প'ড়ে নষ্ট হয়ে গেছে। ঝাপসা হয়ে গেছে!

নূরজাহান ভঙ্গ করলো নীরবতা। এ গালের পান ও গালে টেনে বললে,—ক'জন বাবু আছেন শিউশরণ?

—চন্দনধামে?

—ই্যা গো ই্যা ।

কপাল কুঁচকে ওঠে শিউশরণের । রেখা দেখা যায় একাধিক ।
গভীর চিন্তার সরল আর বক্র রেখা । কত যেন ভাবতে হয় শিউশরণকে ।
ঘন লাল চোখ তার বন্ধ হয়ে যায় হয়তো মনোনিবেশের একাগ্রতায় ।
চন্দনধামের বাবুদের কুলপঞ্জিকা খুলে বসলো নাকি শিউশরণ, মনে
মনে ? বাবুদের বংশতালিকা ?

একটি মাত্র নাম থেকে কত শত নামান্তর !

বংশের নামগোত্রসহ প্রথম পুরুষ থেকে আরও কত কত পুরুষের
জন্মলাভ ! একটি মানুষ থেকে আরও কত মানুষের সৃষ্টি হয়েছে—তা
কি সত্যি সত্যিই জানে নাকি শিউশরণ ?

না-জানার লজ্জায় হেরে যায় না শিউশরণ । বলে,—তা তোমার
সব বাবুদের মিলিয়ে জনা পনেরো হবে বৈ কি ।

—ক'জন বললে ?

মতিবিবির কাণে অঙ্কের একটি সংখ্যা পৌঁছেছে । ঠিক যে কোন্
সংখ্যাটি তা যেন বোঝা যায়নি । নিজেকে শুধরে নেয় যেন মতিবিবি,
তাই শুধায় ।

—পনেরো জন হবে ।

আবার বললে শিউশরণ । নিশ্চয়তার সুরে ! কথার শেষে বন্ধ
হওয়া চোখ মেললে । লাল চোখ । আগুনের ভাঁটার মত ।

কড়িকাঠে চোখ রেখেই কথা বললে নূরজাহান । বলে,—
বাবুদের সব বে থা হয়েছে ?

একটার পর একটা বড় বেঘাড়া প্রশ্ন করে যায় নূরজাহান । এমন
সব কথা জিজ্ঞেস করে যাদের উত্তর দেওয়া যায় না সহজে । নেহাৎ
নিকটতম আত্মজন ছাড়া কে জানবে এত ! তাও বাবুদের এখন দুর্দিন

চলেছে। দুঃসময় চলেছে। আগে পালে-পার্কণে, বারো মাসের তেরো পার্কণে ঘন ঘন ডাক পড়তো শিউশরণের। এখন ন'মাসে ছ'মাসেও একবারও ডাকে না চন্দনধাম।

শিউশরণ হেরে যাওয়ার লোক নয়। কখনও নাকি সে হারেনি। একান্ত মিথ্যার আশ্রয় নিয়ে বলে,—ইঁা ইঁা, সাধি সবার হয়েছে। সাধি হবে না কেন?

মতিবিবি আয়নায় চোখ রেখে বললে,—বাবুদের ধারাই আলাদা। বাবুদের কিছু না হোক সাধিটা ঠিক হয়ে যায় কাঁচা বয়সে!

পাকা অভিজ্ঞের মত কথার স্বর যেন মতিবিবির।

কথাগুলি শুনে প্রচুর হাসলো শিউশরণ! হাসলো এক কর্কশ শব্দের হাসি। কেমন যেন মাতালের হাসির মত। হাসতে হাসতেই বললে,—ঠিক বাৎ বলেছো মতিবিবি, ঠিক বাৎ!

বাবুদের মধ্যে কেউ অবিবাহিত নেই শুনে কি বিষন্ন হয়ে যায় নূরজাহান! শিউশরণের এত হাসি সত্ত্বেও সে হাসে না। কড়িকাঠে চোখ তুলে বসে থাকে। পান চিবোয়। দাঁতে সুপুরী ভাঙ্গে।

তানপুরার ঝঙ্কার নয়, বাতাসের শোঁ শোঁ শব্দ আসে কোথা থেকে। বাইরে ঝড়ের হাওয়া বইছে হয়তো। কাল-বোশেখীর ক্ষেপা হাওয়া দরজা-জানলার ফাঁক-ফোকর থেকে ভেসে আসে সাজঘরে।

শিউশরণের হাসি থামতে চায় না যেন। থেকে থেকে হাসে সে। সেই কর্কশ শব্দের হাসি।

‘বাবুদের কিছু না হোক সাধিটা ঠিক হয়ে যায় কাঁচা বয়সে!’ কথাটি বড় ভাল বলেছে মতিবিবি। কথাটি কাণে বেজেছে শিউশরণের। যেন একটি প্রবাদ শুনিয়েছে মতিবিবি। এক নিছক সত্য।

সাত পাকের বেষ্টনে বেঁধেও যে বাবুদের ধরে রাখা যায়নি ।

অতুলনীয় রূপের অধিকারিনী হয়েও বধুদের রূপের কোন' মূল্য থাকেনি । ফিরেও দেখেননি স্বামীদেবতার দল । ঘরের লক্ষ্মীদের অবহেলায় ফেলে বাবুরা রাত কাটাতেন রূপোপজীবিনীদের ঘরে । আসল ভালবাসা হেলায় তুচ্ছ ক'রে নকল প্রেমের মদিরায় দিশাহারা হয়ে থাকতেন । আজ না হয় বাবুদের পকেটের আর তেমন জোর নেই ; জমিদারের আরও নেই বললেই হয় । তাইতো একা একা আনন্দভোগের উপায় না থাকায় যৌথ সৃষ্টির ব্যবস্থা হয়েছে । চাঁদা তুলে টাকা জমানো হয়েছে । সেই টাকাতেই আজ রাতটুকুর মত যৎকিঞ্চিৎ আমোদ-প্রমোদ হবে ।

নূরজাহান আর মতিবিবি নারী, তবু তারা কি জানে অন্তরের ঘরে ঘরে আজ কি অশান্তির ঝড় বইছে ! যদিও বাঈজী দু'জন সম্পূর্ণ নির্দোষ । স্বেচ্ছায় তারা তো চন্দনধামের ছায়া মাড়াতে আসেনি ! ডাক পড়েছে, মুজরো নেওয়ার ডাক পড়েছে বাবুদের পক্ষ থেকে । তবেই তারা এসেছে ।

সদরের নাচঘর থেকে গান-বাজনার মিঠে সুর বাতাসের সঙ্গে মিতালী পাতিয়ে যেন অন্তরের ঘরে ঘরে ঊকি দিতে চায় । কত মিষ্টি সুরের রাগ রাগিনী, কত সূক্ষ্ম কাজের, কত মোহ আর কত আকর্ষণের—তবুও কি জালা আর হলাহলে পরিপূর্ণ ঐ সুরতরঙ্গ !

চন্দনধামের অন্তপুরিকাদের মধ্যে অনেকে আজ কাণে আজুল দেন । এই রাগ-রাগিনীও বিষ ছড়ায় কারও কারও কাণে, কখনও কখনও ।

অন্দর প্রায় অন্ধকার ।

একেই গ্রাম্য বিজলী আলো, তায় ব্যবহারে কার্পণ্য । নেহাৎ যে-ঘরে

আলো না জ্বালালে চলে না, সেই সব ঘরে টিম টিমে পঁচিশ ওয়াটের আলো জ্বলে। দালান-উঠানে নিরবিচ্ছিন্ন আঁধার—আলোর চিহ্ন নেই। সিঁড়িগুলিও তথৈবচ। একদিন রঙীন বেলোয়ারী কাচের দেওয়াল-গিরি আর লণ্ঠনে রাতের বেলায় আলোয় আলো হয়ে থাকতো চন্দনধামের ঘর-দালান-সিঁড়ি-উঠান। আলোর সে কি অবিম্বস্ত অপর্যবহার! এমন কি দিনমানেও আলো জ্বলতো কোথাও কোথাও—যেখানে দিনের অটেল সূর্যালোকও প্রবেশের পথ খুঁজে পেতো না।

বেলোয়ারী কাচের রঙীন আলো বাতিল হয়ে যায়। নিভে যায় যেন চিরকালের মত। বিজ্ঞান-বিদ্যুতের কাছে যে বিষম পরাজয় হয় তৈলদীপের।

বিজ্ঞানের জ্ঞানাজ্ঞান-শলাকায় পৃথিবীর ঘরে ঘরে আজ বিদ্যুতের প্রবাহ বহে যায়। বৈজ্ঞানিক গবেষণা আর আবিষ্কারের মহিমা-কীর্তন করে কত আঁধার-ঘরের মাহুষ! অন্ধ পৃথিবী বিজলী আলোয় হারানো পথ খুঁজে পায়। দুর্দান্ত গতির বিজ্ঞান-বিজলী আর রাখবে না কোন তামসচিহ্ন! প্রকৃতির দুর্লভ আইন বুঝি রক্ষা হয় না—পৃথিবীর অন্ধকার সলজ্জায় মুখ লুকায় গুহা-গহ্বরে।

বাইরে কত আলো! সদরে নাচঘর আলো ঝলমল।

আকাশের পূর্ণিমার চাঁদকে যেন ধরে এনে ঘরে পুরেছে কে! সদরের ঘরে ঘরে আজকের রাতটুকুর মত একশো জোরের বল জ্বলছে। আর অন্তর হাঁ হাঁ করছে। যেন দানবী হাঁ করে আছে।

অনঙ্গমোহন ঘর থেকে দালানে বেরিয়েছেন।

ঠায় এক ভাবে কাঁহাতক আর বসে থাকা যায়! একা একা!

ঘরের দেওয়ালে টাঙানো অল্পমার রঙীন আলোকচিত্র। আবক্ষ

ছবি। জলজ্যাস্ত যেন! শুধু মুখে কথা নেই, নয়তো যেন জীবন্ত। শূণ্য ঘর আরও যেন শূণ্য মনে হয়। অনঙ্গমোহন যখন ঐ ছবিখানি দেখেন নিজেকে আরও অনেক বেশী একা মনে হয়। তখন নিজের নিশ্বাসের ক্ষীণতম শব্দেও কখনও বা চমকে ওঠেন। অনুপমা সতীলক্ষ্মী, তবুও ঘরে ব'সে থাকতে যেন ভয় ভয় করে!

তবে কি অনুপমার হৃদয়ধ্বনি শোনা যায়!

অনুর শ্বাস ফেলার শব্দ! দেওয়ালের ছবিটিকে অনঙ্গমোহন দেখেন যেন এক মুক্ত বাতায়ন, যার অপর পারে ব্যাখায় ব্যাকুল সজলচোখ অনুপমা দাঁড়িয়ে আছে।

ঘর থেকে বেরিয়ে দালানে পৌঁছে অনঙ্গের কোথাও আলোর লেশ দেখতে পেলেন না অনঙ্গমোহন। মুখে তাঁর আসল বন্দা চুরুট। কখনও জ্বলছে, কখন স্তিমিত হয়ে যায়!

ঘোর আঁধারে চুরুটের আলোয় আর কতটুকু দেখা যায়, নিজের হাত দু'খানি ছাড়া! জোনাকি কতই বা আলো ছড়ায়!

কোথাও কেউ নেই না কি! এদিক সিদিক চোখ মেললেন অনঙ্গমোহন! যেরূপে দৃষ্টি পড়ে সেদিকই কালোয় কালো। অবিমিশ্র অন্ধকার। বার্ককো পা দিয়েছেন অনঙ্গমোহন, তাঁর দৃষ্টিহীনতা নয়তো?

ভুল দেখেননি তিনি। অনঙ্গের ঘরে ঘরে দরজা-জানালা বন্ধ হয়ে গেছে!

ঘরের বন্দী আলো বাইরে তাই ঠিকরোয় না। ভয়ে আর ত্রাসে যেন ঘরের মধ্যে লুকিয়েছেন যত অন্তঃপুরবাসিনী।

সদরে আজ নাচ গান আর বাজনা চলবে। মাইফেল চলবে। মদের ফোয়ারা খুলে দেওয়া হবে। যে পারবে ডুব দেবে মদের প্রস্রবণে।

যার বয়স বেশী হয় তার প্রতি বুঝি আর চোখ থাকে না।
সে এক রকম পরিত্যক্ত। মনে মনে ভাবলেন অনঙ্গমোহন। ভাবতে
ভাবতে হাসলেন নিজ মনে। অন্ধকারে দাঁড়িয়ে হাসলেন ব্যর্থ
হাসি। একমুখ চুরুটের ধোঁয়া ছেড়ে বললেন,—নো ওয়ান্ বদারস্
ফর এ্যান্ ওল্ড ম্যান লাইক মী।

বার্দ্ধক্য কি তবে মানুষের অভিশাপ!

যে-বৃদ্ধ তার প্রতি না কি কারও দয়া-মমতা, স্নেহ-প্রেম আর
ভালবাসা থাকে না। বৃদ্ধ কেন বেঁচে থাকবে! বৃদ্ধের মরণই আনন্দের,
বেঁচে থাকা দুঃখের। কষ্টকর। নিজের এবং অন্নের পক্ষেও। কত
কথা ভাবতে ভাবতে দালান ধ'রে এগোতে থাকেন। নিজের মনে
বলেন,—এ্যান্ ওল্ড ম্যান্ ইজ্ এ বেড্ ফুল অব্ বোনস্!

একটি ইংরাজী প্রবাদ বললেন অনঙ্গমোহন। শুধু মাত্র নিজেকে
শোনাতেই যেন বললেন, বহু পুরাণো এই প্রবাদ।

আকাশে কত তারা!

অন্দের দালানের জাফরি-জানালার কয়েকটি পাল্লা উড়ে গেছে
কবেকার এক ঝড় বাতাসে! ঝাপসা চোখে আকাশ দেখেন অনঙ্গ-
মোহন। কালো আকাশ দেখা যায় না চোখে। শুধু দেখা যায়
অজস্র আগুনের ফুলকী। দপ্ দপ্ জ্বলছে কত দূরের আকাশে।

সোঁ। সোঁ। শব্দে হাওয়া চলেছে। কাল-বৈশাখী শুরু হ'ল নাকি—
চলতে চলতে থমকে দাঁড়িয়ে পড়লেন অনঙ্গমোহন। আকাশে দৃষ্টি
চালিয়ে খুঁজলেন কি যেন। দেখলেন আকাশের কোন' কিনারায় মেঘ
জমছে কি না। কিংবা মেঘের স্নগতি তরঙ্গ ভেসে আসছে কি,
এত যখন হাওয়া চলেছে দুর্নিবার!

বৈশাখের এই বৃষ্টিহীন দুর্ঘ্যোগের মত অনঙ্গমোহনের মনেও যেন

তুফান বইছে থেকে থেকে! বর্ষনের বালাই নেই, শুধু বাতাসের দাপাদাপি চলেছে। মনের তুফানও থামে না যেন কত রকমের দুশ্চিন্তায়।

বংশের বয়োঃস্ফোৰ্ত্ত যিনি তাঁর চোখের সমুখে চলবে এই সারারাত্রি-
ব্যাপী বেলেল্লাপনা! কেমন এক অপমানের জ্বালা অনুভব করেন
অনঙ্গমোহন। গাত্রদাহ হয় তাঁর। তবুও চোখ দুটি না হয় বন্ধ ক'রে
সকল কিছু সহ্য করবেন তিনি, কিন্তু তাঁর একমাত্র পুত্র মণিমোহন,
কোথায় গেল! সেও কি ভিড়লো নাকি ঐ নাচগানের আঞ্চড়ায়!
নাচঘরের জলসায়।

বলা কি যায় কিছু! যৌবনের জোয়ারে ভেসে যেতে কতক্ষণ!
একেই ছেলে তাঁর বিয়ের স্বাদ পায়নি। নর্তকীর পদঝঙ্কার
শুনে আর চোখের ইশারা পেয়ে ছেলে যদি তাঁর সাড়া দিয়ে বসে।
তখন?

অনঙ্গমোহন এ যুগের কিছুই জানেন না। কিছুই বোঝেন না!

কোন দিকের হাওয়া যে কোন দিকে বয় কিছুই টের পান না তিনি!

অন্দরের চার দেওয়ালের এক ঘরের মধ্যে ঠিক বন্দীর মত
থেকে থেকে সমগ্র পৃথিবীর সঙ্গে তাঁর সকল যোগাযোগই ছিন্ন
হয়ে গেছে যে! বাস্তব-পরিচয় নেই এ যুগের কোন' কিছুর সঙ্গে।
খবরের কাগজ আর রেডিও মারফৎ আর কতটুকু জানা যায়! সারা
দুনিয়াটাই না কি অসম্ভব বদলে গেছে উদানিং। যেমনটি ছিল তেমন
আর নেই। সেই আদিম দিনের গোলাকার পৃথিবীর অন্তরূপ এখন।
মানুষ আর আগের মত নেই। সমাজের নাকি আমূল পরিবর্তন হয়ে
গেছে চূড়ান্ত মর্ডার ইজমের যুগে। স্মৃতিরাং মণিমোহনের মনের গতি যদি

ভিন্ন পথ ধরে, কি করতে পারেন অনঙ্গমোহন! কিছুই করতে পারেন না। পিতৃত্বের কঠোর শাসন না-মানার অবাধ্যতা না কি পেয়ে বসেছে মানুষকে। আইন আর শৃঙ্খলার কোন' মূল্য নেই।

কোথায় গেল মণিমোহন?

হাতে ক'টা টাকা পেয়েই যে কোথায় অদৃশ্য হয়েছে, অনুমানে কিছুই বুঝতে পারেন না অনঙ্গমোহন। ছেলে যদি তাঁর নাচের জলসায় গিয়ে বসেতো দুশ্চিন্তার কারণ আছে বৈকি।

পাল্লাহীন জাফরি-জানাল দালানের। চলতে চলতে সেই জানালার স্তম্ভে দাঁড়িয়ে পড়লেন অনঙ্গমোহন। বেশ ভাল লাগে যেন আজকের রাতের এই উড়ো বাতাস। সারা গায়ে যেন পরশ বুলিয়ে যায়। চোখে-মুখে হাওয়া লাগে।

বাইরে এলোমেলো হাওয়া চলেছে।

মরে-যাওয়া পৃথিবী হঠাৎ সজীব হয়ে উঠলো কতদিন পরে! বোশেখ মাসের সূর্য্যতাপে নিসর্জীব হয়েছিল যেন কতকাল। গাছের পাতাটির পর্য্যন্ত নড়ন ছিল না।

বৃষ্টি কি আসবে!

বাতাসের স্পর্শস্থ অল্পভব করতে করতে ভাবছিলেন অনঙ্গমোহন। যদি বৃষ্টি আসে! মুষলধারা চাই না, ঝির ঝির বর্ষণ হ'লেই চলবে। দিগ্‌দিগন্ত ঠাণ্ডা হবে। মানুষ বাঁচবে। এক পশলা বৃষ্টি, খানিকক্ষণের তরে—তাতেই নাকি ভিজ়ে স্রাঁতস্ত্রোতে হয়ে যায় বাঙলার মাটি। তার মাঠ-ঘাট এক হয়ে যায় অতি বর্ষণে। আরও অধিকতায় বন্যা বয়ে যায়!

যেখানেই যাক ছেলে, ভালয় ভালয় এখন ফিরে এলে হয়।

সুস্থ অবস্থায়। তার মানে সদরের নাচঘরে যে শোনা গেল বোতল

বোতল হুইস্কি-ওয়াইন্ উজাড় হয়ে যাচ্ছে! অনঙ্গমোহনের বাতাস ভাল-লাগা কোথায় যেন মিলিয়ে যায় ভাবতে ভাবতে। তবুও তিনি জানালা ত্যাগ করেন না। ঘন ঘন টান দিয়ে উড়ন্ত বাতাসে, চুরুট-গন্ধ ছড়িয়ে দেন।

মণিমোহন তেমন ছেলে নয় যে নিজের বাসভূমিতে ব'সে ব'সে কোন' রকম অগ্রাঘ্য করবে। কুকার্য্য করবে! নিন্দা রটবে না? দুর্গাম ছড়িয়ে পড়বে না? আর যারা একেবারেই নিজের, তারা কি সত্যিই চূপ ক'রে থাকবে! যতটা নয়, তার চেয়ে অনেক বেশী রঙিয়ে রঙিয়ে বলবে না তারা!

চরিত্রহীনতার প্রশ্ন দিতে হ'লে তোমার নিজের পাড়ার বাইরে চলে যাও—যেখানে কেউ দেখবার নেই তোমাকে—সেখানে তুমি শুধু একম এবং অদ্বিতীয়ম্ না হ'লেও তোমার সমাজের তুমি সেখানে একেবারেই একা। চেনা-মুখের জানা-মাতুষ দেখতেই পাবে না। তুমি যত পার অধর্ম্ম কর', কেউ দেখতে যাবে না।

এটা মণিমোহনের ফিলজফি। জীবন দর্শন। কথাগুলি সে অক্ষরে অক্ষরে পালন করে।

চন্দনপুরের এক আধার-পথে মণিমোহন তখন হন হন ক'রে চলেছিল। গুরকীর রাস্তা, কাকর ছড়ানো, এবড়ো-খেবড়ো, মণিমোহনের পায়ের চামড়ার জুতোর ঘা খেয়ে রাস্তাটি যেন কথা বলতে থাকে। যা তা জুতো নয়, চীনে পাড়ার চামড়ার পাম্পস্। যেমন মজবুত তেমনি টেকসই। মণিমোহনের জুতোর আশেপাশে তালি পড়েছে, কিন্তু শোল্ আছে একেবারে অটুট, অক্ষয়।

অনেক দূরে দূরে, বাক পেরিয়ে, মোড় ঘুরে তারপর যদিও বা

একেকটি একলা-সঙ্গী-আলো, দাঁড়িয়ে আছে একা একা। কেরোসিনের টিমটিমে লণ্ঠন জ্বলছে, কাচের মাথা-মোটী বাত্মের মধ্যখানে। লণ্ঠনের চিমনী অপরিষ্কার, কালি পড়েছে। হাওয়ার এত বেগ, বন্দী শিখা কিন্তু নিষ্কম্প।

পথ চলতে চলতে নিজের জুতোর শব্দে নিজেই একেকবার চমকায় মণিমোহন। পথ চেনা, বহুদিনের পরিচয়, তবুও চমকে চমকে ওঠে। কাঁচা রাস্তা, দু'পাশে আগাছার জঙ্গল। খেজুর গাছের সারি। মানকচুর বন। পালতে-মাদারের ঝোপ। তেঁতুল আর সজনের খাড়াই।

বনমানুষ আর বাঘ-ভালুকেরে ডরায় না মণিমোহন।

দস্যু-ডাকাতকেও নয়। ভয় করে সাপ-খোপকে। শুধু সরীসৃপের ভয় চন্দনপুরে, রাতের অন্ধকারে। সেই শৈশব থেকে কত কত যে দেখেছে মণিমোহন, তার সীমা সংখ্যা নেই। জলে জল-সাপ দেখলে ভয় করে না, সে-সাপের বিষ থাকে না। কিন্তু ডাঙ্গায় যারা তারা যে ভয়াল ভয়ঙ্কর! এই চন্দনপুরে এখনও এমন এমন কেউটে আর গোখরো আছে, যাদের একটিমাত্র দংশনের জ্বালায় ইহলীলা ত্যাগ করতে হয় মানুষকে।

উঁচু গাছের শাখার সঙ্গে মিতালী পাতিয়ে শাখা জড়িয়ে ঘোরাফেরা করে ওরা। এ-গাছ থেকে সে-গাছে চ'লে। এক প্রান্ত থেকে অন্ড প্রান্তে চলে যায়।

উঁচুতে থাকে তাই দংশায় দেহের অন্ড কোথাও নয়, মানুষের কপালে। একটি মাত্র মোক্ষম ছোবলে মস্তিষ্ক পর্যন্ত নাকি বিষিয়ে, যায়—যাতে নাকি আর বাঁচবার উপায় থাকে না। মাথায় তাগা আর বাঁধতে হয় না। চেতনা হারিয়ে যায় দংশনের সঙ্গে সঙ্গে!

ঐ কেউটে-গোখরোর কেউ কেউ কোন' কোন' রাতের অন্ধকারে,

কি খেয়ালে গাছের উচু শাখা থেকে মাটির বুকে নামতে চায়। গাছের শাখা থেকে নেমে তাও যদিবা স্থির থাকতো! তা নয়, মানুষ-চলা কাঁচা রাস্তাটি পারাপার করে। পথের এক দিকের জঙ্গল ভাল না লাগলে অপর দিকে আছে।

তাই ভয়ে যেন চমকে চমকে ওঠে মণিমোহন। নিজের পদক্ষেপের শব্দেও অসম্ভব চমকায়। মনসার বাহন কি পথ অতিক্রম করছেন! হাতের আঙুলের ফাঁকে ধরা জলন্ত সিগারেটে টান দিতে ভুলে থাকে কতক্ষণ!

এই বিলম্বী পথটুকু পেরোলেই কুমোরপাড়া!

তারপর আরেকটু নিরান্না রাস্তা—সোজা চলে গেছে নাক বরাবর, তারপর পড়বে ক্যাথলিক চার্চ। অনেকটা জায়গা জুড়ে দাঁড়িয়ে আছে চন্দনপুরের খ্রীষ্টের উপাসকদের স্বর্গতুল্য ছুঁচালো মিনারের গির্জাটি!

গির্জার সীমানা যেখানে শেষ হয়েছে সেখান থেকে শুরু হয়েছে দরিদ্র মুসলমানপাড়া। সেখানে পৌঁছে চোখ বন্ধ করে ব'লে দেওয়া যায় কোথায় এলাম। মুসলমানপাড়ার হাওয়ায় নাকি পেঁয়াজ-রসূনের কেমন একটি উগ্র গন্ধ ভাসে সদাক্ষণ। ডিম আর রান্না-মাংসের কেমন যেন আমীরী আমেজ পাওয়া যায়।

মুসলমানপাড়ার শেষাশেষি না যেতে পারলে কিন্তু পথ-চলা থামবে না মণিমোহনের। বৈতরণী না পেরিয়ে যেমন স্বর্গে নাকি যাওয়া যায় না।

ঐতো কুমোরপাড়া! গায়ে-গায়ে জটলা পাকিয়ে কুমোরদের চালাঘরগুলি কোন রকমে যেন সোজা হয়ে আছে। ছ' একটি ঘরের আলো দেখা যায় দূর থেকে। মনে যেন বল পায় মণিমোহন। জোরে জোরে পা চালায় সিগারেটে ঘন ঘন টান দিতে দিতে।

অলকা না জানি কতক্ষণ ধ'রে প্রতীক্ষায় ব'সে আছে ! দুয়োর
খুলে পথের পানে তাকিয়ে ।

চলার গতি যেন উত্তরোত্তর বেড়ে যায় ক্রমেই । হাতের শেষ-খাওয়া
সিগারেটের টুকরোটা ছুঁড়ে ফেলে দেয় পথিপার্শ্বে । মানুষের কণ্ঠ শোনা
যায় কুমোরপাড়ায় পড়তেই । মানুষের টুকরো টুকরো ছেঁড়া ছেঁড়া
কথা শোনা যায় । শিশুর কান্না কানে আসে । হঠাৎ হঠাৎ চোখে
প'ড়ে যায় কুমোরদের জলন্ত চুল্লী । ভাতের হাঁড়ি চাপানো । গমগমে
আঁচ উঠুনে । অন্ধকারে আর কিছু নজরে পড়ে না, শুধু লাল আগুন ।

উঠুন যেন দানবের মত হাঁ করে আছে ! আগুন খাচ্ছে যেন, আর
কিছু না পেয়ে । মানুষের বসতি দেখতে পেয়ে স্বস্তির স্বাস ফেললো
মণিমোহন । সর্পাঘাতের ভয় পদে পদে—সেই জনবিরল বনজঙ্গলময়
পথ শেষ হয়ে গেছে এতক্ষণে । নিজের স্বাস-প্রশ্বাসের শব্দে পর্য্যন্ত
চমকে উঠেছে সে । মনে হয়েছে, শাপের ফোসফোসানি !

আকাশের চাঁদের মত, অলকার ঢলোটলো মুখখানি, বার বার
চোখে ভেসে ওঠে মণিমোহনের । অধীর প্রতীক্ষায় মুখটি ঝুঁক । বিষণ্ণ ।
চোখে ফ্যাল ফ্যাল চাউনি । কাজলপরা টানা টানা চোখ ।

ক্যাথলিক চার্চটি যেন একটি ছোটখাটো পর্বত ।

বিশাল প্রাঙ্গণের বুক জুড়ে আছে । লোহার বিচিত্র রেলিঙ
প্রাঙ্গণের চতুর্দিকে ! রেলিঙের ধারে যুঁই আর গন্ধরাজের সারি ! শৃগঞ্জে
বাতাস যেন ভারী হয়ে আছে । হঠাৎ এক ঝলক যুঁইয়ের গন্ধ নাকে
আসতেই মণিমোহন আনলো গির্জাবাড়ীর পাশের পথ দিয়ে সে চলেছে ।
একবার চোখ ফেরায় গির্জার এক খোলা-দরজায় ।

কিছু দেখা যায় না স্পষ্ট । শুধু দেখতে পায় কালো পালিশের একটি
পিয়ানো । দু'টো কাণ্ডোলেত্রা পিয়ানোর ওপরে । দু'পাশে দু'টো বাতি

পুড়ছে দপ দপ। এখনও খোলা আছে দরজা, খানিক বাদেই বন্ধ হয়ে যাবে।

গির্জার চুড়োয় আছে একটি ঘড়ি। রাতের আঁধারে দেখা যায় না। তবে ঘণ্টায় ঘণ্টায় ঘড়ির ঘণ্টা বাজে। সাবধানী নিশানার মত শোনায় যেন। সময়ের তরী বয়ে চলেছে, ঘোষণা করে যেন প্রতি ঘণ্টায়। কতদূরে ছড়িয়ে পড়ে সেই ঘণ্টাধ্বনি। সারা চন্দনপুরকে শোনায় যেন।

কে ঐ মানুষটি! অমন টলতে টলতে আসছে!

কেন কি জানি, অন্ধকারে মুখ লুকোয় মণিমোহন। মুসলমানপাড়ার আলোয় কাকে যেন দেখতে পায় দূর থেকে। চেনা-পরিচিত কেউ নয়তো? কোন আত্মজন? কোন প্রতিবেশী? বলা যায় না, কখন কোথায় কার সঙ্গে দেখা হয়ে যায়!

মানুষটি পাশ দিয়ে চলে যেতে টেরিয়ে টেরিয়ে দেখলো মণিমোহন।

নিশ্চিত্তার শ্বাস ফেললো একটি। আপনজন কেউ নয়। থার্ড ক্লাশ ঘোড়ার গাড়ীর বুড়ো গাড়োয়ান শামসুদ্দীনটা সারা দিনের রোজগারে বত পেরেছে মদ খেয়ে ফিরছে হয়তো। বাসায় ফিরছে টলটলায়মান অবস্থায়।

দেশী মদের উগ্রতম বিস্ত্রী গন্ধ যাবে কোথায়! মণিমোহন বোঝে যে গাড়োয়ান শামসুদ্দীন এখন আর গাড়োয়ান নেই, বাদশাহী কেতা তার এখন। চিতানো বুক। সদন্ত পদক্ষেপ। সমুদ্রের ফেঁপে-ওঠা তরঙ্গের মত যেন টলছে। কথা বলতে গেলে হয়তো এখনই মেরে বসবে।

তবুও শামসুদ্দীনকে দেখে মনে মনে খুশী হয় মণিমোহন।

মদ থাক, সারা দিনের রোজগারের টাকা ওড়াক, তাতে কার কি! কোন আত্মীয়-স্বজন কিংবা হিতাকাঙ্ক্ষী প্রতিবেশীতো নয়, তাতেই খুশী হয় মণিমোহন। তাড়াতাড়ি পা চালায় পকেটে হাত চালাতে চালাতে। আবার সিগারেট ধরাবার দরকার হয়। পথ-চলার ক্লান্তি লাগে এতক্ষণে।

মুসলমানপাড়ায় তবু আলো আছে। দীন-দরিদ্র, রোজ আনে রোজ খায়। কতই বা উপার্জন গাড়োয়ান, ডিমগুলা, নৌকার মাঝি-মাল্লাদের। তবুও ঘরে ঘরে উজ্জ্বল লণ্ঠনের আলো। এই রাস্তারই যেখানে পান-বিড়ির দোকান, সরাইখানা আর গরুর মাংসের কসাই-খানা আছে, সেখানে জ্বলছে একটি ঝুলানো পেট্রোম্যাক্স।

পান-বিড়ির দোকানের সামনে মানুষের জটলা।

পথের ধারে চাটাই বিছিয়ে ছকা-পাঞ্জা খেলা চলেছে আর কলকাতার চোরা-বাজার থেকে অত্যন্ত সস্তাদরে-কেনা সস্তার ফনোগ্রাফে লঙ্কো না লাহোর ঘরাণার কে এক গায়িকার ঠুংরী গান বেজে চলেছে।

অভাব আছে চন্দনপুরের এ তল্লাটের মানুষদের। অনটন আছে।

তবে আনন্দের অভাব নেই মুসলমানপাড়ায়। কলকাতার চোরাবাজার থেকে কেনা ফনোগ্রাফের গানের জলসা, তাসের আড্ডা আর ঠিক সূর্যালোকের মত ঐ পেট্রোম্যাক্সের আলোর প্রাত্যহিক বন্দোবস্ত আছে।

আরও আছে। পান-বিড়ির দোকানে রঙীন ছবি। বস্ত্রের চিত্র তারকাদের মুখে চটুল হাসি আর চোখে ইশারাভরা রঙীন ছবি। জরির অলঙ্করণ ঐ মায়াময়ীদের বেশভূষায়। আকর্ষণ করে যেন ঠিক! চোখ না ফেরালেও, জোর ক'রে টেনে নেয় মানুষের দৃষ্টি।

গানের জলসায় লঙ্কো না লাহোর ঘরাণার গীতসম্ভার। যতক্ষণ না রাত্রি নিশুতি হয় ততক্ষণ এক নাগাড়ে চলবে ফনোগ্রাফের গান। পান-বিড়ির দোকানও ততক্ষণ হয়তো খোলা থাকবে। সকলের চোখে হয়তো ঘুম নামবে, শুধু ঐ চিত্রতারকাদের চোখের পল্লব পড়বে না। তাদের মুখের সোহাগী হাসি এক মুহূর্তের তরেও মিলাবে না। পেট্রোম্যাক্সটাও ভোস ভোস শব্দে জ্বলতে থাকবে।

বেশ খানিক দূর থেকে চোরা-চোখে খুঁটিয়ে খুঁটিয়ে একবার দেখে
নেয় মণিমোহন।

অলকার ঘরেও আলো জ্বলেছে! তার ঘরের রাস্তার দিকের
জানলাটা খোলা রয়েছে। অলকাও হয়তো প্রতীক্ষায় কাতর হয়ে
বসে আছে।

আরও কিছু পথ যেতে না যেতেই তো দেখতে পাওয়া যাবে
স্বচক্ষে। সিগারেটে দেশলাইয়ের আগুন ধরিয়ে হারাণো-উত্তম ফিরে
পেয়ে তাড়াতাড়ি পা চালায় মণিমোহন।

দিন-কাল খারাপ! আয়ের চেয়ে বেশী ব্যয়ের চাপে দেশের মানুষ
না কি মরমর। ডাইনে আনতে যখন বাঁয়ে কুলোয় না তখন আর সংসার
বাড়িয়ে মিথ্যা মিথ্যা কষ্ট পাওয়া। সকল কষ্টের তুলনায় যখন অর্থকষ্ট
সবচেয়ে কষ্টকর, তখন ভেবেচিন্তে চলতে হয় ইদানীং।

তদুপরি শিশু-সরকার যখন বায়না ধ'রেছে। আকাশের চাঁদ চেয়ে
বায়না ধরলে কারও কোন' ক্ষতি ছিল না। জমিদারদের জমিদারী দাবী
করেছে। কত স্বথের, কত স্ববিধার, কত আনন্দ আর কত আরামের
জমিদারী কেড়ে নিতে চায় জমিদারদের হাত থেকে। নোটিশ এসেছে।
ভারত-আইনের বই থেকে নাকি সূর্যাস্ত আইনের পরিচ্ছেদটি বাতিল
হয়ে যাচ্ছে, চিরকালের মত!

তাই অনঙ্গমোহন তাঁর এক মাত্র ছেলেকে ডেকে বলেছিলেন,—
মণিমোহন, একটি কথা তুমি যেন ভুলে যেও না, তোমার বিবাহ আমি
কোনদিন দেবো না। অন্ততঃ আমি বেঁচে থাকতে নয়।

প্রসঙ্গটা শুনে মাথা নামিয়েছিল মণিমোহন। ইঁ না কিছুই বলেনি।
কিন্তু অনঙ্গমোহন আরও ব'লেছিলেন,—ব্রেড এও বাটারের সংস্থান
থাকবে না? ভাবতে পারো তুমি?

অবাক হয়ে তাকিয়েছিল মণিমোহন। মুখে তার কথা জোগায়নি। অনঙ্গমোহন আরও বলেছেন,—মুখে ভাত দিতে পারবে না, পরণের বাস দিতে পারবে না, বছর বছর পশুপক্ষীর মত বাচ্চার জন্ম দিয়ে যাবে? হরিব্ল! টেরিফিক! প্যাথোটিক!

বাইরে থেকে দরজার কড়া দু'একবার বাজতে না বাজতেই দরজা খুলে যায় যেন ফুস্‌মুস্‌। দুয়ার খুলে দিয়ে এক পাশে, আড়ালে স'রে দাঁড়ায় অলকা। ভয়ে ভয়ে খানিক তাকিয়ে, হাঁফিয়ে হাঁফিয়ে ফিসফিস বললে,—তুমি! আমি ভেবেছি, কে না কে! একা একা থাকতে হয়।

নিজের চোখ দুটিকে যেন বিশ্বাস হয় না অলকার। নিশিমেঘ চোখে তাকিয়ে থাকে এক দৃষ্টিতে!

—কেমন আছো? চাপা গলায় শুধায় মণিমোহন।

—তুমি যেমন রেখেছো। ফিসফিস কথা বলে অলকা। ভয় আর উত্তেজনায় হাঁফিয়ে হাঁফিয়ে।

দরজায় খিল তুলে দিয়েই দুই বলিষ্ঠ হাত মেলে মণিমোহন। প্রথমে দুই মুঠোয় অলকার দুই নরম বাহু চেপে ধরে। যেন শূন্যে তুলে ফেলবে অলকাকে!

—কদিন আসতেই পারিনি অলকা। কলকাতা যাওয়া-আসা করতে হয়েছে। কথা বলতে বলতে মণিমোহন তার দুই মুঠো আরও শক্ত করে।

কেন কে জানে, সজোর চাপে অলকার যেন দম বন্ধ হ'ত থাকে! যেন তাঁর দেহলতা লুটিয়ে পড়তে চাইছে, চোখের দৃষ্টিতে তার ফুটেছে সমর্পনের ব্যাকুলতা। তবুও সহজ হ'তে চায় অলকা। ফিসফিসিয়ে বলে,—আমি জানি তোমার অনেক অসুবিধে, অনেক বাধা। অনেক

চোখকে ফাঁকি দিয়ে আসতে হয় তোমাকে । তবুও তুমিতো এসেছো !
আমাকে ভুলে যাওনি !

দুই মুঠোর চাপে অলকাকে কাছে টানে মণিমোহন । বুকের কাছে
টানে, মুখের কাছে ।

ছেলে যে কোথায় গেল, তাই ভেবে ভেবে অস্থির হয়ে ওঠেন
অনঙ্গমোহন ।

আকাশ আরও কালো হয় । আরও একটু ঘন হয় রাত । ঝাঁ ঝাঁ
ডাকছে একটানা । শব্দটা যেন আরও স্পষ্ট হয়েছে এখন । রাত্রির
শুষ্কতায় । আর যেন ভাল লাগলো না প্রকৃতির রূপ দেখতে । রাতের
আকাশ আর বৈশাখের মুক্ত বাতাস, বুঝি ভাল লাগলো না আর ।
অনঙ্গমোহনের মন চঞ্চল হয়ে উঠলো । রাত্রির তমসা কি ভেঙে খান
খান হয়ে যাবে !

ঝাঁ ঝাঁ ডাকছে না সারেঙ্গী কঁাদছে সদরের নাচ-ঘরে ।

না কি বাঈজীর পায়ের নূপুরের কিন্‌কিনী শোনা যায় ! রাত্রির
তমসা যেন চিরে চিরে যায় একটানা শব্দের করাতে । ঝাঁঝের ডাক,
সারেঙ্গীর কান্না, না ঘুঙুরের মিহি আওয়াজ, ঠিক ধরা যায় না ।

দালান অতিক্রমণ সহসা থেমে যায় অনঙ্গমোহনের ।

কারা এত কথা বলে ! কোন্ এক বন্ধুদ্বার ভেদ ক'রে কাদের কথা
যেন কানে ভেসে আসে । থমকে দাঁড়িয়ে পড়তে হয় ! সোপানসে কথা
বলাবলি করছে কারা ।

চুরিয়ে কারও কথা শুনতে চাওয়া চরম অভদ্রতা ! তবুও পা যেন
চললো না । অভাবের অশান্তিতে ভদ্রতা-অভদ্রতার জ্ঞান আর থাকে না ।
সরিকদের চক্রান্ত চলেছে হয়তো । পরস্পরকে ফাঁকি দেওয়ার ষড়যন্ত্র

পাক খাচ্ছে বন্ধুদ্বার ঘরে । কে কাকে পথে বসাতে পারে তারই ফন্দী-
ফিকির বের করা হচ্ছে রাত্রির তমসায় !

অভাবের তাড়নায় স্বভাবটার কোন' ঠিকঠাক থাকে না । পা আর
চলে না অনঙ্গমোহনের । কান খাড়া ক'রে শোনে কে কি বলছে ।
শুনলেন—

—এই ভিটেয় ঘুঘু চরিয়ে তবে ছাড়বো !

—মামলা চালিয়ে যদি সর্বস্বাস্ত হ'তে হয়, তবুও ।

—ফতুর হই হব', তোদেরও ফতুর করবো !

—হাইকোর্ট দেখাবো !

—কাটিগড়ায় দাঁড় করাবো !

—জমিদারী লাটে তুলে দেবো তোদের !

—এ্যাটর্নীর বলেছে এই ডিক্রীতেই নিষ্পত্তি হয়ে যাবে । বাড়ীর
নোটিস আসবে, এক হপ্তার টাইম দেবে । তারপর—

—তারপরই বাড়ী ভেঙেট ক'রে দাও ! যে যার পথ দেখো !

কথার শেষে কে যেন অটুহাসি শুরু করলো । হো হো শব্দে । তার
সঙ্গে পাল্লা দিয়ে যোগদান করলো আরও কয়েকজন । একই রবে । সেই
হাসির ঐকতান সারা অন্তরময় যেন ছড়িয়ে পড়লো !

কথাগুলি একে একে কাণে পৌছয় আর শিউরে ওঠেন
অনঙ্গমোহন । সরিকদের একদল ষড়যন্ত্র চালায় । বুকের প্যালপিটেশন্
বেড়ে যায় । মাথার মধ্যে যেন একটা ওলট-পালট হয়ে যায় কথাগুলি
শুনতে শুনতে । চক্রান্তের জাল বুঁদন চলেছে রুদ্ধদ্বারকক্ষে । রাত্রির
অন্ধকারে, যখন ষড়যন্ত্রের সঠিক সময় ?

বৈশাখী হাওয়া যেন সর্বক্ষে বিষ ছড়িয়ে দেয় । রাতের কালো
আকাশ কোন' জবাব দেয় না ! ভগবানের প্রকৃতি না কি সজীব,

কথা বলে না কেন তবে? সমবেদনা আর সহানুভূতি জানায় না কেন?

দালান থেকে হনহনিয়ে নিজের ঘরে চলে গেলেন অনঙ্গমোহন। মুখে চুরুটটি ধ'রে রেখে ব'সে পড়লেন ইঞ্জি-চেয়ারে। কেমন যেন ভীষণ হতাশায় ভেঙ্গে পড়লেন। ছেলেটা আবার এমন সময় কোথায় যে চলে গেল! এমন অসময়ে! নিজেকে যেন অত্যন্ত বেশী একা মনে হয়। দেওয়ালে অল্পপমার ছবিটি সহসা চোখে পড়তে আরও যেন একা মনে হয়।

সদরে নাচঘরে আসর জমায়নি তো মণিমোহন? অবিবাহিত বয়স্ক ছেলে সে, হয়ত সংযমকে আর আয়ত্তে রাখতে পারেনি। মদ আর মেয়েমানুষ চোখের সমুখে দেখতে পেয়ে হয়তো লোভ সামলাতে পারেনি। লেজ-কাটা শৃগালদের দলে প'ড়ে হয়ত মণিমোহনও নিজের লেজ কেটে উড়িয়ে দিয়েছে।

অনঙ্গমোহনের মাথার মধ্যে তুফান বইছে যেন। চেয়ার ছেড়ে উঠে পড়লেন, কেন কি কারণে। ঘর থেকে বেরিয়ে দালান থেকে কাঁপা কাঁপা কণ্ঠে ডাকলেন,—শ্রামাপদ! শ্রামা! শ্রামা—আ—আ—আ!

—আজ্ঞে হজুর!

অনঙ্গমোহনের ঠিক পায়ের পাশটি থেকে হঠাৎ সাড়া দেয় শ্রামাপদ। হঠাৎ ঘুম-ভাঙার অস্পষ্ট সুরে। হাতে কাজ ছিল না তার, ফুরসৎ পেয়ে দার্লানেই লটকে পড়েছে। ঘুম ম'রছে।

আরেকটু হ'লে অনঙ্গমোহন নিজের চমকানিতে ট'লে পড়ে যেতেন; মাড়িয়ে ফেলতেন পোষা চাকরকে! ঘুমন্ত শ্রামাপদকে।

—দাদাবাবু কোথায়?

অনঙ্গমোহন প্রশ্ন করলেন ঈষৎ রুষ্টকণ্ঠে।

—আমিতো জানি না হজুর ।

কথা বলতে বলতে উঠে পড়লো শ্যাম । কাঁচা ঘুমটা ভেঙ্গে গেছে,
তাই কথা বললে সামান্য বিরক্তির সঙ্গে ।

—সদরের নাচঘরে নেই ?

—দেখি নাই হজুর ।

—দেখে আয় সেখানে আছে না নেই । যাবি আর আসবি ।
দেবী করিসনে যেন ।

চন্দনপুরের যেদিকে গির্জাবাড়ী, যেদিকে মুসলমানপাড়া শেষ
হয়েছে, সেদিকের একটি রাস্তার দিকে ঘরের খোলা-জানালা বন্ধ হয়ে
গেছে কিছুক্ষণ আগে । ঘরের মালিক শ্রীমতী অলকা দেবী নিজেই বন্ধ
ক'রে দিয়েছে । জানালা বন্ধ করতে করতে বলেছে,—আমার হাত
একেবারে খালি । এমন পয়সা নেই যে তোমাকে এক পেয়লা চা তৈরী
করে দিই ! চা চিনি আনাই । দুধ আনাই !

কথায় বিস্ময় ফুটিয়ে মণিমোহন বললে,—সে কি কথা অলকা ! সাত
দিন আগেও যে তোমাকে একশো টাকা দিয়েছি ! তার সব খরচা
হয়ে গেল এরই মধ্যে ?

অলকা মণিমোহনের কাছটিতে বসে । বলে,—তা হবে না ? কি
যে বল' তুমি ! চার মাসের ঘর-ভাড়া বাকী পড়েছিল । দিয়ে দিয়েছি
চার কুড়ি আশী টাকা । বাকী টাকায় র্যাশন আনিয়েছি, ধোপাকে
টাকা মিটিয়েছি, বাসন-মাজা-ঝি়ের মাইনে চুকিয়েছি । ছ'খানা
পরণের শাড়ী কিনেছি ।

কেমন যেন চিন্তার রেখা ফোটে মণিমোহনের কপালে । খানিক
ভেবে ভেবে বললে,—তবে নাও আরও কিছু টাকা । কথার শেষে

পকেটে হাত পুরলো। বের করলো এক তাড়া নোট। পাচ আর দশ টাকার। বললে—ভালই করেছো বাড়ী-ভাড়ার টাকাটা মিটিয়ে দিয়ে। এই নাও আরও পঞ্চাশ, রেখে দাও তোমার কাছে।

—অসুবিধে হবে না তো তোমার? মিহি কণ্ঠে বলে অলকা। বলে,—যদি অসুবিধে হয় থাক। পঞ্চাশ দিতে হবে না, গোটা কুড়িক টাকা দাও আপাতত।

অলকাকে সাপটে টেনে নেয় মণিমোহন। বলে,—আমার টাকাতো তোমার জন্মেই। নাও তুমি, পঞ্চাশ টাকাই নাও। আমার কোন অসুবিধে হবে না। আমার উপার্জন, সেতো তোমার জন্মে, নয়তো বয়ে গেছে আমার রোজগারের ধান্দায় ঘুরে মরতে!

—তোমাকে কত কষ্ট করতে হয় আমার জন্মে! অলকা কথা বলে সহানুভূতির করুণ সুরে। মুখ উচিয়ে।

মণিমোহন বললে,—কিছু নয়, কিছু নয়! তবু যদি তোমাকে হাজার হাজার টাকা দিতে হ'ত! একটা গহনাও তো দিতে পারি না কালেভদ্রে!

—গয়না আমার চাই না। নিজেকে সোণায় মুড়ে রাখতে আমি চাই না। তুমি আমার হয়ে থাকো, তুমিই আমার অলঙ্কার, তুমিই আমার—

কথা বলতে বলতে নিজেকে কেমন বিকিয়ে দেয় যেন অলকা। তাকে অনেক কাছে টেনে নেয় মণিমোহন। বলে,—তেমন বেশী টাকা উপার্জন করতে পারলে সোণায় তোমাকে মুড়েই রাখতুম! সাধ আমার অনেক, সাধো যে কুলায় না!

মণিমোহনের উপার্জন! যে চাকরী করে না, ব্যবসাও করে না, অথচ টাকা উপার্জন করে কোথা থেকে! জুয়া থেকে? না, তাও নয়। জুয়া মধ্যো মধ্যো খেলে বটে মণিমোহন। কলকাতার চীনা পাড়ায় যে-সব

আগার-গ্রাউণ্ড জুয়ার আড্ডা আছে, যেখানে মদ আর টাকার কোন মূল্য নেই, যেখানে ছোরা আর ছুরি কথায় কথায় চালাচালি হয়, যেখানে নারীমাংসের মূল্য অত্যন্ত নগণ্য—সেই সব ভয়াল ভয়ঙ্কর গোপন আড্ডায় মাঝে-মিশেলে যায় বৈকি মণিমোহন ! খেলে রাউণ্ডের পর রাউণ্ড । জিতে যায় ভাগ্যে যেদিন থাকে । হারে বেশীর ভাগ দিন ।

জলের চৌবাচ্চায় সত্যিকার হাঁস সাঁতরে সাঁতরে বেড়ায় । এক নির্দিষ্ট জায়গা থেকে রিং বা রবারের চাকতি ছুঁড়তে হয় হাঁসকে লক্ষ্যে রেখে । ভাগ্যে যদি থাকে, ঐ রিং হাঁসের গলায় গ'লে যায় । নয়তো রবারের চাকতি ফসকে গিয়ে পড়ে চৌবাচ্চার জলে । টেবিল-মানি জলে যায় তখন । জুয়াড়ীদের তাচ্ছিল্যভরা হাসির অট্টরোলে লজ্জা পেতে হয় তখন । টাকা নষ্ট হওয়ার সঙ্গে সঙ্গে সম্মানও নষ্ট হয় ।

আর যেদিন জিতে যায় ? সেদিন হয়তো পঁচিশ-পঞ্চাশ টাকা । নিজের উপার্জনের জন্য জুয়া খেলে না মণিমোহন । উদবৃত্ত টাকা হাতে থাকলে সেদিন খেলে জুয়া । অর্থাৎ জুয়া খেলে উপার্জন করে না । জুয়ার টাকা ঘরে তোলা যায় না—এ কথাটি সে বিশ্বাস করে ।

মণিমোহনের উপার্জনের পথ অন্য । পালে-পার্কিং কলকাতার ট্রামে-বাসে যেদিন ভিড হয় অসাধারণ, কলকাতার মানুষ যেদিন নিজেদের হারিয়ে উৎসবে মেতে ওঠে সেই দিনগুলির সদ্যবহার করে সে । কোন অসাবধান মায়ের বুকের শিশুর কণ্ঠ থেকে সোনার হার কেটে নেয় কি এক যন্ত্রের সাহায্যে ! আর পালে-পার্কিং ও উৎসব যেদিন থাকে না সেদিন মণিমোহন পরে পুলিশ অফিসারের খাঁকীর কিংবা সাদা জিনের পোষাক । তারপর কলকাতার শহরতলীর দোকানে দোকানে হানা দেয় । সেদিন তার অন্য আকৃতি, অন্য ভাবভঙ্গী, অন্য ধরণ-করণ । পুলিশ ইউনিফর্মে একেবারে অন্য চেহারা ।

পুলিশ অফিসারকে দেখে জালদ্রব্যের ভীৰু দোকানদার হততো
সম্মানে এগিয়ে আসে করজোড়ে। বলে,—কোন' হুকুম আছে
সার ?

সপ্রতিভ হাসি হাসে মণিমোহন। বলে,—পুলিশ কখনও হুকুম
করতে পারে মশাই ? পুলিশ হচ্ছে পাবলিক সার্ভেন্ট, তাকেই হুকুম
করে পাবলিক।

—কি যে বলেন সার ! পুলিশই আমাদের ধ্যান জ্ঞান, পুলিশই
আমাদের ভগবান, পুলিশ বিভাগ আমাদের কাছে স্বর্গ ! পুলিশ যদি
না থাকতো—

দোকানদারকে কথা শেষ করতে না দিয়ে কথার সুর পালটে গম্ভীর
সুরে কথা বলে মণিমোহন। বলে,—তা তো হ'ল, কিন্তু আপনার শো-
কেশের জবাকুসুম আর বাতগেটের ক্যাষ্টর অয়েলের শিশিগুলো যে মনে
হচ্ছে ছ'নম্বর মাল ! দেখি একবার শো-কেশটা খুলুন। বনস্পতির
টিনগুলো দেখে মনে হচ্ছে আসল, কিন্তু ভেতরের বস্তু কি ঠিক আছে ?

কাঁপতে থাকে দোকানদার। শীতের দিনের বলির পাটার মত
কাঁপতে থাকে। মুখ শুকিয়ে যায়। গলা শুকিয়ে যায়। বলে,—
শো-কেশ হাতড়ে আর মিথ্যে কেন কষ্ট পাবেন সার ? তার চেয়ে
আস্থন, আমাদের ষ্টক যেখানে থাকে—

দোকানে অনেক খদ্দের। তাদের সামনে রেখে কখনও পুলিশের
সঙ্গে কথা হয় না। দোকানের ভেতরে প্রায়-অন্ধকার ঘরে যেতে হয়
মণিমোহনকে। সেখানে গিয়ে একটি সিগারেট ধরাতে হয়। কয়েক
মুহূর্তের মধ্যে দোকানদার আসে। কাঁপতে কাঁপতে আসে ! বলে,—
ষ্টক আর কষ্ট ক'রে কেন দেখবেন ? নিন, এগুলো দেখুন।

কথার শেষে হাতের মুঠো খোলে দোকানদার। দেখা যায় এক

তাড়া নোট। পার্চমেন্ট কাগজের শুভ্রতা উঁকি দেয়। জল-রঙের চিত্র-বিচিত্র উঁকি মারে, দেখা যায়। সবুজ আর নীল রঙের আভাষ।

—কেস্টা আরও নষ্ট করছেন আপনি!

গম্ভীর স্বরে বলে মণিমোহন। সিগারেটের ধোঁয়া ছাড়তে ছাড়তে।

—আপনি আমার বাপ ছজুর। সবই বোঝেন, সবই জানেন। আমাদের মত দরিদ্র দেশে এক নম্বরের আসল মাল চালাতে গেলে দোকানের বাঁপ ফেলে দিতে হয়, পাততাড়ি গুটিয়ে ফেলতে হয়। আপনারা সবই জানেন, দু'নম্বর মালের চাহিদাই সর্বত্র। সার, আপনার মূল্যবান টাইম আর মিথ্যে মিথ্যে কেন নষ্ট করেন!

একটি চোখ বন্ধ ক'রে ফিসফিস শব্দে প্রশ্ন করে মণিমোহন। বলে,
—হাতে আপনার কত টাকা আছে?

—পুরোপুরি একশো সার।

—ওটাকে পুরোপুরি দেড়শো ক'রে দিন। অনেক টাকা লাভ আপনার, হাওড়ার এ তল্লাটের মধ্যে সবচেয়ে বেষ্ট পজিশনের দোকান আপনারই।

দু'একবার মাথা চুলকে অগত্যা দোকানদারকে আবার তহবিল খুলতে হয়। বের করতে হয় গুনে গুনে আরও পঞ্চাশ টাকা। পুলিশ বিদায়-কালে বলে,— আবার আসবো। তবে ভয় নেই আপনার!

মণিমোহনের উপার্জনের পথ যে কত ঘোরালো তা কেউ জানে না। পশ্চিমবাঙলার ডিটেকটিভ ডিপার্টমেন্টও নয়। চাকরী আর ব্যবসা না করেও বাঙলার মত বিচিত্র দেশে টাকা জোগাড়ের ভাবনা কি! কিছু সাহস আর খানিক বুদ্ধির জোর থাকলে টাকার অভাব হয় কখনও? যে দেশের হাওয়ায় টাকা উড়ছে সেই টাকার দেশে?

চাকরী ব্যবসা নেই, অথচ উপার্জন আছে প্রচুর। সপ্তপাকে নিজেকে না জড়িয়েও জ্বীলাভ—এই সব বেয়াড়া প্রবঞ্চনার আর্ট আয়ত্ত করতে হয়েছে মণিমোহনকে। অনেক কষ্টে। পৃথিবীর চোখে ধুলো দিতে পারে না ঘেঁ কোন লোক, যখন তখন। হয়তো এই মণিমোহনরাই পারে। যাদের জন্তু পুলিশ, তারাই পুলিশ সেজে ঘুরে বেড়ায়।

তবুও লোকে জানে নিজের পায়ে দাঁড়িয়ে আছে মণিমোহন। যেমন ক'রে হোক, যেখান থেকে হোক—কাঁড়ি কাঁড়ি টাকা রোজগার করছে। বুড়ো বাপকে বাঁচিয়ে রেখেছে। বিয়ের বয়স উৎরে গেছে, তবুও বিবাহ করলো না এখনও, এমনই সচ্চরিত্র সে!

অনঙ্গমোহনেরও তাই মণিমোহনের প্রতি অসীম স্নেহ। অভাবের সংসার, ছেলে বিয়ে করলো না, জয় করলো কাম-কামনা?

কত সময়ে অসময়ে অনঙ্গমোহনের মনে পড়ে যায় নিজের অতীত জীবনের কাহিনী। যৌবনের দিনগুলিতে এক ভিন্ন প্রকৃতির মানুষ ছিলেন তিনি। কোন রকম বাধা নিষেধ ছিল না, ছিল অর্থের স্বচ্ছলতা! আয়ের জন্তু ভাবতে হবে না, শুধু ব্যয় করে যাও যেমন মন চায়। নেশা আর নারীর জন্তু কি অসামান্য টাকাই না উড়িয়েছিলেন অনঙ্গমোহন! প্রথম শ্রেণীর স্কচ হুইস্কি ছাড়া অল্প কোন কিছু মুখে দিতেন না, পরমাসুন্দরী মার্গারেট ছাড়া অল্প কারও প্রতি ফিরেও তাকাতে না। তখন নাকি মানুষের জীবনে শৃঙ্খলা ছিল না, বেনিয়মের বাড়াবাড়িতে আত্মমগ্ন থাকতো স্বেচ্ছাচারের দল। আইনও ছিল না এত কড়া আর কঠোর। সবার উপরে ছিলেন অল্পপমার মত সর্ব্বসহা সহধর্ম্মিণী—যিনি কোন' দিনের জন্তু মুখ ফুটে কিছু বলেননি, প্রতীবাদ করেননি। অনঙ্গমোহনের পানাসক্তি আর মার্গারেটপ্রীতির কথা অল্পপমার অজানা ছিল না, সবই তিনি জানতেন তবুও তাঁর অনিন্দ্য

মুখের সরল হাসিটুকু কখনও মিলায়নি—যতদিন না তার অপমৃত্যু হয়েছে ! তাঁর তুলনায় মণিমোহনতো জিতেদ্রিয় !

অগ্নিদাহনে মৃত্যু হওয়ার পর কোথায় যে অল্পপমার রূপরাশি উবে গেল কে জানে ! কি বীভৎস সেই রূপ ! আগুনে পুড়ে কালো হয়ে যায় অল্পপমার দুধের মত দেহবরণ । মুখাকৃতির কি ভীষণ পরিবর্তন হয়ে যায় ! পুড়ে পুড়ে ছাই হয়ে যায় রাশি রাশি কেশের বোঝা । দেখলে যেন চেনা যায় না সেই অল্পপমাকে । কয়লার খনির ভেতর থেকে যেন টেনে হিঁচড়ে বের করা হয় তাঁকে ।

এখনও সেই দৃশ্য চোখে ভাসলে অনঙ্গমোহন কেমন নীরব, নিস্পন্দের মত হয়ে যান । অল্পপমার আত্মার মুক্তি হয়েছে কিনা কে বলতে পারে ! অপঘাতে মরণ বরণ করলে নাকি আত্মার মুক্তি বা শান্তিলাভ কোনটাই হয় না । স্বাভাবিক মৃত্যু নয়, শেষ-ডাকের সাড়া দেওয়া নয়,—যথেষ্ট আত্মহত্যা, খোদার ওপর খোদকারি যেন ! যৌবনের চপলতায় যার প্রতি কোনদিন অন্তরের দৃষ্টি দেননি অনঙ্গমোহন,—সেই নিজে কিনা মরণ ডেকে এনে নিজেতো চলেই গেলেন চিরকালের মত, স্বামীকেও তাঁর যেন মেরে রেখে গেলেন দুঃখশোকের জালায় ! সে দুঃখের লজ্জায় সমাজে মুখ দেখাতে পারেন না অনঙ্গমোহন । অল্পপমা নিজেতো শুধু অগ্নিদগ্ধ হননি, অনঙ্গমোহনের মুখটি পর্যন্ত চিরদিনের জন্য পুড়িয়ে দিয়ে গেছেন লোকচক্ষে ।

লোকে তখন দোষ দিয়েছিল অনঙ্গমোহনকে । তিনিই নাকি অবহেলায় হত্যা করেছেন নিজের স্ত্রীকে । প্রকারান্তরে তিনিই আসলে হত্যাকারী । তাই অল্পশোচনায় মর্ম্মাহত হয়ে থাকেন যেন । তাঁর সদা-অগ্রসর মুখে কেউ আর হাসির রেখা দেখতে পায় না ।

এক নাগাড়ে কয়েক মুহূর্ত্ত স্থির হয়ে থাকতে পারেন না । নিজেকে

বড় একা মনে হয়। কত দুর্ভাবনা আসে মনে। কত রকমের দুশ্চিন্তা!
ভাবেন, সেযুগের তুলনায় এযুগটা খুবই সংঘত! তাঁদের তুলনায়
মণিমোহনরা তো যুধিষ্টির!

রেডিওটা চালিয়ে দেবেন নাকি! তবুও যা হোক মনুষ্যকণ্ঠ শোনা
যাবে নিরাল। ঘরে। মানুষের মুখ দেখা যাক আর না যাক, মানুষের কথা
শুনতে পাওয়া যায়। বিরক্তি আর বিষণ্ণতায় যখন আচ্ছন্ন হয়ে পড়েন
অনঙ্গমোহন, তখন কত সময়ে রেডিওর কাঁটা ঘুরিয়ে ঘুরিয়ে ধরেন বিবিসি,
রেডিও ফিলাডেল্ফিয়া, সিড্‌নী, ড্যাভেণ্টি, পিটস্‌বার্গ কিংবা প্যারী স্টেশন।

সর্ট্‌ ওয়েভে ধরেন।

বহু দূরের সমুদ্রকূল থেকে ভেসে-আসা-কথা অনঙ্গমোহন বোঝেন
না, কেন না সেই ভিন্দেদী ভাষায় নেই তাঁর দক্ষতা। কিন্তু গানের বা
বাগ্যযন্ত্রের সুর, হোক না বিদেশী, শুনতে বেশ লাগে। ঘরের নিরবিচ্ছিন্ন
শুষ্কতা ভঙ্গ হয়। অন্তরের এক কক্ষে নির্জনবাসে থেকেও সমস্ত দুনিয়ার
সঙ্গে যোগাযোগ রক্ষা করা যায়। কোন খবর না রেখেও জানা যায়
গোটা দুনিয়ার খবরাখবর। নিজের মনের কাছে স্বীকার করেছেন
অনঙ্গমোহন, স্থবিরের কাছে, বার্ককোর সময়ে রেডিও নিঃস্বার্থ সহচর।
সুখের দুঃখের বন্ধু। মানুষের কথায় শুধু সুর, কিন্তু গানের ছন্দ আছে।
উত্থান আর পতন আছে। তান, লয় আছে। রেডিও আর চুপ্‌কট!
বই আর সংবাদ পত্র—যার কেউ নেই তার এরা আছে।

বেতার, ধোঁয়া আর কাগজ তাই এত বেশী প্রিয় অনঙ্গমোহনের।
তুমি স্বৈচ্ছায় তাদের ত্যাগ না করলে, তারাও তোমাকে পরিত্যাগ
করবে না। চেতনাসম্পন্ন মানুষের মত দুর্দিনে ঠকাবে না। তোমার
সুখে অংশ গ্রহণ করবে, দুখের জালা ভুলিয়ে দেবে।

রেডিওর কাছে ধীরে ধীরে এগিয়ে গেলেন অনঙ্গমোহন।

এ, সি কারেন্ট, তাই যন্ত্রটি গরম হ'তে সময় নেয় কিছুক্ষণ। অনঙ্গ-মোহন ঝুঁকে পড়েন, কাঁটা ঘুরিয়ে চলেন এদিক সেদিক। আন্তর্হুনিয়ার অল্ড ওয়েড্ সেট। কাঁটা ঘোরাতে ঘোরাতে কোন্ এক দেশ ধরা পড়ে কে জানে! কান পেতে থাকতে থাকতে শুনতে পাওয়া যায়, রেডিও ফিলাডেল্ফিয়ার নাম। নিমেষের মধ্যে যন্ত্রসঙ্গীত শুরু হয়,—হাওয়াইয়ান গীটার আর পিয়ানো-গ্র্যাফোডিয়নের দ্বৈত শব্দে কি এক গ্রাম্য সঙ্গীতের স্বর বাজতে থাকে।

রেডিও চালু হ'তে ফিরে দাঁড়াতেই দেওয়ালের আয়নায় সহসা চোখ পড়লো অনঙ্গমোহনের। অনেক দিন নিজেকে দেখেননি, হঠাৎ দেখতে পেতেই চট ক'রে এগিয়ে গেলেন আয়নার সামনে।

মুখখানা কি পুড়ে গেছে! কালি মাখানো! কপালে চিস্তার সদাম্পষ্ট কতগুলি রেখা পড়েছে! মাথার ছ'পাশের চুলে পাক ধরেছে! কোটরে কি ঢুকে গেছে দুই চক্ষু! দারিদ্র্যের হতাশ দৃষ্টি সেই চোখে, দেখলেই বোঝা যায়! অনঙ্গমোহনের মুখ থেকে স্বতঃস্ফূর্ত কথা বেরোয়। বলেন,—দি ওল্ড্ আর ফুলস্, প্যারাসাইট্‌স্, হাফ-ডেড্!

হারিয়ে-যাওয়া, ধরচা-হয়ে-যাওয়া লুপ্তশক্তি আর কি কখনও পুনরুদ্ধার করা যায়! ষাটের কোটায় পা দিয়ে স্বাস্থ্য-উদ্ধারের আশা বৃথা—যখন অত্যাচারে আর অনিয়মে একেবারে ভেঙ্গে পড়েছে দেহ। হাতের মুঠো শক্ত করতে চেষ্টা করেন অনঙ্গমোহন, কিন্তু কেন কে জানে, পারলেন না! অত্যধিক ছইস্কি খেয়েছেন বয়সকালে, এখন তাই যন্ত্রের দোষ হয়েছে। অনঙ্গমোহনের দেহাকৃতিও কেমন যেন হলুদ আকার হয়ে যাচ্ছে। চোখ দুটোতেও হলদে আভা। মদ খেয়ে খেয়ে দাঁতগুলো সব প'ড়ে গেছে একে একে। তাই নকল দাঁত। ঝাপসা দেখেন চোখে। নার্ভের দোষ, তাই সোজা দাঁড়িয়ে থাকতে থাকতে থরথরিয়ে কাঁপতে থাকেন।

—ভিয়েনে হুজুর আজ এলাহি বন্দোবস্ত !

ঘরের বাইরে থেকে কথা বললে শ্রামাপদ । দরজার আড়াল থেকে !

ভেবেছিলেন এ কথার কোন' উত্তর দেবেন না । আরাম কেদারায় বসলেন অনঙ্গমোহন । অর্ধেক পুড়ে-যাওয়া চুরুটের ছাই ফেললেন পাশের ছাইদানে । বললেন,—তুমি দেখে এলে নাকি ?

ঘরের আলোর সামান্য একটুখানি দালানে পড়েছে—দরজা ভেদ করে ঘরের বাইরে পৌঁছেছে ! সেই অল্প আলোয় উবু হয়ে ব'সে জলন্ত ষ্টোভে আরও পাম্প্ করছিল শ্রামাপদ । সাপের ফোসফোসানির মত একটানা শব্দ শোনা যায় । শ্রামাপদের আশপাশে রান্নার সরঞ্জাম । চাকি আর বেলুন । এ্যালুমিনিয়মের ছোট কড়াই । ময়দা আর মসলা । শাকশজীর ঝুড়ি । হাঁসের ডিম এক জোড়া । কয়েকটা পেঁয়াজ ।

—হ্যাঁ হুজুর, ভিয়েনে গিয়ে যে দেখে এলাম আমি । এখনও অনেক বিলম্ব ।

শ্রামাপদ কথা বলতে বলতে পাম্প্ ক'রে যায় ঘন ঘন । গমগমে আঁচ চাই । এখন থেকে জলবে বহুক্ষণ । পাম্প করতে করতেই বললে,—কার্টলেটের চিংড়ী এখন সব খোড়া হচ্ছে । মাংস নামতে নামতে যার নাম রান্নির দশটা !

—তাই না কি ?

একটা কোন' কথা বলতে হয় তাই যেন বললেন অনঙ্গমোহন ।

পাম্প্ করা শেষ হ'তে ষ্টোভে কড়াই চাপায় শ্রামাপদ । হয়তো ভিজে আছে এখনও, তাই হয়তো কড়াই শুকোতে সময় নেয় ! শুকিয়ে গেলেই সরষের তেল ঢালবে—ভাজাভুজি আর সাঁতলানোর কাজ ক'টা আগেভাগে মেরে নেবে । শ্রামাপদ বললে,—কচি পাঁঠাতো আর নয়

হজুর, যে চাপাতে না চাপাতে সেক্স হয়ে যাবে ! খাসির মাংস আনিয়েছেন বাবুরা ! মণখানেক । নামতে নামতে যার নাম রাত দশটা এগারোটা !

কত কতদিন ভালমন্দ কিছু মুখে পড়েনি । অনঙ্গমোহন আরাম কেদারায় এলিয়ে পড়লেন । আর পারছেন না সোজা ব'সে থাকতে । কোমর কনকনিয়ে উঠছে । পা দু'টো ঠকঠক কাঁপছে । বললেন,—সদরে লোকজন এসেছে দেখলে শ্যাম ?

—তা আর আসেনি হজুর ! বাবুরা ভাত ছড়াচ্ছেন, কাকের অভাব হবে ? কোঁটিয়ে এসেছে সব ।

—কে কে এসেছে দেখলে ?

শ্যামাপদ মুখে একটা শব্দ করলে । হতাশার কথা শুনে মাহুশ যেমন চুক চুক শব্দ করে । বললে,—সে আর বলবেন না হজুর । চন্দনপুরের যত সব গুঁচাগুলো এসে জড়ো হয়েছে !

সেযুগে সংযম না থাকতে পারে, থাকতে পারে উচ্ছৃঙ্খলা পুরোমাত্রায়, কিন্তু তখনকার যুগে রুচি ব'লে একটা পদার্থ ছিল । মনে মনে সেযুগ আর এযুগ খতিয়ে নেন অনঙ্গমোহন । তখনকার দিনে অভাব ছিল না, তাই রুচির বিকার ছিল না । এখন ঘরে ঘরে অভাব, তাই যেন এই অভাবীদের স্বভাব বলতে কিছু নেই । এখন রুচিবাগীশ নেই বললেই হয় । হাজার কেন লক্ষে একটা যদি চোখে পড়ে ! তখনকার বাবুরা মিশতেন না যার তার সঙ্গে, আর এখন সকলের সঙ্গে মেলামেশা কর'তে হয় ! রেডিও মারফৎ অনঙ্গমোহনের সারা দুনিয়ার সঙ্গে চেনাজানা । কোথায় কি রকম হাওয়া বইছে, সবই তিনি জানেন । মনে মনে বিষাদ-হাসি হাসলেন তিনি । ভাবলেন, এক মনোহর ও সুদৃশ্য অট্টালিকা—যার ওপরতলা আত্মগর্বে একেবারে ধ্বসে যাওয়ায় নীচের তলার বাসিন্দারা মাথা তুলেছে । হাওয়া-ঘরের হাওয়া খাওয়া চলবে না আর ! কুলশীলের

—ভিয়েনে হজুর আজ এলাহি বন্দোবস্ত !

ঘরের বাইরে থেকে কথা বললে শ্রামাপদ । দরজার আড়াল থেকে !

ভেবেছিলেন এ কথার কোন' উত্তর দেবেন না । আরাম কদারায় বসলেন অনঙ্গমোহন । অর্ধেক পুড়ে-যাওয়া চুরুটের ছাই ফেললেন পাশের ছাইদানে । বললেন,—তুমি দেখে এলে নাকি ?

ঘরের আলোর সামান্য একটুখানি দালানে পড়েছে—দরজা ভেদ করে ঘরের বাইরে পৌছেছে ! সেই অল্প আলোয় উবু হয়ে ব'সে জলন্ত ষ্টোভে আরও পাম্প্ করছিল শ্রামাপদ । সাপের ফোসফোসানির মত একটানা শব্দ শোনা যায় । শ্রামাপদের আশপাশে রান্নার সরঞ্জাম । চাকি আর বেলুন । এ্যালুমিনিয়ামের ছোট কড়াই । ময়দা আর মসলা । শাকশজীর ঝুড়ি । ইসের ডিম এক জোড়া । কয়েকটা পেঁয়াজ ।

—ই্যা হজুর, ভিয়েনে গিয়ে যে দেখে এলাম আমি । এখনও অনেক বিলম্ব ।

শ্রামাপদ কথা বলতে বলতে পাম্প্ ক'রে যায় ঘন ঘন । গমগমে আঁচ চাই । এখন থেকে জলবে বহুক্ষণ । পাম্প করতে করতেই বললে,—কার্টলেটের চিংড়ী এখন সবে খোঁড়া হচ্ছে । মাংস নামতে নামতে যার নাম রাত্তির দশটা !

—তাই না কি ?

একটা কোন' কথা বলতে হয় তাই যেন বললেন অনঙ্গমোহন ।

পাম্প্ করা শেষ হ'তে ষ্টোভে কড়াই চাপায় শ্রামাপদ । হয়তো ভিজে আছে এখনও, তাই হয়তো কড়াই শুকোতে সময় নেয় ! শুকিয়ে গেলেই সরষের তেল ঢালবে—ভাজাভুজি আর সাঁতলানোর কাজ ক'টা আগেভাগে মেরে নেবে । শ্রামাপদ বললে,—কচি পাঠাতো আর নয়

হজুর, যে চাপাতে না চাপাতে সেক্ষ হয়ে যাবে ! খাসির মাংস আনিয়েছেন বাবুরা ! মণখানেক । নামতে নামতে ঘার নাম রাত দশটা এগারোটা !

কত কতদিন ভালমন্দ কিছু মুখে পড়েনি । অনঙ্গমোহন আরাম কেদারায় এলিয়ে পড়লেন । আর পারছেন না সোজা ব'সে থাকতে । কোমর কনকনিয়ে উঠছে । পা দু'টো ঠকঠক কাঁপছে । বললেন,—সদরে লোকজন এসেছে দেখলে শ্যাম ?

—তা আর আসেনি হজুর ! বাবুরা ভাত ছড়াচ্ছেন, কাকের অভাব হবে ? কোঁটিয়ে এসেছে সব ।

—কে কে এসেছে দেখলে ?

শ্যামাপদ মুখে একটা শব্দ করলে । হতাশার কথা শুনে মামুষ যেমন চুক চুক শব্দ করে । বললে,—সে আর বলবেন না হজুর । চন্দনপুরের যত সব গুঁচাগুলো এসে জড়ো হয়েছে !

সেযুগে সংযম না থাকতে পারে, থাকতে পারে উচ্ছৃঙ্খলা পুরোমাত্রায়, কিন্তু তখনকার যুগে রুচি ব'লে একটা পদার্থ ছিল । মনে মনে সেযুগ আর এযুগ খতিয়ে নেন অনঙ্গমোহন । তখনকার দিনে অভাব ছিল না, তাই রুচির বিকার ছিল না । এখন ঘরে ঘরে অভাব, তাই যেন এই অভাবীদের স্বভাব বলতে কিছু নেই । এখন রুচিবাগীশ নেই বললেই হয় । হাজার কেন লক্ষে একটা যদি চোখে পড়ে ! তখনকার বাবুরা মিশতেন না যার তার সঙ্গে, আর এখন সকলের সঙ্গে মেলামেশা কর'তে হয় ! রেডিও মারফৎ অনঙ্গমোহনের সারা দুনিয়ার সঙ্গে চেনাজানা । কোথায় কি রকম হাওয়া বইছে, সবই তিনি জানেন । মনে মনে বিষাদ-হাসি হাসলেন তিনি । ভাবলেন, এক মনোহর ও সুদৃশ্য অট্টালিকা—ঘার ওপরতলা আত্মগর্বে একেবারে ধ্বসে যাওয়ায় নীচের তলার বাসিন্দারা মাথা তুলেছে । হাওয়া-ঘরের হাওয়া খাওয়া চলবে না আর ! কুলশীলের

বড়াই শিকের ভূলে রাখতে হবে। আবার মনে মনে হাসলেন অনঙ্গমোহন। যত সব গুঁচাদের আসার কথাটি বার বার মনে পড়ে তাঁর। ভাগ্য ভাল যে পৃথিবীতে নীচুতলার মানুষের সংখ্যাই সবচেয়ে বেশী। অনঙ্গমোহন নিজেও এতকাল ছিলেন ঐ ওপরতলায়। আধিক অস্থূলতার দরুণ এখন তিনি বাধ্য হয়ে নীচে নেমেছেন। বিলাস আর বাবুয়ানি কাকে বলে যেন ভুলে গেছেন। পৃথিবীতে অনঙ্গমোহনদের দলই ভারী, সেই আনন্দে মনে মনে তিনি হাসেন কত সময়ে। অনঙ্গমোহন এখন স্থির সিদ্ধান্তে পৌঁছেছেন, পৃথিবীতে মাত্র দুটি জাতি আছে; অত্যাচারী আর অত্যাচারিত। মানুষের জাত-কুল যুচে গেছে এখন, মুছে গেছে আসল জাতি-কৌলীণ্য।

কে কাকে অত্যাচার করে কে জানে! অনঙ্গমোহন নিজেকে অত্যাচারিতদের দলে ফেলেছেন! তাঁর বার্কক্য আর দারিদ্রের স্বযোগে কে যেন তাঁকে অত্যাচার ক'রে চলেছে দিনের পর দিন। জমিদারী হাতছাড়া হয়ে যাচ্ছে, নিজের বয়সটাও হাতছাড়া হয়ে গেছে,—সঙ্গে হারিয়েছে শরীরের শক্তি আর সামর্থ্য। যেমন প্রকট অর্থাভাব, তেমনি দুর্বল দেহ। টাকা আর স্বাস্থ্য না থাকলে মানুষ নাকি আর মানুষ থাকে না, অমানুষ হয়ে যায়।

কি ঘেমা, কি ঘেমা! চন্দনপুরের যত সব গুঁচা আর অখাণ্ডগুলো নাকি আজ সদরের আসরে জমা হয়েছে—এখনকার চন্দনধামের বাবুদের তারাই নাকি বন্ধু, সহচর, সোদরপ্রতিম।

ষ্টোভের 'পরে চাপানো কড়াই তেতে ওঠে। ষ্টোভের একটানা ফোঁস-ফোঁসানি শুরু হয়ে গেছে। গরমকড়ায় সরষের তেল ঢালতে ঢালতে শ্রামা-পদ বলে,—হুজুর, হাঁসেরভিমের কি তৈরী করি বলুন? কি খাবেন আজ? ঝাল না ঝোল? নাকি খাওয়ার পাতে গরম গরম অম্লেট খাবেন?

—যা হয় কর' একটা কিছু ।

অনঙ্গমোহন নিশ্চুহের মত কথা বললেন ।

—তবে হজুর ঝালই বানাই । দাদাবাবু ঝাল খেতে খুব ভালবালেন ।

শ্রামাপদ কড়ায় ভাজাভুজির আলু-বেগুন ছাড়ে আর বলে ।

—মণিমোহনের তো এখনও পাত্রা নেই ! গেল কোথায় সে ?

অনঙ্গমোহন যেন নিজেকেই প্রশ্ন করলেন ? বললেন,—শ্রাম, সদরের কোন' ঘরে মণি নেই তো ? দেখেছো তুমি ?

কড়ায় ঝাঁজরি চালায় শ্রামাপদ । সরষের তেলের ঝাঁজে বার কয়েক কেশে নিয়ে বলে,—সদরে এখন যায় কার সাধ্য হজুর ? তবে লোক মারফৎ খোঁজ নিয়েছি, দাদাবাবু সদরে নেই । আমাদের দাদাবাবু সেখানে যাওয়ার পাত্রই নয় ।

—তবে গেল কোথায় ?

ঘরের ভেতর থেকে কথা ভেসে আসে । ষ্টোভের ফৌস ফৌস শব্দ ছাপিয়ে ভেসে আসে কথা ।

ঝাঁজরি ওলটায় পালটায় শ্রামাপদ । আলু-বেগুন উলটে উলটে দেয় । বলে,—দাদাবাবু হয়তো তাসের আড্ডায় গেছেন । তাসে একবার বসলে তো দাদাবাবুর কিছুই খেয়াল থাকে না !

—আমার ভয় হয়, মণিমোহন যেন কোন' শুভাকাঙ্ক্ষী আত্মীয়-বন্ধুদের পাক্কায় প'ড়ে মদ-ফদ না ধরে ! এ্যাডিক্টেড্ হ'লেই যে ফ্যাসাদ !

অনঙ্গমোহন কথা বলেন ভীত, সঙ্গন্তের মত । তাঁর চোখের দৃষ্টিতে ফোটে ভয়ানকতা । তিনি যে জানেন মদ খাওয়ার অভ্যাসটা পাকাপাকি করলে ঝাঙালীর ঘরের স্বাধীনতার ব্যাঘাত হয় ! সারা জীবনের অভিজ্ঞতা

থেকে জেনেছেন,—বাঙালী জানে না মত্তপান করতে, তাই খাতেও সহ হয় না, ধোপেও টেকে না। অনঙ্গমোহন ঠেকে আর দেখে শিখেছেন, বাঙালীর সব কিছুতেই অতিমাত্রা। হাসিও যত কান্নাও তত। বজায় রাখতে পারে না, চালিয়ে যেতে পারে না, আরস্তের সঙ্গে সঙ্গেই শেষ হয়ে যায় ফুলঝুরির মত।

বয়সকালে লজে আর ক্রাবের লাক্ আর ডিনার পার্টিতে অনঙ্গমোহন দেখেছেন কত বিদেশী আর বিদেশিনীকে—যারা সস্তর পেরিয়েছে, তবুও বুড়িয়ে যায়নি! যেমন তাজা মন তেমনি সবল স্বাস্থ্য তাদের। হাসিতে উচ্ছল সদাঙ্গণ। হয়তো সেই মরণের শেষ মুহূর্তেও ওদের ঐ হাসি, মুখ থেকে মিলায় না।

—দাদাবাবু আমাদের তেমন ছেলেই নয় হজুর, যে মদ ধরবে!

বললে শ্রামাপদ। তেলের ঝাঁজে চোখ দুটোকে বন্ধ করে ফেললে। ঝাঁজটা যেন আর চোখে সহ হয় না কোন মতেই! চোখ দুটোকে ডান বাহুতে চেপে ধ'রে শ্রামাপদ বলে,—আপনি ব্যস্ত হচ্ছেন কেন? সারাটা দিন কলকাতায় হাড়-ভাঙ্গা খাটুনি খেটেছেন, এখন হয়তো তাই খানিকক্ষণের জন্য তাস-ফাস খেলছেন কোথাও।

বৈশাখের উতল হাওয়া চলেছে। রান্নার স্নগন্ধ বয়ে আসে বাতাসে থেকে থেকে।

মাংস-রান্নার উগ্র লোভনীয় গন্ধ। হয়তো ভিয়েনের কড়ায় চপ কিংবা কাটলেট চেপেছে। পেরোজ আর ভিমের মেশানো গন্ধ আসে হাওয়ায়।

কিছুক্ষণ আগেও এই গন্ধ নাকে পেয়েছিলেন অনঙ্গমোহন। তখন তাঁর অতৃপ্ত রসনা যেন চেয়েছিল আশ্বাদন, কিন্তু এখন যেন আর ভাল লাগছে না। অকুচি ধরছে। অনঙ্গমোহন এখন যেন এক দুরারোগ্য ব্যাধির রোগী! একমাত্র ছেলের মদ ধরার ভয় যেন তাঁর কাছে এখন

মৃত্যুভয়ের সামিল। অরুচি ধরেছে তাই মাংসগন্ধে। চপ আর কাটলেটের লোভনীয় উগ্রগন্ধে।

মণিমোহন যে অনঙ্গমোহনের শেষ-বয়সের ঝাপসা চোখের মণি। সে যদি মদ ধরে! তাহঁতো এত দুশ্চিন্তা তাঁর। কে চালাবে তখন? চলবে কোথা থেকে? কলকাতায় কাকে পাঠাবেন তখন, জুয়া খেলতে, ঘোড়দৌড়ের বাছা বাছা ঘোড়া ধরতে! মণিমোহন এখন একটা পাকা জুয়াড়ী হয়ে উঠেছে শুধু ঐ অনঙ্গমোহনের সহযোগ আর অহুপ্রেরণায়! তবুও এখনও ঘোড়ার নাম অনঙ্গমোহনই বলে দেন, বাতুলে দেন রেশু খেলার কাঁক-ফোকর। কলকাতার রেশের মাঠের ঘোড়াদের কুলজী-কোণ্ঠী তিনি যতটা জানেন, হয়তো বা ঘোড়ার মালিকরাও জানেন না। রেশুড়ে ঘোড়াদের কুলপঞ্জিকা অনঙ্গমোহনের নখদর্পণে। জকিদের নাম কণ্ঠস্থ।

কলকাতা থেকে কত দূরের চন্দনপুরে ব'সে ব'সে তিনি বিজয়ী ঘোড়াদের নামগুলি নাকি আগেভাগে ভবিষ্যদ্বাণীর মত ব'লে দিতে পারেন। তারই একমাত্র ওয়ারিশন্ মণিমোহন, সেও বড় একটা লোকমান দিয়ে আসে না সচরাচর। অনঙ্গমোহন খেলতে যা টাকা দেন, সেই টাকার দ্বিগুণ ফেরৎ দিয়ে দেয় হাতে হাতে।

শুধু মাঠের খেলা নয়, ক্রীড়ার ঘরের ভেতরের খেলার ফন্দী-ফিকিরও ছেলেকে শিখিয়েছেন অনঙ্গমোহন। কত দিন বলেছেন,—জুয়া খেলা ভাগ্যের খেলা নয়,—মাথার খেলা! ঠিক মাথাটি খেলিয়ে খেলতে পারলেই জয় স্থনিশ্চিত। সীওর উইন!

টেবিল-মণি দিয়ে তেতাস্ খেলায় বসতে হ'লে কি কি কায়দা আয়ত্ত করতে হয়, তাও বুঝিয়ে দিয়েছেন। বলেছেন,—এ খেলায় বিরুদ্ধপক্ষদের মুখের দিকে দেখতে হয়। কার হাতে কেমন তাস, ক'খানা টেকা বা

ক'জন রাণী আর ক'টা গোলাম চোখ দেখলেই বোকা যায়। খেলোয়াড়দের মুখে নাকি এক সাইকোলজিক্যাল এক্ফেক্টের ছাপ পড়ে। মুখ দেখে বুঝতে না পারো, ব্লাইণ্ড কল্ড শুনেও যদি বুঝতে না পারো, তা হ'লে খেলতে যাওয়ার সময় সার্ট, পাজাবীর বদলে কোর্ট প'রে খেলতে যেও। কোর্টটি হওয়া চাই ওপেন ব্রেস্ট, অর্থাৎ বুক-খোলা। কোর্টের ভেতরে থাকবে দুটি ইনসাইড পকেট নয়, পকেটের জায়গায় আঁটা থাকবে দুখানি ছোট ছোট আয়না। ডানপাশের খেলোয়াড়ের হাত দেখতে চাওতো বামপাশের আয়নাটি দেখবে, আর বামপাশের হাত দেখতে হ'লে ডান দিকের আয়না আছে, দেখে নাও। তারপর হাত বুঝে নয় এগিয়ে যাও কিংবা দাঁড়িয়ে পড়'।

এ সব প্যাচ পুরানো হয়ে গেছে মনিমোহনদের সময়ে। এই চোখে ধোঁকা দেওয়ার সেই সেকলে দিন আর নেই। জুয়া খেলায় ব'সে মনিমোহন বুঝেছে, ঠিকঠাক খেলতে হ'লে সোজা পথে না খেললেই মুশকিল? একবার দুর্গাম ছড়ালে দল থেকে তাড়া খেতে হয়। দলে আর পাত্তা পাওয়া যায় না। অগ্রায় পথ অবলম্বন করলে কত সময়ে সত্যি সত্যি মারধোর খেতে হয়। কথা কাটাকাটি থেকে হাতাহাতিতে পৌঁছে যায় কত সময়ে। শুধু হাতে যখন কুলোয় না তখন চলে ছোরাছুরি।

এত বেশী ধৈর্য নেই মনিমোহনের যে ব'সে ব'সে খেলবে ঘণ্টার পর ঘণ্টা, কখন বিশ-পঁচিশ টাকা হাতে আসবে সেই আশায় থাকবে।

কলকাতা তথা বাঙলা দেশের পথে-ঘাটে হাটে-বাজারে যখন এত খত মূর্খ নরনারী ছড়ানো আছে তখন জুয়ার আড্ডায় গিয়ে মাথা ঝাটানোর দরকার? এত কষ্টের কি বা প্রয়োজন?

ট্রাম বাস আছে কলকাতায়। শহরতলীতেও আছে মোটরবাস।

পালা-পার্কিং আর পরব-উৎসবের দিনে ট্রামে আর বাসে মাথা গলানোর সাধ্য থাকে না কারও, এত বেশী ভিড় ! শ্রামবাজার থেকে দক্ষিণেশ্বরে বাস ছুটেছে । দমদম-পাতিপুকুরের বাস চলেছে । এই বাস সোজা চলে গেছে ইটাগাপুর । শ্রামবাজার থেকে বনগ্রামের বাস আছে । ওদিকে দক্ষিণে ছুটেছে বাস বালীগঞ্জ স্টেশন, চলেছে খিদিরপুর, মোমিনপুর আর ঠাকুরপুকুরের বাস । শিয়ালদা আর হাওড়ার রুটেও বাস ছুটেছে । বরানগর থেকে টালিগঞ্জ, বেহালার বাসও আছে । ট্রামের কথা ধরলাম না ।

মণিমোহন বাঙলা তারিখ দেখে নেয় দেওয়াল-পঞ্জিকায় ।

ইংরেজী তারিখটা যদিও বা কোন' রকমে মনে রাখা যায়, বাঙলা তারিখের ভুল হয় প্রত্যহ । মনে থাকে না । মনে পড়ে না । কেন' কে জানে !

ক্যালেন্ডারের তারিখে দেখে, লাল অক্ষর না কালো অক্ষর ।

ছুটির দিন না কাজের দিন ? তাই দেখে মণিমোহন । যদিও সরকারী ছুটির লাল অক্ষর না থাকলেও বারো মাসের মধ্যে হিন্দু আর মুসলমানী এত তেরো পার্কিং থাকে, যাদের উল্লেখ করতে হ'লে আমাদের দেওয়াল-পাঁজীর সব সংখ্যাই লাল অক্ষরে ছাপতে হয় ।

সংক্রান্তি আর অমাবস্তার দিন লাল অক্ষরে লেখা থাকে না, মাসের মধ্যে এই দিনগুলিতেও বাসে বড় কম ভিড় হয় না । মনে হয় সত্যিই বুঝি বা ছুটির দিন । বাঙলা বছরের প্রথম দিন থেকে ধরলে পয়লা বোশেখের দিনও সরকার ছুটি দেন না । সেদিনেও ঐ কালো অক্ষর । শুধু বৈশাখেই কতগুলি উৎসব !

ট্রামে আর বাসে যেন মোছব লাগে, মানুষ কত প্রকারের হয় তারই একজিবিশনের । আমাদের জাতে কত রকমের মানুষ আছে

ভয়ে আর ভাবনায় নাতনীদের জড়িয়ে থাকেন, পাছে তারা বা তাদের গলার হার, কানের তুল চুরি হয়ে যায়।

মণিমোহন দাঁড়িয়ে থাকে ঠিক বকধার্মিকের মত। মনে মনে হাসে সে।

কত আর সামলাবে বুড়ি? কতকণ সামলাবে? কাকে সামলাবে? নিজেকে না নাতনীদের? মণিমোহনের চোখ দুটি মধ্যে মধ্যে বেশ লোভাতুর হয়ে ওঠে। এক ছড়া সোনার হার, আজকের এই দুদিনে, আনবে অন্ততঃ শতখানেক টাকা। নিমিষের মধ্যে সোনার দোকানে বিক্রী হয়ে যাবে। এর তুলনায় জুয়ায় ব'সে অর্থোপার্জন সত্যিই কষ্টকর। অনেক বেশী ধৈর্য আর সততার প্রয়োজন হয় সেখানে। কে এত কষ্ট করে খামাকা?

দক্ষিণেশ্বরের টায়মিনাসে বাস পৌছে যায়। দাঁড়িয়ে পড়ে। কাতারে কাতারে মানুষ—শ্রীরামকৃষ্ণের লীলাভূমি আর সাধনপীঠ পঞ্চবটী দেখতে চলেছে। মা ভবতারিণীর চরণামৃত পান করতে চলেছে। ঈশ্বর শিব স্পর্শ করবে, গঙ্গাজল মাথায় ছোঁয়াবে, মায়ের মন্দির প্রদক্ষিণ করবে, দেখবে সেই বিখ্যাত ভগ্নমূর্তি!

ভবতারিণীর মন্দিরের ছয়োরে শ'য়ে শ'য়ে নরনারী। কে কাকে দেখে, কে কাকে রাখে। কোনরকমে শুধু একবার দর্শনলাভ, মায়ের চরণদর্শনলাভ—সেই চরম মুহূর্তের সুযোগ নেয় মণিমোহন। মন্দিরের দেওয়ালে ঝুলানো লেখা, কেউ পড়ে না। “পকেটমার হইতে সাবধান” হবে না মাতৃদর্শন করবে এই ঠাসাঠাসি আর গাদাগাদীর মধ্যে?

বুড়ী ঠাকুমা নিজেকে সামলাবেন না নাতনীদের! দর্শনের পর প্রাঙ্গণে নেমে মনে পড়বে নাতনীদের। তারা তখন হাত দেবে গলায় আর কাণে। হাতের পরশে দেখবে যেগুলি ছিল, সেগুলি ঠিক আছে না

নেই। ঠাকুমা তখন বলবেন,—মরতে মরতে বেঁচে ফিরেছি। মাহুকের চাপে যেন শ্বাস রোধ হচ্ছিল।

একজন নাভনী দেখবে, ঠিক আছে তার কানের তুল আর কণ্ঠহার। একজন দেখবে তুল দু'টো ঠিক আছে। গলায় হাত দিয়ে গলার হার আজ খুঁজে পাবে না। কিশোরী-কুমারী তখন ভর-কাঠ কণ্ঠে বলবে,—আমার গলার হার ?

—সে কি লা পোড়ারমুখী ? হতচ্ছাড়ি ! খুইরে যে মরলি, তোর বাপ মার কাছে আমি এখন মুখ দেখাবো কোন্ লজ্জায় ! ও মা কি হবে গো, কে কোথায় আছে গো ?

প্রায় কালার সুরে কথাগুলি বলতে বলতে ভূমিতে তখন বসে পড়বেন বুড়ী ঠাকুমা। ছোটখাটো একটি ভীড় জ'মে যাবে তৎক্ষণাৎ। কেউ কিছুই করতে পারবেন না, তবুও ওপরপড়া হয়ে প্রসন্ন করবে একের পর একজন।

কেউ বলবে,—সোনা ছিল কতটা ? "ক' ভরি ?

ঠাকুমা বলবেন,—মাথা চাপড়াতে চাপড়াতে বলবেন,—ভরি ফরি নয়। আমরা গরীবগরবা, এই সাড়ে দশ আনাটাক সোনা ছিল !

সেই বাস তখন ফিরে চলেছে। দক্ষিণেশ্বর টু শ্রামবাজার।

বাসের কন্ডাক্টর হাঁকছে, যাত্রীদের ডাকছে। একেবারে পুরোপুরি ভর্তি না হলে বাস ছাড়বে না ! শুধু হর্ণ বাজাবে। লোক তুলবে।

মণিমোহন তখন বাসের কাছাকাছি, রাস্তায় দাঁড়িয়ে মুখের তাজা সিগারেটে দেশলাই ধরায়। তার ট্যাঁকে সোনার হার, পাঁচ পাকে জড়ানো—তবুও বিঁধছে যেন কোমরে। সিগারেট শেষ হ'লেই উঠে পড়বে ফিরতি বাসে। শ্রামবাজার থেকে যাবে সোনাপটিতে। বড়বাজারে।

দালানে ষ্টোভ জ্বলছে সঁা সঁা শব্দে । এতক্ষণে যেন গমগমে আঁচ হয়েছে । প্রথমে ছিল ফিকে নীল রঙ আগুনের । তারপর হয় হলুদ রঙ । তারপর এখন ঘন লাল রঙ হয়েছে ।

—কি চাপিয়েছো শ্রাম । উলুনে কি চ'ড়লো !

চোখে অস্পষ্ট দৃষ্টি । দালানে আলো-আঁধার । ষ্টোভের আগুনের আলোয় কি আর তেমন আলো হয় ! প্রদীপের নীচেই যে অন্ধকার !

—ভাজা চাপিয়েছি হুজুর । হয়ে এসেছে । তারপর ডাল চাপাবো ।

—তুমি যে বললে শ্রাম, ভিয়েন থেকে কিছু রান্না আনবে, তার কি করলে !

অনঙ্গমোহন যেন ঈষৎ কৌতূহলের সঙ্গে প্রশ্ন করলেন । ষ্টোভের কাছাকাছি এগিয়ে গেলেন কথা বলতে বলতে ।

কড়াই থেকে আলু-বেগুন ভাজা নামায় শ্রামাপদ । অতি সাবধানে বাঁজরি নাড়াচাড়া করে । যদি প'ড়ে যায় দালানের মেঝেয় ! তেলের গরম কড়াই নামিয়ে রাখতে রাখতে বললে,—সে হুজুর ঠিক আছে । রান্নাবান্না এখনও সব চাপেনি । মাংসটা চেপেছে এতক্ষণে । হালুইকর-দের পান-দোস্তা খাওয়ার পরসাত দিয়ে দিয়েছি আমি ।

—কোন্ হালুইকরের দল এসেছে ।

—হারাণ হালুইকরের দল । এ বাড়িতে হারাণ ছাড়া আমিতো কাকেও কখনও দেখতে পাইনি ।

কথা বলতে বলতে শ্রাম আবার পাম্প্ করে ষ্টোভে । ডাল চাপাতে হবে, জোরালো আঁচ চাই ।

—হ্যাঁ হারাণই আসে আমাদের কাজেকর্মে । আগে ছিল হারাণের বাপ, তার নাম ছিল কি যেন ! খানিক থেমে বলেন,—মনে পড়েছে, হারাণের বাপের নাম ছিল ভূতনাথ । ভারী ভাল হাত ছিল তার ।

নাটকের সাজাহানের মত, বাদশাই ভঙ্গীতে, দালানের একদিক থেকে অপর দিকে পায়চারী করতে করতে কথা বলেন অনঙ্গমোহন। দালানের দেওয়ালে তাঁরই চলন্ত ছায়া।

ভিয়েনে থাকে কার সাখ্যি! একেই বৈশাখের গরম, তার ওপর গোটা ছয়েক আগুনের চুল্লী, জ্বলছে দাউ দাউ। ভিয়েনে যেন আগুনের প্রবাহ বইছে। ঘাম ঝরছে হালুইকরদের।

হারাগের মাথার বাবরি চুল এলোমেলো হয়ে গেছে। তার চিবুক থেকে টস্ টস্ ঘাম পড়ছে ফোঁটা ফোঁটা। ভিয়েন থেকে বিরাজমোহন উঠে যাওয়ায় তবু যা হোক হাঁফ ছেড়ে বেঁচেছে হালুইকরেরা। ছিনে-জোঁকের মত যেন বসেছিলেন বিরাজমোহন। তাঁর মোটা-কাঁচ চশমার ভেতর থেকে লক্ষ্য করছিলেন সকল কিছু। কে কি ভুল করলো, কে কাজে ফাঁকি দিলো, কেউ কিছু অপচয় করলো কিনা—খুঁটিয়ে খুঁটিয়ে দেখছিলেন।

বিরাজমোহন ভাল ভাবেই জানেন পাক-প্রণালী। লুচি ভাজতে হ'লে কত জন লোকের কতটা ময়দার দরকার হয়, তরকারীতে কতটা তেল আর সূনের প্রয়োজন হয়, কিংবা এক মণ মাংস রাঁধতে হ'লে কতটা ঘি আর কতগুলো আলু দিতে হয়—সবই তিনি জানেন। চোখ বন্ধ ক'রে ব'লে দিতে পারেন। শ'তিনেক লোককে খাওয়াতে চাটনি বানাতে হ'লে কতটা মিষ্টি, কতটা তেঁতুল, কতটা আদা লাগবে, মুখে মুখে তিনি ব'লে দিতে পারেন।

বিরাজমোহন চলে যেতেই পায়ের আঙুলে ভর দিয়ে উঁচু হ'য়ে বছবার অন্তরের দরজা-জানালা দেখতে চেষ্টা করে হারাণ। রাতের অন্ধকার অন্তরে, কিছুই আর তেমন দেখা যায় না। হারাণ ভাবছিল, কোথায়

গেল মণিমালা, রাধাদিদি, শ্রামলী, কেকা, মঞ্জুদিদি, কমলা, ধীরা, বীরা, ইরা আর চম্পাবতীদের দল! হয়তো আশায় আশায় থেকে নিরাশ হয়ে চলে গেছে তারা।

বিরাট হাঁড়িতে মাংস ফুটছে টগবগিয়ে।

কড়ায় চপের কিমা রান্না হচ্ছে। লোভনীয় গন্ধের হাওয়া বইছে ভিয়েনে। চপের কিমা, খুন্তী দিয়ে ঘাঁটাঘাঁটি করতে করতে হারাণ বললে, দলের একজনকে,—বলরামদা, কিমাটা একটু নাড়াচাড়া ক'রতো, আমি ততক্ষণে অন্দর থেকে চাটনীর তেঁতুলটা বোঁ ক'রে নিয়ে আসি।

বলরাম কার্টলেটের চিংড়ী খুঁড়ছিল। বড় কষ্টের কাজ এই চিংড়ী খোড়া। কিছুতেই যেন শেষ হ'তে চায় না উঠে এসে হারাণের খুন্তী ধ'রে বলরাম বলে,—জিরে আর জায়ফলটাও আনতে ভুলে যেও না হারাণদা!

—জিরে আর জায়ফল এসেছে অন্দর থেকে। আছে ঐ কাগজের চৌঙায়।

কথা বলতে বলতে অদৃশ হয়ে যায় হারাণ, অন্দরের অন্ধকার পথে।

অন্দরের ঠিক ছুয়োরটি পেরুতে না পেরুতে কি এক স্নগন্ধের এক ঝলক গন্ধ পায় হারাণ। পুরুষাত্মক হালুইকরের কাজ করেছে, হারাণের নাক তাই বড় বেশী সজাগ। হালুইকরী করতে হ'লে রান্নার হাত থাকার যেমন প্রয়োজন, তেমন চাই তীব্র ভ্রাণশক্তি। নাক টেনে না কি বলা যায়, কোন্ রান্নায় কি কি মশলা পড়েছে, উত্তরের কোন রান্না কতদূর এগিয়েছে।

—হারাণ?

ফিস্ ফিস্ নারীকণ্ঠে অন্দরের ছুয়োর মুখে।

কোমরে জড়ানো গামছাটি খুলে নিয়ে চেপে চেপে মুখের ঘাম মুছতে মুছতে হারাণ বলে,—কে ডাকে ! কে গা ?

—আমরা হারাণ । এখনও কিছু রান্না হয়নি ?

কিশোরী-কণ্ঠের মিষ্টি মিষ্টি কথা । হাতের চুড়ি না আঁচলের চাবির রিনিঝিনি থেকে থেকে । মাথার স্তগন্ধি তেলের উগ্র গন্ধ । তেল না সেটের গন্ধ বোঝে না হারাণ । অন্ধকার, তাই কেউ কারো মুখ দেখতে পায় না । কে যে কোথায়, কিছুই দেখা যায় না । হারাণ হাসি চেপে বললে,—রান্নাবান্না সব চুকে গেছে । তোমরা কে তা বললে না ?

—আমি মণিমালা ।

ফিস্‌ফিস্‌ কথা । মিষ্টি মিষ্টি ।

—মণিমালাদিদি ?

—ই্যা গো হারাণ । চৈঁচাও কেন অত ? কেউ যদি শুনতে পায় ?

—আরও কে কে যেন রয়েছে মনে হচ্ছে মণিমালাদিদি ?

—আমি রাধা ।

—আমি কেকা ।

—আমি মঞ্জু ।

মুখের হাসি চেপে হারাণ বলে,—আর কেউ কেউ আছে, ঠিক ঠাণ্ডর করতে পারছি না আমি ।

মুখের মধ্যে আঁচল পুরে হাসতে থাকে মণিমালা । পাছে শব্দ হয় তাই । রাধা হাসি সামলে বলে,—কি গলা তোমার হারাণ ? এত চৈঁচাও কেন ? ই্যা, আরও আছে । কমলা, ধীরা, বীরা, ইরা আর চম্পা ।

—তা কি বলছো তাইতো এখনও শুনতে পাইনি । দিদিমণিদের তা হ'লে দেখছি মনে আছে হারাণকে !

রাধা বললে,—তোমাকে আর কি বলবো বল' হারাণ ? তোমাকে আবার মনে থাকবে না ! ভিয়েনে কি কি চাপলো বলো তাই শুনি ।

হারাণ বলে,—শাকভাজা নেমেছে । বেগুনভাজা নেমেছে, কুমড়োর ছকা নেমেছে । মাছের কালিয়া, মাংস, চাটনীও নেমেছে । চপ কাটলেট গরম গরম ভাজা হচ্ছে ! আর কি চাও ?

—লুচি নামেনি ? পাপড় ভাজা নামেনি ? দই নামেনি ?

বলতে বলতে খিল খিল হাসি শুরু করলো কে একজন ।

—মিষ্টি নেমেছে, পানও নাবলো ব'লে । হারাণ হাসি লুকিয়ে বললে গম্ভীর স্বরে ।

—কি যে ছাই কথা বাড়াও হারাণ ? মুখের আঁচল বের করে ফিস ফিস বললে মণিমালা । বললে,—এখনি হয়তো বিরাজকাকা আবার ভিয়েনে এসে পড়বেন । হারাণ, আমাদের কিছু চাখতে দেবে না ? মাছের কালিয়াটি হুনে পুড়িয়ে ফেলোনি তো ?

—মাংসে বড়এলাচ দিতে ভুলে গেছো তো ? এতক্ষণে কথা ধরলে মঞ্জু । বললে—বাবুরা তা হ'লে আর রক্ষা রাখবে না তোদের !

—তা যা বলেছ দিদিমণি ! বললে হারাণ । বললে,—তবে দুঃখের কথাটি এই যে, এখনও কিছু নাবেনি । এইবার সব একে একে নামবে ।

যারা অন্ধকারে বহু প্রত্যাশায় দাঁড়িয়ে দাঁড়িয়ে মিনিট গুনছিল আর মশার কামড় খাচ্ছিল তাদের সকলের চোখে একই সঙ্গে নামলো নিরাশ দৃষ্টি ।

—তবে কিসের এত গন্ধ ছেড়েছো হারাণ সেই গন্ধে গন্ধে আমরা যে এসেছি !

অভিমানী-কণ্ঠে কথা বললে রাধা । হতাশ স্বরে বললে ।

হারাণ হেসে ফেললো । মজা দেখতে দেখতে মানুষ যেমন বিহ্বল

হয়ে হাঙ্গে। গামছায় ঘাড়-পিঠ মুছতে মুছতে বললে,—যে বার এক একটা খুরী নিয়ে এসো দিদিমণিরা, মাংসটাই চেখে দেখো সব আগে।
পাতে দেওয়ার যোগ্য যদি না হয়ে থাকে, তখন!

—কি যে তুমি বল' হারাণ। তোমার রান্না আবার পাতে দেওয়ার যোগ্য হবে না!

দলের লীডার হয়তো মণিমালা। সেই কথা বলে। সবার চেয়ে সেই নাকি বয়সে বড়। মণিমালা বললে,—এই চম্পা, তুইতো এলে-বেলে, তুইই যা, খুরী চুরি ক'রে নিয়ে আয় যেখান থেকে পারিস।

চম্পাবতী, সেইই কনিষ্ঠা। সকলের চেয়ে বয়সে ছোট। ক'দিন মাত্র ঘাগরা ছেড়ে শাড়ী ধরেছে। চলতে ফিরতে শাড়ীর আঁচল সামলাতে পারে না এখনও। পায়ে জড়িয়ে হোঁচট খায়। বুকের কাপড় বুকে থাকে না। যখন তখন কোমরের ফাঁস আলগা হয়ে যায়। বিনা সিঁথির টানা চুল বাঁধে। খোঁপা হয় না, তাই বিম্বুনী বাঁধে। জোড়া বিম্বুনী ঝুলতে থাকে দুই কাঁধে।

চম্পাবতীর ভয়ার্ত্ত কথার স্বর। বললে,—আমার সঙ্গে ইরাদিকেও যেতে বল' মণিপিসী। অন্ধকারে আমার যে একা একা ভয় করবে ভাঁড়ারে যেতে।

মণিমালা ফিস ফিস বলে,—ই্যা ইরা, তুমিও ওর সঙ্গে যাও। জ্যাঠাইমা কাকীমাদের কেউ যদি দেখতে পায় বলিস, সদর থেকে বাবুরা খুরী চাইতে পাঠিয়েছেন।

—কেউ দেখতে পাবে না। বললে চম্পাবতী। বললে,—আমি ঠিক আঁচলের ভেতরে লুকিয়ে নিয়ে আসবো। চল' ভাই ইরাদি।

হারাণ বললে,—খুরী আনিয়ে ব'লে পাঠিও দিদিমণিরা। আমি তবে যাই?

—কাকেও বলবে না তো হারাণ ?

ফিস ফিস জিঞ্জেরস করলো মণিমালা ।

রাধাও বললে,—তা হ'লে আর আমাদের রক্ষে থাকবে না! কর্তাদের কাছে এক প্রস্থ হবে, অন্যদের গিন্নিদের কাছেও আর এক প্রস্থ হবে ।

হারাণ বললে,—এই কি প্রথম চাখছো দিদিমণিরা ? সেই এ্যাট্টুকুনি বেলা থেকে যে ঠিক এইখানটিতে এসে তোমরা—

—চুপ চুপ হারাণ ! যাও, তুমি কাজে যাও ।

ফিস ফিস বললে মণিমালা । বললে,—বাবুদের কেউ আসছেন না কি ? চটিজুতোর শব্দ পেয়েছি আমি । এই, তোরা সব আয়, লুকিয়ে পড়ি আমরা ।

তারপর আর কোন কথা নেই । শাড়ীর খস খস আর চুড়ি না চাবির ঠুং ঠুং । দীর্ঘশ্বাস ফেলার শব্দ, একসঙ্গে অনেকের ।

—কোথায় লুকোই রাধা ? বললে মণিমালা, একেবারে চুপিচুপি ।

রাধা বললে,—কলতলায় যাবি ?

—না, যদি বিছে কামড়ায়, এই অন্ধকারে ! মণিমালা বলে ।

মঞ্জু বললে,—তারচেয়ে চল, শীঘ্রি চল, নিরামিষ্ণী রান্না-ঘরে ঢুকে পড়া যাবে ।

—হ্যাঁ ।

—ঠিক বলেছি ।

শাড়ীর খস খস, হাতের চুড়ি না আঁচলের চাবির ঠুং ঠাং শব্দ পলকের মধ্যে যেন জোরালো হয়ে উঠলো । আবার অন্ধকারের সঙ্গে যেন মিশে গেল চকিতে ।

অন্দরে আর যেতে মন চায় না । হারাণ হাসতে হাসতে ভিয়েনে পা বাড়ালো । কেশতৈল, এসেন্সের না মো, পাউডারের উগ্র গন্ধটুকু যেন

ভুলতে পারে না হারাণ। টেনে টেনে শ্বাস নিয়ে বুকের মধ্যে যেন বহন করে নিয়ে যায় সেই স্বগন্ধ। পারুল মাতোয়ারার গন্ধ পর্যন্ত জানা আছে হারাণের। মেখেছে কত দিন। এ যে কিসের গন্ধ ঠিক ধরতে পারে না আন্দাজে।

যেন এক নতুন উত্তম অর্জন ক'রে হারাণ। হাসিমুখে হাজির হয় ভিয়েনে। চুল্লীর মুখে বিরাট বিরাট হাঁড়ী আর কড়া। আগুনের আলো চাপা পড়ে গেছে। ভিয়েনের আধো-আলো আধো-অন্ধকারে হারাণের হাসিমুখ দেখতে পায় না দলের কেউ। কোমরে গামছা বাঁধতে বাঁধতে হারাণ বললে,—বলরামদা, যাও, কার্টনেট কটা খোড়া শেষ কর' তাড়াতাড়ি। আর আমাকে গোটা দুই পান যদি খাওয়াও।

দলের চাঁই হারাণ। সেই দল রাখে।

চিতপুরের গরাণহাটার কোন্ এক বস্তীতে বাসা আছে হালুইকর হারাণের। ঘর ভাড়া নিয়েছে সে নিজের নামে ঐ বস্তী-অঞ্চলে—যেখানে আরও অনেক হালুইকরের দল আছে—যারা হারাণের প্রতিদ্বন্দ্বী বৈ কিছুই নয়। সেই ভাড়া-ঘরে দড়ির খাটিয়া আছে হারাণের। ছারপোকায় ভর্তি, তা হোক।

সেই খাটিয়ায় হারাণ বসে। দলের মধ্যে ছ'একজন যারা পুরানো লোক, তাদের কেউ কেউ বসতে পায় ঐ খাটিয়ায়, হারাণের আশেপাশে। এক হুঁকোয় তামাক খায় তারা সকলে। দলের মধ্যে যারা নবাগত, যারা সব শিখছে, হাত পাকাচ্ছে—তারা বসে মাটিতে। খাটিয়ার আশেপাশে।

হারাণই দলের চাঁই। সে খাটিয়ার মধ্যখানে বসে। মন ভাল থাকলে, বারোয়ারী হুঁকো ছেড়ে শুধু সে নিজে একা সিগারেট ধরায়। কাকেও দেয়না। হারাণের খাটিয়ার ময়লা তোষকের তলায় থাকে

ক্যাপটান সিগারেটের একটি ছুমড়ানো প্যাকেট ! কত বড় বড় ঘরের
যজ্ঞমানেরা কত সময়ে । কত বড়লোক বাবুরা আসেন কাজে কর্শে
খোঁজ দিতে । হারাণের সব বড়লোক বাবু খদ্দেররা আসেন বাসিন
চাইতে যাগযজ্ঞে ।

সিগারেটের প্যাকেট খুলে ধরতে হয় তখন হারাণকে ! তাঁরা খান
আর না খান, তবুও দেখাতে হয় কতদিনের মিছানো সিগারেট ।

দলপতি পান চেয়েছে । পান সাজতে ব'সে যায় বলরাম ।

—হাত চালাও ভাই সব । রাত দশটার মধ্যে ফিনিশ্ দেবো কথা
দিয়েছি । হারাণ কথা বলে কিমার কড়ায় খুন্তী খেলাতে খেলাতে ।
হঠাৎ কণ্ঠস্বর নীচু ক'রে চাপা সুরে বললে,—আজ আবার বাবুরা সব
বোতল চালাবেন ! কার মেজাজ কখন কেমন থাকে বলা যায় না !

—বোতলের সঙ্গে সঙ্গে বাঈনাচ !

বলরাম কথা বললে, পানে চুণ মাথাতে মাথাতে ।

ওয়াইন চেয়ারে সোডার বোতল খালি হ'তে থাকে ।

শূণ্য বোতল জড় হয় অনেকগুলো ! ঘরের মেঝেয় বোতলের মুখের
টিনের চাকতি আর ছিপি ছড়াছড়ি হ'তে থাকে । ঘরের এক কোণে
কাঁচা বরফের চান্ড, তাই ওয়াইন চেয়ার যেন অগ্ন ঘরের তুলনায়
অনেক বেশী ঠাণ্ডা হয়ে আছে । ঘরের ভারপ্রাপ্ত রতনদা যেন হিমসিম
খেতে থাকেন । বরফের বস্তায় আছে কয়েকটি বোতল । ঠাণ্ডা হচ্ছে ।

এক এক সময়ে এক এক রকমের চাহিদা মেটাতে হয় ।

বাবুদের একেক জন একেক ধরনের পানীয় চেয়ে পাঠান । ছইন্ধির
সঙ্গে সোডা, ব্রাণ্ডির সঙ্গে জল, রামের সঙ্গে মিষ্টি-লেমোনেড মেশাতে
মেশাতে জান যেন বেরিয়ে যায় রতনদার ! কেউ আবার ধীরে ধীরে স্বপ্ন

খাচ্ছেন, কেউ বা একের পর এক টল্ খেয়ে চলেছেন। কাঁচের গেলাশ আর বোতল—কত সাবধানে ঘাঁটাঘাঁটি করতে হয়! সোডার বোতলের মুখের চাকতি খুলতে হয় গণ্ডায় গণ্ডায়।

সবই করেন রতনদা। আর কারও হাত দেবার অহুমতি নাই। তাই আগাগোড়া তিনিই যা কিছু করেন। আর মধ্যে মধ্যে ফাঁক পেয়ে নিজের গেলাসটি মুখে তুলে অত্যন্ত ধীরে ধীরে এক-আধ চুমুক খেয়ে নেন। ধীরে স্বস্থে একটু একটু খেতে পারলে না কি নেশাটি অনেকক্ষণ থাকে। পানের স্থানন্দ উপভোগ করা যায়।

—মদ কখনও ঢোক ঢোক করে গিলতে নেই!

ঘরে যিনি ছিলেন তাঁর উদ্দেশে বললেন রতনদা। কথার শেষে নিজের পাত্রটি মুখে তুললেন। এক চুমুক খেলেন কি খেলেন না।

ঘরে ছিলেন চন্দ্রমোহন। জলসা থেকে উঠে এসেছিলেন।

বিশেষ একটি গেলাস তৈরী করাতে এসেছেন। বেয়ারাগুলোকে বললে যে তারা বোঝে না। এক নাম বলতে অন্য নাম বলে দেয়। এক চাইলে আরেক এনে দেয়। মেজাজ বিগড়ে যায় তৎক্ষণাৎ। মাথাও ঠিক রাখা যায় না।

চন্দ্রমোহন বললেন,—আমার আবার ঠিক উন্টো! প্রথম চোটে পর পর কয়েকটা টল্ পেগ না খেলে ফাউনডেশন্‌ই তৈরী হয় না। আমার ভিৎ তৈরী করতেই লাগে পেগ্‌ পাঁচ ছয়। তারপর ধীরে ধীরে এক একটা খাবো। স্লোলি স্লোলি।

বোতল থেকে গেলাশে পানীয় ঢালতে ঢালতে রতনদা বললেন,—হাফ্‌ সোডা আর হাফ্‌ জিন দেবো?

—না রতনদা। জিন্‌ আর হুইস্কি দাও, ওয়ান ফোর্থ সোডা।

—হোয়াইট লেবেল না রেড লেবেল দেবো বড়দা? নিজের

গেলাশ নামিয়ে রেখে জামার আস্তিনে ঠোট মুছে রতনদা বললেন,—
হোয়াইট লেবেলের বোতল ক'টা শেষ হয়ে যাক না আগে। তারপর
না হয় রেড লেবেল খোলা যাবে, কি বল ?

চন্দ্রমোহনের কপালে রেখা ফুটলো। এক মুহূর্ত্ত কি যেন ভাবলেন
তিনি। বললেন,—তা, তুমি যখন বলছো তাইই দাও।

—জিন্টা নাই বা আর খেলে ! একরকমই খাও না। যে কোন' এক
রকম খাওয়াই ভাল। চেঞ্জ করা খুব খারাপ। তাতে ব্যাড্ এফেক্ট হয়।

কথা বলতে বলতে রতনদা হোয়াইট লেবেলের একটি বোতল
বাম হাতের দু'আঙুলে ধরে তুলে ফেললেন। তারপর বোতলটিকে
শূণ্ঠে ছেড়ে দিয়ে পলকের মধ্যে ডান হাতে লুফে নিলেন।

চন্দ্রমোহন বললেন, একটি চোখ ঈষৎ বন্ধ করে বললেন,—জিন্
হইস্কি কম্বাইন্ড্ না হ'লে আমি কিছু বুঝতেই পারিনা, এমনি
অভোসে দাঁড়িয়ে গেছে। কথা বলতে বলতে ক্ষণেক থেমে বলেন,—
আমরা খাচ্ছি যে আজ নয়। বিশ বছর বয়েসে আরম্ভ করেছি, আর
আজ আমার এজ নিয়ারলি ফিপ্টি টু। বাহান্নো। আমরা একেবারে
যাকে বলে তোমার ভেটোরেন।

রতনদা হইস্কির গেলাশে জিন ঢালতে ঢালতে বলেন,—তা কি আমি
জানি না বড়দা? আমরা যে সকলে এক সঙ্গেই শুরু করেছি। আমিও প্রথম
যখন খাই তখন আমারও বয়েস আর কত হবে, এই বছর পনেরো।

—তা যদি বল' রতনদা, মদেই আমাদের জন্ম ! মুখ ফসকে যেন
কথাগুলি বলে ফেলেন চন্দ্রমোহন। বলেন,—মদ আমরা তিন চার
পুরুষে খাচ্ছি। বাপ পিতামো যে নেশা—

পোকায়-কাটা চাপকান পরা একজন বেয়ারা ঘরে ঢোকে। বলে,
—রতনবাবু, চটপট আট গেলাশ হইস্কি, সেজবাবুর বন্ধুরা চাইছেন।

—সেজবাবুর বন্ধুরা চাইছেন ? শুধোলেন রতনদা । বললেন,—
ডাকো সেজবাবুকে, তিনি এসে না বললে আমি আর এক গেলাশও
দেবো না । কথা বলতে বলতে হাতের তৈরী গেলাশ এগিয়ে ধরলেন
চন্দ্রমোহনের সমুখে ।

চন্দ্রমোহন বললেন, গেলাশটি হাতিয়ে নিয়ে বলেন,—কীপ
কোয়ায়েট, ব্লাডি ফুল ।

বেয়ারা ঘরের মেঝেয় চোখ নামিয়ে, বেরিয়ে গেল ঘর থেকে ।
সেজবাবুর কাছে চললো ।

রতনদা বললেন,—ড্রিক্ যত স্নো করতে পারবে ড্রিক্‌র তত মজা
পাবে । তাড়াহুড়ো ক'রে গাঁজা খেতে হয়, পর পর না টানলে নেশা
হয় না । মদ কিন্তু তা নয় ।

হাতের টাটকা গেলাশে ওষ্ঠ স্পর্শ করলো ।

যেন তৃষাতুর চন্দ্রমোহন, বহু প্রতীক্ষার পর এক পাত্র জল
পেয়েছেন । বেশ খানিকটা জল পানের পর মুখ চুকিয়ে বলেন,—গ্যাট্
আই নো রতনদা, স্নো এণ্ড্ স্টেডি উইনস্ দি রেশ্ । কিন্তু কি করবো
বল' ভাই, ঢুকুঢুকু একটু একটু আমার আদপেই চলেনা । অভ্যেসের
দোষ আর কি !

—মদ ঢুকুঢুকুই খেতে হয় । কথা ধরলেন রতনদা । বললেন,—
নেহাৎ ক্রিষ্টমাস আর পয়লা জানুয়ারী ছাড়া ভাল ইউরোপীয়নরা কোন
দিন মাতাল হয় না । শুধু আমাদেরাইতো আর হুইস্কি জিন্ খাইনা,
ওরাও প্রচুর খায় ।

—হাসালে রতনদা । মুখ থেকে গেলাশ নামিয়ে বলেন চন্দ্রমোহন ।
বলেন,—ইউরোপীয়নরাই তো হুইস্কি জিনের সৃষ্টিকর্তা । আমরা,
আমরা শিখেছি কাদের কাছে ?

রতনদা ঈষৎ হেসে বলেন,—তুংখের বিষয়, ওরা মদ খায়, খেয়ে সারাটা জীবন ভোগ করে, আর আমরা? মদ ধরতে না ধরতে মদেই আমাদের খেয়ে ফেলে। আমাদের দেশ না-শীত না-উষ্ণ দেশ, এদেশে দিন নেই রাত্রির নেই, এ্যালকোহল সহ্য হয় কখনও? মরেও তাই লীভার ফাটিয়ে!

—যা বলেছো রতনদা! আমিও কতদিন একথা ভেবেছি। কত দিন মদ খেতে খেতে শুধু আমার এই কথাটাই মনে পড়েছে। কিন্তু—

কথার শেষে আবার গেলাশ তুললেন চন্দ্রমোহন। মুখে ঠেকালেন।

রতনদা বললেন,—ওরা মদ খায়, স্বীকার করছি প্রচুর মদ খায়, ওদের মত খেতে গেলে আমাদের দু'দিনে জিব বেরিয়ে পড়বে। কিন্তু ওরা মত্তপানের সঙ্গে সঙ্গে আরও কত কি খায়! শাক, শজী, মাছ, মাংস, ডিম পর্যাপ্ত পরিমাণে খায়। আর আমরা? আমরা দু'পাকুর টানলে বড় জোর একটু চাট খাই।

—তা হ'লে কি হ'ল রতনদা? আমরা চাটি আর ওরা খায়?

কথাগুলি শেষ হওয়ার সঙ্গে চন্দ্রমোহন অট্টহাসি শুরু করলেন। তাঁর আপাদমস্তক যেন হাসতে লাগলো। সে কি প্রচণ্ড অট্টহাসি!

—যাও, তোমার নেশা ধ'রে গেছে বড়দা।

রতনদা তাঁর অভিজ্ঞ দৃষ্টিতে চন্দ্রমোহনের চোখ দেখে বললেন। তাঁর চোখ দেখে আর হাসির অস্বাভাবিক ধরণ শুনে।

একটি অর্গলহীন জানলা হঠাৎ খুলে গেল সশব্দে। হঠাৎ হাওয়ায়।

বাইরে কাল-বৈশাখীর মত ক্ষেপা হাওয়া বইছে। মাঝে মাঝে সেই চন্দনঝিলের ওপার থেকে হিম-হাওয়ার তরঙ্গ আসছে আর ঘিরে

ঘিরে ধরছে যেন চন্দনধামকে। গৃহের প্রাঙ্গণেরগাছ-গাছড়া ভুলে উঠেছে।
হাজার বাছ মেলছে যেন তারা, শাখা-প্রশাখা বিস্তারিত করছে।

ওয়াইন-চেয়ার কত দিন পরে খোলা হয়েছে তার ঠিক নেই।

ঘরের দরজার ভেতরকার অর্গল নেই, জানালায় নেই ছিটকিনি,
পাল্লাগুলোয় উই ধরে ধরে যন্ত্রারোগীর ফুসফুসের মত ঝাঁজরা হয়ে গেছে।
ক্যাবিনেটও তথৈবচ। ঘরের এক কোণে শূণ্য বোতলের স্তূপ। কবেকার
কে জানে! কিছু কাঁচের গেলাশ। ফাট-ধরা, ভাঙাচোরা।

ফেলে-আসা দিনগুলির কত স্বপ্ন যেন এখনও জেগে আছে ঐ কাঁচের
গেলাশ-বোতলে। ঠুনকো কাঁচের নগণ্য পুরানো বোতল, আর
গেলাশ,—কত মোহনীয় স্বপ্ন না জানি সৃষ্টি ক'রেছিল, রাতের পর
রাত। কত মায়া আর কত মোহ। কত উদ্দাম উত্তেজনা! রোমাঞ্চ!

—ঠিক বলেছো রতনদা। বললেন চন্দ্রমোহন। গেলাশের
অবশিষ্ট এক চুমুকে শেষ করে বললেন,—আমার নেশা ধ'রে গেছে,
ঠিক বলেছো তুমি! আর এক পাত্র আমাকে পাঠাও।

হাসতে হাসতে তিনি বেরিয়ে গেলেন ঘর থেকে।

আসরে তখন গান শুরু হয়েছে। ধীর মন্থর গতিতে আলাপ
চলছে। কি সুর বোঝা যায় না।

চন্দ্রমোহন ফরাসের মধ্যখানে বসতে বসতে দেখলেন ইদিক
সিদিক। দেখলেন, কে কেমন আছে; কার কেমন অবস্থা। গানের
আলাপ ছাড়া একটি চাপা গুঞ্জনের শব্দ পাওয়া যায় জলসায়। চন্দ্রমোহন
ঘরে আসতেই থেমে যায় গুঞ্জন। বাবুদের বন্ধুবান্ধবদের মনের
কথার আদান প্রদানে বিরতি পড়ে। যে যার মুখ বন্ধ করেন।

আসরের মধ্যমণি চন্দ্রমোহন। তিনি আসন গ্রহণ করতে না করতে

কেউ কেউ তাঁর কাছে তাকিয়া ঠেলে দেয়। কেউ এগিয়ে ধরে সিগারেটের টিন। চন্দ্রমোহন সিগারেট তুলে নিয়ে বললেন,—গানের পালা কখন চুকবে? বাঈনাচ শুরু হোক না।

—শুনছি রাত বারোটায় নাচ শুরু হবে। ততক্ষণ গান-বাজনা চলবে।
চন্দ্রমোহনের এক ঘনিষ্ঠ বন্ধু কথাগুলি চন্দ্রমোহনের কাণে কাণে বর্ষণ করলেন।

—তাই না কি? রাত বারোটায় বাঈনাচ?

—ই্যা, তার আগে জমবে না নাচ। আজকে যে হোল্ নাইট পার্ফরমেন্স!

—বাঈজী দু'জনকে দেখেছি, যাকে বলে তোমার খুপস্বরং—

চন্দ্রমোহনের কথা খেমে গেল মধ্যপথে। বন্ধু তাঁর মুখে দিয়াশলাইয়ের জ্বলন্ত কাটি ধরলেন। সিগারেটের মুখে আগুন ধরিয়ে দিলেন।

হারমনিয়ামে আলাপ চলতে থাকে এক নাগাড়ে।

সঙ্গে তানপুরার সশব্দ ঝঙ্কার। আসল গান ধরলে তবলা ধরা হবে। তবলটি ব'সে থাকে গালে হাত দিয়ে!

—বেশী খেও না। বুঝেছো খেও। পেটের ব্যাথাটা আবার যেন না চাগাড় দিয়ে ওঠে।

বন্ধু বন্ধুর কাজ করেন। নকল শাসনের সুরে বললেন চন্দ্রমোহনের কানে। চুপি চুপি বললেন।

বড়বাবু কথাগুলি শুনে মৃদু মৃদু হাসলেন।

সিগারেটে পর পর কয়েকটি টান দিয়ে ধোঁয়া ছাড়তে ছাড়তে বললেন,—এরই মধ্যে তিনটে টল্ হয়ে গেছে? এখনও যেন বুঝতেই পারছি না যে কিছু খেয়েছি।

—সে কি কথা চন্দর! আমি তো দু'টো গেলাশ মাত্র ছইস্কি

খেয়েছি। বন্ধুটি চুপি চুপি কথা বলেন। বলেন,—তু' গেলাস খেয়েই চোখে স্নেহ লাল-নীল দেখছি।

হো হো শব্দে হেসে উঠলেন চন্দ্রমোহন। অট্টহাসির মত হাসি হাসতে হাসতে বললেন,—তাই না কি? তা হ'লে আর এক গ্লাস দিক্! এ্যাও বেয়ারা, ইধার লে আও।

বেয়ারার হাতে ট্রে। সারি সারি গেলাশ সাজানো ট্রে।

যার পাত্র শূন্য হয়ে পড়ে তার সমুখে ট্রে ধরে বেয়ারা। শূন্য রেখে পূর্ণ নাও। বেয়ারা কাছে আসতেই চন্দ্রমোহন নিজেই একটি গেলাস তুলে নিয়ে ধরলেন বন্ধুর সামনে।

—উপরি উপরি আমি খেতে পারি না। হবে'খন খানিক পরে।

—তা কখনও হয়! চন্দ্রমোহন বলেন,—ধর'। বেশী আর বিধবাপনা দেখাতে হবে না!

অগত্যা বন্ধু কি আর করেন। তিনি অনোন্তাপায় হয়ে গেলাশটি স্বহস্তে ধারণ করলেন। যেন কত নিশ্চিন্ত হ'লেন চন্দ্রমোহন। তৃপ্তির হাসি ফুটলো ধোঁয়াভরা মুখে।

গায়ক গান ধরলো :

আগে করিয়ে যতন, কেন মজাইলে মন—

সঙ্গে সঙ্গে তারিফের সুরে বাহবা বাহবা ধ্বনি উঠলো নাচঘরে। চন্দ্রমোহন বললেন, বেশ সজোর কণ্ঠে,—আহা—হা—হা! সুরটা কি সুর হে?

গায়কের আশপাশে উগ্র সঙ্গীতরসিকরা ঘিরে বসেছেন।

গানের সুর যেন তাঁরা বাতাসে ভাসতে দেবেন না কোন মতেই। নিজেরাই পুরাপুরি পান করবেন সঙ্গীতস্বধা। তাঁদের মধ্যে একজন বলেন,—সুর ভৈরবী, তাল আড়াঠেকা।

গায়ক দ্বিতীয় পঙক্তি ধরলেন :

প্রেম ফাঁসি দিয়ে বধিলে জীবন ॥

গান শুরু হওয়ার একই মুহূর্তে তবলা ধরলে তবলাচি । সুর-বাঁধা
তৈরী তবলার আওয়াজে নাচ-ঘর যেন গমগমিয়ে উঠলো ।

গানের সুরে চাপা প'ড়ে যায় নাচঘরের অস্পষ্ট গুঞ্জন ।

যারা ছিল অশ্রু-মনে, আলাপচারীতে রত ছিল—তারা যেন সকলে
একে একে নীরব হয়ে যায় । সুরেল কণ্ঠ গায়কের, অন্তরের দরদ
মেশানো । গানের সুর শুধু নাচঘরেই সীমাবদ্ধ থাকে না । ঘরের বাইরে
সুন্ধ রাত্রি, কালো আঁচল বিছিয়ে ঢেকে দিয়েছে চন্দনপুরকে । এলোমেলো
হাওয়া চলেছে থেকে থেকে । চন্দনবিলের অপর তীরের বন-বাদাড়
থেকে যেন জোরালো নিঃশ্বাসের মত সোঁ সোঁ শব্দে হাওয়ার ঝড় আসছে
চন্দনধামকে আষ্টেপৃষ্ঠে জড়িয়ে ধরতে । অদৃশ্য বাতাসের সঙ্গে যেন সুরের
মিতালী—নাচ ঘরের গান কেঁপে কেঁপে ছড়িয়ে পড়ছে দিকে দিকে ।

কেউ বললে,—বহুং আচ্ছা ভাই !

কেউ বলে,—আহা, আহা !

আরও দুই পঙক্তি গাইতে থাকে গায়ক :

দেখা হ'ল হ'ল ভাল, দু' দিনে সাধ ফুরাইল,

দিলে ভাল প্রতিফল, রহিল স্মরণ ॥

গানের সুরে না কি আছে সম্মোহন । ঠিক ঠিক যদি গাইতে পারে
কেউ, গান গেয়ে গেয়ে নাকি ভুলিয়ে দেওয়া যায় পৃথিবীর দুঃখ । হৃদয়ের
অতি তীব্র ও অতি কোমল ভাব শুধু ভাষায় ফোটে না, যে জন্তু রাগ
রাগিনীর সৃষ্টি । বাক্য সীমাবদ্ধ, সুর অসীম । ভাবে কেঁদে মরে ভাঙ্গা
ভাষা ! গানের সুর কত কোমল, কত মধুর, কত তীব্র, কত সূক্ষ্ম, কত
মর্মস্পর্শী ! সহস্রতন্ত্রী হৃদয়বীণার বাকারে কত শত সুরতরঙ্গ ।

নাচ ঘরের সমবেত শ্রোতাদের কে যেন সম্মোহিত ক'রে দেয় !

শুধু চন্দনধামের অন্তরমহলে বিষ ছড়িয়ে দেয় সুরের লহরী ।

অন্তঃপুরবাসিনীদের কারও কারও কাণে যেন বিষ ছড়াতে থাকে ।
গান কিংবা বাজ্যযন্ত্রের ভেসে-আসা সুর শুনলে ব্যথা লাগে মনে । বুকে
যেন ঘন ঘন হাতুড়ীর ঘা পড়তে থাকে ! মাথা কিম্বা কিম্বা করে ।
বিরক্তি আসে মনে ।

সুরের তরঙ্গ যেন কুহকিনীর মতই ভয়াল ভয়ঙ্কর । নাচ ঘরের গান-
বাজনা শুনলে অন্তরের কেউ কেউ ভয়ে যেন সিঁটিয়ে সিঁটিয়ে ওঠেন ।
নিজেদের ভাগ্যকে দোষ দেন ।

অনঙ্গমোহনের ঘরের রেডিও, যত রাত হ'তে থাকে ততই যেন
বিস্তৃত ক'রে তোলে অন্তরমহলকে । রাত্রি গভীর হওয়ার সঙ্গে সঙ্গে না
কি যত বিদেশী ষ্টেশন চালু হ'তে থাকে । অনঙ্গমোহনও রেডিওর
কাঁটা ঘোরাতে থাকেন । বিবিসি ভাল না লাগলে, ধরেন হয়তো
ফিলাডেলফিয়া বেতার-কেন্দ্র । সেখানে যদি শুধু নিরস বক্তৃতা চলতে
থাকে, তখন ধরেন ড্যাভেনট্রি কিংবা মীডুনী ষ্টেশন ।

যেখানে গান কিংবা বাজনা চলে দেখে দেখে সেই মীটারটিতে কাঁটা
খামিয়ে দেন ।

শ্রামাপদ এ্যালমুনিয়ামের হাঁড়ীতে ডালের ফোড়ং ছাড়তেই চিড়-
বিড়িয়ে উঠলো হাঁড়ী । হাঁচতে শুরু করলো শ্রামাপদ । তাড়াতাড়ি সিঁকডাল
হাঁড়ীতে ঢালতে ঢালতে বললে,—হজুর, রাঙাবৌদির ঘরে লেগে গেছে ।

রেডিও চলছে ঘরে । খুব আন্তে আন্তে ।

তবুও ঠিক ঠিক শুনতে পেলেন না অনঙ্গমোহন । বললেন,—কি
বললে শ্রাম ? দাদাবাবু এসেছে ?

—না হুজুর। আমাদের রাঙাবৌদির ঘরে খণ্ড-প্রলয় হচ্ছে শুনছি।

হাঁড়ীতে বাঁজরি ঘোরাতে ঘোরাতে কথা বলে শ্রামাপদ। কথার শেষে আরেকবার হাঁচলো।

খানিক আগে যে-ঘরে হাসি ছিল, এই কিছুক্ষণের মধ্যে সে-ঘরে তুলকালাম কাণ্ড চলতে থাকে। খানিক আগেই দেখেছিল শ্রামাপদ, নিজের চোখে দেখেছিল। রাঙাবাবুর খোলা দরজা আর জানলা থেকে ঘরের ভেতরটায় চোখ পড়তেই দেখেছিল রাঙাবৌদিকে—আয়নার সামনে দাঁড়িয়ে তিনি চুল বাঁধছেন। অসাবধানে তাঁর উর্দ্ধবসন খসে পড়েছে মেঝেয়। চুরিয়ে দেখতে দেখতে পাছে কেউ দেখতে পায় সেই ভয়ে শ্রামাপদ বেনীক্ষণ দাঁড়াতে পারেনি তখন। যদি কেউ দেখে, কারও যদি চোখ পড়ে!

রেডিও ছেড়ে হস্তদস্ত হয়ে ঘর থেকে দালানে বেরিয়ে পড়লেন অনঙ্গমোহন। বললেন,—এত চেষ্টামেচি কেন? কি হয়েছে কি?

শ্রামাপদ হাঁড়ীর মুখে চাপা দিয়ে বললে,—শুন না হুজুর। স্বকর্ণেই শুনতে পাবেন। রাঙাবাবু চটলে তো আর রক্ষে নেই?

—রাগারাগির কারণ কি?

প্রায় রুদ্ধশ্বাসে কথা বললেন অনঙ্গমোহন।

—শুন না হুজুর।

কথা বলতে বলতে শ্রাম আবার পাম্প করে ষ্টোভে। উপযু্যপরি পাম্প করে যায়।

রাঙাবাবুর ঘরের সাজানো-গোছানো চেহারা অত আকৃতি ধরে।

সহসা দেখলে মনে হয় কে বা কারা যেন তখনই ক'রে দিয়েছে

ঘরের সকল কিছু । মধ্যে মধ্যে সজোরে চীৎকার করছেন রাঙাবাবু,—
এখনও বলছি, চাবি দেবে কিনা বল !

রাঙাবৌদি, কাঠের পুতুলের মত দেওয়ালে হেলান দিয়ে দাঁড়িয়ে
থাকেন । অকথা কুকথা শুনেছেন, তাই চোখ বেয়ে তাঁর জলের ধারা
নেমেছে । পাষণ মূর্তির মত তিনি নির্বিকার হয়ে থাকেন । চোখে
স্থির দৃষ্টি ফোটে ।

রাঙাবাবু আবার বললেন,—চাবির গোছাটা দাও বলছি এখনও !

—আমি জানি না কোথায় চাবি আছে । রাঙাবৌদি কথা
বললেন বাষ্পরুদ্ধ কণ্ঠে । ফোঁপাতে ফোঁপাতে ।

—তোমার চাবি, কোথায় আছে, তুমি জানো না ! বিশ্বাস করতে
হবে আমাকে !

রাঙাবাবুর কণ্ঠস্বর যেন সপ্তমে উঠলো । চিবিয়ে চিবিয়ে তিনি
বললেন ।

—হারিয়ে গেছে যে ! কি করবো আমি ?

ভিজ্জে ভিজ্জে স্থর রাঙাবৌদির কথায় । চোখের প্রান্তে টলমল
জলবিন্দু । পা দুটো যেন তাঁর ঠকঠকিয়ে কাঁপছে ক্রোধ আর
উত্তেজনায় । যতবার চোখে পড়ছে, তাঁর সাজানো-গোছানো ঘরের
বিপর্যাস্ত রূপ, তত যেন জল ঝরছে চোখ ফেটে ।

রাঙাবাবু চাবির গোছা খুঁজেছেন । বিছানার বালিশ, তোষক
আর গদী টেনে টেনে মেঝেয় ফেলেছেন । আনলার কাপড়-চোপড়
ফেলে ছড়িয়েছেন । বাক্স আর স্ট্রাকেশ খুলে খুলে বের করেছেন যা
পেরেছেন । কিন্তু চাবির গোছা মেলেনি, শুধু পণ্ড্রম হয়েছে ।

চাবির গোছায় আলমারী আর দেরাজের চাবি আছে । রাঙাবাবু
আলমারী খুলতে চান । আলমারীতে কি আছে কে জানে !

রাঙাবাবু টেচিয়ে উঠলেন সজোরে,—এটা তোমার বাপের জমিদারী, তা মনে ক'র না! ভাল চাও তো চাষি বের করে দাও মিত্রা!

রাঙা অধর ধরো ধরো কেঁপে উঠলো রাঙাবৌদির। লজ্জা আর অপमानে সর্ব্বাঙ্গ যেন তাঁর জলতে থাকে। রাঙাবৌদির পুরা নাম স্মিত্রা। তিনি বললেন,—আমি জানি না কোথায় আছে। যা খুশী করতে পারো তুমি!

আরও যেন চ'টে উঠলেন রাঙাবাবু। আগুনে যেন ঘিয়ের ছিটা পড়লো! বললেন,—তবে রে পোড়ারমুখী! দেখবি তবে?

—কি আর দেখাবে তুমি! বললেন স্মিত্রা। বললেন,—তোমায় মুরদ কত তা আমার খুব জানা আছে! অভদ্র, ছোটলোক তুমি একটা।

—মুখ সামলে কথা বলবে মিত্রা, এখনও আমি বলছি!

—তুমিও মুখ সামলে কথা কইবে।

—চাষি দাও বলছি এখনও।

—দেবো না, দেবো না, দেবো না। যা পারো কর' তুমি।

একেবারে বেপরোয়ার মত বলেন স্মিত্রা দেবী। নাচার হয়ে বলেন।

—দেবে নাতো? রাঙাবাবু কথা বলতে বলতে এগিয়ে যান ধীরে ধীরে।

—না দেবো না।

স্মিত্রার কথা শেষ হওয়ার সঙ্গে সঙ্গে তাঁর গালে পড়লো একটি সজোর চড়। চপেটাঘাতের শব্দ ছড়ালো অন্তরে। আচমকা মার খেয়েছেন স্মিত্রা। বড় বেশী জোরে মেরেছেন রাঙাবাবু। স্মিত্রা যেন চোখে অন্ধকার দেখতে থাকলেন।

নিম্পলক তাকিয়ে থাকতে থাকতে চোখে আঁচল তুললেন। চোখ

ছ'টি যেন কিসের অসহ্য ব্যথায় সজল হয়ে উঠেছিল। স্মিত্রার রঙ ফর্সা তাই হয়তো লাল হয়ে উঠলো চড়-খাওয়া গাল। চোখে আর মুখে আঁচল চেপে ফুঁপিয়ে কাঁদতে থাকেন।

—চাবি না দিলে আলমারী ভেঙ্গে খুলবো আমি, তাও বলে দিচ্ছি।

রাঙাবাবুর উচ্চকণ্ঠে অন্তরমহল যেন সজ্জস্ত হয়ে ওঠে। তাঁর কণ্ঠ মিলাতে না মিলাতে একটা চাপা কান্নার আওয়াজ স্পষ্ট হয়ে ওঠে। স্মিত্রা দেবী যেন আর নীরবে কাঁদতে পারেন না, গুমরে গুমরে কাঁদেন। অনেক অকথা কুকথা অনেকগুণ ধরে ব'লে চ'লেছিলেন রাঙাবাবু। বাক্যবাণে যেন জর্জরিত হয়ে গেছেন স্মিত্রা। সন্দের সীমা ছাড়িয়ে যায় মার খাওয়ার সঙ্গে সঙ্গে। কেমন যেন এক ককণ সুরে কাঁদতে কাঁদতে বললেন,—যা খুশী তুমি করতে পারো, আমি চাবি দেবো না, দেবো না, দেবো না।

রাঙাবাবু রাগে যেন কাঁপতে থাকেন। ক্রোধের আতিশয্যে স্মিত্রার ঘাড়ের এক ধাক্কা দিয়ে বললেন,—যত বড় মুখ নয়, তত বড় কথা! দূর হয়ে যাও ঘর থেকে হারামজাদী!

ঘরের এক কোণে নিশ্চুপ দাঁড়িয়ে ছিল স্মিত্রার এক মাত্র কন্যা—সুচিত্রা। ভয়ে যেন সেও কাঁঠ হয়ে গিয়েছিল। মাকে আছড়ে পড়তে দেখে ডুকরে কেঁদে উঠলো। নাবালিকা কিশোরী সে, অত শত বোঝে না। অসহায়ের মত দাঁড়িয়ে থাকে। কান্না সামলে নেওয়ার চেষ্টা করে। বাবার ভয়ে।

স্মিত্রা মেঝেয় লুটিয়ে পড়লেন। শরীরের কোথায় যেন বিশেষ আঘাত পেয়েছেন তিনি, ধাক্কা খেয়ে প'ড়ে যাওয়ার সঙ্গে সঙ্গে। তাঁর হাতের কনুই দেওয়ালের সঙ্গে ঘষে গেছে সহসা। নারীদেহ কোমল, তাই হয়তো ঈষৎ রক্ত ঝরতে থাকে তাঁর কনুই থেকে। স্মিত্রা দেবী স্বামীকে প্রথম দর্শনেই বুঝেছিলেন যে, স্বামী তাঁর কি এক বিস্ত্রী পানীয়

পান করেছেন। মদ খাওয়া উগ্র মূর্তি রাঙাবাবুর। তাঁর খাসে জুগুৎ ছড়ায় ঘরে।

অনঙ্গমোহন তাঁর দালানে দাঁড়িয়ে শুনতে শুনতে অস্থির হয়ে ওঠেন। কান্নার করুণ সুর, কথা কাটাকাটি—সবই তাঁর কানে পৌছয়। তিনি বললেন,—শ্রাম, বৌটাকে মেরে ফেললে না কি? দেখে এসো না! বৌটা প'ড়ে প'ড়ে মার খাবে আর আমরা কি না দাঁড়িয়ে দাঁড়িয়ে দেখবো!

হুঃখের হাসি হাসলো শ্রামাপদ। ষ্টোভের পাম্প করার কাজে ক্লান্ত হয়ে উঠে দাঁড়িয়ে বললে,—উপায় কি হুজুর? কে বলতে যাবে বলুন? শেষে কি বলতে গিয়ে মারধর খাবে!

—তা বটে। বললেন অনঙ্গমোহন। —হোয়াট ননসেন্স! এই লাঠালাঠির অর্থটা কি?

হাতের কাজে ঘেমে উঠেছিল শ্রামাপদ।

চটপট কাজ সারতে হবে। ষ্টোভটা যাতে নিছক জ্বলতে না থাকে, সেদিকেও চোখ আছে। মিছামিছি কেরোসিন পুড়বে! ডালের হাঁড়ী ফুটতে দিয়ে উঠে পড়ে শ্রাম। ঘেমে উঠেছে সে। এতকালের পুরাণো ষ্টোভ, পাম্প করতে করতে হিমসিমিয়ে গেছে যেন।

শ্রামাপদ বললে,—সদরে যে হুজুর সমন এসেছে!

—সমন? Summons? অনঙ্গমোহন আঁৎকে উঠলেন। বললেন, —কার নামে?

—রাঙাবাবুর নামে।

শ্রামাপদ কথা বলতে বলতে রাঙাবাবুর ঘরের দিকে এগিয়ে যায়। এতক্ষণ কানে শুনছিল, দেখতে যায় বারেক। দূর থেকে চোরা-দৃষ্টিতে

দেখবে, কারও নজরে পড়বে না। এক নজরে দেখে বুঝে নেবে পরিস্থিতি। বেশীক্ষণ দেখতে হবে না।

এমন এমন ঘরোয়া দুর্ঘটনা দেখতে দেখতে শ্রামাপদর জীবন প্রায় ভোর হয়ে এসেছে। এখন আর তাই দেখেও বিকার আসে না মনে। শুধু আশঙ্কা হয়, রক্তারক্তি থেকে খুনোখুনি না হয়!

অন্দরের ঘরে ঘরে ললনারা সজাগ হয়ে উঠেছেন। কেউ দরজায় আর কেউ জানালার পাশে খুলে কান পেতে দাঁড়িয়ে আছেন। কথা কাটাকাটি চলছিল এতক্ষণ, তাই কেউ আর এতটা খেয়াল করেননি! ধাক্কাধাক্কি, মারামারির শব্দ শুনতে পেয়ে কেউ যেন স্থির থাকতে পারলেন না।

বারবাড়ীতে সমন এসেছে। থানা থেকে সমন এসেছে।

আদালতের ডাক এসেছে। উপেক্ষা করলে, যার নামে সমন তার নামে ওয়ারেন্ট জারী হয়ে যাবে। হাতে হাতকড়া বেঁধে টেনে নিয়ে যাবে।

গানের জলসায় ব'সেছিলেন রাঙাবাবু। সমন আসবে তাতো আর জানতেন না। ছইন্ধির নেশাটি যখন সবে মাত্র ধরেছে, ঠিক সেই মুহূর্তে আদালতের পেয়াদা এসে হাজির। এক হাতে লাঠি, আরেক হাতে সমনের কাগজ। নাচঘরের আসরে তখন মাথাটি যেন কাটা গেছে রাঙাবাবুর। ছইন্ধির গেলাশ রেখে তাড়াতাড়ি উঠে প'ড়েছেন। নেশা চ'টে গেছে।

অনেক ভেবে ভেবে বুদ্ধি ঠাউরেছিলেন রাঙাবাবু। পেয়াদাকে যদি দশ পনেরো দিয়ে আজকের মত ভাগিয়ে দিয়ে, দু'দিন পিছিয়ে দিতে পারা যায় সমনের ডাক! পেয়াদাকে শুধু রাজী করাতে পারলেই চলবে। পেয়াদা ফিরে গিয়ে বলবে, আসামী পশ্চিমে হাওয়া খেতে গেছে। দু'চার দিনের মধ্যেই ফিরবে। আসামী তো যা তা ছোটলোকের ঘরের মানুষ নয়, জমিদারবাবু।

অনঙ্গমোহন শুনে প্রথমে আঁৎকে উঠেছিলেন ।

সমন এসেছে । এমনই ভয় পেয়েছিলেন, যেন কোন এক নিকটতমের মৃত্যু সংবাদ শুনলেন অতর্কিতে । চিন্তার কারণ আছে তাঁর । মণিমোহন কলকাতার জুয়ার আড্ডায় ঘোরাঘুরি করে, চীনাপল্লীতে ঘাওয়া আসা করে । গড়ের মাঠে যায় । ফাটকা বাজারে ঘোরে ।

কলকাতার চীনাবাজারে কত জুয়ার আড্ডা চালায় চীনা রমণী । মুখে মদির হাসি আর বুকের মধ্যে, গাউনের আড়ালে, শানানো ছুরি থাকে তাদের ।

মণিমোহনের নামে যদি সমন আসতো, সেই ভয়ে না কি আঁৎকে উঠেছিলেন অনঙ্গমোহন । বললেন,—রাঙাবাবুর নামে সমন এলো কেন শ্রাম ? জানো না কি কিছু ?

শ্রামাপদ দূর থেকে এক নজরে দেখে নিয়ে ফিরে এসে জবাব দেয়,—পাওনাদার হয়তো নালিস ঠুকে দিয়েছে । বাবুদের একোজনের পাওনাদার তো কম নয় !

অনঙ্গমোহন গলা কাঁপিয়ে বললেন,—সমন এসেছে, তা বৌ কি দোষ করলে ! ও ব্যাচারী মার খায় কেন ?

রাঙাবাবুর ঘরের কান্না তখন আরও স্পষ্টতর হয়ে ওঠে । কোন কাকেও অহেতুক ধরে মারলে যেমন অসহায় স্তরে কান্না শোনা যায়, এ যেন সেই ধরনের কান্না ।

স্বমিত্রা দেবী সহায়হীনা । ঘরে কেউ আসে না বাধা দিতে, ঐ মারমুখ স্বামীকে । রাঙাবাবু নেশা করেছেন এখন, কে যাবে তাঁকে রুখতে ।

স্বমিত্রা চৈতন্যে উঠলেন কান্নার স্তরে,—ডাকো আদালতের পেয়াদাকে, দেখে যাক এই রক্তপাত ! সমন এসেছে, বেশ হয়েছে ! ধরে নিয়ে যায় না কেন ?

আরও যেন ক্ষেপিয়ে দিলেন স্বামীকে । রাঙাবাবু লাথি মারলেন আচমকা, মেঝের লুটিয়ে পড়া স্মিত্রার কাঁকালে । বেশ কয়েক মুহূর্তের জন্তু কেমন যেন নিশ্চুপ, নিষ্পন্দ হয়ে থাকলেন হঠাৎ-আঘাতে । অনেকগুলি পরে আবার সেই কান্নার গুমরানি শুরু হ'ল । স্মিত্রা দেবীর মুখ যেন নীল হয়ে গেছে । হাতের কনুই রক্তাক্ত । গালে আঙুলের লম্বা লাল দাগ পড়েছে । রাঙাবাবুর হাতের মুঠোয় উঠে গেছে স্মিত্রা দেবীর মাথার কিছু কেশগুচ্ছ ।

রাঙাবাবু বললেন,—চাবি দাও বলছি এখনও । আলমারী ভেঙ্গে ফেলবো আমি !

কথার প্রতিধ্বনি ওঠে অন্তরে । ঘরে ঘরে ললনারা চমকে চমকে ওঠেন । কখন কার ভাগ্যে কি আছে কেউ বলতে পারে না । এইতো সব কলির সন্ধ্যা, এখনও সারা রাতটাই বাকী প'ড়ে আছে । বাবুরা যখন সুস্থ মস্তিষ্কে থাকেন তখন এত ভয় আর ভাবনা থাকে না । সাদা চোখ থাকলে বাবুদের বুদ্ধিও সাদা থাকে । কিন্তু আজকের রাতে বাবুদের সকলেই প্রায় রঙীন জল পান করবেন । মাত্রা চাড়িয়ে পান করবেন যার যত খুশী । তারপর একেকজন অস্ত্র মূর্তি ধারণ করবেন । মস্তিষ্ক সুস্থ থাকবে না । আর তখন কার ঘরে যে কি অঘটন ঘটবে কে বলতে পারে !

ব্যথাহত স্মিত্রা অতি কষ্টে নিজেকে তুলে উঠে বসলেন, কাঁদতে কাঁদতে । কোমল দেহ যেন আড়ষ্ট হয়ে গেছে । উর্দ্ধাঙ্গের বসন সামলাতে সামলাতে বললেন,—আলমারী ভেঙ্গে কি পাবে কি ? কিছু কি রেখেছো ! সবই যে ঘুচিয়েছো তুমি !

—তা জানি না, এখন আমাকে বাঁচতে হবে । বললেন রাঙাবাবু । আগের মত জোরালো সুরে নয়, কিছু স্তিমিত কণ্ঠে । বললেন,—আমি

তো বেশী চাইছি না, পনেরো বিশ টাকা পেলেই চলবে। পেয়াদাকে আপাততঃ বিদেয় করতে পারলে মামলা উইত্‌ড্‌ করিয়ে নেবো।

কাঁকালের লাধি খাওয়ার নতুন ব্যথায় কাতর হয়ে উঠেছেন স্মিত্রা। হঠাৎ আঘাত পেয়েছেন, বড় বেশী লেগেছে হয়তো। সারা দেহ যেন আড়ষ্ট হয়ে গেছে। কাঁকাল কন কন করছে।

রাঙাবাবু এতক্ষণে রক্তের ধারা দেখতে পেয়েছেন স্মিত্রার এক বাহুতে। টাটকা লাল রক্তের রেখা। চোখে পড়তে ক্ষণেকের জ্ঞান রাঙাবাবুর মন যেন হু হু করে ওঠে। বিবেক যেন দংশায়। রাঙাবাবু যেন বুঝতে পারেন যে, অন্মায় করেছেন। এতটা মেজাজ গরম না করলেও চলতো। মেয়েমানুষের গায়ে কি হাত তুলতে আছে! ঐ মার-খাওয়া, লুটিয়ে পড়া, ব্যথায় কাতর, রক্তাক্ত স্মিত্রার মত মেয়ের অঙ্গে কি হাত তুলতে আছে!

কত দিয়েছে সে! নিরাভরণা হয়ে সকল অলঙ্কার একে একে দিয়েছে। দেনার দায়ে নির্বাত হাজত বাস থেকে বাঁচিয়েছে স্বামীকে।

রাঙাবাবুর কে আর আছে, যে বিপদের সময় এসে পাশে দাঁড়ায়!

কোন আত্মজন নয়। কোন বন্ধু-বান্ধব নয়। থাকেন শুধু স্মিত্রা। দেবী। কত অন্মায় কুকার্য করেছেন রাঙাবাবু। কত বিপদে আপদে পড়েছেন। জেলবাস থেকে বেঁচে গেছেন কতবার! বাঁচিয়েছে যে সে ঐ স্মিত্রা।

রাঙাবাবু নেশাখোর, দুশ্চরিত্রের মানুষ। শুধু বদখেয়ালে আজ পর্যন্ত কত অর্থ যে ব্যয় করেছেন তার হিসেব জানে না কেউ। উপভোগই তাঁর জীবনের ফিলজফি—ঋণং কৃহা মৃতং পিবেৎ প্রবচনটি অক্ষরে অক্ষরে পালন করতে চান। চরম অভাবের দিনেও ত্রিমকার-সাধনা করেন। বাঁধা দিয়ে আর ধার-দেনা চালিয়ে ফুর্তি করেন!

যাদের পাওনা দেনা মেটাতে পারেন না, হুদ গুনতে পারেন না।
যাদের দেওয়া টাকার, তাদের কেউ কেউ কখনও কখনও টাকা ফেরৎ
পাওয়ার আশায় থেকে থেকে থানায় নালিশ করে। রাঙাবাবুর নাম-
সই দেখিয়ে ডায়েরী লেখায়।

থানার অফিসার বিশ্বাস করতে চায় না ফরিয়াদী-পক্ষের বক্তব্য।
অফিসার হয়তো বলেন,—রাঙাবাবু নাম-জাদা ঘরের লোক, তিনি
এমন কাজ করেছেন! রাঙাবাবু সম্ভ্রান্ত ঘরের, এই সামান্য টাকা
ফিরিয়ে দেন নি, এ কেমন কথা?

ফরিয়াদী-পক্ষ বলে,—মিথ্যে কখনও নালিশ চলে কারও নামে?
বিশ্বাস না হয় এইতো দেখুন না হাতচিঠে রাঙাবাবুর নাম-সই। সই
কি আর জাল করা যায়! না ভদ্রলোকে করে?

স্বমিত্রা দেবীকে সংসার করতে হয়। দশজনের সঙ্গে একত্রে বসবাস
করতে হয়। সমাজের কাছে মুখ দেখাতে হয়। সকলের সঙ্গে মিলে
মিশে থাকতে হয়। রাঙাবাবু নেশা করতে পারেন, রাতের পর রাত
অন্ত্র কাটাতে পারেন—তার জের স্বমিত্রাকেই সামলাতে হয়।
লোকের মুখে চাপা দিতে হয়। গায়ের গয়না দিয়ে রাঙাবাবুর ধার-
দেনা মেটাতে হয়। জেলবাস থেকে বাঁচাতে হয়।

কিন্তু এখন প্রায় সবই ফুরিয়ে গেছে। ঘড়ার জল গড়াতে গড়াতে
ঘড়া শূন্য হয়ে এসেছে।

তাজা লাল রক্ত দেখে মনটা কেন কে জানে ঝগেকের জন্ত যেন হ হ
ক'রে ওঠে রাঙাবাবুর। নেশার ঘোরে কি গর্হিত কাজই তিনি করলেন!
বারেকের জন্ত অহুতাপের জ্বালায় জ্বলতে থাকে বুকের ভেতরটা। এখনও
ক্রোধ আর উত্তেজনায় কাঁপছেন রাঙাবাবু। মনে অহুশোচনা জাগলেও
শরীর এখনও উত্তেজিত। ইঁফাতে থাকেন তিনি। ঘন ঘন শ্বাস ফেলেন।

কিশোরী মেয়ে চিত্রা, সেও ভয়ে যেন সিঁটিয়ে যায়। গলা ছেড়ে
কঁদতেসাহসপায়না, বাবার ভয়ে মুখে হাত চেপে ফুঁপিয়েফুঁপিয়ে কঁদে।

অসহ ব্যথা পান স্মিত্রা দেবী। শুধু কঁাকালে নয়, দেহের আরও
কোথাও কোথাও যেন ভীষণ ব্যথা লাগে। এতক্ষণ তিনি যেন ছিলেন
অন্য এক পৃথিবীতে; ভুলে গিয়েছিলেন চন্দনধামের অন্তরমহলের কূলবধু
তিনি। ব্যথার চেয়ে লজ্জায় যেন আরও কাতর হয়ে পড়লেন। কত কে
শুনলো কে জানে! দূরে দাঁড়িয়ে, স্মিত্রার দৃষ্টির অন্তরালে থেকে শুনলো
হয়তো এই লজ্জাকর ঘটনা! শুনলো যত মুখোমুখি দাদেইজীর দল।
শুনে কত খুশী হ'য়েছে অন্য অন্য সরিকরা! কত হাসাহাসি করলো তারা
নিজেদের মধ্যে! এর চেয়ে স্বামী যদি তাঁকে একেবারে মেরেই ফেলতেন!
দিনের আলো ফুটলে কোন্ লজ্জায় মুখ দেখাবেন ঘর থেকে বেরিয়ে?

—পনেরো বিশ টাকা? হঠাৎ কথা বললেন স্মিত্রা। অত্যন্ত মিহি
কণ্ঠে। কষ্টকাতর স্বরে। বললেন,—আগে যদি বলতে আমাকে।
মিথ্যে মিথ্যে এই রক্তারক্তি করলে তুমি।

জীর ভাব-পরিবর্তন দেখে রাজাবাবু চোখ দুটি যেন চিকচিকিয়ে
উঠলো। তিনিও কেমন এক করুণ স্বরে বললেন,—সদরের দরজায়
সমন-হাতে পেয়াদা, তাইতো চাবির গোছাটা চাইছি! তুমি
কিছুতেই যে দিলে না চাবি।

—চাবি তোমার হাতে কক্ষণও দেবো না আমি। এখনও নয়।

আবার সেই কাতর স্বরে কথা বললেন স্মিত্রা। কথা বলতে
বলতে আঁচলে মুখ ঢাকেন। চোখে আঁচল চেপে অশ্রুধারা রোধ করতে
চান যেন। মুখ থেকে আঁচল সরিয়ে বললেন,—টাকা না চেয়ে তুমি যে
কেবল চাবির গোছাই চেয়ে চললে! সোজাশুজি টাকা চাইলে
আমি কি—

—জানো স্মিত্রা ! কথা বলতে বলতে কয়েক পা এগিয়ে গেলেন রাঙাবাবু । বললেন,—মদ খেয়েছি কিনা, তাই মাথাটা কেমন যেন খারাপ হয়ে গেছে সমন আসতে শুনে । এখন আমাকে তুমি বাঁচাও, উদ্ধার কর' । তুমি ছাড়া কে আছে আমার ? কত বিপদ থেকে কতবার তুমিই তো আমাকে বাঁচিয়েছো !

—তুমি যদি বলতে টাকার দরকার, তা তো তুমি বললে না ।

মুখ সিঁটিয়ে সিঁটিয়ে বললেন স্মিত্রা দেবী । অতিকষ্টে কথা বললেন । কেমন আড়ষ্ট হয়ে আছেন যেন এখনও । বললেন,—তোমার হাতে কখনও আমি চাবির গোছা তুলে দিতে পারি ? তোমার এই নেশার মধ্যে ?

—অগ্রায় হয়ে গেছে স্মিত্রা । ক্ষমা কর' । আমাকে বাঁচাও । রাঙাবাবু কথা বলেন কান্দো কান্দো সুরে । বলেন,—ক্ষমা কর' স্মিত্রা, অন্ততঃ আজকের মত ।

—টাকাতো নেই । যা আছে তাতে এক হপ্তার র্যাশনটা হ'তে পারে ।

জলভরা চোখ তুলে বললেন স্মিত্রা দেবী । বললেন,—টাকা দশ বারো আছে ।

—যা আছে তাইই দাও ।

রাঙাবাবুর অসহায় কণ্ঠের অনুরোধ ।

স্মিত্রা বলেন,—তারপর ? তারপর যতদিন না মাস কাবার হচ্ছে, মহল থেকে টাকা না আসছে, উপোসে থাকতে পারবে তো ? আমার এক ফোঁটা মেয়েটা না খেয়ে থাকবে ? কাল রাত পোয়ালেই র্যাশন আনাতে হবে না ?

—তা হ'লে উপায় ? রাঙাবাবু শুধোলেন । সভয়ে ।

ঘরের কড়িকাঠে চোখ তুললেন স্মিত্রা । সজল আঁখিতে তাঁর নৈরাশ্রের ছায়া ফুটে আছে । ঈষৎ কুঞ্চিত মুখে ব্যথার কাতরতা ।

—তুমি বল' উপায় কি। বিষন্ন স্বরে বললেন স্মিত্রা। তাঁর পরনের জামার বোতাম খুলে গেছে না ছিঁড়ে গেছে টানা-হেঁচড়ায়। কথা বলতে বলতে তিনি জামা আঁটতে থাকেন। ব্লাউসের একটা ছুঁটো বোতাম ছিঁড়ে গেলেও আরও ক'টা থাকে।

—এত রাতে আমি কোথেকে টাকা জোগাড় করি !

রাঙাবাবু কথা বলতে বলতে ব'সে পড়লেন খাটের এক কিনারায়। হতাশ হয়ে যেন ব'সে পড়লেন !

—কার কাছে দেনা করেছিলে ? শুধোলেন স্মিত্রা। বললেন,—কে নালিশ করলে ?

—আর বল কেন ! বললেন রাঙাবাবু। পকেট থেকে সিগারেট বের করতে করতে বললেন,—এক ব্যাটার ছেলে আছে, মাত্র পঞ্চাশটা টাকার জন্তে না ব'লে ক'য়ে নালিশ ঠুকে দিয়েছে !

—ওগো সত্যি কথা বল'।

অহুরোধের কাতর স্বরে স্মিত্রা বলেন।

—মাইরী বলছি, কোন শালা মিথ্যে কথা বলে ! বলেন রাঙাবাবু। বললেন,—যেখানে থেকে হোক টাকাটা শোধ দিয়ে দেখে নেবো না শূয়ারের বাচ্ছাকে ! ঘুঘু দেখেছে, ফাঁদ দেখেনি শালা—

—ওগো, আমার কচি মেয়ে ঘরে রয়েছে, তুমি অমন অভদ্র ভাষা আর বল' না।

আঁচলে চোখ মুছতে মুছতে বললেন স্মিত্রা। শ্রাবণের আকাশের মত ধারা যেন থামে না। মেয়ের দিকে চোখ ফিরিয়ে বললেন,—চিত্রা, ঘর থেকে যাও ! দেখে এসো, বাইরে দালান থেকে কারা দাঁড়িয়ে শুনছে। কে কে আছেন !

যত লজ্জা স্মিত্রার, ঐ অশ্লীল সরিকদের কাছে। কি ভাবলো তারা !

সুমিত্রার প্রতি তার স্বামীর এই নির্লজ্জ দুর্ব্যবহার দেখে কত হাসলো মনে মনে ! তাদের পরচর্চার খোরাক জুটলো একটা, যারা লুকিয়ে থেকে শুনছে কাণ খাড়া রেখে ।

দিনের আলো ফুটলে, ঘর থেকে বেরিয়ে কোন্ লজ্জায় মুখ দেখাবে সুমিত্রা ! গালের কালসিটের দাগ দেখাতে বেরুবে ! কল্লুইয়ে ছ'ড়ে-যাওয়া রক্তের দাগ দেখতে পাবে না কেউ ?

নীরব ছ'জনে । রাঙাবাবু সিগারেটে টান দিয়ে যান । এতক্ষণের অনেক ক্রোধ আর অনেক উত্তেজনা প্রশমিত হয় যেন ধূম পানের সঙ্গে সঙ্গে । ঘন ঘন টান দিয়ে যান সিগারেটে । ঘন ঘন ধোঁয়া ছাড়ে ।

এই নীরবতার মধ্যে, বহু দূর থেকে ভেসে-আসা গানের সুর, কাণে যেন বড় বেশী বাজতে থাকে । সেই সদরের নাচঘর থেকে, রাত্রির গভীর অন্ধকার ছিন্ন করতে করতে, কত প্রাচীর আর কত দেওয়াল ভেদ করে ভেসে আসে সারেকীর কান্না !

একটি দীর্ঘ দীর্ঘশ্বাস ফেললেন সুমিত্রা । হঠাৎ কি যেন মনে পড়লো তাঁর । বললেন,—একখানা হাফ-গিনি আছে । তাতে তোমার কাজ হবে না !

এক রাশি হাসি ফুটলো রাঙাবাবুর মুখে । প্রসন্ন হাসি । বললেন,—খুব হবে সুমিত্রা, খুব কাজ হবে । ওঃফ্, বাঁচালে আমাকে । তুমি যে আমার লক্ষ্মী ! তুমি আমার—

—থাক, ঢের হয়েছে ।

অতি কষ্টে, নিজেকে টেনে টেনে, উঠলেন সুমিত্রা । উঠে দাঁড়ালেন । কঁাকালের ব্যথাটা যেন চাগিয়ে উঠলো, মুখ বিকৃত করলেন । বললেন,—থাক । আমি কেউ নই । আমি শুধু লাথি খেতেই আছি । কথা

বলতে বলতে এক মুহূর্ত্ত থেমে আবার বললেন,—ঐ হাফ-গিনিখানা দিয়েই তুমি প্রথম মুখ দেখেছিলে চিত্রার !

—নাও। একখানা হাফ-গিনি গেলে—

বলতে যেন আটকায় না রাঙাবাবুর। মকর মাঝে বারিবিন্দু দেখে-ছেন তিনি। অঁধ-জল-সাগরের মাঝারে দেখেছেন খড় কুটো। নির্ঝম নিরাশার মধ্যে দেখতে পেলেন আশার উজ্জল আলো ! স্মিত্রাকে উঠে দাঁড়াতে দেখে কত যে আশ্বস্ত হ'লেন কে বলবে ! নিশ্চিত্তার খাস ফেললেন তিনি। এতক্ষণের মধ্যে এই প্রথম যেন আরামের টান দিলেন সিগারেটে।

—তুমি সদরে যাও। মিনতি মাখানো কথার সুর স্মিত্রার। বললেন,—তুমি সদরে যাও, চিত্রাকে দিয়ে গিনিখানা পাঠিয়ে দেবো আমি।

কথাগুলি শুনে মনে যেন ব্যথা পান রাঙাবাবু। বিপদে পড়েছেন, অগত্যা কি আর করবেন। খাট ছেড়ে উঠে দাঁড়াতে হয় তাঁকে। বলেন,—আমার সামনে আলমারী খুলতে চাও না তুমি ?

—না !

—আমাকে বিশ্বাস করতে পারো না স্মিত্রা ?

—না !

—আমি তোমার স্বামী, তুমি আমাকে অবিশ্বাস করবে ?

—হ্যাঁ !

—কেন তাই বল ?

—তুমি যে অবিশ্বাসের কাজ ক'রেছো। আমার অসাক্ষাতে আলমারী আর দেওয়াজ খুলে যখন যা মন চেয়েছে বের ক'রে নিয়েছো। আমার কত গয়না, কত দামী দামী সাড়ী, কত সৌখীন জিনিস তুমি

ছাড়া আর তো কেউ নেয়নি ! কথা বলতে বলতে কয়েক মুহূর্ত খেমে আবার বললেন কাঁপা কাঁপা স্বরে—সে-সব নিয়ে কি যে ক’রেছো তুমিই জানো ।

—আমার সংসারেই দিয়েছি । অভাবের দিনে, যখন কোথাও কিছু পাইনি, তখন তোমার মুখে হাসি ফোটাতে ও সবগুলো বিক্রী করতে হয়েছে ।

—মহল থেকে তোমার ভাগে যে-টাকা আসে, তাতে আমার তো কোন দিন কোন’ অভাবই থাকেনা । তুমি মিথ্যে কথা ব’লছো !

—আমি মিথ্যে ব’লবো ?

—হ্যাঁ । তাই তোমার স্বভাব । কেমন যেন দীপ্তকণ্ঠে কথা বলতে বলতে হঠাৎ বিমর্ষ স্বরে স্মিত্রা বললেন,—যাকগে । আমার যা গেছে, চিরকালের মত ঘুচে গেছে । তাদের আর ফিরে পাব না, তা আমি জানি ।

—স্মিত্রা !

—যাকগে, মিথ্যে কথা বাড়িয়ে লাভ নেই । তুমি যাও, সদরে যাও । সমনের পেয়াদা তো আর তোমাদের জমিদারীর প্রজা নয় যে ঠায় দাঁড়িয়ে থাকবে ! সদরে যাও না তুমি ।

—বেশ, তা হলে তাড়াতাড়ি পাঠিয়ে দাও ।

কথার শেষে সিগারেটে শেষ-টান দিতে দিতে রাঙাবাবু ঘর থেকে বেরিয়ে গেলেন । এখন তিনি যেন অন্য এক মানুষ । শান্ত, স্তিমিত, স্থির ভদ্রজনের মত ।

স্মিত্রা আর কোন কথা বলেন না । বলতে যেন ইচ্ছাও করে না তাঁর । কত সময়ে ঐ স্বামীর মুখ পর্য্যন্ত দেখতে ইচ্ছা করে না । মৌখিক কথাবার্তাও কত দিন বন্ধ ক’রে দেন । স্মিত্রার কাছে রাঙাবাবু যেন

এক মূর্তিমান গানি—যার লজ্জায় মুখখানি তাঁর দিনে দিনে পুড়ে গেছে একেবারে ।

রাঙাবাবু নেশায় আসক্ত । মদ খেয়ে ফিরে এসে কি নির্লজ্জ কাণ্ডই না কত দিন করেছেন এক অন্তর লোকের সামনে । মাতলামি করতে করতে কত রাতে নির্দম প্রহার করেছেন জ্বীকে ! কত পাওনাদার রাঙাবাবুর ! স্মিত্রা নিজের গায়ের অলঙ্কার দিয়ে দিয়ে থানা থেকে পাওনাদারের নালিশ মিটিয়ে দিয়েছেন । নির্দাং জেল থেকে বাঁচিয়ে-ছেন স্বামীকে !

তার ওপর রাঙাবাবুর কে কোথায় আছে একজন—যে নাকি বশ ক'রে ফেলেছে রাঙাবাবুকে । চোখে দেখেননি তাকে কখনও স্মিত্রা, দেখতেও চান না । লোকমুখে শুনেছেন, আছে একজন কোন কেউ । চন্দনপুরেই আছে । কোথায় কাছাকাছি । রূপ আছে না গুণ আছে কে জানে, সে নাকি বশীকরণ করেছে রাঙাবাবুকে । আছে কে একজন অজাত কুজাতের মেয়ে । ডাগর-ডোগর, ভরা-যৌবনা ।

স্মিত্রা দেবীর রূপ আছে । তাঁর স্ঠাম দেহ থেকে এখনও যেন যৌবন বিদায় নেয়নি । তাঁর রূপ আছে, রঙ আছে, অপূৰ্ণ গঠনও আছে অটুট । তবুও, তবুও রাঙাবাবু কেন যে ফিরে দেখলেন না, কেউ বলতে পারে না । তবুও কাব্যে পড়া যায়, মানুষ না কি শ্রেয় রূপের পূজারী, ভালবাসে একমাত্র সৌন্দর্যকে !

বন-জঙ্গলে বনফুল ফোটে । আগাছার কাঁটাভরা জঙ্গলে ফোটা ফুলটির মতই স্মিত্রা দেবী যেন সংসারে আছেন, কোন রকমে নিজেকে বাঁচিয়ে, সরিক আর সমাজকে এড়িয়ে । কাঁটার ঘা তবুও এড়াতে পারেন না । রক্ত ঝরে ফুলের পাপড়ি থেকে ।

—চিঁড়া !

প্রায় ফিসফিসিয়ে ডাকলেন স্মিট্রা । পাছে কেউ শুনতে পায় সেই ভয়ে । আবার ডাকলেন,—চিঁড়া !

ঘরে ঢুকলো স্মিট্রা । ঘরের ভেজানো-দরজা আন্তে আন্তে খুলে ঘরে ঢুকলো । বললে,—মাগো !

তখনও চোখে জল স্মিট্রার । কেমন যেন দুঃখ-পাওয়া মুখ । থমথমে, বিষন্ন ।

কোথায় ব্যথা সারাবেন নিজের, ছ'ড়ে-বাওয়া রক্তাক্ত কতুইয়ে কোথায় ওষুধ লাগাবেন তা নয় । স্মিট্রা দেবী দেবরাজের দিকে ধীরে ধীরে এগোতে থাকেন । কঁাকালের ব্যথায় চলতে যেন পারেন না । ফিসফিস বললেন,—ইঁয়ারে চিঁড়া, বাইরের দালানে কেউ শুনছিল ?

—ইঁ্যা । বললে স্মিট্রা । ফোঁপাতে ফোঁপাতে । বললে,—দালানে আলো নেই, তাই সকলকে দেখতে পাইনি মা ।

—তবুও কাকে কাকে দেখলি ? কাকীমারা কেউ ছিল না ?

—ইঁ্যা । মেজকাকী, সেজকাকী আর ফুলকাকীকে দেখেছি ।

—জ্যাঠাইমাদের কেউ ছিল না ?

—দেখতে পাইনি । বড় জ্যাঠাইমা নিজের ঘরের দরজা থেকে শুনছিল ।

দেবরাজের মাথায় আছেন শ্রীরামকৃষ্ণ । আসন-পিড়ি হয়ে ব'সে আছেন ।

কৃষ্ণনগরের মৃৎশিল্প, মাটির শুভ্র মূর্তি । স্মিট্রা, মূর্তি সরিয়ে লুকিয়ে-রাখা চাবির গোছা তুলে নিলেন । রাঙাবাবুর ভয়ে আগেভাগে লুকিয়ে রেখেছিলেন । আলমারীর চাবি খুলতে খুলতে বললেন,—অপর্ণাকাকী ছিল না ?

—অপর্ণাকাকীমা তো ঘরে, ধীরাজের খুব জর হয়েছে যে ।

সুচিঁত্রা কথা বলতে বলতে চোখ বড় করলো ।

আলমারী খুলে এটা সেটা নাড়াচাড়া করতে করতে একটি ছোট
ক্যাশ-বাক্স বের করলেন সুমিত্রা দেবী । বাক্স খুলতে খুলতে বললেন,—
বাবাকে এই টাকাটা চুপি চুপি দিয়ে এসো চিত্রা । যেন হারিও না ।

—না না ।

—মুঠোর মধ্যে নিও ।

—হ্যাঁ ।

মেয়ের হাতে গিনিখানা দিতে দিতে সুমিত্রার হাতখানি কাঁপতে
থাকে যেন । বুকের ভেতরটা মোচড় দিয়ে ওঠে । চোখে যেন অন্ধকার
দেখেন আরেকবার ।

—এ কেমন টাকা মা ? সোনার টাকা ?

সিঁহুর-মাখানো হাফ গিনিখানা তুলে ধ'রে জিজ্ঞেস করলো সুচিঁত্রা ।

—হ্যাঁ । যেন হারিও না । মুঠোর মধ্যে নিও । বাবাকে দিয়ে
এসে ধীরাজ এখন কেমন আছে দেখে আসবে ।

ঘরের বাইরে, দালানের অন্ধকারে অদৃশ্য হয়ে গেল সুচিঁত্রা,
নিমেষের মধ্যে । কত দালান আর কত সিঁড়ি পেরিয়ে তাকে যেতে
হবে সদরে । কত অন্ধকার ভাঙতে হবে তাকে । সেও বুঝেছে
বিপর্যয়ের অশান্তি নেমেছে তাদের ঘরে ।

অপর্ণার ছেলে ধীরাজমোহনের খুব অসুখ !

মেয়ের মুখে শুনে সুমিত্রা ভাবছিলেন, একবার ছেলেটাকে দেখতে
না গেলে খারাপ দেখায় । তাঁকে মেয়ে নিয়ে ঘর করতে হয় । কোথায়
ব্যথা সারাবেন স্থির ব'সে থেকে, ওষুধ দেবেন কোথায়, তা নয়, অপর্ণার
ছেলের অসুখ শুনে কর্তব্যজ্ঞান জেগে উঠলো এখন, ঠিক এই মুহূর্তে ।

দেবরাজের লম্বা আয়নায় হঠাৎ দেখতে পেলেন স্মিত্রা, নিজেকে চোখে পড়লো তার। আয়নার কাছে এগিয়ে গেলেন—দেখলেন মুখখানি রাঙা হয়ে ফুলে উঠেছে যেন। কঁদে কঁদে ফুলছে দুই চোখ। চোখের কাছাকাছি, বাম গালে কালশিটের নীলাভ চিহ্ন। আঙুলের লম্বা ছাপ এঁকে দিয়ে গেছেন রাঙাবাবু। স্মিত্রা দেবীর চাঁদের মত ঢলো ঢলো মুখে কলক পড়েছে যেন। মাথার চুল এলোমেলো হয়ে গেছে। খোঁপা খুলে ঝুলছে বিহুনী। কাঁটা ক'টা খ'সে পড়ো-পড়ো। নীরব ঘর। বাড়ি থেমে যাওয়ার উত্তর মুহূর্ত। সাড়াশব্দ নেই ঘরে। স্মিত্রা দেবীর তপ্ত শ্বাস ফেলার শব্দ শুধু।

নাচঘর থেকে উড়ে-আসল সারেকীর কান্নাটা যেন এখন বড় বেশী বাজতে থাকে কাণে। আয়নায় নিজের মূর্তি দেখে, নিজের ফুলে-ওঠা মুখখানি দেখে ঘর থেকে বেরুতে সাধ হয় না।

কি লজ্জা, কি লজ্জা! কতদিনে এই কালশিটের দাগ মিলোবে কে জানে। তেমনি কি জ্বলছে ছ'ড়ে যাওয়া কুহুইটা! স্মিত্রার আঁচলের এক প্রান্তে রক্তের লালিমা। কুহুইয়ে আঁচল চেপে চেপে রক্তপাত বন্ধ ক'রেছেন, তারই লাল প্রতিচ্ছবি।

অর্পনার ছেলেটির জন্ম মন অস্থির চঞ্চল হয় সত্যিই কিন্তু এই চেহারা কাকে দেখাবেন! সহানুভূতি আর সমবেদনা কুড়াতে বেরুবেন! কেমন যেন ভগ্নমনে খাটে ব'সে পড়লেন স্মিত্রা। দেবরাজের মাথায় রামকৃষ্ণর মূর্তি—তার প্রতি যেন অভিমানের কঠোর দৃষ্টিতে একবার দেখলেন। আবার প্রাণের ধারার মত অনর্গল অশ্রুপাত শুরু হয়। কান্না যেন থেমেও থামতে চায় না!

মেয়েটাকে এখন অর্পনার ঘরে, তার ছেলে ধীরাজকে দেখতে না পাঠালেই যেন ভাল ছিল। অর্পণা যদি খুঁটিয়ে খুঁটিয়ে সকল কিছু জেনে

নের হুমিয়ার কাছ থেকে। কত কি এলোমেলো চিন্তা এসে যেন জড় হয় হুমিয়ার মনে। পাষণ্ড মৃত্তির মত নিখর হয়ে বসে থাকেন তিনি। আর দরদর বেগে জলের ধারা নামে দুই চোখ থেকে।

শিয়াল ডাকছে না! কত রাত হয়েছে কে বলতে পারে! চন্দন-ধামের আশপাশে বাঁশবাগান। রাতের বেলায় কেউ মাড়ায় না সেদিক। অন্ধকারে দেখা যায় না ঘন সন্নিবিষ্ট বাঁশঝাড়—তুখু দেখা যায় দূর আকাশের তারার মত, জোনাকি জ্বলছে অজস্র। বাঁশবাগানের বত্বক শিয়াল, মিলে মিশে এক হয়ে প্রহরে প্রহরে ডাক দেয়।

চন্দনধামের ঘুমন্ত শিশুরা চমকে ওঠে সেই বিকট আওয়াজে।

পালাজরের রোগী ধীরাজমোহনও চমকে উঠলো। অস্থখে ভুগে ভুগে হয়তো দুর্বল হয়ে পড়েছে। স্বস্থ থাকলে তার চাঞ্চল্যে অতিষ্ঠ হয়ে উঠতে হয় অর্পণাকে। সেই ছেলে প'ড়ে আছে যেন মৃতপ্রায়ের মত। ককালসার শরীর, যেন মিশিয়ে গেছে বিছানার সঙ্গে। আতুড় গায়ে দেখলে বুকের পাঁজরা ক'খানা যেন গুনে ফেলা যায়। দেখলে কে বলবে এই সেই দস্তি দামাল ছেলে!

অর্পণা দেবীর ঘরের এক কোণে রেডিও চলছে। অত্যন্ত মিহি সুরে। পাছে ছেলের ঘুম ভেঙ্গে যায়। খানিক আগে বার্লি খাইয়ে ঘুম পাড়িয়েছেন ছেলেকে। গভীর ঘুমে যখন প্রায় অচৈতন্য হয়ে পড়েছে ছেলে, তখন অত্যন্ত সন্তর্পণে খুলে দিয়েছেন রেডিও।

কখন যেন দেখেছিলেন অর্পণা, বেতার জগতের পৃষ্ঠা খুলে আজকের অনুষ্ঠানসূচী দেখেছিলেন। রাত দশটা নাগাদ গান আছে দিলীপকুমার রায়ের। ভজন গান।

অর্পণা দেবী ভীষণ পছন্দ করেন দিলীপকুমারকে। তাঁর কণ্ঠকে।

তার গান শুনতে পেলে ছুনিয়া ভুলে যেতে পারেন অপর্ণা। কি সুমিষ্ট
কণ্ঠ, কত দরদভরা !

দুই হাতে দেহের ভর রেখে উপুড় হয়ে খাটে শুয়েছিলেন অপর্ণা।
পড়ছিলেন যেন কি একখানি মোটা আকারের বই। শরৎচন্দ্রের 'শেষ-
প্রश्न' পড়ছিলেন। ঘরে শুধু রেডিওর কীণতম ধ্বনি। কলকাতা বেতার-
কেন্দ্র থেকে কে এক নতুন গায়িকা খেয়াল শোনাচ্ছেন। উচ্চাঙ্গ সঙ্গীত
গাইছেন ফেনিয়ে ফেনিয়ে।

অলকমোহন ব'সে আছে অপর্ণাবৌদির পায়ের কাছে। সেও যেন
এক মনে, নিবিষ্ট চিন্তে পড়ছে কি একটি খাতা। বাঁধানো একসাইজ বুক।
হঠাৎ অলকমোহন মুখ তুললো।—অপর্ণাবৌদি, বল'তো কার লেখা ?
অপর্ণা কৌতূহলী হাসি হাসলেন মৃদু মৃদু। বললেন,—কোনটা
কার লেখা ?

অলকমোহন বললে —এই যে আমি পড়ছি। তুমি শোন'।

—বেশ পড়'। তবে খুব আন্তে আন্তে, আমার রোগা ছেলে না
উঠে পড়ে ঘুম থেকে !

অলকমোহন পড়তে থাকে :

তোমাকে বললাম—এস
তোমার ধূসর জীবন হতে এস,
তোমার রাত্রির এই ক্লান্ত স্তব্ধতা পার হয়ে এস,
যেখানে প্রভাতের রক্তিম আশা কাঁপছে,
যেখানে আসে রাত্রের পাহাড়ে ঘননীল আভাস
নামে সমুদ্রের গভীর অন্ধকার,
আর তারারা জ্বলে তীক্ষ্ণ নীল আগুনের শিখা
আকাশের স্ককঠিন নিঃসঙ্গতায়।

তুমি কোনো উত্তর দিলে না, শুধু হাসলে,
সে ক্লান্ত, স্তিমিত হাসিতে
রাত্রির অবিশ্রাম, অশান্ত বিষণ্ণতা।

‘শেষ-প্রশ্ন’ বন্ধ ক’রে ফেললেন অপর্ণা। উগুড় হয়ে শুয়ে ছিলেন,
সাবধানে উঠে বসলেন ধীরে ধীরে। এক বালক হেসে বললেন,—কার
লেখা? রবীন্দ্রনাথের?

অলকমোহন ঠোট ওলটালো। নিরাশ মুখ করলো। বললে,—
শুধু ঐ এক রবীন্দ্রনাথ আর রবীন্দ্রনাথ! আর বুঝি কেউ কবি নেই
আমাদের সাহিত্যে?

হেরে গেছেন অপর্ণা। বলতে পারেননি, সেজন্য কোথায় লজ্জা
পাবেন, অপর্ণা আবার এক বালক হেসে বললেন,—কেন থাকবে না।
মাইকেল আছেন, সত্যেন দত্ত আছেন, নজরুল ইসলাম আছেন—

—আর কেউ নেই?

কেমন যেন ধমকের স্বর অলকমোহনের। বিরক্ত মুখাকৃতি।

—কার লেখা বল’না ঠাকুরপো?

উগ্র আগ্রহের সঙ্গে, মুখে হাসি ফুটিয়ে প্রশ্ন করেন অপর্ণা। মিনতির
আভাস যেন কথার ধরণে।

অলকমোহন বললে,—লেখকের নাম সময় সেন। আধুনিক বাঙলা
সাহিত্যের একজন শ্রেষ্ঠ কবি।

অপর্ণা অবাক হ’লেন যেন। চোখে ফুটলো স্থির চাউনি। নতুন জ্ঞান
অর্জনের বিস্ময় যেন চোখে। বললেন,—আমি ভেবেছি তোমার লেখা
বুঝি!

—তুমি একটা আস্ত মূর্খ। আমি আবার কবে কবিতা লিখলাম?
অলকমোহন খাতার পাতা ওলটায় আর কথা বলে।

—আমি ভেবেছি এ বুঝি তোমারই মনের কথা বলছে। তুমি আমাকে। কেমন যেন ধীর-গভীর স্বরে বললেন অপর্ণা। কথার শেষে চোখ ফিরিয়ে অন্য দিকে তাকালেন। যেরদিকে রেডিও, সেদিকে দৃষ্টি ফেরালেন।

—আমার মনের কথা হ'তে যাবে কেন? বললে অলকমোহন। খাতার পাতা ওলটাতে ওলটাতে বললে,—কবির লেখা!

ঈষৎ লজ্জায় সঙ্কুচিত হয়ে ওঠেন অপর্ণা! আগে থেকে না জেনে-
শুনে, কথাগুলি ব'লে ফেলেছেন!

কিছুক্ষণ নীরবে খাতার পাতা উলটে উলটে থামলো অলকমোহন। কোন্ এক পাতায় ধেমের গিয়ে পড়তে থাকলো মনে মনে। অপর্ণা লজ্জা-রাঙা মুখ ফিরিয়ে আড়-নয়নে দেখলেন অলকমোহনকে। তার আনত মুখ। খাতার পাতায় চোখ।

অলকমোহন বললে,—আচ্ছা এটা কার লেখা বল'।

অপর্ণা আবার আগের মত এক ঝলক হাসতে চেষ্টা করলেন, যেন পারলেন না। বললেন,—নিশ্চয়ই আমি জানি না। আচ্ছা তুমি পড়'।

অলকমোহন আবৃত্তির স্বরে পড়া শুরু করলো:

বর্তমানে মুক্তকচ্ছ, ভবিষ্যৎ হোঁচটে ভরা—

মাঝে মাঝে মনে হয়,

হুমুঁথ পৃথিবীকে পিছনে রেখে

তোমাকে নিয়ে কোথাও সরে পড়ি।

নদীর উপরে যেখানে নীল আকাশ নামে—

মাথা নত করলেন অপর্ণা। চোখ নামালেন! আকাশের অল্প-বিদ্যুতের মত একবার ঘেন চমকালেন।

অলকমোহন থামলো। দেখলো একবার কাব্যের শ্রোতাকে।
তারপর আবার পড়তে থাকলো :

নদীর উপরে যেখানে নীল আকাশ নামে
গভীর স্নেহে,
শেয়াল-সকুল কোন নির্জন গ্রামে
কুঁড়ে-ঘর বাঁধি '
গরুর দুধ, পোষা মুরগির ডিম, ক্ষেতের ধান ,
রাতে কান পেতে শোনা বাঁশবনে মশার গান ;
সেখানে ছপুর শ্রাওলায় সবুজ পুকুরে
গরুর মতো করুণ চোখ
বাঙলার বধু নামে ;
নিরালা কাল আপন মনে
পুরোণো বিষণ্ণতা হাওয়ায় বোনে।

থামলো অলকমোহন। খাতার মধ্যে আঙুল চালিয়ে বন্ধ করলে
খাতা। বললে,—কার লেখা বল ?

কি বলবেন কি অপর্ণা ! বিশ্বয়ের ঘোর নামে তাঁর মুখে চোখে।
বললেন,—জানি না আমি। বলতে পারবো না ভাই।

বিরক্ত হয়ে বললে অলকমোহন,—তুমি কোন' কন্ঠেরই নয়। এটাও
ঐ সময় সেনের লেখা।

অপর্ণা যেন বিশ্বাস করতে পারছেন না। কেন কে জানে। ভাবছেন
এই নামে কি সত্যি আছেন কোন' কবি? সত্যিই কি অলোকমোহনের
লেখা নয় ! মিথ্যাই বা বলবে কেন অলক ! পরের লেখা কেউ কেউ
নিজের নামে চালাতে হয়তো পারে, কিন্তু নিজে লিখে অন্যের নামে
কেউ কখনও চালাতে পারে ! এতক্ষণ কথায় কথায় ঝলকে ঝলকে
হাসছিলেন অপর্ণা, আর যেন হাসতে পারেন না।

অলকমোহন আবার খাতার পাতা ওলটাতে থাকে। পাতার পর পাতা, পড়ে না, চোখ বুলিয়ে যায়।

অপর্ণার অস্থির ছেলে ধীরাজমোহন, বেশী জর আর গভীর ঘুমের ঘোরে শিউরে শিউরে উঠেছে কখনও। চোখ কপালে তুলে ঘুমোচ্ছে। অর্কনেত্রে। অপর্ণার মনে পড়লো, ছেলেকে এখনও আজ ওষুধ পর্য্যন্ত খাওয়ানো হয়নি। ওষুধ আনতে যাওয়ার নাম করে বিরাজমোহন গেছেন। গেছেন সেই কতক্ষণ আগে! তবে যখন সন্ধ্যা উৎরেছে। অপর্ণার মনে পড়লো, তিনি বলে গেছেন সাইকেলে যাবেন। ফেরবার নাম নেই কেন তবে এখনও! গেছেন তো আসছেন না কেন? নাচঘরে জ'মে যাননি তো! হাতে টাকা পাওয়া মাত্র কোথায় যে অদৃশ্য হয়ে গেলেন কে জানে। যেখানেই যান, ছেলেটার ওষুধটা কিনে দিয়ে গেলেই চ'লতো। নাচঘরে একবার ভিড়লে আর কি উঠতে পারবেন খুব শীঘ্রি! অপর্ণা বিচলিত হয়ে ওঠেন, ভাবতে ভাবতে। বিনা ওষুধে থাকবে ছেলে?

অলকমোহন পাতার পর পাতা ওলটায় খাতার। কখনও থ' হয়ে থেমে থাকে। কখনও বা গুঞ্জরণ শোনা যায় অস্পষ্ট।

যুঁই ফুল এক রাশি দিয়েছিল অলকমোহন। সেই সন্ধ্যায়। ঘরের হাওয়ায় টাটকা যুঁইয়ের গন্ধ ভাসে যেন। অপর্ণাও থেকে থেকে যুঁইয়ের গন্ধে কেমন যেন আনমনা হয়ে পড়েন। কবিতা শুনে যেন নির্ঝাঁক হয়ে যান।

বিরাজমোহন যদি নাচ ঘরে ভিড়ে যান, তখন কে ডাকবে তাঁকে। কাকে পাঠিয়ে ডাকাবেন অপর্ণা, এই ছমছমে অন্ধকারে!

নাচঘরে সারেঙ্গী কাঁদছে, ককিয়ে ককিয়ে। এক টানা। কখনও দ্রুত

আর কখনও বিলম্বিত। কিন্তু যেন বিরামবিহীন। যেন থামবে না আর। নিদারুণ শোকের নিরবিচ্ছিন্ন কান্নার মত শোনায় যেন। হয় তো মাত্রা-তাল-সম-লয় আছে, আছে মীড়, বাদী আর বিবাদী—সপ্তস্বরের খেলায় আছে আরও কত কি! তবুও কান্নার শোকাক্ত স্বর যেন সারেকীর একটানা ওঠা-নামায়।

বৈশাখের এলোপাতাড়ি বাতাস শুধু তালে তাল রাখতে পারে না। হাওয়ার গতি যে কোন্ দিকে ধরা যায় না।

চন্দনধামের শীর্ষে মরচে-ধরা লোহার ওয়েদার-কক। মোরগের লেজ খ'সে গেছে কতকালের বৃষ্টিজলে! লেজ-কাটা মোরগটা অন্ধকারে ঘুরেছে বনবনিয়ে। কোন' মতে স্থির হয়ে থাকছে না এক মুহূর্ত।

নাচঘরের দ্বারে-বাতায়নে লাল ভেলভেটের ঝুলন্ত পর্দা—বাতাসের সঙ্গে সঙ্গে যেন চঞ্চল হয়ে ওঠে। উড়তে থাকে অভিসারিকার লুটানো আঁচলের মত। দামী সিগারেট, মূল্যবান পানীয়—তাদের উগ্র গন্ধকে হার মানিয়ে দিয়েছে বেল আর যুঁইয়ের মন-মাতানো গন্ধ। নাচঘরের দেওয়ালে আছেন বিগত পুরুষরা—তাদের তৈলচিত্র। কেউ ব'সে আছেন, কেউ দাঁড়িয়ে আছেন—চোখে অভিজাত দৃষ্টি ফুটিয়ে। সারি সারি ছবিতে আজ মালা পড়েছে একেক ছড়া। কি ভাগ্য পূর্বপুরুষদের! ধারা ছিলেন শ্রায়, নিষ্ঠা আর নিয়মের জীবন্ত পরাকাষ্ঠা—তাদেরই পাশে পাশে নগ্ননারীর চিত্ররূপ। বটিচেলী, রাফায়েল, মাইকেল এঞ্জেলোর বিখ্যাত ছবির নকল অঙ্কন। আসল আর নকলে যে কি ভীষণ পার্থক্য কে পরবে! কি অক্ষম অনুকরণ!

গান আর বাজনার ঝঙ্কারে নাচঘর যেন গমগম করছে।

তুলু-তুলু-চোখ বাবুদের কেউ কেউ সোজা আর বসতে পারছেন না।

তাকিয়ায় এলিয়ে পড়েছেন নেশার উগ্রতায়। কড়া হুইকির নেশার চোখে যেন কিছু আর দেখা যাচ্ছে না। প্রচণ্ড নেশায় কারও কারও মুদিত চকু—নিমীলিত আঁখি। কেউ কেউ কারণে অকারণে হাসাহাসি করছেন। হাসির কথা নেই, তবুও হাসি। শুধু হাসি নয়, অটু হাসি। জোরালো নেশার রাশ-ছেঁড়া সজোর হাসি।

সারেঙ্গী ককিয়ে ককিয়ে উঠছে। কখনও দ্রুত, কখনও বিলম্বিত।

কে একজন গান ধরেছেন। খাঘাজ বেহাগের মত টপু খেয়াল গান। গানের সঙ্গে সঙ্গে চলেছে সারেঙ্গী, তানপুরা আর তবলা। মাত্র চার পঙক্তির গান, গীতিকার শোরীর রচনা—গাইতে সময় নেয় কতক্ষণ! গান চলতে থাকে বাবুদের হাসাহাসির সঙ্গে। গানটি এই :

সাথিড়া মানো সাথ্‌ নিভানা

হম পরদেশী লোক বিগানা।

ইস্‌ গলিয়ঁ বীচ আদানি জাঁদা

শোরী অপনা সো অপনা বিগানা সো বিগানা ॥

স্বধাতে যে স্বাদ নেই, মধুতে নেই যে মিষ্টতা, সুরায় নেই যে মাদকতা—সঙ্গীতে তা আছে। যে হৃদয় শত সহস্র জল-প্রপাতের গর্জনে, শত বজ্রের একত্র নির্ঘোষে কাঁপে না, গানের মধুর সুরে তা অভিভূত হয়। কে যেন মত্তমুগ্ধ করেছে নাচঘরের মানুষদের। হুইকির কড়া নেশা না খেয়াল গান, কে বলতে পারে! হাতে হাতে পানপাত্র, বরফ-ঠাণ্ডা। যেন গলানো তরল সোনা, গেলাসে গেলাসে—চলকে চলকে উঠছে তাল দেওয়ার তালে তালে। বাবুদের কেউ কেউ তাল দিচ্ছেন। মাথা তুলিয়ে, পা নাচিয়ে, টুকি দিয়ে।

বড়বাবু চন্দ্রমোহন নেশায় একেবারে চুরচুরে হয়ে পড়েছেন। দীর্ঘ হুই চোখ ক্রমচার মত রাঙা হয়ে উঠেছে। মুখখানা যেন তাঁর অসম্ভব

লাল হয়ে গেছে। এক তাকিয়া থেকে অন্ত এক তাকিয়ার ঠেস দিয়ে
বসতে বসতে চন্দ্রমোহন বললেন,—কার গান হে ?

—শোরীর গান বড়বাবু। স্বর ভৈরবীবহার, তাল মধ্যমান।

গায়ক গান থামিয়ে বললেন সবিনয়ে।

—একসাইটিং ! ভারী চমৎকার গাইছো ভাই তুমি। বহৎ আচ্ছা !

চন্দ্রমোহন বললেন ঠোট চেপে। তাঁর ওষ্ঠপ্রান্তে জলন্ত সিগারেট।
প্রি ক্যাশেলস্, তিলে তিলে পুড়ে ছাই হয়ে যাচ্ছে, ধোঁয়া ছড়িয়ে।
বড়বাবুর চোখে ধোঁয়ার স্পর্শ লাগে। তাই তাঁর বাম চোখ এখন
প্রায় বন্ধ। এক চোখে দেখছেন। মুখ থেকে সিগারেট নামিয়ে বললেন,
—এ গানে কি বলতে চায় শোরী ?

ঈষৎ গর্বে গায়ক খুশীর মূহ হাসি হাসলো ! মুদ্রামূল্য নয়, শুধু মাত্র
মৌখিক তারিফ শুনেই আনন্দ। গায়ক কথা বলে, গানের মত কথাতেও
দরদ ফুটিয়ে। বললে,—মেনে লও, তোমাতে আমাতে মিলন হবে না।
হম পরদেশী লোগ বিগানা। আমি পরদেশী, তাই পর। ইস্ গলিয়ঁ
বীচ আদানি জাঁদা। কিন্তু, এই স্থানে আসা যাওয়া চিরকালের।
শোরী অপনা সো অপনা বিগানা সো বিগানা। শোরী বলছে, যে
আপন সে আপনই থাকবে, যে পর সে পরই থাকবে।

—আহা !

কে যেন বললে, ভাবে বিভোর হয়ে।

হঠাৎ এক রাশ দমকা হাওয়া আসে খোলা দরজা দিয়ে। অনেক,
অনেক দূর থেকে, ছুটতে ছুটতে আসে যেন আজ রাতের লোভে
লোভে ! মুক্তদ্বার পেয়ে ঝাঁপিয়ে পড়ে ঘরের ফরাসে। আলোর ঝাড়
দোলাহুলি করে। মন্দ গতিতে দুলতে থাকে ঘরের আলো।

—হজুর।

ডাক শুনে চোখ ফেরালেন চন্দ্রমোহন ।

ট্রে-হাতে বেয়ারা । বড়বাবুর হাত শূণ্য দেখে, ট্রে এগিয়ে ধরে ।
ভয়ে ভয়ে ।

দৃষ্টি ফিরিয়েই বড়বাবু বললেন,—হোয়াই ডু ইউ ডিস্টার্ব্‌ নন্সেন্স !
খতমত খেয়ে স'রে যায় বেয়ারা । যেন ধাকা খেয়ে ক'হাত
পিছিয়ে যায় ।

গানের ব্যাখ্যা শুনিয়া আবার গান ধরেছে গায়ক । ঠিক পূর্বের মত
স্থললিত কণ্ঠে । থেমে-ধাকা তবলা, তানপুরা আবার বেজে উঠেছে !

খেই হারাণো ভৈরবীর স্বর আবার যেন ছোট্টাছুটি শুরু করলো
চন্দনপুরের আকাশে আর বাতাসে । ঘন কালো রাতের জমাট অন্ধকার
বৈশাখী হাওয়ায় যেন খান খান হয়ে যায় । আকাশের ঘন নীল মেঘ
ছড়িয়ে পড়ে ইদিক সিদিক । স্পষ্ট হয়ে ওঠে রাত্রির আকাশ !

কোথায় যে এক ফালি চাঁদ লুকিয়ে আছে, চোখে পড়ে না সহসা ।
আছে কি নেই, দেখা যায় না । মেঘে ঢাকা ওড়না যেন, কোন্‌ লজ্জায়
খুলতে চায় না । দেখাতে চায় না চাঁদমুখ ।

দিনে মাছি, রাতে মশা । কাঁচা নর্দমা আর এঁদো পুকুরের ছড়াছড়ি
চন্দনপুরে । যেখানে সেখানে বাঁশবন, আকাশচুমী তাল, নারকেল,
বাবলা, মাদার আর দেবদারু । আকাশ থেকে বোমা পড়ার ভয়ে যেন
প্রাকৃতিক কমোডজ্ ! পৃথিবীর যত ভারতলোভী ভিন্দেশী আকাশচারী-
দের দূরবীন-চোখ থেকে বাঁচাতে হবে যেন এই চন্দনপুরকে !

এমনই নোংরা আর অপরিচ্ছন্ন চন্দনপুর । তবুও সেও যেন আজ
রাতটুকুর জন্ত, এলোমেলো বৈশাখী বাতাসের মত, বাবুদের ঐ আলো-
ঝলমল নাচঘরের মত, সারেঙ্গীর ধনির মত, আনন্দে আত্মহারা হয়ে পড়ে ।

মাঝে মাঝে প্রবল হাওয়ায় গাছের পাতা খড়খড়িয়ে ওঠে ।

পাতায় পাতায় চুমোচুমি চলে, কিন্তু রাত্রির শুকতায় মনে হয় যেন হাসাহাসির শব্দ। কারা যেন কাদের উপহাস করছে। হাসছে অট্টহাসি।

চন্দনধামকে ঘিরে আছে, গাছ-প্রহরী।

সে যুগের বাবুদের সখের বাগান ছিল। গোলাপ বাগান। সৌখীন ফুলের বাগিচা। সাজানো বাগান শুকিয়ে গেছে কবে কোন্ কালে, শুধু বেঁচে আছে এখনও তাল, নারকেল, আম, কাঁঠাল, জামরুল আর দেবদারু, পেঁপে আর সুপুরী গাছ। চন্দনধাম পড়ো পড়ো হয়ে এসেছে। প্রাঙ্গণের প্রাচীরও তঁধেবচ। কোথাও কোথাও ভেঙ্গে ধ্বসে পড়েছে। বাহির আর ভিতরের পথ খুলে গেছে। এর তার গরু ছাগল পর্যন্ত আসা যাওয়া করে সেই পথ ধরে! সাজানো বাগান শুকিয়ে গেছে, রোমহকের দল চরতে আসে তাই! ঘাস খেতে আসে।

চন্দনধাম জরাজীর্ণ। গাছ-গাছড়া এখনও সজীব, সতেজ আছে। যত্ন নেই, কেউ দেখে না, তবুও বছরে বছরে ফল ফলে এখনও।

এলোপাতাড়ি হাওয়ায় থেকে থেকে গাছের পাতা খড়খড়িয়ে ওঠে। অন্ধকারকে ব্যঙ্গ করতে কারা যেন অট্টহাসি হাসে!

কে এমন হাসে। মাতালের মত?

এমন দুঃখের রাতে কার এমন হাসি আসে! ব্যঙ্গ আর বিদ্রূপের উপহাস! অন্দরমহলে কেউ কেউ চমকে ওঠেন হাসির শব্দে। এক পক্ষ হাসাহাসি করছে না কি অপর এক পক্ষকে দেখে! এক সরিক হাসছে না কি অন্ত সরিকের দুঃখে! শত্রু হাসছে!

এক অন্ধকার দালানে দু'জন ভীক। অন্যরের অন্তরে থেকেও এক

সঙ্গে যেন চমকে উঠলো হাসাহাসির শব্দে । উড়ু উড়ু হাওয়ায়
গাছের পাতা নেচে ওঠে । যেন জীইয়ে ওঠে । শাখা প্রশাখা জড়াজড়ি
করতে থাকে একে অন্টকে ।

রাধারাণী ফিস ফিস বললে,—কারা হাসছে বল'তো জয়াবৌদি ?

—কি জানি ভাই । আমার যেন ভয় ভয় করে ।

রাধারাণী কার একটি হাত নিজের হাতের মুঠিতে চেপে ধ'রলো ।
খিল খিল হাসি হাসতে থাকলো । চাপা হাসি । বললে,—নাহি-
নাহি ভয়, হবে হবে জয় । কথার শেষে আবার হাসি শুরু করলো ।
কথাগুলি বললে যেন গানের সুরে ।

রাধারাণীর মুঠোর মধ্যে কার বন্দী হাত, ঠাণ্ডা হিম হয়ে গেছে ।
যেন একটু বরফ । রাধারাণী হাসি থামিয়ে বলে,—এত যদি ভয়,
তবে মরতে এলি কেন ?

—বড্ড যে অঙ্ককার ! কখন কি কামড়ায় তার ঠিক নেই । যেমন
অঙ্ককার, তেমনি কি দম-আটকানো গরম ! যদি কেউ ।

—ভয় নেই । বাইনাচ ছেড়ে উঠে আসবে না কেউ—

রাধারাণীর কথায় আশ্বাসের সুর । নিশ্চয়তা । কথা শেষ ক'রেই
এক ছত্র গান গাইলো রাধা,—স্বপনে দৌঁছে ছিছু কি মোহে—

ঘন নীল রঙের নীলাশ্বরী রাধার শ্রীঅঙ্গে । অঙ্ককারে যেন মিশে
থাকে, দেখাই যায় না । ফেসে যাওয়া, তালি-পড়া, সেলাই করা—তা
হোক । তবুও নীলাশ্বরী । কি একটা চেনা চেনা গন্ধ পাওয়া যায়
রাধারাণীর গা থেকে । স্নো, পাউডার না এসেন্সের গন্ধ ঠিক ধরা যায়
না । কি মেখেছে রাধা কে জানে !

—এখানেই দাঁড়িয়ে থাকবি তাই ব'লে ?

গান থামিয়ে রাধারাণী বললে,—হ্যাঁ, এখানেই থাকতে হবে ।

—কতক্ষণ ?

—যতক্ষণ না আসে। ফিস ফিস কথা বলতে বলতে কাকে যেন জড়িয়ে ধরলো রাধা। বললে,—জয়াবৌদি, তুই কি মিষ্টি ভাই! কি নিটোল শরীর তোর! কত নরম!

—থাক, ঢের হয়েছে।

—মাইরী বলছি, আমি এক বিন্দুও বাড়িয়ে বলছি না। আয় তোকে একটা চুমু খাই।

—আবার ছেলেমানুষী হচ্ছেতো? ছিঃ রাধা।

—মনে মনে অহঙ্কার হচ্ছে না তোর? আমি যদি তোর মত হতুম, কি যে করতুম তার ঠিক নেই!

—থাক, আমার মত হয়ে আর কাজ নেই! কপালপুড়িয়ে কাজ নেই।

কেমন যেন ভীতিকাতর কণ্ঠে কথা বললে জয়াবৌদি। দুঃখভারাক্রান্ত স্বরে। নিজেকে মুক্ত করে নিলো রাধারাণীর আবেষ্টন থেকে।

নেহাৎ ঘনকালো আঁধার, তাই দেখা যায় না জয়াকে।

জয়ার পরণের সাদা শাড়ী শুধু চোখে পড়ে আবছা আবছা! লাল পাড় তাঁতের শাড়ী। যেমন পাতলা, তেমনি মন্থণ। নেহাৎ অন্ধকার, তাই জয়াকে যেন দেখা যায় না। শুভ্র ফুলের মতই জয়ার শান্ত রূপ। ছিপ-ছিপে দেহের গঠন। কৌকড়া চুলের চূর্ণ কুস্তল নেমেছে কপালে। নধর, নিটোল অঙ্গপ্রত্যঙ্গ। টিকালো মুখে কেমন যেন অস্বাভাবিক বিষণ্ণতা। ভাসা-ভাসা চোখের কোলে কালিমা!

—কপাল তুমি স্বেচ্ছায় পুড়িয়েছো জয়াবৌদি, তা তুমি যাই বল' না কেন!

—কেন? আমার দোষটা কি তাই শুনি?

চুপ ক'রে থাকে রাধা। জবাব দেয় না কথার। ঠিক যেন অন্ধকারের

মতই নিখর হয়ে থাকে। কি গভীর অন্ধকার এই দালানে! যেন নিরেট কান্ডল! দালানের কাঠের কড়িকাঠের ফাঁকে ফাঁকে কবুতরের বাসা। থেকে থেকে বকম বকম শব্দ তোলে শান্তির দুতেরা।

ঝাঁঝিঁ ডাকছে দালানের নালী-নর্দমায়। অবিরাম নয়,—থেকে থেকে, থেমে থেমে ডাকছে। কেমন যেন ভ্যাপসা গরম এই বন্ধ দালানে! হাওয়ার চলাচল নেই।

—কথা কইলে না যে রাধাঠাকুরঝি? আমার দোষটা কি, তা তো শোনালে না!

হাতে হাত দেয় রাধা। নিজের মুঠোর মধ্যে ধরে জয়্যাবৌদির বরফের মত ঠাণ্ডা একখানি হাত। যেমন ঠাণ্ডা আর তেমনি কি নখর নরম! রাধা বললে,—স্বামীকে যে তুমি আঁসারা দিয়েছিলে! সময় থাকতে বাঁধ বাঁধতে পারলে না। গেরো আলাগা ক'রেছিলে তাই ছিঁড়ে গেল!

—আমি এসেছি তখন পরের ঘর থেকে, আমি কি দিয়ে বাঁধ বাঁধবো?

—কেন, রূপের ফাঁদের বাঁধ কোথায় ছিল তখন?

জয়্যাবৌদি থেমে থাকে কয়েক মুহূর্ত। তারপর হতাশ-স্বরে বলে,— তা থাকলে কি ভাবনা ছিল কিছু! রূপ আমার কোথায়! তোমাদের উচিত ছিল, কোন' সুন্দরী মেয়ের সঙ্গে তোমাদের দাদার বিয়ে দেওয়া। তা হ'লে—

—তা হ'লে কি? রাধা শুধোয় ফিসফিসিয়ে।

—তা হ'লে তিনিও স্থখে থাকতেন, আমারও কপালটা পুড়তো না।

—আজ্ঞেবাজে বক' কেন? তুমি বলতে চাও, তোমার রূপ নেই?

—না।

—যা আছে তাই বা কার থাকে?

—কোন' কাজে লাগলো না ভাই। রখাই গেল।

—তাপসদা এখন কেমন আছেন? ডাক্তাররা কি বলছে?

—আছেন একই রকম। ডাক্তার বলছে যে, এ অস্থি সারবার নয়। কোন' ওষুধ নেই।

প্রশ্নটি যেন না করলেই পারতো রাধা। বিষন্নকাতর কণ্ঠে কথা বলে জয়া। নিরাশায় ভেঙ্গে পড়ে যেন। উত্তর শুনে রাধার মত মুখর আর চপল মেয়েও নীরব হয়ে যায়। একটা দীর্ঘশ্বাস ফেললো রাধা।

তাপসমোহনই জয়ার জীবনদেবতা—বিবাহিত স্বামী—ইহকাল আর পরকাল। মৃত পিতার একমাত্র বংশধর তাপসমোহন। হাতে সম্পত্তি পাওয়ার সঙ্গে সঙ্গে বন্ধুবান্ধবদের পাশ্চাত্য প'ড়ে বিগড়ে গেলেন রাতারাতি। কাপ্তেনী আর বাবুয়ানির জন্তু জলের মত টাকা ওড়াতে শুরু করলেন। একেই কাঁচা বয়স, তার ওপর কাঁড়ি কাঁড়ি কাঁচা টাকা হস্তগত হওয়ার আনন্দে তাপসমোহন ভুলে গেলেন যেন সংসার-ছুনিয়া। কলকাতার সেরা সেরা রূপসীদের পায়ে যে কত কত টাকা ঢাললেন, তার কোন' ঠিক থাকলো না। বিনিময়ে প্রেম না ভালবাসা কি যে পেলেন কে জানে। তবে এক ছুরারোগ্য ব্যাধির আক্রমণ এড়াতে পারলেন না। সেরা সেরা সুন্দরী রমণীদের দেহবল্লরী যে বিয়াক্ত হ'তে পারে, ভাবতে পারেননি তাপসমোহন। কল্পনা করতে পারেননি,—চাঁদেই থাকে কলঙ্ক, সুগন্ধি ফুলে থাকে কীট-পতঙ্গ, তেমনই রূপবতীর দেহ হ'তে পারে বিষ-জর্জর! তাপসমোহন তো আর এমন কিছু নীলকণ্ঠ নয়, যে, যা খাবেন তাইই হজম ক'রে ফেলবেন!

রাশি রাশি টাকা জলের মত খরচা ক'রে ব্যাধি কিনেছেন তাপসমোহন। শরীরও তাঁর অকালেই পঙ্গু আর অকেজো হয়ে পড়েছে। উদ্বাসনশক্তি হারিয়ে ফেলেছেন, তাই এখন শয্যাশায়ী। তাপসমোহনের অঙ্গ-প্রত্যঙ্গ এখন লুপ্তশক্তি, পক্ষাঘাতগ্রস্তের মত অনড় আর অচল।

বাকশক্তি প্রায় নেই বললেই হয়। মস্তিষ্ক পর্য্যন্ত আক্রান্ত। মানুষ চিনতে পারেন না। যোর তপস্বীর মতই যেন বাহিরের জ্ঞানশূন্য। প্রথম প্রথম তাঁর সেবা আর শুশ্রূষার জন্তে ছিল রমণী-নার্স, আর এখন !

শ্রেফ চাকরের দয়ায় থাকতে হয় এখন। চাকর যা করায় তাই করেন। ডাক্তার শুধু ইন্জেকশন্ দিয়ে যায়।

অথচ কত রূপ জন্মাবোধির এখনও ! দিনে দিনে পাপড়ি খসে যায়, ফুল শুকিয়ে যায়,—কিন্তু জন্ম যেন দিনকে দিন তিলোত্তমা হয়ে উঠছে।

—তোমার জন্তে মাঝে মাঝে খুব কষ্ট হয় আমার। বললে রাধা। এক হাতে জন্মের কোমর জড়িয়ে ধরে বললে,—তাইতো আজ তোকে এখানে পাকড়াও করে এনেছি। কত কষ্টে আছিস তুই !

—কেন, এখানে কেন ? বিশ্বয়ের সঙ্গে কথা বলে জন্ম। বলে,—এখানে এই ভ্যাপসা গরমে আমার কোন্ কষ্টটা সারবে তাই শুনি ! এখানে কি আছে ? তোমার হেঁয়ালীর কিছুই বুঝে উঠতে পারছি না তাই আমি !

কি যেন বলতে চায় রাধা, বলতে পারে না মুখ ফুটে ! আমতা আমতা করতে করতে বললে,—বৌদি, আমি একটা কথা বলবো তোকে, রাখবি ?

—কথাটা কি তাই শুনি আগে।

—রাখবি বল্ ?

—আগে শুনি তারপর বলবো। কি কথা ?

—যদি না রাখিস, তখন ?

—চেষ্টা করবো, ব'লেই দেখ' না তুমি।

কি যেন চাপতে চায় রাধা। বলতে পারে না। পেশ করতে পারে না তার বক্তব্য। বলে,—জানিস বৌদি, তপনদা তোকে ভালবাসে !

খিল খিল হাসি হেসে উঠলো জয়া। সহজ, সরল হাসি। তার হাসির প্রতিধ্বনি ভাসলো দালানে।

রাধা বললে,—বিশ্বাস করলি না তুই?

হাসি থামিয়ে জয়া বলে,—এ কথা কি বিশ্বাসের যোগ্য? তপন তো শুনতে পাই তোকেই ভালবাসে।

—তপনদা এখুনি আসবে এখানে, তার মুখেই শুনবি'ধন তুই।

—রক্ষে কর' ভাই। তার মুখে আর শুনে কাজ নেই। তপন আমাকে ভালবাসে! হাসালি তুই।

আবার খিল খিল হাসি ধরলো জয়া। হাসির বেগে যেন বেসামাল হয়ে পড়লো।

রাধা বললে,—তপনদা বলছিল, তোমাদের ঐ জয়াবৌদির সঙ্গে যদি আলাপ করিয়ে দিতে পারো, তা হ'লে—

—তা হ'লে, থামলি কেন?

—তা হ'লে, আমাকে তপনদা এক জোড়া কানের ছল গড়িয়ে দেবে কেউ শ্রাকরার দোকান থেকে।

—তাই না কি?

অবাক-স্থরে বললে জয়া। চোখ বড় ক'রে বললে।

—ই্যা রে বৌদি। তুই ভাই আপত্তি করিস্ না যেন। ঐ বোধ হয় তপনদা আসছে।

—রক্ষে কর' ভাই। আমি পালালাম এখান থেকে। তোমাদের এই নন্দনকানন থেকে।

—ছ'টি পায়ে পড়ি বৌদি, যাসনি ভাই।

দালানের অন্ত প্রান্তে যেন এক ছায়ামূর্তি। হঠাৎ দেখা দেয়। ধীরে ধীরে এগিয়ে আসতে থাকে।

জয়া বললে,—তুমি থাকো ভাই রাধাঠাকুরঝি, আমি আর নয়।

—ছ’টি পায়ে পড়ছি তোমার। তপনদা তোকে—

—না, না তা হয় না, তা হয় না।

কথা বলতে বলতে, চকিতের মধ্যে অদৃশ হয়ে গেল জয়াবৌদি।
যে-পথে এসেছিল সেই পথ ধরে দৌড়তে থাকলো।

দালানের নালী-নর্দমায় হয়তো ছিল সাথীহারা একটা বেড়াল।
ম্যাও ম্যাও ডাক শুরু করলো। ডাকলো বিড়ালীকে।

স্ববিশাল চন্দনধামের এই তল্লাট জনশূন্য। মাহুষের বসতি নেই।
পরিত্যক্ত।

যাদের অধিকার তাঁরা পরিত্যাগ করেছেন অনিচ্ছায়। অভাব আর
অনটনের তাড়নায় বিক্রী ক’রে দিয়েছেন কাকে যেন। দখল নেয়নি
ক্রেতা এখনও। ঘরে ঘরে তালা ঝুলছে। বিক্রেতার ঘর-দালান খালি
ক’রে দিয়ে চ’লে গেছেন চন্দনধাম থেকে। নগদানগদি টাকা কয়েক
হাজার পেয়ে, হাতে যেন স্বর্গলাভ হওয়ায় ভাগ্য ফেরাতে গেছেন
কলকাতার শহরতলীতে। কলকাতার ঠিক বৃকের ওপর থাকতে না কি
অনেক কাঠ, খড় পোড়াতে হয়। শহরতলীতে তত হয় না, অথচ
কলকাতার সঙ্গে যোগাযোগ রক্ষা করা যায় অতি সহজে। তাই এখান
থেকে বসতি উঠিয়ে কলকাতার বৃকে নয় কোলে গিয়ে বসবাস করছেন।

—রাধা!

—হ্যাঁ। তপনদা?

—হ্যাঁ।

—আজ কোন্ দিক দিয়ে এলে? কেউ দেখতে পায়নি?

—আকাশের চাঁদও দেখতে পায়নি, মাহুষ তো দূরের কথা। এসেছি
তোমাদের বাগানের বেড়া ডিঙিয়ে। একটা কুলগাছ ছিল, অন্ধকারে

দেখতে পাইনি। কুলগাছের কাঁটায় আমার পাঞ্জাবীটাই ছিঁড়ে গেল
কতখানি!

—আহা! গায়ে-টায় ফুটে যায়নি তো!

—পদ্মফুল তুলতে নেমে কাঁটাকে ভয় করলে কি চলে?

—আমি কতক্ষণ ধ'রে এখানে ঠায় দাঁড়িয়ে আছি, তোমার জন্তে!
একা একা আমার ভয় করে না বুঝি? দেরী করলে কেন এত? জয়া-
বৌদিও ছিলেন এতক্ষণ। তাড়াতাড়ি এলে আলাপ করতে তার সঙ্গে।

—অন্ধকারটা জমাট না বাঁধলে চোর কখনও চুরি করতে বেরোয়!
আমার দুর্ভাগ্য!

—কি চুরি করবে তুমি?

—কেন, তোমাকে!

—দ্যেং! কেবল তোমার ইয়ারকি। বাজে কথা আর ধাপ্লাবাজী
রোজ রোজ ভাল লাগে না।

—আমি যে নিরুপায়।

—কেন? চল' না, তোমাতে আমাতে কেটে পড়ি ছ'জনে।
কোন দিন বাড়ী থেকে একটা উটকো জানোয়ারের সঙ্গে হয়তো বিয়ে
দেবে! চলে যেতে হবে কানপুর কি লক্ষ্ণৌ, দিল্লী কিংবা বোম্বায়ে।
তারপর তখন?

—একটা চাকরী-ফাকরী না জুটিয়ে শেষ পর্যন্ত কি গাছতলায়
দাঁড়াবো তোমাকে নিয়ে?

—কত বি, এ আর এম, এ ফ্যা ফ্যা করে ঘুরে মরছে, তুমি
কোথেকে চাকরী জোটাবে?

—বি, এ আর এম, এ-রা কি চাকরী পায় রাধা? তারা ঐ ফ্যা
ফ্যা করেই ঘুরে মরে। চাকরী জোটাতে না পেরে শেষকালে

সুইসাইড করে। কাগজ দেখতে পাও না, গড়ের মাঠের গাছে স্থান
শিক্ষিত বেকার যুবকের উদ্ভ্রম্নে আত্মহত্যার খবর ?

—তোমাকে কে দেবে চাকরী ?

—কেন আমার অমন মামা যখন রয়েছেন তখন আমার চাকরীর
ভাবনা ? কংগ্রেসী মিনিষ্টারদের সঙ্গে আমার মামার যাকে বলে
গলায়-গলায় !

—তাই না কি ?

—কলকাতার রাজভবনের লাঞ্চ আর ডিনার পার্টিতে ডাক পড়ে
মামার। ভেবো না, ভেবো না রাধা, তোমাকে আমি ঠিক—

—থাক, থাক, তোমার শুধু সব সময়ে বড় বড় কথা ! কদিন থেকে
শুনছি আমি !

—আমাকে তুমি ভুল বুঝলে রাধা ?

—ভুল বোঝাবুঝির কি আছে ? আমি কি বেওয়ারিস না কি ?
শুধু মুখের কথায় কাজ বাগাতে চাও তুমি ! ধাপ্পা দিয়ে ভুলিয়ে রাখতে
চাও ! আমি কি কিছু বুঝি না ?

অনেক কষ্ট আর অনেক ব্যথা বুকে পুষে কথাগুলি যেন বলতে থাকে
রাধা। কেমন যেন ক্ষীণ আর করুণকণ্ঠে। অন্ধকার, তাই দেখা যায় না,
রাধার চোখ দু'টিও জলে ভ'রে গেছে। কুমারী-মন রাধার, তাই বড় বেশী
যেন তাকে কাতর দেখায়। মেঘ না ডাকতেই যেন জল ঝরতে থাকে।
ঘন ঘন শ্বাস পড়ছে তার। নীলাম্বরী শাড়ীর আঁচল চোখে তুললো রাধা।

—মিথ্যে মিথ্যে রাগ ক'রছো তুমি।

—না তপনদা, আর নয়। অনেক হয়েছে, আর নয়।

—রাধা, তুমি আমাকে ভুল বুঝবে !

—না না, ভুল নয়। আমারই ভুল হয়ে গেছে, অগ্রায় হয়ে গেছে।

তুমিও আর এসো না ! বিয়ে যদি করতে না পারো, কোনদিন পাবে না আমাকে ।

—রাধা ! তোমার কি হয়েছে কি আজ ?

—কিছু হয়নি ! সোজা আর স্পষ্ট কথা খোলাখুলি জানিয়ে দিলুম । আর ঠকতে আমি রাজী নই ।

—একটা চাকরী জোগাড় না ক’রে কেমন ক’রে—

—তবে চাকরী হোক আগে, তারপর এসো, সাড়া পাবে আমার । আমি চ’লে যাচ্ছি এখন । আর নয়, অনেক হয়েছে ।

—রাধা !

—না, আর নয় ।

—রাধা !

—উহু ।

—রাধা !

—না, না ।

—রাধা ! রাধারানী !

কোথায় কে ! নন্দনকানন থেকে হঠাৎ অদৃশ্য হয়ে গেল রাধিকা । বাণীর ডাকে আর সাড়া মেলে না অভিসারিকার । চোখে যেন শুধুই অন্ধকার দেখে তপন । কিঁকিঁ ডাকে, যেন বিজ্রপের সুরে । দালানের নালী নর্দমায় বেড়ালটা ক’বার ডাকলো ম্যাও ম্যাও । সাথীকে ডাকলো হয়তো । কোথায় যে হারালো বিড়ালী !

চোরের ছায়ামূর্তি, তপনকৃষ্ণের কায়ামূর্তি, খানিক নিম্পন্দের মত দাঁড়িয়ে, দালানের অন্ত প্রান্তে মিলিয়ে গেল ধীরে ধীরে । আকাশের চাঁদের চোখকে ফাঁকি দিয়ে ফিরতে হবে । কুলের কাঁটা বিঁধবে হয়তো দেহে ! কাঁচা বাঁশের বেড়া ডিঙাতে হবে ।

আবার কে অন্ধকারে আঁচল টানে অভিমানিনী রাধার !

এক ইঁচকা টানে থামিয়ে দেয় যেন চলন্ত রাধাকে । চমকে শিউরে উঠলো সে । সক্রোধে ফিরে দাঁড়ালো । চেষ্টা করে উঠতে পারে না ধরা পড়ার ভয়ে, বাড়ীর লোকের কাছে । সাপের মত ফোস করলো যেন রাধা । ফিরে দাঁড়িয়ে বললে,—কে: ?

—আমি রে ঠাকুরঝি ।

—কে: ? জয়াবৌদি ?

—হ্যাঁ ।

—তুমি এখানে দাঁড়িয়ে আছো তখন থেকে ?

—হ্যাঁ ভাই । শুনছিলুম তোমাদের প্রেমালাপ । খন্টি মেয়ে বটে তুই ! ভাগিয়ে দিতে হয় এমন নিষ্ঠুরের মত ?

চোখভরা জল রাধার । ছলছল দুই চক্ষু । অহুতাপের জ্বালা ধরছে যেন বুকে । এমন কড়া কড়া কথাগুলো না বললেই হয়তো চলতো । কিন্তু কত জ্বালায় যে কথা ক'টা রাধা বলেছে, তা হয়তো কেউ জানে না । সমবয়সী আত্মীয় আর প্রতিবেশীদের কেউ আর বাদ নেই এখন, সকলেই পেরিয়ে গেছে একে একে । শুধু রাধাই আছে একলা-সঙ্গী । পাত্র জোটে তো দাবী মেটানো যায় না । দাবী যদি মিটলো, পাত্র পছন্দ হয় না । পর্বতপ্রমাণ দাবী করলো হয়তো বরপক্ষ, নয়তো খোঁজখবর নিয়ে জানা গেল, পাত্রটি শ্রেয় উজবুক আর অশিক্ষিত । দুইয়ের সমন্বয় হয় না, তাই রাধাকেও থাকতে হয় কুমারী । কুড়ির ঘরে পা পড়লো, তবুও এখনও সিঁদুর উঠলো না সীঁথিতে । আইবুড়ী নাম ঘুচলো না । মরুপথে নদীর ধারা যে হারাতে চললো সত্যিই !

যন অন্ধকার, তাই দেখা যায় না ।

আঁচলে চোখ মুছলো রাধা। বললে,—ভাগিয়ে দিয়েছি, বেশ করেছি! বিয়ে যদি না করতে পারে, কি সম্বন্ধ আমার সঙ্গে?

—তাই ব'লে এমন মুখ-ঝামটা দিয়ে তাড়িয়ে দিবি। আহা, এসেছিল হয়তো কত আশায় আশায়?

—খুব চিনি আমি। পুরুষরা ঐ ধরনেরই হয়, কাজ বাগিয়ে কেটে পড়ে। কথা বলতে বলতে আবার রাধা চোখ মুছলো আঁচলে। তপ্ত অশ্রুধারা মুছলো।

—দয়া মায়া নেই তোর মনে, যাই বল কেন।

চূপচাপ থাকলো রাধা। সত্যিই যেন দিনকে দিন কেমন নির্দয় আর আর নিষ্ঠুর হয়ে উঠছে সে। আগে যেন ছিল শান্ত-কোমল। এখন কঠোর, কঠিন, মমতাবিহীন। আগের দিনের সেই নব্বতা আর নেই। এখন যেন শুধু ক্রন্দ-কষ্ট, তিত্তিবিরক্ত।

রৌদ্রের আলোয় যেন ঝলসে-যাওয়া ফুল। স্বগন্ধ উবে গেছে। রঙ জ'লে গেছে। কবে বুঝি পাপড়ি থ'সে ঝরে পড়বে!

ঝাঁঝের ডাক কখনও ধামে, কখনও চলতে থাকে। মাঝে মাঝে যেন দম ফুরিয়ে যায় ক্ষণেকের তরে। সাথীহারা বেড়ালটা ডাকছে তো ডাকছেই। হয়তো কাঁদছে। কোথায় যে অদৃশ হয়েছো বিড়ালী! কে যে চুরি করেছে, কে জানে।

রাধার চোখের জল বুঝি শুকিয়ে যায়। বলে,—বেড়ালের কান্না ভাল নয় বৌদি! বেড়াল ডাকলে গেরস্থের অকল্যাণ হয়।

—তা জানি। অমঙ্গলের বাকী কিছু আছে? জমিদারী চলে যাচ্ছে, বাস্তুবাড়ী বিক্রী হয়ে যাচ্ছে। কে যে কোথায় গিয়ে দাঁড়াবে কে বলতে পারে?

—কেন এমন হ'ল ভাই?

—জমিদারবাবুদের দোষে। জয়াবৌ কথা বলে সামান্ত জোরালো কণ্ঠে। বললে,—ওড়ালে আর পোড়ালে টাকা থাকে কখনও। উড়িয়ে আর পুড়িয়েই চন্দনধামের বাবুরা ফতুর হয়ে গেল।

কথায় কেমন যেন আক্রোশ ফুটিয়ে রাখা বললে,—কোন' দিকে দিকপাতই নেই বাবুদের, শুধু নিজেদের নিয়েই মত্ত হয়ে আছেন। কোথা থেকে যে আসবে, কোথা থেকে যে চলবে তার ভাবনা-চিন্তা নেই।

রাধা হয়তো বলতো না এ সব কথা। সত্যিই যে দূকপাত নেই চন্দনধামের বাবুদের। চোখ নেই যেন কোন কিছুতেই। আর তাই যদি থাকতো, রাধা কি তবে এতদিনেও থাকতো অবিবাহিত। কবে তার বিয়ে হয়ে যেতো। লজ্জা থাকতো না, অপমানের জালায় জলতে হ'তো না রাধাকে। চন্দনধামের বাবুদের প্রতি রাধার কোন রাগই থাকতো না। কিন্তু এখনও যে সিঁহুর পড়লো না সীমন্তে, মাথায় ঘোমটা উঠলো না।

দালান ধরে এগোতে এগোতে কথা বলাবলি চলতে থাকে। দালানে যেন একটা একটা কথার প্রতিধ্বনি ভাসতে থাকে। চন্দনধামের এই পরিত্যক্ত অংশ পেছনে ফেলে এগিয়ে চলে ছ'জনে। কেমন যেন গা ছম ছম করতে থাকে। ভয় ভয় করে।

পরিত্যক্ত অংশ যেন দানবের মত হাঁ করে আছে। একটা কুটো পড়লে শব্দ ওঠে, এমনই ফাঁকা। যেমন অপরিচ্ছন্ন, তেমন অন্ধকার। উঠানে ঘাস গজিয়েছে; আলিশা, কার্নিশ আর পাঁচিলে বট আর অশ্বথের চারা মাথা চাড়া দিয়ে উঠেছে। ঘরে ঘরে পশু আর পাখী বাসা বেঁধেছে। পায়রায় ডিম পাড়ছে। বিল্লী বাচ্ছা বিইয়েছে গণ্ডায় গণ্ডায়। সাপে খোলস ছেঁড়েছে। দালানের কোথাও ডিমের খোলা,

কোথাও মরা বিড়াল-ছানার অস্থি, আবার কোথাও বা সাপের খোলস। হাওয়ার যেন দুর্গন্ধ বইছে।

কোনদিন হয়তো ঝড়ের দোলায় খসে পড়বে এই অংশটা।

—আচ্ছা বৌদি, তোর কষ্ট হয় না? রাধা কথা বললে কতক্ষণ পরে।
কেন? কষ্ট হবে কেন?

—আমি হ'লে থাকতে পারতুম না। বিগড়ে যেতুম ঠিক।
তাপসদা তো শয্যাশায়ী, পঙ্গু!

এক বলক লজ্জা নামে জয়ার মুখভাবে। দুঃখের লজ্জা। কথাগুলি
শুনতে শুনতে হঠাৎ মাথাটা কিম্বিকিমিয়ে ওঠে! সর্কাজ যেন জ্বলতে
থাকে লজ্জার ব্যথায়।

তবুও হাসলো জয়া। ক্ষীণ হাসি ফুটলো তার ঠোঁটের ফাঁকে।
বললে,—ও সব কথা যেতে দে ঠাকুরঝি। কপালে যা আছে—

—কপাল! বিশ্বাসই করি না আমি। কেমন যেন তাচ্ছিল্যের
সঙ্গে বলে রাধা। জোরালো কণ্ঠে। বলে,—আমি যদি তুই হতুম
দেখতিস কি করতুম! কপালতো মানুষের নিজের হাতে।

—এমন যেন কারও না হয় কখনও। পরম শত্রুর যেন না হয়!

—তাইতো তোকে দেখলে আমার বুকের ভেতরটা যেন কেমন
করতে থাকে!

কথার দুঃখ ফুটিয়ে কথা বলে রাধা। সহানুভূতি ফুটিয়ে।

হঠাৎ কোন্ এক ঘর থেকে সামান্য এক ফালি অম্পষ্ট আলো
পড়লো মুখে। যত এগোতে থাকে তত যেন স্পষ্ট হয় আলো। তত
যেন স্পষ্ট হয়ে ওঠে দু'জনের মুখ। মিশ্‌কালো অন্ধকার থেকে
আলোর আভাষ এসে আসল রূপ যেন চোখে পড়ে।

—কে লা তোরা ?

কোথা থেকে প্রশ্ন করলে এক বৃদ্ধা নারীর কণ্ঠ ।

চমকে উঠলো দু'জনে । রাধা আর জয়া । পরস্পর দু'জনে
দু'জনের গা টেপাটেপি করলো ।

ফিসফিস বললে রাধা,—কাণ আছে তো বুড়ীর !

—কি হবে ঠাকুরঝি ! যদি বলে, এদিকে কেন এসেছো ?

আবার সেই বৃদ্ধা নারীর কণ্ঠ কথা বললে,—কে ? কথা কও না
কেন ? কে জানে বাবা, চোর-ছাঁচোড় নয়তো ! কে গা তোমরা ?

ঘে-ঘর থেকে আলো ছড়িয়েছে, সে-ঘরে আছেন কে এক নারী,
যার কাঁপা-কাঁপা কণ্ঠ ।

রাধা হাসতে শুরু করলো বুড়ীর ব্যস্ত কথায় । মুখে আঁচল পুরে
ধরলো । ঈষৎ ঝুঁকে পড়লো হাসতে হাসতে । তাই না হেসে
পারলো না জয়া, সেও হাসতে থাকলো সঙ্গে সঙ্গে ।

—ভয় দেখাবি বৌদি ?

হাসির বেগ কমিয়ে বললে রাধা ।

—না ভাই । সত্যি সত্যিই ভয় পেয়ে যদি টেঁচিয়ে-ফেঁচিয়ে ওটেন !

বৃদ্ধা আবার বললেন,—কে তোমরা ? কথা নেই কেন ?

হাসতে হাসতে যেন লুটিয়ে পড়ে রাধা । ঘরের দরজার কাছে
এগোয় বৌদির একটি হাত ধ'রে টানতে টানতে । জোর ক'রে হাসি
খামায় রাধা । বলে,—ছোট্টাগুমা আমরা এসেছি চুরি করতে ।
কে বল'তো আমরা ?

—তাই বল' । আমি ভাবছি কে না কে ! আচ্ছা মেয়েতো
তোরা ! বৃদ্ধা কাঁপা কাঁপা স্বরে কথাগুলি বললেন ।

—আমি কে তাই বল' না ।

—রাধা না তুই ?

পরস্পর চোখ চাওয়া-চাওয়ি করলো দু'জনে । চোখ বড় ক'রলো রাধা । অবাক-দৃষ্টি ফুটলো বিফারিত চোখে ।

—চোখই না হয় গেছে, কান যাবে কোথায় !

ছোটঠাকুমা বললেন সামান্য গর্কের ভঙ্গীতে । বললেন,—ইদিকে কি মনে ক'রে ?

এ দেখলো ওর মুখপানে । রাধা বললে,—চুরি করতে এসেছি ছোটঠাগমা ।

বুদ্ধা দৃষ্টিহীনা । ক'বার ছানি কাটিয়ে কাটিয়ে এখন আর চোখে দেখতেই পান না । প্রায় আটের কোটায় পা দিয়েছেন বলতে গেলে । শীর্ণ হয়ে পড়েছে দেহ, চর্ম লোল হয়ে গেছে । এককালে নাকি অসামান্য সুন্দরী ছিলেন, এখন দেখলে কে বলবে ! সেই টানা টানা চোখ এখন কোটরগত । ডালিম-লাল অধরের ফাঁকে দন্তহীন মাড়ি । পিঠ-ভর্তি কালো পশমের মত রাশি রাশি চুল ছিল কে বলবে ! মাথায় এখন কদম ছাঁটের পক্ক কেশ । সেই ভরাট দেহ এখন বাঙলা 'দ' অক্ষরের মত ত্রিভঙ্গ আকার হয়ে গেছে । অন্ধ হয়ে পড়েছেন শেষ বয়সে, তাই আছেন কারাবাসিনীর মত, চার দেওয়ালের ঘরে । কারায় পাহারার প্রয়োজন নেই, কয়েদী সম্পূর্ণ অন্ধ ।

—কি আর চুরি করবে ভাই ! এই হাড় ক'খানা ? কিই বা আছে আমার !

বুদ্ধা যেন হেসে কথা বলেন । শব্দহীন হাসি ।

ছোটঠাকুমার ঘরে সত্যি কিই বা আছে । মাক্কাতার আমলের যত কিছু ডেয়ো-ঢাকনা আর ক'খানা ফেঁসে-যাওয়া থান কাপড় ছাড়া কিই বা আছে এই ঘরে । ঝুল-কালো দেওয়ালে টাঙানো ক'খানা রঙীন ছবি,

যত-সব দেবদেবীর। কালীঘাটের কালী, দশভূজা দুর্গা, ধরিত্রী, অধিষ্ঠাত্রী জগদ্ধাত্রীর ছবি।

—তা এসেছিস যখন কষ্ট ক’রে আয় দু’দণ্ড গল্প করি তোর সঙ্গে।

ছোটঠাকুমা অবরোধবাসিনী। দৃষ্টির শক্তি হারিয়েছেন।

—এই মাটি ক’রেছে! ফিসফিসিয়ে স্বগত করে রাধা। বলে,—
ছোটঠাকুমা, আর কে আছে বলতে পারে? আমার সঙ্গে?

—কে? দেখতে তো পাইনে ভাই।

—তোমার এক নাতবোঁ।

—কে বলতো?

—জয়াবোঁদি।

—অ।

—ডেকে তোমার পাশে বসিও ছোটঠাকুমা। ও খু—ব গল্প করতে পারে।

—রক্ষে কর’ ভাই! তোমার দাদার রাতের খাওয়ার টাইম হয়ে গেছে, তুমিতো জানো। তারপর—

—খামলে কেন? তারপর?

জয়ার মুখে প্রচ্ছন্ন গাষ্ঠীর্ষ্য। মুখের হাসি কোথায় যেন মিলালো। চোখ নামালো জয়া। ভূমিতে দৃষ্টি রেখে বললে,—তারপর আজ জমিদারবাবুরা না কি ককটেল পার্টিতে মেতে উঠেছেন। আজ শুনছি একেবারে হোল্ নাইট পারফরমেনশ্!

—তাতে তোর ভয় কি? তোর বরতো আর মাতেনি।

—ভয় আছে বৈকি। ভয় না থাকলে আর বলছি কেন!

কি কুঁচকে উঠলো রাধার। তেমনি চোখ পাকিয়ে বললো,—কেন
তাই তুমি!

মিহি হাসির ক্ষীণ হাসির আভাস খেলে যায় জয়ার মুখে। খানিক
চুপচাপ থাকতে থাকতে বলে,—ড্রিক করলে শুনতে পাই অনেকে আপন
পর চিনতে পারেন না। এখন ভালয় ভালয় ঘরে ফিরতে পারলে বাঁচি।

—যাও না তুমি। কে তোমাকে ধ'রে রেখেছে?

রাধার ক্রি আর সোজা হয় না তখন থেকে। কথার স্মরণ যেন
তেমন আর নেই। কেমন যেন রাগো রাগো।

—তাই যাই ভাই।

কথা বললো আর গুঠন টানলো জয়া। আকপাল ঘোমটা টেনে
চললো তরতরিয়ে।

রাত কত কে জানে। হয়তো দশটা বেজে গেল এতক্ষণে।
তাপসমোহনের রাতের পথ্য দেওয়ার সময় উৎরে গেল। জয়া পা
চালালো অন্ধকারে। সাপের মত হিলহিলিয়ে এগিয়ে চললো দালান
উঠান ঘরে। এক মহল থেকে আরেক মহলে যেতে হবে, কত সিঁড়ি
ভাঙতে হবে। কত অন্ধকারের জটলা ছাড়িয়ে তবে সেই তাপস-
মোহনের ঘর!

পঙ্কু, অনড়, অচল, স্থবির তাপসমোহন। হয়তো বাঁচবেন না,
তাই ভগ্নহৃদয়। বুঝতে পেরেছেন তাপসমোহন। পাপ ক'রেছিলেন
একদা! অজস্র অর্থব্যয়ে ব্যাধি কিনেছিলেন। যাদের দেহ পোকায কাটা,
যারা কীটদষ্ট, তাদের দেহ থেকে তাপসমোহনের দেহে বিষ ছড়িয়েছিল।

জয়া চলেছে তো চলেছেই। পথও যেন আর শেষ হয় না।
দালান, উঠান, সিঁড়ি, যেন আর শেষ হয় না। ভয়ে বেন সিঁটিয়ে
যায় সে।

প্রতিটি মুহূর্ত যেন বিষন্ন ঠেকছে রাধারাণীর। বড় বিস্ত্রী লাগছে এই ঘুপসি ঘরের বদ্ধতায়। হাঁফ ধরছে যেন। পরণের জামাটা ঘামতে শুরু করেছে। রাধা চুপচাপ দাঁড়িয়ে থাকে করুণ চোখে। গোপন অভিসারের সঙ্গিনী বৈকে দাঁড়ালো। কথায় সায় দিলো না জয়াবোধি। মুখের ওপর কথা শুনিয়ে চ'লে গেল, তাকে একা ফেলে!

তালি-পড়া নীলাশ্বরী শাড়ীর আড়ালে রাধার বুক ওঠা নামা করে ঘন ঘন। ছোটঠাকুমার ঘরের অল্প-আলো প্রদীপের সোনালী আভায় রাধাকে দেখায় যেন সিলুয়েট ছবি। দেখা যায় না যেন, শুধু দেখা যায় রাধার ডাগর দেহের বহিরেখা। নীলাশ্বরীর আবরণ আছে কে বলবে! যেন অন্ধকারের কালি মেখেছে সে। রাতের কালো-কাজল মেখেছে।

—হ্যাঁ ভাই, অমন চুপ মারলে কেন? মুখে কথা নেই কেন? বৃদ্ধা বললেন অন্ধ চোখ মেলে। প্রদীপের স্বল্প-আলোয় তাঁকে দেখায় বড় ভয়াবহ। দৃষ্টিহীন চোখ দু'টিতে স্থির চাউনি। অস্থিসার কুঞ্জ শরীরে অসংখ্য কুঞ্জনরেখা! বিবর্ণ দেহাবরণ। শীর্ণ অঙ্গপ্রত্যঙ্গ। কথা বলতে গেলে মাথাটি ঠকঠকিয়ে কাঁপতে থাকে। ক্ষীণ ও কম্পমান কণ্ঠস্বর!

বুকে যেন হাতুড়ির ঘা পড়ছে রাধারাণীর। বিষন্ন চোখে বিমর্ষ দৃষ্টি। গম্ভীর মুখে প্রচ্ছন্ন হতাশা। কড়া কড়া বাক্য শুনে চলে গেছে তপনকৃষ্ণ। আর কোনদিন আসবে কি না কে জানে। অমুশোচনার জ্বালা ধরে রাধার দেহ আর মনে। বিস্ত্রী লাগে যেন এই চার দেওয়ালের ঘর, বৃদ্ধা ছোটঠাকুমাকে।

রাধা টোক গিললো। গলা শুকিয়ে গেছে যেন। বললে,—মন-মেজাজ ঠিক নেই ছোটঠাকুমা।

—কেন লা, মনের আবার কি রোগ ধ'রলো?

নীরব রাধা। যেন নিষ্পন্দ। ঘরের দরজার একটি কপাটে ঠেস দিয়ে দাঁড়িয়ে থাকলো। নিরাশায় যেন ভেঙ্গে পড়েছে। মুখে যেন কথা নেই, বোবা যেন।

ছোটঠাকুমা উত্তর না পেয়ে বলেন,—হ্যাঁ ভাই রাধা, বেথা হচ্ছে না, তাই বুঝি অভিমান হয়েছে?

—ধ্যোৎ!

—প্রজাপতি দয়া না করলে, ফুল না ফুটলে কি হয় ভাই!

রাধা হেসে ফেললো! ম্লান হাসির মূহুরেখা ফুটলো তার চোঁটের কোণে। বললে,—কি যে তুমি বল' ছোটঠাগুমা!

যেন চন্দনপুর তথা সমগ্র বাঙলার ছেলেদের প্রতি রোষ দৃষ্টি হানলো রাধা।

ঘর মেলেতো ঘরানা মেলে না। ছেলে মিললো যদি কথায় মিললো না। কোথায় একটা অমিল আছে রাধার মিলনপথে! কে জানে, সম্বন্ধ আসতে না আসতে তাই হয়তো কেঁচে যায়। পাকা কথা পর্য্যন্ত এগোয় না, কি কুগ্রহ!

রাধা বললে,—প্রজাপতির দয়া ফয়া সত্যযুগের কথা। পারতো আমার বাবা অফুরন্ত ঢালতে তা হ'লে কি আর—

—পোড়াকপাল আমাদের রাধা! তা না হ'লে আমাদের অত সাধের জমিদারী ক্রেড়ে নিচ্ছে কংগ্রেস!

ছোটঠাকুমার শীর্ণ শীর্ণ হাত দু'টো হঠাৎ চঞ্চল হয়ে উঠলো। কথা বলতে বলতে তিনি নিজেও যেন অস্থির হয়ে ওঠেন। বলেন,—খুঁজে পাচ্ছি না কেন রাধা?

—কি ছোটঠাগুমা?

অবাক মেনে বললো রাধা। ঘুরে দাঁড়ালো।

—আমার আফিমের কোটটা ।

চোখ আছে, দৃষ্টি নেই । চোখ থাকতেও চোখ নেই । যখন তখন হারিয়ে ফেলেন যা কাছে থাকে । এদিকে রাখতে সেদিকে রাখেন । হেথায় রাখতে সেথায় রাখেন । শীর্ণ হাত দুটো হাতড়াতে থাকেন, খুঁজতে থাকেন দরকারের বস্তু ।

—আফিমের কোটা ! চমকে উঠলো রাধা ।

—হ্যাঁ ভাই । কোথায় ফেলেছি বলতো ?

—দেখো না খুঁজে, আছে নিশ্চয়ই কোথাও ।

কথা বলতে বলতে এগিয়ে গেল রাধা । প্রদীপের আলোয় সিলুয়েট ছবি এতক্ষণে যেন পরিচ্ছন্ন ফটোগ্রাফে পরিণত হয়ে উঠলো । আলো ছড়ালো রাধার মুখে । কি বিষন্ন বিমর্ষতা সেই মুখে ।

হ্যাঁ, ঠিক এই মুহূর্তে যেন প্রয়োজন ছিল একটুখানি আফিমের । ছোটঠাকুমার কাছে এগিয়েছে রাধা । এলোপাতাড়ি খুঁজতে শুরু করে দিয়েছে মাদুর-বিছানা হাতড়ে ।

—কোথায় ফেলেছি কে জানে ! কার হাতে আবার পড়বে !

—এইতো রয়েছে তোমার পায়ের কাছে ।

খুঁজতে খুঁজতে বললে রাধা । আফিমের ছোট কোটাটা তুললো নিজের হাতে । খুলে ফেললো কোটার ঢাকনি । কি দুর্গন্ধ !

এক ঝলক বিষাক্ত গন্ধ নাকে ভেসে আসতেই রাধার মুখে বিকৃতির রেখা ফুটলো । গা গুলিয়ে উঠলো যেন । বমি আসলো ।

—দাও ভাই । বাঁচালে দিদি ।

কথা বলার সঙ্গে সঙ্গে শীর্ণ হাত তুললেন প্রবৃদ্ধা । হাত মেললেন । কোটাটা সেই হাতে বসিয়ে রাধা খানিক দাঁড়িয়ে থাকে চুপচাপ । পলক-হীন চোখে দেখে, বুড়ী কোথায় রাখে ঐ বিষের কোটা ।

জানতো না তো রাধা। আফিম কি বস্তু জানতো না। লোকের জিজ্ঞাসু চাউনি আর মামুলী কথাগুলো শুনতে শুনতে যখন গা জলতে থাকে, লজ্জা আর অপমানে যখন চোখ ফেটে জল পড়তে থাকে, তখন লোকের সেই দৃষ্টি আর কথাকে এড়িয়ে যাওয়া যায় না।

রাধা ভাবছিল তাই, এই তো উপায় আছে এড়ানোর। লোকের চোখকে ফাঁকি দেওয়ার ওষুধ আছে। এইতো রয়েছে। একটুখানি আফিম!

কত কত দিন সকালের খবর-কাগজে রাধা পড়েছে কত কার খবর—প্রথম পৃষ্ঠায় যাদের ঠাই মেলে না। কাগজের পাতা উলটে উলটে, কলম হাতড়ে হাতড়ে খুঁজতে হয়, কোথায় সেই এক টুকরো করুণ সংবাদ—রয়টার, ইউ, পি’র নয়, স্রেফ নিজস্ব সংবাদদাতা প্রেরিত। ষ্টাফ রিপোর্টার প্রদত্ত। গ্রামের খবর যদি হয় তখন হয় সংবাদদাতা আর শহরে খবর দেন ষ্টাফ রিপোর্টার! কতদিন রাধা কাগজে পড়েছে, জনৈক যুবতীর অহিফেন সেবন করিয়া আত্মহত্যার বিবরণ। কতটা আফিম, কখন খেয়েছে, খাওয়ার কতক্ষণ পরে মৃত্যু হয়েছে, সব তথ্যই আছে! বিবরণে ভুল নেই, তবে কারণ অজ্ঞাত। ‘আত্মহত্যার কারণ জানা যায় নাই’!

গায়ে যেন কাঁটা দেয় রাধার। ভয় ভয় করে। মৃত্যুর হাতছানি দেখতে পায় নাকি! বুড়ীর ঘর থেকে বেরিয়ে পড়লো সে। চললো যেদিকে ছ’চোখ যায়। কে আবার কান্না শুরু করলো কে জানে! কানে যেন কান্না শোনে।

কার আবার কোথায় ব্যথা বাজলো! এমন করুণ-করুণ সুরে কে কাঁদলো কোথায়!

বাতাসে কান্নার তরঙ্গ যেন!

বোশেখের এলোমেলো হাওয়া, কোথা থেকে আসছে যেন ঝড়ের মত। চোখে-মুখে অফুরন্ত চুমু খেয়ে আবার কোথায় পালায় চকিতের মধ্যে। কখনও গাছের পাতাটি পর্যন্ত ন'ড়ে না, কখনও গাছে গাছে জড়াজড়ি চলে। কাজল-কালো আকাশ থেকে যেন দূরন্ত বেগে নামতে থাকে পৃথিবীর বুকে, রাশি রাশি মেঘশীতল কালো বাতাস। আসে আর ছড়িয়ে পড়ে দিকে দিকে, ধরা দেয় না। হাওয়ার গতি বোঝা দায়!

চাপা-কান্নার ব্যথাতুর গুমরানি শুনে প্রকৃতির হাওয়া বৃষ্টি থমকে থাকে। স্থির হয়ে থাকে।

সারেঙ্গীর সুরেল কান্না কতদূর থেকে কানে আসে! কখনও দ্রুত, কখনও বিলম্বিত, সুরের ওঠানামা চলছে তো চলছেই। তানপুরা, সারেঙ্গী আর ডুগী-তবলার মেলামেশায় চন্দনপুর নেশাচ্ছন্ন হয়ে পড়েছে! এমন জনবহুল গ্রাম-শহরে মানুষের বসতি আছে কি না বোঝা যায় না। রাতের চন্দনপুর, যেন অন্ধ মূর্তি এখন তার। শুধু গান-বাজনার শব্দটুকু ভেসে বেড়ায় এখান থেকে সেখানে। মজা পুকুর, পোড়োবাস্ত, বুনো ওলের বাগিচায় ছুটে ছুটে বেড়ায় হাওয়ার সঙ্গে সঙ্গে বাজনা, গান আর তারের গোঙানি।

বাবুদের কারও কারও নেশা লেগে গেছে। কড়া ছইঙ্কির কড়া নেশা। জ্ঞানগম্যি থাকে কি না থাকে। কতদিন বিদেশী ওয়াইন আর লিকুয়ের চোখে দেখা নেই, রসনায় নেই তাদের আশ্বাদন। দেশীর সঙ্গে বিদেশীর তুলনাই চলতে পারে না। দেশী জলে শুধু দুর্গন্ধ, বিদেশী জলের ব্লেন্ড নাকে লাগলেই গন্ধে গন্ধে নেশা ধ'রে যায়।

আজ রাতের মত বাবুরা যেন গা ভাসিয়ে দিয়েছেন ছইঙ্কি, জিন আর ব্র্যাণ্ডির জোয়ারে। আজকে'র মত ভাঁটা আর পড়বে না। কোন'রকম বাধা-নিষেধ নেই, যে মত পারো খাও। সহ করতে না পারলে, দাঁড়াতে

না পারলে, প'ড়ে থাকো না কেন ফরাসে মুখ খুবড়ে। পেটে না সয়,
উপরে ফেলো যখন খুশী, গলায় আঙুল চালিয়ে।

কিন্তু পূর্ণচ্ছেদ টেনো না যেন কোন' মতে। অন্ততঃ আজ রাতের
মত চালাও যত পারো। ভারত-আইনের কেতাব থেকে সূর্যাস্ত
আইনের পরিচ্ছেদ বরবাদ হয়ে যাচ্ছে যখন, তখন হয়তো এ জীবনে
ও মুখ আর না দেখতেও পারো।

শিশু সরকার তার চেয়ে যদি আকাশের চাঁদ চেয়ে বায়না ধ'রতো!
জমিদার আর জমিদার থাকবে না; জমিদারের হাতে আর খাজনা
আদায়ের ভার থাকবে না, জমিদারকে আর ডাকবে না মধ্যস্থতার
কাজ করতে। জমি বিলির পার্ট চুকে যাবে। কাছারীতে তালা পড়বে!

প্রকট মরণ যেন দিনকে দিন এগিয়ে আসছে। জমিদার আর
জমিদার থাকবে না। যার জমি তাকে দেওয়া হবে। লাউল যার
জমি তার হবে।

নাচঘরে তখনও নাচ শুরু হয়নি তবু।

রাত্রি আরও গভীর হোক, আরও ঘন হোক কালো আঁধার। সারা
চন্দনপুর ঘুমিয়ে পড়ুক। নেশাটা আরও একটু জ'মে উঠুক। তারপর।

তারপর নর্তকীর নাচ, বাঈজীর গান, বাবুদের যেমন খুশী চলবে।
আসর জাঁকাবে মৃতিবিবি আর নূরজাহান। নাচবে, গাইবে, কথা
বলবে চোখে চোখে, ঢলাঢলি করবে কত!

বড়বাবু চন্দ্রমোহনের এখনই ঢুলু ঢুলু রক্তিম আঁখি। সোজা আর
বসতে পারছেন না যেন। সহ করতে পারছেন না ঝাড়লগুনের
জোরালো আলো। মাথার টেরী ঠিক নেই, আলুথালু চুল। বড়
বেশী লাল হয়ে উঠেছে তাঁর কর্ণমূল আর নাসিকা।

শোরীর খেয়াল গান শেষ হতে না হ'তে আবার গান ধরেছে কে !

বাবুদের মধ্যে গান-বাজনার সমঝদার বেশী যিনি, তাঁর নাম সতু
ওরফে সত্যেন্দ্রমোহন । হঠাৎ বললেন কথা,—এ গান তোমার শেষ
ক'রে দাও, নূতন সুরে বাজাও বীণাখানি ।

ঋপদ আর ধামার থেকে খেয়াল ঠুংরী । মার্গ-সঙ্গীতের শেষে
চুটকি গজল ?

গায়ক সলজ্জায় থামলেন শুরুতেই । কে যেন তাঁর কণ্ঠ রোধ
করলো হঠাৎ । তানপুরা, তবলা আর সারেঙ্গী থামলো যুগপৎ ।

চন্দ্রমোহন বললেন,—যখনকার বা তখনকার তা । স্থান কাল
আছে সব কিছু । গান-বাজনারও তাই !

সত্যেন্দ্রমোহন গুছিয়ে বসলেন নিজে । একটি তাকিয়া তুললেন
কোলের 'পরে । দুই বাছ রেখে বললেন,—এখন সামার সীজুন, যাকে
বলে তোমাদের ভরা গ্রীষ্ম । পাক্কা বোশেখ মাস এটা, দেয়ারফোর
এই সীজুনের গানই গাও না কেন ।

—কোন্ গান অর্ডার করুন আপনি ! যেমন বলবেন তেমনিই
গাইবো ।

গায়ক কথা বললে সবিনয়ে । যেন নিবেদন করলে ।

চন্দ্রমোহন হো হো শব্দে হাসি ধরলেন কেন কে জানে ! অর্থহীন
হাসি । হাসতে হাসতেই বললেন,—ভরা দুপুরে যদি কেউ গায়, নিদ্রা
নাহি আঁখি-পাতে ! কনকনে শীতের রাত্রে যদি ধরা হয়, এ ভরা ভাদর !
কিংবা ঋতুঘটে গরমের দিনে যদি কেউ গাইতে থাকে, এমন দিনে তারে
বলা যায় ? নয়তো ঝামঝামে বর্ষায় যদি গাও বসন্তের গান ?

গাইয়ে আর বাজিয়েরা নীরব শ্রোতার মত ব'সে থাকে চুপচাপ ।
শুরু যেন পাঠ দেন, শিখরা শোনে যেন একাগ্রচিত্তে ।

সত্যেন্দ্রমোহন বললেন,—ঠিক কথাইতো। যখনকার যা। শাস্ত্র-
কারেরা বলে গেছেন, ছয় রাগ গাইবে ছয় ঋতুতে।

চন্দ্রমোহন বললেন,—এ্যাজ ফর এক্জাম্পল্ ?

তু'এক মুহূর্ত্ত কি যেন ভাবতে থাকেন সত্যেন্দ্রমোহন। মনে মনে যেন
খতিয়ে নেন। তারপর বলেন,—সঙ্গীত-রত্নাকরে আছে, ভৈরবো মাল-
কৌশল হিন্দোলাদীপকস্তথা। শ্রীরাগো মেঘরাগল য়েতে পুরুষাঃস্বতাঃ।

—অর্থাৎ ? চন্দ্রমোহন শুধোলেন। নিমীলিত চোখ মেললেন।
বললেন,—মানেটা বাংলাে দাও সতু। দেবভাষা যে বুঝি না আমরা
কেউ।

সত্যেন্দ্রমোহন বলেন,—গ্রীষ্মে দীপক, বর্ষায় মেঘ, শরতে ভৈরব,
হেমন্তে মালকৌশল, শীতে শ্রীরাগ, বসন্তে হিন্দোল গাওয়াই আমাদের
প্রথা। সময়ের সঙ্গে সঙ্গে এমন তাল রেখে গাওয়ার নিয়ম অল্প আর
কোন' সভ্য দেশেই নেই।

সঙ্গীত সম্পর্কে গবেষণা কারও কারও ভাল লাগে না। গান-বাজনা
শুনতেই ভাল লাগে, যেমন শুধু পড়তে ভাল লাগে গল্প আর কবিতা।
কাব্য আর সাহিত্য ! কে আর জানতে চায় সাহিত্যের ভাষার উৎপত্তি,
ব্যাকরণ, ব্যবহার-রীতি !

অখিলমোহন গুম হয়ে ব'সেছিলেন নিজের বন্ধুদের মধ্যেখানে।
শুনছিলেন, কে কি বলে না বলে। যেন থাকতে না পেরেই তিনি
বলেন,—লেকচার ফেকচার ভাল লাগছে না আর। এটা তো গান-
বাজনার স্কুল নয়, ভুলে যাও কেন ? পয়সা খরচা ক'রে এই নিরস
বক্তিতে শুনতে হবে না কি !

গানের স্বর নেই। বাজনার ধ্বনি খেমে গেছে। নাচঘর যেন থমথম
করছে। মাঝে মাঝে দমকা বাতাস এসে তুলিয়ে দিয়ে যায় ঝাড়লগ্নন ;

হুয়োরে ঝুলানো লাল ভেলভেটের পর্দা। দেওয়ালের ছবিতে টাঙানো ফুলের মালা।

—গানের পালা চুকিয়ে দিয়ে নাচের পালা শুরু হোক না!

কে যেন কথার পিঠে কথা জুড়লো নিজেকে লুকিয়ে!

—গান-বাজনা যেদিন খুলী চালাতে পারো। কিন্তু—

বড়বাবু চন্দ্রমোহনের যেন সাড় ফিরলো। তাকিয়ায় এলিয়ে ছিলেন তিনি। সোজা হয়ে বসলেন। একটি সিগারেট ধরিয়ে প্রচুর ধোঁয়া ছাড়তে ছাড়তে বললেন,—বেশ তাই হোক। বহুৎক্ষণ গান-বাজনা চলেছে, আর নয়।

সিনেমার হাফ-টাইমের মত, মঞ্চাভিনয়ের বিশ্রামের মত, ক্ষণেক বিরতি পড়লো। একটি অস্পষ্ট গুঞ্জন শোনা গেল নাচঘরে! যারা ছিলেন নীরব গম্ভীর, তাঁদের মুখে মুখে হাসি আর কথা ফুটলো। ব'সে থেকে থেকে যাদের পায়ে ব্যথা ধ'রে গেছে, তাঁরা উঠে দাঁড়ালেন। নাচঘরের বাইরে চলে গেলেন যেন ব্যথা ছাড়াতে। টলটলায়মান কেউ কেউ। উগ্র নেশার ঘোরে কেউ কেউ বোবা হয়ে গেছেন।

নাচঘরের ফরাসের কোথাও কোথাও শূন্যতা বিরাজ করে। ঘরের হাওয়া যেন হালকা হয় এতক্ষণে। হাওয়ায় মদ, সিগারেট আর ফুলের গন্ধের মিশ্রণ।

—বান্ধুজীদের ডেকে আনছি আমি। পাঁচ মিনিটের মধ্যে নাচ শুরু হবে। ভেবো না কেউ। আমি যাবো আর আসবো।

কথা বলতে বলতে উঠে দাঁড়ালেন চন্দ্রমোহন। ট'লে ট'লে যেতে যেতে সামলে নিলেন নিজেকে। সিগারেটের ধোঁয়া ছাড়তে ছাড়তে নাচঘর ত্যাগ করলেন।

অস্পষ্ট গুঞ্জন স্পষ্টতর হয়। বড়বাবু নাচঘরে নেই, কথার তোড়

আর হাসির মাত্রা ক্রমেই যেন বাড়তে থাকে । মাতলামি আর হাসি-
হাসির রেশারেশি চলতে থাকে যেন । দেওয়ালে ঝুলানো সারি সারি
তৈল চিত্র । চন্দনধামের বিগত পুরুষরা—যেন উত্তরপুরুষদের
বেলেলাপনায় সক্রোধে তাকিয়ে আছেন নিম্পলক চোখে । মৃতজনদের
আশেপাশে আরও ছবি আছে—নয়কায়া নারীমূর্তির তেলরঙ ছবি ।
মাইকেল এঞ্জেলো, রাফায়েল, বটিচেলী, গর্গা, রেনল্ড আর লোত্রেকের
নকল ছবি—দেশী শিল্পীর ব্যর্থ অনুকৃতি মাত্র !

—যতক্ষণ না আনে ততক্ষণ বন্ধ থাকে কেন ? রণে ভঙ্গ দিই কেন ?

—হ্যাঁ, তাই না তাই । গান না চলে বাজনা চলুক ।

—ধোং ঘোড়ার ডিম ! গান-বাজনা তো রেডিও খুললেই শোনা
যায় ! মতিবিবি আর নূরজাহানের নাচ কি আর ইহজীবনে দেখা
হবে ? গান-ফান বাজনা-টাজনা লাগে না ওদের পায়ের কাছে ।

—পায়ে তবে গড়িয়ে পড়' । ওদের পায়েই গড়াগড়ি খাও ।

—ওদের পায়ে গড়াতে হলে তোরা আমার ধাতে সহাবে না ।
পায়ের তলায় পিষে যাবো । লক্ষপতি কোটিপতি হওয়া চাই ।

—কোটি আর লক্ষপতিদের একজন হওয়া চাই, নইলে নয় ?

—আলবৎ !

—এক রাতের জন্তে যদি হই ? একটা রাতে তো আর এক লাখ
খরচা হয় না ।

—এক হাজার তো হয় ।

—হ্যাঁ, তা হয় বটে । তবে পাই কোথা তাও ?

—তবে ? মারবে লাখি আর হাটিয়ে দেবে ।

—মতিবিবির পায়ের লাখি ? না জানি কত মিষ্টি !

বৈশাখ রাতের দমকা হাওয়ায় লাল ভেলেভেটের পর্দা নেচে উঠছে

যেন নিতম্ব হুলিয়ে। ঝাড়লঠনের আলোয় ভেলভেটের লালিমা খেলছে আলোছায়া। নাচঘরে বেলা আর যুঁইয়ের তীব্র গন্ধ ভাসছে। ঘূর্ণায়মান বিজলী পাথার সজোর বাতাসে পাক খায় অনেক সিগারেটের ধূম্রজাল।

বেয়ারা গোলাপজল ছিটোয় দূরে দাঁড়িয়ে, রূপোর পিচকারী থেকে। নাচঘরে কথার তুবড়ি ফুটতে থাকে যেন। দমকা হাওয়ায় ছেঁড়া ছেঁড়া কথার টুকরো, জানলার বাইরে বেরিয়ে যায়। হাসির শব্দ ছুটতে থাকে, যেন হাসতে হাসতে।

কুতুতুতু আওয়াজ নাচঘরের এক দুয়োরে। কামাকাম, কামাকাম ধ্বনি। কুমুর-পরা পায়ের পা-ফেলার শব্দ। প্রতি পদক্ষেপে শব্দ ওঠে! কথার তোড় আর হাসির হিড়িক মন্ত্রবলে যেন স্তিমিত হয়ে গেল। স্বর্গ থেকে অম্বরী নামছে, নাচতে নাচতে। মেনকা, রস্তা, উর্কশী না অগ্নি কেউ? নেচে নেচে এমন এগিয়ে আসছে, পায়ে তাল ঠুকে ঠুকে!

উড়ু উড়ু বাতাসে ওড়না উড়লো মাথার! নূরজাহানের মুখ থেকে যেন মেঘের আবরণ স'রে গেল। পূর্ণচাঁদের মত সোনা-রঙের মুখ যেন নূরজাহানের। টানা টানা চোখের কোনে মিহি সূর্যার টান। রাঙা অধর। ঠিকালো নাকে এক বিন্দু হীরা জল জল করছে, ঝাড়লঠনের আলোয়।

সাপুড়িয়া সাপ খেলায়, এ চিরদিনের প্রথা। আবার সাপও কখনও কখনও খেলায় সাপুড়েকে। ফণা নাচিয়ে নাচিয়ে এঁকেবেঁকে যখন খেলায়, তখন আর সাপের নাগাল পায় না সাপুড়ে। বাঁশী বাজিয়ে বাজিয়ে দম বেরিয়ে যায়, তবুও পোষ মানে না সাপ। মন্ত্র-তন্ত্র কৃথা হয়ে যায়। বাঈজীরা আজ খেলাবে বাবুদের।

এক লহমায় সারা নাচঘরখানা যেন দেখে নেয় নূরজাহানবাজ।

যেন সোজা তাকিয়ে দেখে না কোন' কিছু, তাকায় আড়নমনে । বাঁকা
চোখে । আসমানী রঙের পাংলা বেনারসী পরেছে নূরজাহান । ফিকে নীল
ওড়না । মতিবিবির অঙ্গে ছাইরঙের জঙ্লা বেনারসী । ঘাগরার মত
কোমরে কুঁচি দিয়ে দিয়ে শাড়ী পরেছে দু'জনেই । মতিবিবির কালো-কেশ
ঢাকা পড়ে না ময়ূরকণ্ঠি রঙ ওড়নায় । বিহুনীর সোনালী জরি দেখা যায় ।

জ্যোছনা-ভরা আকাশের তলে যেন সমুদ্রের তরঙ্গ উঠলো । ওদের
মুহু মুহু হাসির সঙ্গে সঙ্গে হিল্লোল উঠলো দেহে ! ওরা পরস্পর মুখ
চাওয়া-চাওয়ি করে আর হাসে অল্প অল্প ।

কোমরের ঝুলন্ত রেশমী-রুমাল টেনে নিয়ে ঠোঁটের দুই প্রান্ত মুছে
নেয় মতিবিবি । মুখে এক গাল পান । নকল না আসল কে জানে,
কুঁচো হীরের অলঙ্কার দুজনের সমান সমান । চুড়ি, চিক আর কানে
ঝুমকো । বুকে ব্রোচ । হাতের আঙুলে আঙটি মণিমুক্তার । কারা
যেন বদলাবদলি করেছে । আঙটি বদল করেছে ওদের সঙ্গে কারা
যেন । বিলিয়ে দিয়েছে হয়তো ওদের দিলখোলা বাবুদের দল ।

হীরের ছটা ছড়াতে থাকে নাচঘরে । ওড়নার চুমকি যেন আকাশের
তারার মত দপ দপ করছে । সাজঘরে ছিল এতক্ষণ, বসে বসে
ঘাম ঝরেছে সেখানে । হাজাক আলোর উত্তাপে সাজঘরে গুমোট
ধ'রেছিল যেন ।

সাজঘর থেকে নাচঘরে । বন্ধ কোটর থেকে মুক্ত ফরাসে । হাত-
পাখার হাওয়া থেকে বিজলী পাখার ঝড়ে ।

নাচঘরে গুঞ্জন চলতে থাকে । নূরজাহান আর মতিবিবির অটুট
অক্ষয় যৌবন দেখে কি যেন বলাবলি চলে বাবুদের সঙ্গে, তাঁদের
বন্ধুবান্ধবদের ! ওদের চোখে যেন চোখ রাখতে পারে না কেউ ।
লজ্জা, ঘৃণা, ভয়—কিসের ভয় কে বলবে ?

চন্দ্রমোহন বললেন, হেসে হেসে,—বিবিজানেরা নাচতে পারে, গাইতেও পারে অতি অপূর্ব। তাই নয় শিউশরণ?

শিউশরণ ছিল নাচঘরের বাইরে। ছুয়োরের পাশে! আসরে নামিয়ে দিলেই তার কাজ চুকে যাবে! খৈনী মলছিল শিউশরণ। বড়বাবুর কথা কানে পৌছতে না পৌছতে বললে—জনাব, ওরা ছ'জন আসমানের অঙ্গরী। গান ভি বহুৎ আচ্ছা গায়, নাচনেওয়ালী ভি আছে। এক এক বিবির এক এক কুড়ি সোনার মেডেল। দিয়েছে সব রাজা-উজীর, আমীর-ওমরাহ। কথা বলতে বলতে ঠোঁটের ফাঁকে খৈনী ভ'রলো শিউশরণ। আবার বললে—বিবিজানরা জনাব, যার তার ঘরে যায় না। হাজার হাজার দিলেও নয়। তোয়াক্কাই করে না টাকার। এই শিউশরণ গোলামকে যখন হুকুম করেছেন, তখন—

কথা আর শেষ হ'তে পায় না। চন্দ্রমোহন ততক্ষণে পা দিয়েছেন ফরাসে। যেখানে ওরা প্রায় সেখানে এসে দাঁড়িয়েছেন। বিজলী পাখার তীব্র বাতাসে চন্দ্রমোহনের আদ্রির পাঞ্জাবী থর থর কাঁপছে। ফরাসে লুটিয়ে আছে কোঁচানো কোঁচা—পঞ্চাশ ইঞ্চি বহরের কাঁচির ধুতি।

—ওদের গায়ে পড়বে না কি বড়বাবু?

কে যেন ফিস ফিস কথা বললে কানে কানে। চুপি চুপি বললে।

লাল চোখ চন্দ্রমোহনের। নাসিকা আর কর্ণমূলও লাল। চুরচুরে নেশায় যেন ঢুলু ঢুলু চোখ! গেলাশের পর গেলাশ জিন-হইস্কি সোডার কম্বাইনড্ খেয়েছেন চন্দ্রমোহন। পেগ ফুলই হোক, হাফ্ই হোক, কোয়ার্টারই হোক, পেগের থাকে পরিমাপ। পেগের পরিমাণে আর যা কিছু থাক, অসংযম নেই। পেগের সম্মান রাখলে সেও না কি সম্মান রাখে! গেলাশের মাত্রা নেই কোন' কিছু। কত সোডা আর কত আসল ধরা যায় না। গেলাশ যেন বেপরোয়া। চন্দ্রমোহন

লক্ষ্য পান বন্ধুর সাবধানী কথায়। ইদিক সিদিক দেখেন নেশাচ্ছন্ন
দৃষ্টিতে। কাকেও দেখেন না, অথচ চোখে যেন কত ব্যগ্র চাউনি।
ফরাসে ব'সে পড়লেন চন্দ্রমোহন, ঠিক বিজলী পাথার নীচে।

দূর থেকে গোলাপ জলের ছিটে পড়লো তাঁর মাথায় মুখে। বেয়ারা
পিচকারী থেকে জল ছিটালো কতক্ষণ!

যেমে উঠেছেন বড়বাবু। চোখ-মুখ তাঁর ভয়ানক লাল হয়ে
উঠেছে। তাকিয়ায় হেলান দিলেন চন্দ্রমোহন। বললেন,—আগে গান
তারপর নাচ।

সব যেন থ হয়ে গেছে। প্রথম দর্শনের পর, সূর্যের আলোয় ফুল
ফুটলে যেমন মধুপের গুঞ্জন শুরু হয়, নাচঘরে তেমনই সাড়া পড়েছিল
ওরা আসতেই! এখন আর কারো মুখে কথা নাই! দেখছে, শুধু দেখছে।

নূরজাহানের বুকে ঘন লাল কাঁচুলী। মতিবিবির ভেলভেটের।
এঁটে সেঁটে যেন ব'সে গেছে কোমল অঙ্গে।

অখিলমোহন বললেন—বেয়ারা ক'টা আর আসে না কেন?
বড়বাবু তুমি যদি একবার ইঁাক পাড়ো! ষ্টক ক্রিয়ার হয়ে গেছে না
কি এরই মধ্যে?

—এ্যাট্‌ অল্‌ নট্‌।

চন্দ্রমোহন সিরিয়াসলি বললেন। বিস্ফারিত চোখে তাকালেন।
ইশারায় ডাকলেন অখিলমোহনকে।

চন্দ্রমোহন ফিস ফিস কথা বলেন অখিলমোহনের কানে। বলেন—
আমি মানা করেছি, এখন যেন সাভ'না করে আর।

—কেন? এখন নয়তো কখন? কাল আর কে কাকে চিনবে!

—উহ তা নয়। বললেন চন্দ্রমোহন।—বলছি যে আজীবাজে
কতকগুলো আছে, তাদের ভাগিয়ে দেবো গান শেষ হ'লেই। তারপর।

অখিলমোহন বললেন,—আমাকেও তাড়িয়ে দেবে না কি ? আমি পনেরোটা করকরে টাকা কবুল করেছি, বড়বাবু । তোমার মত পঞ্চাশ একশো নাইবা দিতে পারলুম, তা বলে—

চন্দ্রমোহন বললেন—উহু তা নয় । আমাকে আগে বলতে দাও ।

—কিছু আর বলতে বাকী রাখলে বড়বাবু ? অখিলমোহন নেশার আমেজে কিনা কে জানে, দুঃখ-দুঃখ স্বরে কথা বলছেন ।

—পঞ্চাশ একশো ওমনি ওমনি বেরিয়েছে ভেবেছো অখিল ?

—তবে । তোমাকে তো বড়বাবু নাড়া দিলেই টাকা পড়ে । ফাটকা বাজারের তুমি হ'লে কিনা এক পাকা খেলুড়ে ।

—সে সব দিন গেছে অখিল । সে দিন আর নেই । জমিদারিটা থাকলেও বুক ফুলিয়ে বলতে পারতুম !

—তবে টাকা পেলে কোথায় ? একেবারে কাঁড়ি কাঁড়ি টাকা না কি তুমি একাই ঢেলেছো শুনতে পাচ্ছি ।

—না হে না । তুমি কিছু জানো না, ফাটকা আর খেলি না । ফাটকায় সব দিয়েছি । আমি দিয়েছি সবসময়ে একশো পঁচিশ টাকা, তাও দিয়েছি কোথেকে জানো ?

—কোথেকে ?

—তোমার বৌদিদির গলার একটা জড়োয়া নেকলেস বিক্রি ক'রে তবে দিতে পেরেছি । না দিলে মান থাকে না । জমিদারীতো যেতে বসেছে, যাওয়ার আগে একটা রাত ফুর্তি করবো, তাই বিক্রিই করে দিলুম চোখ কান বন্ধ ক'রে ।

—বড়বৌদি খুব রাগারাগি করলেনতো ?

—যাক সে কথা । বললেন চন্দ্রমোহন । ফিসফিসিয়ে বললেন,—

তোমার যদি খেতে মন চায়, সোজা চ'লে যাও ওয়াইন চেম্বারে ।
সেখানে রতনদা আছে ।

হারমোনিয়মের সুর যেন কথায় কথায় চাপা পড়ে যায় । ইতিউত্তি
আড় নয়নে দেখতে দেখতে কি এক গানের প্রথম পঙতি বাজিয়ে চললো
নূরজাহান । পা মুড়ে বসলো মতিবিবি । ঝাড়লঠনের তীব্র আলোয়
ওদের দেহরেক্ষা যেন স্পষ্ট চোখে পড়ে ।

মুক্তা ঝরলো যেন ! আসল না নকল কে বলবে, এক ঝলক হাসি
হেসে নূরজাহান বললে,—কসুর মাফ করবেন হুজুর । আমি বাঙলা
গান ধরছি ।

—বহুত আচ্ছা, বহুত আচ্ছা ।

—যেমন খুসী গাও । যা মন চায় ।

—যাত্রা, অপেরার গান গাইবেন না কি তাই বলে ?

—রেকর্ড সঙ্গীত ?

খিল খিল হেসে ফেললো নূরজাহান । মতিবিবির গা টিপলো
হাসতে হাসতে । ওদের হাসাহাসিতে যেন মুঠো মুঠো মুক্ত ছড়ালো
নাচঘরে ।

চন্দ্রমোহন ধমকানির সুরে বললেন,—কথা বললে নাচ ঘরের
বাইরে যেতে হবে, আগে থেকে জানিয়ে রাখছি । ডোন্ট ক্রিয়েট
ডিস্টারবেন্স ।

তবলচি তবলা ঘুরিয়ে ঘুরিয়ে হাতুড়ীর ঘা মেরে মেরে সুর বাঁধছে ।

হারমোনিয়মের নব্র ধীর সুর যেন উত্তরোত্তর জোর হ'তে থাকে ।
নূরজাহান পান চিবোতে চিবোতে হঠাৎ গান ধরলো মিহিমিষ্ট কণ্ঠে ।
গাইলো,—আমার নিশীথ রাতের বাদলধারা—

বহু-পরিচিত গান কবিগুরু রবীন্দ্রনাথের । বাঈজীর মুখে এ-গানের

প্রথম কলি শুনে বিশ্বয় লাগে যেন বাবুদের । বিশ্বাস হয় না যেন,
নূরজাহান গাইছে এই গান ।

নাচঘরে যেন খুশীর জোয়ার বইলো । খেয়াল, টপ্পা কিংবা ঝপদ বা
ধামার গান নয়, বাউল, কীর্তন কিংবা গজল, ঠুংরীও নয়—শ্রেফ
আধুনিক বাঙলা গান কবিগুরু—যাঁর গানে সুরমাত্র সম্বল নয়, সুরের
সঙ্গে সঙ্গে আছে কবিজনোচিত ভাব আর ভাষা । যেমন সুর, যেমন
ভাষা, তেমন ছন্দ ।

—আমার নিশীথ রাতের বাদল ধারা—

গানের এক এক কলি গায় আর আড়চোখ দেখে নূরজাহান ।
বাঁকাচোখের দৃষ্টিতে কেউ পড়ে না, অথচ যেন ঘরের সকলের মুখাকৃতিই
লক্ষ্য করে সে । তার নাকের হীরা যেন দ্যাতি ছড়ায় যখন তখন ।
কোমল করপল্লব যেন নেচে বেড়ায় হারমনিয়মের বৃকে ।

টাছাছোলা কণ্ঠ নূরজাহানের । তৈরী গলা । তার দরদ মাখানো
কণ্ঠস্বর শুনতে শুনতে বাবুরা যেন বিমুগ্ধ হয়ে যান ।

বৈশাখের ঝড়ের মত হাওয়ায় নিশীথ রাতের বাদল ধারা ঝরতে
থাকে যেন চন্দনপুরে । শাস্ত স্তিমিত রাত্রির ঘন আঁধার ভেদ ক'রে
গানের সুর কত দূরে ভেসে যায় । সুরের সঙ্গে সঙ্গে ভাসে যুঁই আর
বেলফুলের মাতাল গন্ধ । পান আর জর্দার মিঠেকড়া খোসবয় ।

বাবুদের যেন অবাক ক'রে দিয়েছে বাঈজীর মুখে রবীন্দ্রনাথের গান ।

মতিবিবি চুরিয়ে চুরিয়ে চুপিচুপি বলে,—ঘাবড়াচ্ছিস কেন ! ভয় কি
তোর ! গাইবি তো গলা ছেড়ে ।

মুহূ হেসে নীরব সম্মতি জানালো নূরজাহান । প্রথম লজ্জাটুকু যেন
কিছুতেই দূর হয় না । সঙ্কোচ না সঙ্কট যেন মোচন হয় না আর ।

সামনে আর আশেপাশে যত অচেনা, অজানা মুখ । তাকিয়ে আছে

যেন পলকহীন চাউনীতে। যেন পৃথিবীর আর এক আশ্চর্যের দেখা
মিলেছে। ওদের নাম দু'টি শুনলে চেনা যায় ওরা জাতে মুসলমানী,
কিন্তু সত্যি কি তাই! হিন্দু না মুসলমান কে জানে, দেখায় যেন
আরব-বেহুইনের মত। পশ্চিমের মুসলমান না উত্তরের রাজপুতানী
ঠিক ধরা যায় না। বেহারী না গুজরাটী, মাড়োয়াড়ী না ভাটিয়া
চেনা যায় না যেন এক নাগাড়ে দেখেও।

কবিগুরু যেন এই গানটি কেবল মাত্র নূরজাহান বাঈজীর তরেই
র'চে গেছেন। এমন মিষ্টি আর দরদভরা কণ্ঠে কে আর কবে গেয়েছে
ব্যথাঝরা রোদনভরা এই করুণ গান!

গাইতে গাইতে স্বর কেঁপে কেঁপে ওঠে, শিহরণের মত। যেন
নিজের কথা গানের স্বরে ব'লে চলেছে সে। গাইছে যেন কত বিরহিনীর
মত। কে যেন মনের মাহুয, ঐ নিশীথ রাতের বাদল ধারার মত, না ব'লে
বিদায় নিয়েছে তাকে একা ফেলে। কেঁদে কেঁদে গাইছে যেন
নূরজাহান। ওর সূর্যটানা চোখ দু'টি কি বারেক চিকচিকিয়ে উঠলো!
প্রথম লজ্জাটুকু কাটিয়ে সঙ্কট না সঙ্কোচের বেড়াজাল থেকে নিজেকে
মুক্ত ক'রে নূরজাহান তার তৈরী-সাধা কণ্ঠস্বর যেন সপ্তমে তুলেছে।

সারেঙ্গী চলেছে সঙ্গে। যেন কাঁদছে চাপা কান্না। রাত্রির মৌননীর
আকাশ স্তব্ধ হয়ে শুনছে এই করুণ ক্রন্দন। ফুটফুটে তারাগুলো আর
জল্জল করে না, আভা ঠিকরোয় না,—যেন স্থির হয়ে থাকে।

দুপ দাপ কপাট বন্ধ হয় অন্তরের ঘরে ঘরে। পৃথিবীতে কালারা
কত সুখী! বধির কণ্ঠ কত সুখের!

জানলা আর দুয়ের পড়তে থাকে। যেন ঝড় এসেছে, ঝড় আসছে।

সারেঙ্গীর টানা টানা কাগা শুনে ভাল লাগে এই জ্যোছনার রাতে ।
গুমরে গুমরে, কাতরে কাতরে কাঁদছে যেন হারমনিয়ম । তবলার শব্দ
যেন নয়, কে যেন কাকে ধ'রে অবিরাম মারাধরা করছে ।

জানলা পড়ছে । দরজা পড়ছে । কপাট পড়ছে কারও কারও
ঘরে !

চন্দনপুরের নালা-নর্দমা, মজা-পুকুর, আগাছার জঙ্গল, লতাগুল্মের
ঝোপ, বাঁশবন আর পড়ো-পড়ো ভূতুড়ে চন্দনধামের কোর্টরে-কন্দরে
অন্ধকার যেন গভীরতর এখন । বৈশাখের দমকা হাওয়া কোথা থেকে
যেন অন্ধকার ভাসিয়ে আনছে চন্দনপুরকে একেবারে ঢেকে ফেলতে ।
আলো নেই, শুধু কালো । আলকাতরার মত আঁধার, স্পর্শে লাগে
বুঝি । যেন হাতে ধরা যায় ।

অন্ধরের দালানে দাঁড়িয়ে দাঁড়িয়ে নেহাৎ শিশুর মত, আকাশের
চাঁদকে লক্ষ্য করছিলেন অনঙ্গমোহন । বসতি আছে না কি চন্দ্রলোকে ।
কারা আছে কে জানে ! কেমন আছে !

অনঙ্গমোহনের মুখে জলন্ত চুরুট । অনর্গল ধোঁয়া ছাড়ছেন তিনি ।
বাতাসকে যেন ভারী ক'রে তুলছেন । লোভাতুর দৃষ্টি তাঁর অকেজো
চোখে । ভাবছিলেন, যারাই থাক ঐ চন্দ্রলোক আর মঙ্গলগ্রহে, তারা
অবশ্য অবশ্য স্থখে আর শান্তিতে আছে । জালা আর যন্ত্রণায় ভুগছে না
এই পৃথিবীর বাসিন্দাদের মত । পার্থিব স্থখ বলতে কিছু আর রইলো
না । জমিদার আজ বাদে কাল ফকির হ'তে ব'সেছে । উজীর
থেকে ভূমিহীন বাস্তুহারার দলে যেতে বসেছে । সম্রাটের আভিজাত্য
লোয় লুটোবে । ফকিরদের সঙ্গে সব হারিয়ে ফকিরের মত ফকির
হয়ে থাকতে হবে ! রাজায় প্রজায় ভেদাভেদ রাখবে না কংগ্রেস ।
গতস্ত্রের জয়জয়কার হবে !

